


Text & Pl. 4. 24.




KONUNGA-SÖGUR
 AF
 SNORRA STURLUSYNI.
 TOM. III.



*Templum Cathedralis Nidarosianum extruxit RASTENUS,
 Norvegia ab ann. MCLXI. ad ann. MCLXXXVIII Archiepiscopus.*

HOLMIÆ,
 EXCUD. J. HÖRBERG,
 MDCCCXXIX.

L. M. Holmström



KONUNGA-SÖGUR

AF


SNORRA STURLUSYNI.

Saga af Magnusi Goda.
Saga af Haraldi Hardráða.
Saga af Olafi Kyrra.
Saga af Magnusi Berfætta.
Saga af Sigurdi Jorsalafara,
Eysteini oc Olafi.
Saga af Magnusi Blinda oc
Haraldi Gilla.
Saga af Sigurdi, Inga oc
Eysteini, Haraldssonom.
Saga af Hákonu Herdabreid.
Saga af Magnusi Erlingssyni.

H O L M I Æ.

Excud. *JOH. HÖRBERG,*

MDCCCXXIX.



VIII.

SAGAN AF MAGNUSE GODA.

CAP. I.

AUSTAN-FERD MAGNÚSAR OLAFSSONAR.

Magnús Olafsson byriadi ferd sína eptir Jólin, austan af Hólmgarði, ofan til Aldeigio-borgar; taka þeir at búa skip sín, þegar er ísa leysti um várit. Þess getr Arnor Jarla-skálld í Magnúsdraþo:

Nú hyck riðdanda ráða
róg örs þvfat veitk görva
þegi seimbriotar segia
seggiom hneitis eggia:
varat ellifo allra
ormsetrs hati vetra
hraustr þá er herskip glæsti
Hörda vinr or Gördom.

Enn um várit hellt Magnús austan til Svíþjóðar.
Sva segir Arnorr:

Þíng baud út hinn úngi
egg-riofandi þjódom

sin bar hird at hömlo
 hervædr ara brædis.
 Sallt skar húfi hvelltom
 hraustr þíód konungr austan
 báro brinlogs ríri
 brún vedor at Sigtúnom.

Her segir at Magnús konungr, þá er hann fór austan or Gardaríki, sigldi fyrst med föroneyti síno til Svíþíóðar, oc hellt upp til Sigtúna. Þá var konungr í Svíþíód Önundr Olafsson: þar var þá oc Astrídr drottning, er átt hafði inn helgi Olafr konungr: hon fagnadi forkunnar vel Magnúsi konungi stiúp-syni sínom, oc let þegar stefna fiölmennt þing af Svíóm, þar sem heitir á Haungrom. Enn á þín-gino taladi Astrídr drottning oc sagði sva: her er nú kominn med oss sun hins helga Olafs konungs er Magnús heitir; ætlar hann nú at hefia ferd sína til Noregs, at sækia födorleifd sína; er mer skyllða á mikill at styrkia hann til þessar ferðar, þvíat hann er stiúpson minn, sva sem þat er öllöm mönnum kunnigt bædi Svíóm oc Nordmönnum; skal ec þar öngan lut til spara, þann er ec hefi föng á, at hans styrkr megí sem mestr verða, bædi fe oc fiölmenni þat allt er ec hefi forráð á; sva oc þeir menn allir er til þessar ferðar vilia ráðaz med hönom, skulo eiga heimila mína vinátto fullkomna. Ec vil því oc lysa, at ec skal ráðaz til ferdarinnar med hönom,

man þat þá öllum audsynt, at ec spari eigi adra luti til lidsemdar vid hann, þat er ec má hönom veita. Taladi hon her um langt oc sniallt: enn er hon hætti, þá svörudo margir oc sögdo sva: at Svíar höfdo litla tírar-för farit til Noregs, þá er þeir fylgdo Olafi konungi fedr hans, oc er eigi her betra at ván, er þessi madr er barn at alldri, sögdo þeir, erom ver fyrir þá sök ófúsir þessar ferdar. Astrídr svarar: allir þeir menn, er nockorir hreysti-menn vilia vera, muno eigi ædrazt um slíkt. Enn ef menn hafa látit frændor sína med hinom Helga Olafi konungi, edr siálfir fengit sár, þá er þat drengskapr at fara nú til Noregs oc hefna þess. Kom Astrídr sva ordom sínom oc lidveitzlo, at fiöldi manna vard til þess med henni, at fylgia Magnúsi til Noregs. Þess getr Sighvatr skálld:

Hrein getom hála launa
 hnoss fiöld lidi osso
 Olafs dóttor er átti
 iöfr sigr-hvatastr digri.
 þíng beid herr á Haungrom
 hund margr Svía grundar
 austr er Astríd lysti
 Olafs sonar málom.

Máttit hon við hættna
 heil ráð Svía deila
 meirr þótt Magnús væri
 marg-nenninn sonr hennar.

Olli hon því at allri
 áttleifð Haralds knátti
 mest með máttkom Kristi
 Magnús konungur fagna.

Milldr á mennsko at giallda
 Magnús enn því sögnom
 þat gördi vin virda
 víd-lendan Astridi:
 Hon hefir sva komit sínom
 sönn at fá man önnor
 ord görig drós til dyrdar
 diúp-rád kona stjúpi.

Sva segir Þiódolfr skálld í Magnús-floeki:

Ut redto allvaldr skióta
 eykio dúdiz rá sneckio
 enn þrítog skip þrauta
 þanu tíð í haf skríða.
 Vægdit vendi sveigdom
 vedr ótt of þer drottinn
 hlódo hirdmenn þrúdir
 hún-skript í Sigtúnom.

CAP. II.

FERD MAGNÚSAR OR SVÍÞÍÓÐ.

Magnús hóf ferd sína af Sigtúnom, oc hafði þá lid
 mikit er Svíar höfðo fengit hönom. Þeir fóro fæti
 of Svíþíóð, oc sva til Helsingia-lands. Sva segir Ar-
 norr Jarla skálld:

Raudar bárot randir síðan
 rimmo yggir um Sænskar bygdir
 eigi gatzto lids kost lágan
 landsfólk sótti þer til handa.
 Austan þurdoz úlfa ferðar
 öldom kudr með hvíta skiöldo
 túngo rióðr til tyrar þínga
 teknir menn oc dör in rekno.

Síðan fór Magnús Olafsson austan um Jamtaland oc
 Kiöl, oc kom ofan í Þrándheim, oc tók þar þegar
 allt fólk vel við hönom. Enn þegar er menn Sveins
 Alfifosonar konungs spurdo, at Magnús son Olafs kon-
 ungs var þá í land kominn, þá flydo allir víds ve-
 gar, oc fordudo ser: var þar engi mótstada veitt
 Magnúsi; enn Sveinn konungur var sudr í landi. Sva
 segir Arnorr Jarla-skállld:

Austan komto með allra hæstom
 yggjar mäs i þrænskar bygdir
 fidri-rióðr enn fiand-menn ydra
 fálma qváo ægis hialmi.
 Breidaz visso blágams fædir
 benia kólgo ydrír dólgar
 hræddir urdo súrvi at forða
 fiandmenn þínir vesölld sína.

CAP. III.

MAGNÚS OLAFSSON TIL KONUNGS
TEKINN.

Magnús Olafsson fór með lidi síno út til kaupánga,
 var hönom þar vel fagnat: síðan let hann stefna þar

Eyra-þíng; enn er búanda-fólk kom til þíngs, þá var Magnús til konungs tekinn yfir land allt, sva vídt sem haft hafði Olafur konungr faðir hans. Síðan tók Magnús konungr ser hird, oc görði lenda-menn, skipadi hann þá allt í herödom maunnom í ármenningar oc í syslor. Magnús konungr baud út leidángri þegar um haustit um allan Þrándheim, oc varð hönom þá gott til lids, hellt hann síðan he-rinom sudr med landi.

CAP. IV.

FLÓTTI SVEINS KONUNGS.

Sveinn konungr Alfifoson var þá staddr á Sunn-hörda-landi, er hann spurði her-sögo þessa; let hann þegar skera upp herör, oc senda fiögurra vegna frá ser; stefndi til sín bænda-fólki, oc let þat fylgia, at úti skyldi vera almenningr at lidi oc skipom, oc veria land med hönom. Enn lid þat allt, er þan-nog var næst konungi, sótti á fund hans: átti kon-ungr þá þíng, oc tal vid bændor, oc bar upp eren-di sín, oc sagði sva: at hann villdi hallda til móts vid Magnús konung Olafsson, oc hallda vid hann orrosto, ef bændor vilia fylgia hönom; mællti kon-ungr helldr skamt; bændor gördo lítinn róm at má-li hans. Síðan töludo Danskir höfðingiar, þeir er med konungi voro, langar tölur oc sniallar: enn bæn-

dor svörudo oc töludo ímóti; sögdo margir sva, at þeir villdo fylgia Sveini konungi, oc beriaz med hönom, enn sumir neitudo greidliga; sumir þögdo med öllo; sumir qvodoz mundo leita á fund Magnús konungs, þegar er þeir nædi. Þá svarar Sveinn konungr: sva litz mer, sem her se komit fátt bænda-fólk, þat er ver höfom ord send, enn þessir bændor, er her ero, oc segia siálfom oss, at þeir muni þegar fara á fund Magnús konungs, er þeir mega, þá syniz mer sem allir muni einir til lidsemdar oc hinir, er segia at kyrrir vili sitia; slíkt sama þeir er þegia vid: enn hinir, er segia at oss muni fylgia, þá man sá vera annarrhverr eda fleiri, er oss man ecki tiltak í vera, ef ver leggiom til orróstö vid Magnús konung: er þat mitt ráð, at ver leggiom oss eigi á trúnad bænda þessa; förom helldr þannog er oss er fólk allt tryggt oc trútt, höfom ver þar þá nógan styrk, at vinna undir oss land þetta. Enn þegar er konungr hafdi þenna orskurd veitt, þá fylgdo allir hans menn þesso rádi; snexo þeir þá stöfnom, oc drógo segl sín; sigldi Sveinn konungr þá austr med landi, oc letti eigi fyrr, enn hann kom til Danmarkar: tók Hörda-Knútr allvel vid Sveini bródr sínom. Enn er hann hitti Hörda-Knútr bródr sinn, þá baud hann Sveini konungi, at hafa þar ríki med ser í Danmörko, oc þecktiz Sveinn konungr þat bod.

CAP. V.

FERD MAGNÚSAR KONUNGS YFIR NOREG.

Magnús konungr fór um haustit austr allt til lands-
enda, oc var hann til konungs tekinn of allt land,
oc vard landsfólk allt fegit hans tilkomo.

CAP. VI.

DAUDI KONUNGANNA KNÚTS OC SVEINS
SONAR HANS.

Sveinn konungr Knútsson fór til Danmerkr, oc tók
þar vid ríki med Hörda-Knúti bróðr sínom. Þat
sama haust andadiz Knútr konungr inn Ríki á Eng-
landi, idus Novembris, þá var hann fertugr at all-
dri; hann var iardadr í Vincestr. Þá hafði hann
konungr verit yfir Danmörk XXVII vetor, enn bæði
yfir Danmörk oc Englandi XXIV vetor, enn þar
med Noreg VII vetor. Þá var tekinn til konungs
í Englandi Haralldr son Knútz konungs. Þann sa-
ma vetr andadiz Sveinn konungr Alfifoson í Dan-
mörk. Þíódolfr skállð qvad sva um Magnús konung:

Aur spornadot arnar
ilríóðr af Sviþjódo
herr fylgdi þer harri
hraustr í Noreg austan.
Flyði Sveinn enn síðan
sann-ráðinn frá láði

erlendis let undan

Alfífo son drífa

Biarni Gullbráðraskállð orti um Kálf Arnason:

Hafa lezto únga iöfra

erfd sem til red hverfa

satt er at sitia knátti

Sveinn at Danmörk einni.

Kendot Kálfr til landa

kapp-fúsom Magnúsi

ollo þer at stillir

iörd oc feck or Gördom.

Magnús konungr var þann vetr yfir Noreg, enn Hörda-Knútr yfir Danmörk.

CAP. VII.

FELAG HÖRDA-KNÚTS OC MAGNÚSAR KONUNGA.

Enn eptir um várit baud hvartveggi konunga leidangri út, oc fóro þau ord um, at þeir mundo til orrostó leggja við Elfi: enn er hverrtveggi herinn sótti miök til móts við annan, þá gördó lendirmenn niósnir or hvaro-tveggja lidino til frænda sinna oc vana í annan flokk, oc fylgdi þat ordsendingom hvarratveggio, at menn skyllðo göra fríd milli konunga. Enn fyrir því at konungar voro bádir úngir oc bernskir, þá höfðo aull land-rád fyrir þeim ríkis-menn, þeir er til þess voro teknir í hvarratveggja landi: kom þá sva, at sættarstefna var lögd milli konunga.

Síðan fundoz þeir siálfir, oc var þa rædt um sættir: oc kom þat í sáttmálit, at konungar svördoz í brædra-lag, oc setto frid milli sín, medan beggia þeirra lif endiz: enn ef annarrhvarr þeirra andadiz sonlaus, þá skyldi sá þeirra er lengr lifdi, taka eptir hann land oc þegna. Tólf menn, þeir er ágætaztir voro af hvarra ríki, svördo þar til med konungunom, at þessi sætt skyldi halldaz, medan nockurr þeirra lifdi. Eptir þat skildo konungar, oc fór hvarrtveggi heim í sitt ríki, oc hellz þessi sætt medan þeir lifdo bádir.

CAP. VIII.

FRÁ ÁSTRÍDI DROTTNINGO.

Astrídr drottning, er átt hafdi Olafr hinn helgi konungr, kom í Noreg med Magnúsi konungi, stiúpsyni sínom, sem fyrr var ritat, oc var med hönom í gódo yfirlæti, sem verdugt var. Þá kom oc til hirðarinnar Alfhilldr módir Magnús konungs: tók konungrinn hana þegar med enom mesto kærleikom, oc setti hana veggamliga. Enn Alfhilldi vard, sem mörgom kann verda, þeim er fá ríkdóminn, at henni afladiz eigi seinna metnadrinn; oc kom sva at henni líkadi illa, þat er Astrídr drottning var nockoro meira metin en hon, í sessi eda annari þjóno-sto; villdi Alfhilldr sitia nær konunginom: enn A-

stríðr kalladi Alfhilddi ambátt sína, sva sem fyrr hafði verit, þá er Astríðr var drottning yfir Noregi, þá er Olafur konungur redi landi; villdi Astríðr fyrir eingan mun eiga sess við hana, og máttu þær eigi í eino herbergi vera.

CAP. IX.

FRÁ SIGHVATI SKÁLDDI.

Sighvatr skálld hafði tekit heim-leyfi af Olafi konungi, þá er Olafur konungur fór austr í Gardaríki; enn annat sumar eptir fór Sighvatr af landi, og suðr til Roms, þá er orrosta var á Stiklastödom, þá qvadr hann víso þessa:

Rúms let ec og hellt heiman
hermóðr á för góðri
gjallar vönd þann er gulli
gaf mer konungur vasðan.
Sullt þa er silfri hialltat
sverð dyrt vidir þverðo
lögðom vapn enn vígðom
ver ylgjar staf fylgðom.

Enn of haustit, er Sighvatr var sunnan á leid, spurði hann fall Olafs konungs, var hönom þat hinn mesti harmr; hann qvadr þá:

Stóð ec á Mont og minntumz
mörg hvar sundr brast targa
breið og brynior síðar
borgom nærr of morgin.

Mundak þann er undi
öndurdan brum löndom
fadir minn var þá þenna
þordendr konung fordom.

Sighvatr geck einn dag um þorp nockot, oc heyrði at húsbóndi einhverr veinadi miök, þat er hann hafði mist kono sinnar, bardi á brióstit, oc reif klædi af ser, gret miök, oc sagði, at hann villdi giarna deya. Sighvatr qvad:

Fúss lætz madr er missir
meyar fadms at deya,
keypt er ást ef eptir
oflátinn skal gráta.
Enn fullhuginn fellir
flótt styggr sás ann drottni
vart torrek lítz verra
vigtár konungs árom.

Sighvatr kom heim í Noreg oc til bús síns, hann átti bú oc börn í Þrándheimi; fór hann sunnan fyrir land á byrdingi: enn er þeir láo í Hillarsundi, þá sá þeir hvar hramnar margir flugo. Sighvatr qvad:

Hrafna se ec til Hafnar
hræs minnaz þeir sinna
þar er slaut und nid nytom
Nordmanna skip fordom.
Gialla hátt fyrir Hillar
hvern dag frekir ernir
endr þeir Olafir grendi
innan mörgo sinni.

Enn er Sighvatr kom norðr til kaupánga, þá var þar fyrir Sveinn konungr: baud hann Sighvati til sín at fara, þvíat hann hafði fyrr verit með enom Ríka Knúti konungi fedr hans: Sighvatr sagði, at hann vill fyrst fara heim til bús síns. Þat var einn dag er Sighvatr gekk úti á stræti, oc hann sá hvar konungs menn leko, Sighvatr qvæð:

Geng ec um þvert frá þengils
þróaz ecki mer recka
emk sem bast í brjósti
bleikr verðungar leiki.
Minnumz ec hvar manna
minn drottinn lek sinna
opt á Odals-tóptom
ord-sæll oc ver fordom.

Síðan fór Sighvatr til bús síns. Hann heyrði margna menn á mæla sér, oc segja, at hann hefði laupiz frá Olafi konungi; hann qvæð:

Hafva láti mic heitan
Hvíta krístr at víti
elld ef ec Olaf villdak
em ec skirr um þat firraz.
Vatnærin hefek vitni
vask til Rums í háska
ölld leyni ec því alldri
annarra þau manna.

Sighvatr undi illa heima, hann gekk úti einn dag, oc qvæð:

Há þóttu mer hlæa
hall of Noreg allan

fyr var ec kendr á knörrom
 klif medan Olaf lifdi.
 Nú þickia mer miklo
 mitt stríð er þat hlíðir
 iöfurs falli kann ec illa
 óblíðari síðan.

Sighvatr fór öndurdan vetr austr um Kiöl til Jamta-lands, oc þá til Helsingialands, oc kom fram í Svíþíód, oc fór þegar á fund Astríðar drottningar, oc var med henni lánga ríð í gódom fagnadi. Hann var oc med Önundi konungi bróðor hennar, oc þá af hönom X merkor brendar, sva sem segir í Knúts drápo. Sighvatr spurdi iafnan, er hann fann kaupmenn Hólmgarðs-fara, hvat þeir kynni segia hönom til Magnúsar Olafssonar. Sighvatr qvad:

Enn lystir mic austan
 erot af spörd or Górdom
 frá öðlingi úngom
 opt byriot lof spyria.
 Fretti ec smás, þo at smæstir
 smuglir ástar fuglar
 þinnig hægiunz för flúgi
 fylkis nids á midli.

CAP. X.

FRÁ ÞVÍ ER MAGNÚS KONUNGR KOM FYRST
 Í SVÍÞÍÓÐ.

Enn er Magnús Olafsson kom fyrst til Svíþíóðar or Gardaríki, þá var Sighvatr þar fyrir med Astríði

drottningo, oc urdo þau öll fegin miök. Þá qvad Sighvatr:

Heim sóttir þú hættinn
hönd enn vel mátt löndom
þinn stoda ec sem mönnom
Magnús konungr fagna.
Fora ec vist því at varom
varðr at þer i Garða
skipnaz skíri-nafna
skript þjóð-konungr niptar.

Sighvatr redz síðan í ferdina með Astríði drottningo, oc fylgdi Magnúsi til Noregs. Sighvatr qvad:

Minn hug segik mönnom
Magnús at ec fagna
(Guds lán er þat) þíno
þíng-drífo vel lífi.
Ætti drengia drottinn
dyrdar son er yrði
þjóð mætti fá fæðaz
fedor líkr konung slíkan.

Enn er Magnús var konungr ordinn yfir Noreg, þá fylgdi Sighvatr hönom, oc var hinn kærasti Magnúsi konungi; hann qvad þetta, þá er þær Astríðr drottning oc Alfhilðr konungs módir höfðu skotiz á ordom nockorom:

Astríði lát þú æðri
Alfhilðr enn þic siálfa
þer þótt þinn hagr stórom
(þat villdi Gud) batni.

CAP. XI.

GÖRT SKRÍN OLAFS KONUNGS.

Magnús konungr let göra skríñ, oc búa gulli oc silfri, oc setia steinom: enn skríñ þat var sva gört, bædi at mikilleik oc ödrom vexti sem lík-kista, enn svalir undir nidri; enn yfir uppi vætt sem ræfr vaxit, oc þar af upp höfod oc burst: ero á vættino lamar á bak, enn hespor fyrir, oc þar læst með lukli. Síðan let Magnús konungr leggja í skríñ þat helgan dóm Olafs konungs, oc urdo þar margar iár-tegnir þá at helgom dómi Olafs konungs. Þess getr Sighvatr skáld:

Gört er þeim er gott bar hiarta
gull-skrin at veg sínom
hrósa ec helgi ræsis
hann sótti Guð drottinn.
þar gengr margr frá mæro
meidr þess konungs leidi
hreins með heilar siónir
hríngs er blindr kom þíngat.

Þá var þat í lög tekit, at hallda heilagt um allan Noreg hátíð Olafs konungs: var sá dagr þegar þá sva halldinn, sem hinar stærsto há-tídir. Þess getr Sighvatr:

Oss dugir Olafs messo
Jöfor magnar Guð fagna
meina laust í míno
Magnús fedor húsi.

Skyldr

Skyldr em ec skilfings hallda
 skollaust þess er bió golli
 helgi handar tialgor
 harmdauda mer raudo.

CAP. XII.

FRÁ ÞÓRI HUND.

Þórir Hundr fór þegar af landi brott litlo eptir fall
 Olafs konungs; hann fór allt út til Jórsala, oc er
 þat margra manna sögn, at hann hafi eigi aptrko-
 mit. Sigurdr het son Þóris Hunds, fadír Kannveigar,
 er átti Jon son Arna Arnasonar; þeirra börn voro
 Vidkunnr í Biarkey oc Sigurdr Hundr, Erlingr oc
 Jardþrúdr.

CAP. XIII.

VÍG HÁREKS OR ÞIÓTTO.

Hárekr or Þiótto sat heima at búom sínom, allt
 þar til er Magnús konungr Olafsson kom í land, oc
 hann var konungr ordinn. Þá fór Hárekr sudr til
 Þrándheims á fand Magnúsar konungs. Þá var þar
 med Magnúsi konungi Asmundr Grannkelsson. Enn
 er Hárekr geck upp af skipi, er hann kom til Nid-
 aróss, enn Asmundr stóð í lopt-svölom hiá konun-
 gi, sá þeir Hárek oc kendo. Þá mællti Asmundr
 til konungs: nú vil ec gjalda Háreki dráp födor

míns; hann hafði í hendi breiðöxi litla oc þunn-slegna. Konungr leit til hans oc mælti: haf helldr öxi mína; sú var veggsglegin oc þyck. Enn mælti konungr: ætla sva til, Asmundr, at hörd muni bein í kalli þeim. Asmundr tók öxina, oc geck ofan or gardinom, oc er hann kom ofan á þver-stræti, þá gengo þeir Hárekr, oc hans menn nedan ímót. Asmundr hió í höfod Háreki, sva at þegar stóð öxin í heila nidri, var þat bani Háreks. Enn Asmundr geck upp aptr í gardinn til konungs, oc var öll egginn fallinn or öxinni. Þá mælti konungr: hvernog mundi nú hafa dugat hin þunna öxin, mer syniz sem þessi se nú ónyt. Síðan gaf Magnús konungr Asmundi len oc syslo á Hálogalandi; oc ero þar margar frásagnir oc miklar um skipti þeirra Asmundar oc sona Háreks.

CAP. XIV.

FRÁ ÞÓRGEIR FLECK.

Kálfr Arnason hafði mest landráð með Magnúsi konungi fyrst nockora stund. Enn þá gördoz menn til áminningar við konung, hvar Kálfr hafði verit á Stiklastödom; gördiz Kálfi þá nockoro vandgættra til skaps konungs. Þat bar at eitt sinn þáer fiölmennt var með konungi, oc kærdo menn mál sín, þá kom þar fyrir hann, með sín skyld erendi þor-

geirr Fíeckr af Súlo or Veradal, er nefndr er fyrr í sögo hins Helga Olafs konungs; konungr gaf ecki gaum at ordom hans, oc hlyddi þeim er hönom voro nærri. Þá mællti Þórgeirr til konungs hátt, sva at allir heyrdó þeir er í nánd hanom voro:

Mæl þú við mic,
Magnús konungr,
þvíat í fylgio vark
med fedor þínom;
þá bar ec höggvinn
haus minn þadan,
er þeir of daudan
dögling stigo.
þu elskar
þá arma-þióð
drottins svika
er diöfol hlægdo.

Þá gerdo menn at óhliód; enn sumir bádo Þórgeir útganga: konungr kalladi hann til sín, oc lauk síðan erendom hans, sva at Þórgeiri líkadi vel, oc het hanom vinatto sinni.

CAP. XV.

FERD KÁLFS ÁRNASONAR OR LANDI.

Þat var litlo sídar at Magnús konungr var á veizlo at Haugi í Veradal: enn er konungr sat at matbordom, þá sat á adra hönd hönom Kálfr Arnason, enn á adra hönd Einar Þambarskelfir. Þá var sva

komit, at konungr gerdi fæd á við Kálf, enn virði þá Einar mest. Konungr mællti til Einars: við skolom ríða í dag á Stiklastadi, vil ec síá þar þau merki, er þar hafa orðit. Einar svarar: ecki kann ec þer þar af at segia; lát þú Kálf fara sóstra þinn, hann man þar kunna segia frá tíðindom. Enn er bord voro uppi, þá bióz konungr til ferdar; hann mællti til Kálfs: þú skalt fara með mér á Stiklastadi. Þá svaradi Kálfr: eigi ætla ec þat skyllt. Þá stóð konungr upp, oc mællti helldr reidugliga: fara skaltu Kálfr. Síðan geck konungr út. Kálfr klæddiz skiótt oc mællti til skósveins síns: þú skalt ríða inn á Eggio, oc bidia húskarla mína at hafa hvert fat á skipi fyrir sólar-fall. Magnús konungr reid á Stiklastadi, oc Kálfr með hönom, stigo af hestom, oc gengo þar til sem bardaginn hafði verit. Þá mællti konungr til Kálfs: hvar er sá stadr er konungrinn fell? Kálfr svarar, oc retti fram spiótskaptit: her lá hann fallinn, sagði hann. Konungr mællti: hvar vartú þá Kálfr? hann svaradi: her sem nú stend ec; konungrinn mællti, oc var þá raudr sem dreyri: taka mundi þá öxi þín til hans. Kálfr svarar: ecki tók öxi mín til hans; geck hann þá í brott, oc til hests síns, lióp á bak oc reid leid sína, oc allir hans menn; enn konungr reid aptr til Haugs. Kálfr letti eigi ferðinni fyrr enn hann kom um qvellðit inn á Eggio; var skip hans búit fyrir landi,

oc ákomit lausa-fe allt, oc skipat húskörlom hans; helldo þeir þegar um nóttina út eptir firði, fór Kálfr síðan dag oc nótt sva sem hyri gaf; sigldi hann þá vestr um haf, oc dvaldiz þar lengi, heriadi um Irland, oc Skotland oc Sudr-cyar. Þessa getr Biarni Gullbrár-skálld í Kálfsflocki:

þer frá ec þórbergs hlyri
þess gerdoz er verdir
hellit því unz hann of spillti
Harallds bróðorson góðan.
Vökdo öfundmenn yckar
idula rog á midli
öþörf lítz mer arfa
Olafs í þeim málom

CAP. XVI.

UM HEITAN BÆNDA.

Magnús konungr kastadi sinni eign á Viggio, er Hrótr hafði átt, oc Qviststadi er Þórgeir hafði átt, svo oc á Eggio, oc allt þat fe er Kálfr hafði eptir átt, oc margar adrar stóreignir let hann falla í konungsgard, er þeir höfðu átt er fallit höfðu á Stiklastödom í bónda-lidi; hann gerdi oc vid marga þá menn stórar refsingar, er mestan mótgang höfðu veitt Olafi konungi: suma rak hann or laudi, enn af sumom tók hann stór-fe, fyri sumom let hann bú höggva. Þá tóko bændor at göra kurr, oc mællto sín í milli: hvat mun konungr þessi fyrirætla, er

hann brytr' lög á oss, þau er setti Hákon konungur enn Gódi? man hann eigi þat, at ver höfom iafnan eigi þolat vanrettit? man hann hafa farar födor síns, edr annarra höfðingia þeirra er ver höfom af lífi tekit þá er oss leiddiz ofsi þeirra oc lögleysa. Þessi kurr var víða í landi. Sygnir höfdo lidsafnat, oc var þat ord á, at þeir mundo hallda til bardaga vid Magnús konung, ef hann færi inn í fiördinn. Magnús konungur var þá á Hördalandi, oc hafði þar dvaliz miök lengi, oc hafði lid mikit, oc let sem þá oc þá mundi hann fara norðr í Sogn. Þessa urdo varir vinir konungs, oc gengo XII menn á mál-stefno, oc samdziz þat med þeim at luta til einn mann, at segia konungi þenna kurr: enn sva var tilstillt, at Sighvatr skálld hlaut.

CAP. XVII.

BERSÖGLIS VÍSOR.

Sighvatr orti þá flokk þann er hann kalladi Bersöglis vísor, oc hefir hann fyrst of þat, at þeim þótti konungur velkia ofmiöc ráðin, at setia bændor aptr, þá er heitudoz at reisa ófrid móti hönom; hann qvad:

Fregn ec at sudr med Sygnom
Sighvatr hefir gram lattan
fólk orrosto at fresta
ferr ef þó skulom beriaz.

Förom í vörn og veriom
 vel tvíst konung lystir
 hve lengi skal hríngom
 hans grund til þess fundar.

I því sama qvæði ero þessar vísar:

Het sá er fell á Fitiom
 siölgegn og red hegna
 heiptar rán enn hánom
 Hákon firar unno;
 þiód hellt fast á fostra
 siölblíds lögom síðan
 enn ero af því er minnir
 Adalsteins búendor seinir.

Rett hygg ec kísa knatto
 Karlólk og sva Jarlar
 af því at eignom lofða
 Olafar fríd gáfo.
 Harallds arfi let halldaz
 hvar dyggr og son Tryggva
 lög þau er lydir þágo
 lauk-iöfn at þeim nöfnom.

Skolot rádgiafar reidaz
 rydr þat konungr ydrir
 drottins ord til dyrdar
 Döglíngr víð bersögli.
 hafa qvedaz lög (nema líúgi
 landherr) búendr verri
 endr í Ulfasundom
 önnor enn þú hetz mönnom.

Hverr eggjar þic harri
 heiptar stránger at gánga
 opt reynir þú þínom
 þínn stál á bak málom.
 Fastordr skyli fínda
 fengsæll vera þengill;
 hæfir heit at riúfa
 hialldr mögnudr þer alldri.

Hverr eggjar þic höggva
 hialldr-gegnir bú þegna
 of rausn er þat iöfri
 innanlands at vinna.
 Engr hafdi sva úngom
 ádr bragningi ráðit
 rán hygg ec reckom þínom
 reidr er herr konungr leidaz.

Giallto varhuga veltar
 vidr þeim er nú ferr hedra
 þjófs skal hönd í hófi
 hólða qvitt of stytta.
 Vinn ec varmra benia
 varnad enn bydc hlydit
 tár mutaris teitir
 til hvat búmenn vilia.

Hætt er þat er allir ætlaz
 ádr skal við því ráða
 hárir menn er ec heyri
 hót skiöldungi at móti.
 Greypt er þat höfdom hnepta
 helldr oc nidr í fellda;

slegit hefir þögn á þegna
þing menn nösom stínga.

Eitt er mál þat er mæla
minn drottinn leggr sína
eign á odöl þegna
öfgaz búendr göfgir.
Rán mun seggr er sína
selr út í því telia
flaums at felli dómi
föðorleifd konungs reidi.

Oc er þessi síðarst:

Seyni Olafs bíð ec snúdar
(síd qveda aptans bíða
óframs sök) meðal ockar
allt er háligt sva mála.
Erom Magnús ver vegnir
villda ec med þer milldom
Haralds vardar þú hiörvi
heyck æ lifa oc deya.

Þvílík kenningarord voro í kvæði vid konunginn, at hann skyldi hafa lög þau er fadir hans hafði sett. Eptir þessa áminning skipaðiz konungr vel vid; slutto margir adrir oc þessa rædo fyrir konungi. Kom þá sva at konungr átti tal vid hina vitrosto menn, oc sömdo þeir þá lög sín. Síðan let Magnus konungr rita lög-bók þá er enn er í Þrándheimi, oc köllot er Grágás. Magnús konungr gerdiz síðan vinsæll oc ástsæll öllu landsfólki; var hann fyri þá sök kalladr Magnús inn Gódi.

CAP. XVIII.

FRÁ ENGLA KONUNGOM.

Haralldr Engla konungr andadiz V vetrom eptir andlát Knúts ins Ríka födur síns; hann var iardadr hiá födur sínom í Vincestor. Eptir andlát hans tók konungdóm í Englandi Hörda-Knútr bródir hans, annar son gamla Knúts: hann var þá konungr bæði yfir Englandi oc Danavellði; red hann því ríki II vetr; hann varð sóttlausr á Englandi, oc andadiz hann barnlaus, oc er iardadr í Vincestr hiá fedr sínom. Eptir andlát hans var til konungs tekinn á Englandi, Játvarðr inn Gódi son Adalráðs Engla konungs oc Emmo drottningar, dóttur Ríkardar Rúdo-Jarlís. Játvarðr konungr enn Gódi var bródir sammædra Harallds oc Hörda-Knúts sona Gamla Knúts. Gunnhilldr het dóttir Gamla Knúts oc Emmo drottningar, hon var gípt Heinreki Keisara í Saxlandi; hann var kalladr Heinrekr hinn milldi. Gunnhilldr var III vetor í Saxlandi áðr hon tók sótt, oc andadiz V vetrum eptir andlát Gamla Knúts konungs födur síns.

CAP. XIX.

FRÁ MAGNÚSI KONUNGI ÓLAFSSYNI.

Magnús konungr Olafsson spurði andlát Hörda-Knúts; þá sendi hann þegar menn sína suðr til

Danmerkr, oc gördi með þeim ordsendingar til þeirra manna, er víð hann höfðu sverdögum bundiz, þá er sætt þeirra oc einkamál voro gör Magnúss oc Hörða-Knútz konungs, oc minnti þá á ord sín, let þat oc fylgia ályctar ord, at hann sialfr mundi koma þegar um sumarit til Danmerkr með lidi síno, oc eignaz allt Danavellði, sva sem stódo til einkamál oc sverdagar, eða falla þar í orrosto með her sínom. Sva segir Arnor Jarla-scáld.

Afkárlig varð Jarla
ord-gnótt sú er hlaut Drottinn
fylgdi efnd því er ylgjar
ánger tælir red mæla.
At framm í gny grimmum
grafnings und kló hrafni
fúss lezt falla ræsir
feigr edr Danmörk eiga.

CAP. XX.

FRÁ LIDI MAGNÚSAR KONUNGS.

Síðan safnadi Magnús konungr lidi miclo, stefndi til sín öllum lendom mönnom oc rícom bændom, afladi ser lánscipa. Enn er lid þat com saman, þá var þat it frídazta, oc allvel búit. Hann hafði LXX stór-scipa, er hann sigldi af Noreg: Sva segir Þiódolfr Skáld.

Díarft neyttir þú Drottinn
dólg-stránger scipa lángra

af því at ytar höfdo
 austr siötigi flausta.
 Sudr gnaududo súdír
 segl hund vid stög rundo
 vik fal vand-laung eyki
 Vísundi þröm sveigdom.

Her getr oc þess, at Magnús konungr hafði þá Vísund enn micla, er Olafr hinn Helgi konungr fadir hans hafði giöra látit; hann var meir enn þritogr at rúma tali, var á framstafui vísundar-höfud mikil, enn aptr spódr, var höfudit oc spódrinn oc svírarnir bádir allt gullagt. Þess getr Arnor Jarla-scáld:

Liótu dreif á lypting utan
 lödri bifdiz gullit rauda
 fastligr hneigdi furo glæstri
 fyrir garmr of skeidar styri.
 Stírdum helltu um Stafangr nordan
 stálum bifdoz fyrir álar
 uppi glódo el-mars typpi
 elldi glík í Danavelli.

Magnús konungr sigldi út af Ögdom oc yfir til Jótlands. Sva segir Arnorr:

Segia man ec hve Sygna
 snarfengan bar þengil
 hallr oc hrími sóllinn
 hlebords Vísundr nordan.
 Setti biódr at breido
 bryn-þings setil stínga

fús tók ölld við æsi
Jótlendi gramr branda.

CAP. XXI.

UM KVOMO MAGNÚS KONUNGS TIL DAN-
MERKUR.

Enn er Magnús konungr kom til Danmerkr, var hönom þar vel fagnat; átti hann þar brátt þing og stefnur við landsmenn, og beiddi þá vidrtöko ser, svo sem einkamál þeirra voro til. Enn fyrir því at lands-höfðingar þeir er ágætastir voro í Danmörko, voro eidbundnir við Magnús konung, og villdo halda ord sín og eida, þá flutto þeir þetta mál miðc fyrir fólcino: þat bar og annat til, at þá var og andadr Knútr inn ríki, og dautt allt hans afkvæmi: hinn inn þridi hlutr, at þá var alkunnig ordin helgi Olafs konungs födur hans, of öll lönd, og iartegna-gjörd hans.

CAP. XXII.

MAGNÚS ÓLAFSSON TIL KONUNGS TEKINN
YFIR DANMÖRK.

Síðan let Magnús konungr stefna Vebiargaþing; þar skyldo Danir ser konung kíósa, bædi at forno og nýo. Enn á því þingi tóko Danir Magnús Olafsson til konungs yfir allt Danavellði. Dvaldiz Mag-

nús konungr í Danmörko lengi um sumarit, oc fagnadi allt fólk hönom vel, hvar sem hann kom, oc veitto hönom hlydni: skipadi hann þá um allt land syslor oc heröd, oc veitti veizlor ríkismönnum. Enn er álcid haustit, hellt hann lidi síno til Noregs, hann dvaldiz í Elfiuni nockora ríd,

CAP. XXIII.

UPPHAF SVEINS ÚLFSSONAR.

Sveinn er madr nefndr son Ulfis Jarls Þórgilssonar Sprakaleggs: módir Sveins var Astrídr dóttir Sveíns konungs Tiúgoskeggs: hon var systir Knúts ens Ríka samfedra, enn hon var sammædra vid Olaf Svíakonung Eiríksson; var módir þeirra Sigrídr drottning en Stórráda, dóttir Sköglar-Tosta. Sveinn Ulfsson hafdi þá dvaliz lánga ríd med Svíakonungom frændom sínom, iafnan sídan er Knútr konungr let drepa Ulf Jarl födur hans, sva sem ritat er í Sögo Knúts konungs Gamla, at hann let drepa Ulf Jarl mág sinn í Roiskelldu; var Sveinn fyrri þá sök eigi í Danmörk sídan. Sveinn Ulfsson var allra manna frídastr synom, manna var hann mestr oc sterkastr, oc hinn mesti íþróttamadr, oc snilldar-madr: þat var allra manna mál þeirra er hann var kunnigr, at hann hefði alla luti til, þá er pryda góðan höfðingia. Sveinn Ulfsson kom á fund Magnúss kon-

ungs Olafssonar, þá er hann lá í Elfinni, sva sem ádr er ritat; tók konungriinn vel við hönom, voro þar oc margir flutnings-menn til þess, þviat Sveinn var hinn vinsælasti madr, tiádi hann oc siálfr sitt mál fyrir konungi fagrt oc sniallt, oc kom sva at Sveinn geck til handa Magnúsi konungi, oc gördiz hans madr. Sídan töludo þeir Magnús konungr oc Sveinn marga luti í einmælom.

CAP. XXIV.

SVEINN ÚLFSSON TÓK JARLDÓM.

Einn dag þá er Magnús konungr sat í háseti, oc var fiölmennt um hann, sat Sveinn Ulfsson á fót-skörinni midri fyrir konunginom; þá tók konungr til máls: kunnigt vil ec göra höfðingiom oc allri alþydo þá ráða-gjörd, er ec vil vera láta: her er kominn til mín ágætr madr bædiz at ættom oc af siálfom ser, Sveinn Ulfsson; hefir hann nú görz minn madr, oc sellt mer til þess trú sína: enn sva sem þer vitit, at allir Danir í sumar hafa görz mínir menn, þá er nú landit höfðingialaust, er ec em á brott farinn, enn þar er, sem þer vitit, miöc herscátt af Vindom oc Kurom, eda ödrom austr-vegs mönnom, cda sva af Söxom; het ec þeim at fá höfðingia, þar til landvarnar oc landstiórnar: se ec þar öngan mann iamvel tilfallinn fyrir allra luta

sakir, sem Sveinn Ulfsson, hefir hann ætt til þess at vera höfðingi: nú mun ec giöra hann Jarl minn, oc fá hönom í hendur Danavelli til yfirsóknar, medan ec em í Noregi, sva sem Knútr enn Ríki setti Ulf Jarl födur hans höfðingia yfir Danmörk, þá er Knútr var á Englandi. Þá svaradi Einar Þambar-skelfir: ofjarl, ofjarl, föstri. Konungrinn mælti þá reidugliga: fátt þykir ydr ec kunna fyrir mer: enn mer lítz sva sem ydr þyki sumt of-jarlar, enn sumt ecki at mönnom. Þá stóð konungrinn upp, oc tók sverd, oc festi á linda Sveini; síðan tók hann skiöld, oc festi á öxl hönom, setti síðan hialm á höfut hönom, oc gaf hönom Jarlsnafn, oc veitzlor slícar í Danmörk, sem ádr hafði þar haft Ulf Jarl fadir hans. Síðan var framm borit skrin med helgom dómom, lagdi Sveinn þar á hendor sínar, oc svardi trúnadar-eida Magnúsi konungi: síðan leiddi konungrinn Jarl til hásetis med ser. Sva segir Þiódolfr:

Siálfr var austr vid Elfi
 Ulf's mögr oc het fögro,
 þar red Sveinn at sveria
 sínar hendor á skríni.
 Red Olafs sonr eidom
 átt hafa þeirra sáttir
 scemra alldr enn scyllði
 Skánunga gramr hánom.

Fór

Fór þá Sveinn Jarl til Danmerkr, oc var þar við hönom vel tekit af allri alþýdo: tók hann ser þá hird, oc gerdiz brátt höfðingi mikill: fór hann um vetrinn víða yfir landit, oc vingadiz miðc við stórmenni, var hann oc vinsæll af öllu landzfólki.

CAP. XXV.

HERNADR MAGNÚSAR KONUNGS.

Magnús konungr hellt lidi síno norðr í Noreg, oc dvaldiz þar um vetrinn. Enn er vár kom, þá hafði Magnús konungr úti lid mikit, oc hellt því sudr til Danmerkr: Enn er hann com þar, spurdi hann þau tíðindi af Vindlandi, at Vindor höfðu horfit undan lydni við hann í Jómsborg; þar höfðu Danakonungar fyr haft Jarls-riki mikit, hófu þeir Jómsborg at upphafi, oc var þat orðit allstyrkt vígi. Enn er Magnús konungr heyrði slíkt sagt, þá bauð hann út af Danmörk skipaher, oc lidi miclo, oc hellt um sumarit til Vindlands með allan herinn, oc hafði lid allmikil. Þess getr Arnor Jarla-scáld:

Heyra scaltt hve herskiöld-bárut
hilmis kundr til Vinda grundar
heppinn dróttu af blunni slettum
helog bord í stefia meli.
Alldri frák en vísi valldit
Vinda sorg at döglingr spendi
flaustom var þá flód of ristit
fleiri scip til Odals þeirra.

Enn er Magnús konungr kom til Vindlands, þá lagði hann til Jómsborgar, oc vann þegar borgina, oc drap þar mart fólk, enn brendi borg oc landit víða út í frá, oc gördi et mesti hervirki, sva sem segir Arnor Jarla-scáld:

Skiöldungr fórt þá um óþjóð elldi
 audit var þá flotnom dauda
 hæstan kyndot hlenna þrystir
 hyriar lióma sudr at Jómi.
 Hvergi þordi hallir varda
 heidit fólk í virki breido
 budlúngr unnot borgar mönnom
 biörtom elldi stalldræp hiërto.

Mikit fólk á Vindlandi geck til handa Magnúsi konungi, enu miklo var hitt fleira þó, er undan komz, oc flyði víðs vegar. Fór Magnús konungr þá aptr til Danmerkr, oc bió ser þar þá til vetrsetu, enn sendi frá ser herinn bædi þann inn Danska, oc mart lid þat, er hönom hafði fylgt af Noregi.

CAP. XXVI.

GEFIT SVEINI KONUNGS-NAFN.

Enn sama vetr er Sveinn Ulfsson hafði fengit yfir-sókn of allt Danavellði, oc hann hafði vingaz við allmargt stórmenni í Danmörku, oc fengit alþydo lof, þá let hann gefa ser konungs-nafn; oc hūfo at því ráði margir höfðingiar. Enn um várit er hann

spurdi at Magnús konungr fór nordan or Noregi, oc hafði herr mikinn, þá fór Sveinn til Skáneyar, oc þaðan upp á Gautland, oc sva til Svíþíódar, á fund Önundar konungs frænda síns, oc dvaldiz þar um sumarit, oc hafði niósnir út í Danmörk um ferdir Magnús konungs oc fiölmenni hans. Enn er Sveinn spurdi at Magnús konungr hafði látit frá ser mikinn luta lids síns, oc sva þat, at hann var þá sudr á Jotlandi, þá reid Sveinn ofan af Svíþíód, oc hafði lid mikit er Svíakonungr hafði fengit hönom. Enn er Sveinn kom út í Scáney, þá tóco Scánungar vel vit hönom, oc helldo hann þar fyrir konung, dreif þá lid mikit til hans. Sídan fór hann út í Sæland, oc var þar vel vid hönom tckit, lagdi hann þar allt undir sic. Þá fór hann á Fíón, oc lagdi undir sic allar eyar, oc geck fólkit undir hann, oc hafði Sveinn þá her mikinn oc margt skipa. Magnús konungr gipti Ulfhilddi Olafsdóttur, systur sína, Otto Hertuga í Saxlandi: Magnús het son þeirra: þaðan er komin ætt mikit; Hertogar þeir er rádit hafa Brúnsvík telia sva sitt kyn til Olafs hins Helga.

CAP. XXVII.

FRÁ HER MAGNÚS KONUNGS.

Magnús konungr spurdi þessi tíðindi, oc þat med at Vindor höfdo her úti. Síðan stefndi Magnús konungr lidi til sín, oc dróz hönom brátt herr um allt Jótland. Þá kom oc til hans Otto Hertogi af Saxlandi or Brúnsvík; hann átti þá Ulfhildi Olafs dóttur konungs ens Helga, systor Magnús konungs; Hertoginn hafdi micla sveit manna. Dana höfðingiar eggjodo Magnús konung at fara móti Vindaherinom, oc láta ecki heidit fólk ganga þar yfir land oc eyða: oc var þat ráð tekit, at konungrinn snyr her sínom sudr á leid til Heidabæar. Enn er Magnús konungr lá vid Scotborgar-á á Hlyrscógs heidi, þá kom hönom niósn af her Vinda, oc þat med at þeir höfdo sva mikinn mannfjölda, at eigi feck tölo ákomit, oc Magnús konungr hafdi lítinn lut vid fiölmennis, oc hönom væri sá einn til at flyia undan: enn konungr villdi þó beriaz, ef mönom þætti nockur fong á því at þeir mætti sigraz: enn flestir lötto at beriaz, oc sögdo allir eitt frá, at þeir visso til sanns, at Vindor höfdo oflyanda her: enn Otta Hertogi fysti helldr at beriaz. Let konungr þá blása saman öllom herinom, oc let alla menn herklædaz, oc lágo þeir um nóttina undir sciölldom sínom, þvíat þeim var sagt, at herr Vin-

da var þá kominn nær þeim, oc var konungr allhugsíúkr; þótti hönöm illt ef hann scylldi flyia verða, at hann hafði þat alldri reynt, svaf hann lítt um nóttina, oc saung bæner sínar.

CAP. XXVIII.

IARTEGN ÓLAFS KONUNGS.

Eptir um daginn var Michialsmesso aptan; enn er komit var at degi, þá sofnadi konungr oc dreyndi, at hann sá hinn helga Olaf konung, födur sinn, oc hann mælti við hann: ertu nú miðc hugsíúcr oc óttafullr, er Vindor fara móti þer með her mikinn; ecki scaltu ræðaz heidingia þótt þeir se margir saman, ec man fylgia þer í orrosto þessi: ráði þer þá til bardaga við Vindor, er þer heyrir lúdr minn. Enn er konungr vaknadi, þá sagði hann mönnum draum sinn, tók þá oc at lysa af degi: þá heyrði allt fólk í lopt upp kluckna-hliód, oc kendo Magnús konungs menn þeir er verit höfðo í Nidaróse, at sva þótti sem Glöð væri ríngt; þá klucko hafði Olafr konungr gefit til Clemenskirkio í kaupangi í Nidarósi.

CAP. XXIX.

ORROSTA Á HLYRSCOGS HEIDI.

Þá stóð upp Magnús konungr, oc bad at blása scylldi herblástr: fór þá Vinda herinn sunnan yfir ána at

þeim: lióp þá upp allr konungs herinn, oc stefndi móti heidingiom. Magnús konungr steypiti af ser hringa-bryniunni, oc hafði ytzta rauda silkiskyrto, oc tók í hönd ser öxina Hel, er átt hafði Olafr konungr: Magnús konungr rann fyrir öllum sínom mönnom móti herinom, oc hió þegar tveim höndom hvern mann at ödrom. Sva segir Arnorr Jarlascáld:

Od med öxi breida
 ódæsinn framm ræsirr,
 varð um hilmí Hörða
 hiör dynr er varp brynio.
 Þá er of skapt enn skipti
 skapvörðr himíns iördo
 Hel klauf hausa fölvá
 hendor tvær iöfurr spendi.

Orrosta þessi var ecki all-löng; voro konungsmenn hinir áköfusto. Enn hvar sem þeir komo saman, fello Vindor, sva þyekt sem unn-varp lægi: enn þeir er sídarr stódo sneroz á flóttá, oc voro þeir þá höggvnr níðr sem búfe: rak konungr siálfr flottann austr yfir heidina, oc fell fólkít um alla heidina. Sva segir Þiódolfr:

Hyck í hundrads floeki
 Haralds bróður-sun stódo
 hrafn vissi ser hvassast
 hungur bann framast manna.
 Vítt lá Vinda flótti
 varð þá er Magnús bardiz

höggvinn valr at hylia
heidi rastar breida.

Þat er alþydo mál, at ecki mannfall hafi ordit iasnmikit á Nordr-löndum í kristnom sid, sem þat er vard á Hlyrskógs heidi af Vindum: Enn af lidi Magnús konungs fell eigi mart, enn fiöldi vard sárt. Sva segir í Brimabók, at Rettibur Vinda-konungr var drepinn af Dönom: hann átti átta sono, þeir vildo hefna födur síns, oc eyddo mikinn lut af Danmörk nordr til Rípa, oc fello þeir allir á Hlyrscógs heidi fyrir Magnúsi Góða, oc XV þúsundir manna med þeim. Eptir orrosto þessa let konungr binda sár sinna manna, enn lækna voro eigi sva margir í herinom sem med þyrsti; þá geck konungrinn til, oc þreifadi um hendur þeirra manna er hönom syndiz: enn er hann tók í lófana oc strauk um, þá nefndi hann til XII menn þá er hönom syndiz sem miúkhendir mundo vera, oc sagdi at þeir scylldo binda sár manna, enn eingi þeirra hafdi fyrr sár bundit; enn allir þessir urdo hinir mesto lækna síðan. Þar voro tveir Islenskir menn, var aunar Þórkell son Geira af Lyngum, annar Atli fadir Bardar Svarta or Selárdal, oc komo frá þeim margir lækna síðan oc gódir. Eptir þessa orrosto vard miöc frægt víða um lönd iartegn sú er gert hafdi hinn helgi Olafr konungr; oc var þat alþydo mál, at engi madr mundi beriaz þurfa við Magnús kon-

ung Olafsson, oc Olafr konungr fadir hans væri
hönom sva náqvæmr, at óvinir hans mættu önga
mótstödo veita hönom fyri þá sök.

CAP. XXX.

ORROSTA Á RE.

Magnús konungr sneri þegar herinom móti Sveini,
er hann kalladi Iarl sinn, þótt Danir kölludo hann
Konung: red Magnús konungr ser þá til skipa, oc
bió herinn: fiölmento þá hvarirtveggio sem mest.
Varo þar margir höfðingar í lidi Sveins konungs,
Skánungar, Hallendingar, Siálendingar, Fíónbúar:
enn Magnús konungr hafdi mest Nordmenn oc Ióta,
bellt hann þá lidi síno til móts við Svein: Vard
fundr þeirra fyrir Vestrlandi á Re, vard þar or-
rosta mikil, oc lauc sva, at Magnús konungr hafdi
sigr, enn Sveinn kom á flóttu, oc let lid mikit, oc
flydi hann þá aptr á Scáni, þvíat hann átti hæli
uppi á Gautland, ef hann þyrfti til at taka. Enn
Magnús konungr fór þá aptr til Iótlands, oc sat þar
um vetrinn fiölmennr, oc hafdi gæzlo á scipom sí-
nom. Þessa getr Arnor Iarlascáld:

Fús let á Re ræsir
ramm þíng háit glamma
Valsca raud fyrir vído
Vestlandi gramr branda.

CAP. XXXI.

ORROSTA Í AROSE.

Sveinn Ulfsson fór þegar á scip sín, er hann spurdi at Magnús konungr var genginn af scipom: dró þá Sveinn þegar lid mikit at ser, allt þat er hann feck, oc fór þá um vetrinn um Siáland oc Fíón, oc um eyar; oc er dró at Íólum, hellt hann sudr til Íótlands, oc lagdi til Limafiardar, oc geck þar mart fólk undir hann, enn hann tók giöllt af sumom; sumir fóro á fund Magnús konungs. Enn er hann spurdi hvat Sveinn hafðiz at, þá fór hann til skipa sinna, oc hafði med ser Nordmannalid þat, er þá var í Danmörku, enn sumt Dana-lid, hellt þá sunnan fyrir land. Sveinn var þá í Arósi, oc hafði mieit lid: enn er hann spurdi til Magnús konungs, þá lagdi hann síno lidi or bænom, oc bióz til orrosto. Enn er Magnús konungr hafði spurt hvar Sveinn var, oc hann vissi at þat mundi vera skamt milli þeirra, þá átti hann hús-þing oc taldi fyrir lidi síno, oc sagði svo: Nú höfom ver spurt, at Iarl med lidi síno mun her liggia fyrir oss, er mer sva sagt, at þeir hafi lid mikit: nú vil ec göra ydr kunnigt of ætlan mína; vil ec leggja til fundar vid Iarl oc beriaz vid hann, þó at ver höfom lid nokoro færra: munom ver traust vart eiga enn sem fyrr, þar sem Gud siálfr er, oc hinn helgi Olafr

konungr fadir minn, hefir hann oss oc nockrom sinnom fyrr sigr gefit, þá er ver höfom bariz, oc höfom ver opt haft lid minna enn óvinir varir. Nú vil ec at menn búiz sva vid, at ver sculom leita þeirra, oc þegar er fund varn ber saman, þá sculo menn at róa, oc taka þegar til bardaga, veri þá búnir allir mínir menn at beriaz. Síðan herklædduz þeir, oc bioggo hvarir sic oc sitt rúm, tóko síðan ródr, oc röro fram þar til er þeir sá lid Iarls, greiddo þegar atródrinn. Enn er Sveins menn sá herinn, vapnodoz þeir, oc tengdo saman scip sín, tóks þá þegar orrosta hörd. Sva segir Þíódolfr scáld:

Lögdo glædis glóða
gramr oc Iarl fyrir skammo
þar kwam bitr á börva
brand-leikr saman randir.
Sva at man þínga mundot
merkendr Hedins serkiar
(herr náði gny görva
geirs) orrosto meiri.

Þeir hörduz um stafna, oc mátto þeir einir höggom vid koma er í stafni voro, enn þeir lögdo kesiom er í fyrir-rúmi voro, enn allir þeir er aptar voro, skutu sneri-spiótom eda gasflokom eda víg-örom, enn sumir hördo grióti eda skepti-flettom, enn þeir er fyrir aptan siglo voro, skutu bóga-skotom. Sva segir Þíódolfr:

Scotit frác skepti-flettom
 sciótt oc mörgo spióti
 brád feck hramn er hádo
 hialldr á breida skialldo.
 Neytto mest sem máttu
 menn at vapna senno
 bauðs enn bardir lágo
 börvar grióts oc örva.

Bárot böslar fleiri
 bogmenn at hör tognum
 mundit þann dag þrændi
 þreyta fyrr at sceytom.
 Sva þyct flugo sídan
 snæri dörr of skærur
 (ótt var ördrif látit)
 illa satto á milli.

Her segir þat, hvat áköf var skot-hríðin. Magnús konungr var öndverda orrosto fyrst í scialld-borg: enn er hönom þótti seint á orkaz, þá lióp hann framm or scialld-borginni, oc framm eptir skipino, kalladi hátt oc eggiadi menn sína, oc geck allt framm í stafninn í högg-orrosto: enn er þat sá hans menn, þá knúdoz þeir vel fram oc eggiadi hver annan: var þá kall mikit of allan herinn. Sva segir Þíódolfr:

Miöc bad Magnúss recka
 mannr röskliga annan
 hörd þrifuz bord þar börduz
 böð-sky framarr knya.

Gördiz þá en ákafasta orrosta: í þeirri sókn hrauds

skip Sveins framan um stafninn oc söxin: þá geck Magnús konungr med sína sveit upp á skip Sveins, oc síðan hvern at ödrom hans manna; gördó þeir þá sva harda atgöngo, at Sveins menn hrucko fyrir, oc hraud Magnús konungr þat skip, oc síðan hvert skip at ödro. Flydi þá Sveinn oc mikill luti hans manna; enn fiöldi fell lids hans, mart feck oc grid. Sva segir Þiódolfr:

Vördr geck meirr at mordi
 Magnús kialar vagna
 þat var frægt í fagran
 framstafn varar hramni.
 Gördom þar sva at þverdi
 þengils enn vox gengi:
 skeidr nam herr at hróða
 húskarla lid Iarli.

Adr svanfollðar selldi
 Sól rírandi inn dyri
 Iarls lá ferd á ferli
 fiör grid stöfom hiörva.

Þessi orrosta var Drottins-dag hinn næsta fyrir Iól.
 Sva segir Þiódolfr:

Röm var hilldr sú er hramma
 hard jels vidir bardoz
 herr geck snart at snerro
 sunnudag of unnin.
 Flaut þá er feigir leto
 fiör gny stafir hiörva
 Þiód söck nidr af nödom
 nárr á hverri báro.

Magnús konungr tók þar VII skip af Sveins mönnum. Sva segir Þíódolfr:

Hraud Olafs mögr áðan
 löfurr vá sigr ens Digra
 fregnat slíkt or Sogni
 síau skip konor hnipnar.

Oc enn qvad hann:

Mist hafa Sveins oc sinna
 sverd gautar föronauta
 hörd er helldr of ordin
 heim kvamo för beima
 hrærir hausa þeirra
 hreggi æst oc leggi
 (siár þytr auds of árom)
 unnr á sanda grunni.

Sveinn flydi þegar um nóttina til Siálands, með þat lid er undan hafði komiz, oc hönom villdi fylgia: enn Magnús konungr lagði at landi skip sín, oc let þegar um nóttina lid sitt fara á land; enn snemma of morgininn eptir komo þeir ofan með strand-högg stór. Þess getr Þíódolfr:

Gær sá ec grióti stóro
 gein haus fyrir steini
 fór á fylking þeirra
 fast hardliga kastat.
 Ofan keyrdo ver ordom
 iard muna Sveinn of varda
 stadar hefir stafn í midio
 strandhögg numit landi.

CAP. XXXII.

FLÓTTI SVEINS KONUNGS.

Magnús konungr hellt þegar sunnan síno lidi til Siálands eptir Sveini: enn þegar er Magnús konungs lid kom at, þá flydi Sveinn þegar á land upp, oc allt lid hans; enn Magnús konungr setti eptir þeim, oc rak flóttan; drápo þeir slíkt er þeir nádo. Sva segir Þiódolfr:

Spurdi einu orði
 ölld blóðrodna skiölldo
 satt er at sva mörg átti
 Sælunz mæz hver bæri.
 Aur trádo ver áðan
 yfir of skóginn gnógar
 títt bar tymargr flótti
 til Hríngstada illar.

Saur-stockinn ber svíra
 snarr Skánunga harri
 undr nema allvalldr Lundar
 alldr prúdr fyrir halldi.
 Gær flugo molld oc myrar
 merki Iarls ens sterka
 slód dreif fram at flædi
 flaugar dörr of hauga.

Sveinn flydi þá yfir á Fíón; enn Magnús konungr fór þá herscilldi yfir Sióland, oc brendi víða fyrir þeim mönnum, er um haustit höfdo slegiz í flok med Sveini. Sva segir Þiódolfr:

Náði Iarl at eyða -
 iðfra-setr á vetri
 lezt eigi þú litla
 landvörn af þer standa.
 Máttir Magnús hitta
 milldr oc flokk und scilldi
 nefa Knúts var þá nytun
 nærr sem ráðinn væri.

Rönn lezt ræsirr þrænda
 reidr þordir bæ meida
 hús namtu hver í eiso
 hyrfelld gefa elldi.
 Gör villdir þú giallda
 gædinga vinr skædar
 ört rendo þeir undan
 Iarls fylgörom dylgior.

CAP. XXXIII.

BREND FÍÓN.

Þegar er Magnús konungr spurdi at Sveinn hellt lidi síno til Fíóns, hellt hann eptir hönom. Enn þegar er Sveinn spurdi þat, geck hann á scip oc sigldi, oc kom framm í Scáni, fór þadan á Gautland, oc síðan á fund Svía konungs. Enn Magnús konungr geck upp á Fíóni, let þar ræna, enn brenna fyrir mörgom: allir Sveins menn þeir er þar voro, flyðo brott víds vegar. Sva segir Þiódolfr:

Rindr á roka-landi
 regg af eiki veggium

sudr leikr elldr of unninn
 ódr í lopt upp glódom.
 Bær logar hálfo herra
 hiðnom nærr á Fíóne
 ræfir þola nauð oc næfrar
 Nordmenn sali brenna.

Menn eigo þess minnaz
 manna Sveins at kanna
 víga Freys síst voro
 vesgefn þrennar stefnur.
 Van er fagr á Fíóne
 fljóds dugir vapn at rióða
 verom með fylkto fólki
 framm í vapna glammi.

Eptir þetta geck enn allt fólk undir Magnús konung
 í Danmörko: var þar þá gódr fridr enn efra lut
 vetrar, setti þá Magnús konungr sína menn til stiór-
 nar um land allt þar í Danmörk: enn er áleid vá-
 rit fór hann vid lidi sínþ. norðr í Noreg, oc dval-
 diz þar lengi um sumarit.

CAP. XXXIV.

ORROSTA VID HELGANES.

Enn er Sveinn spurdi at Magnús konungr var fa-
 rinn til Noregs, þá reid hann þegar út á Scáni, oc
 hafði lid mikit or Svíavelli: tóko Scánungar vel
 vid

vid hönom; esldiz hann þá enn at lidi; fór síðan út í Sióland, oc lagdi þar undir sic, sva Fíón oc allas eyar. Enn er þat spurdi Magnús konungr, þá esldiz hann at lidi oc scipom, oc hellt síðan sudr til Danmerkur: hann spurdi hvar Sveinn lá med her sinn, hellt Magnús konungr þá til móts vid hann; vard fundr þeirra þar sem heitir Helganes, oc var þat at qvelli dags er orrosta tókz; hafdi Magnús konungr lid minna eun scip stærri, oc betr scipul. Sva segir Arnor Iarlascauld:

Títt hefic heyrt at heti
Helganes þar er elgi
vags enn víða frægi
varg-teitir braud marga.
Röckr öndort bad randir
Reggbus saman leggja
róg-skya hellt Rygiar
regni haust-nótt gegnum.

Orrosta var hin ákafasta: enn er áleid nóttina gördiz mikit mannfall. Magnús konungr skaut hand-scoti alla nóttina. Þess getr Þíódolfr:

Hjtzig laut er heitir
Helganes fyrir kesiom
sucku sárir reckar
Sveins ferd bana verdir.
Mætr hellt mörgo spióti
Mæra gramr í snæro

odd raud aski studdan
örr land-reki dörrom.

Enn þat er skiótast at segia af orrosto þessi, at Magnús konungr hafði sigr, enn Sveinn flyði; var skip hans rodit meðal stafna, oc mörg önnur skip Sveins voro hroðin. Sva segir Þjóðolfr:

Flyði Iarl af auðo
ótynn scipi síno
mord þar er Magnús gordi
meinfært þadan Sveini.
Red her-konungr hrióða
hneitis egg í sveita
sprændi blóð á bryndan
brand vá gramr til landa.

Enn segir Arnorr:

Skeidr tók Biarnar bróður
ballr Skánungom allar
þjóð reir þeirrar tíðar
þíngat gramr með hríngom.

Þar fell mikit lid af Sveins mönnom: feck Magnús konungr oc hans menn allmikit lutskipti. Sva segir Þjóðolfr:

Skiöllð bar ec heim frá hialldri
hlautz mer til þess Gautzkan
ramr varð sudr á sumri
sverd-dynr oc þó brynio.
Vapn gat ec fríð enn fljóði
fyrir sagðac þat kyrra

Þar feck ec hiálm er hilmir,
hardfengr Dani bardí.

Sveinn flydi þá upp á Scán, oc allt líd þat er með
hönom undan komz: enn Magnús konungr oc hans
menn ráko flóttan langt á land upp, oc varð þá
lítil vidrtaka af Sveins mönnom eða bændom. Sva
segir Þíódolfr:

Baud Olafs sonr áðan
upp á land at standa
geck við mann-dyrd micla
Magnús reidr af skeidom.
Snarr bað hilmir heria
hark vóx í Danmörko
fleygir hart of hauga
hestr or Skáni vestau.

Síðan let Magnús konungr fara herskilldi allt um
bygdina. Sva segir Þíódolfr:

Nú taka Nordmenn knya
nær gaungum ver staungom
berkak Magnús merki
Min skialld á hlíd sialldan.
Skytr skeifom fæti
Skáni yfir sláni
fár vegr er mer fegri
fundinn sudr til Lundar.

Síðan tóko þeir at brenna bygdina: flydi þá allt
fólk víðs vegar undan. Svá segir Þíódolfr:

Bárom iárn at ærno
ískölld á hlíd vísa

skiótt ríða nú skeyttar
 Skánunga lok vanir.
 Raudr leikr of þy breidom
 brádr at varo rádi
 elldr enn ernir vallda
 atblásendor því vási.

Oc enn qvad hann:

Svídr of seggia búdir
 siklingr í her miklum
 eydir bygd sem brádaz
 biartr elldr Danavellði.
 Módr herr halr of heidi
 hialldrs Danmarkar skialldo
 ver lutom sigr enn sárir
 Sveins menn fyrir renna.

Fiörd let fylkir, verða
 forn traddan mó spornat
 leynumz lítt á Fíóni
 lids Skiöldunga midli.
 Muna fyr' Magnús synia
 menn Sveins þeir er nú renna
 upp fara mörg í morgin
 merki stórra verka.

Sveinn flyði þá austr fyrir Scáni, enn Magnús kon-
 ungr hvarf aptr til skipa sinna, oc hellt síðan austr
 fyrir Scáneyar sído, oc vard miöc búiz af scynd-
 ingo. Þá qvad Þíódolfr þetta:

Ecke hef ec at drecka
 annat enn sió þenna

syg ec or sölltom ægi
 sylg er ec iöfri fylgi.
 Ligger fyrir oss enn uggum
 allítt Svía kallom
 driúgt höfom vas fyrir vísa
 við Skáneyar síða.

Sveinn flydi þá upp á Gautland, oc sótti síðan á
 fund Svía konungs, oc dvaldiz þar um vetrinn eptir
 í góðo yfirlæti.

CAP. XXXV.

HERNADR MAGNÚS KONUNGS.

Magnús konungr sneri aptr ferdinni þá er hann
 hafdi undir sic lagt allt Skáni: hellt þá fyrst í Falstr,
 veitti þar uppgöngo, heriadi þar, oc drap mikit
 fólk, þat er ádr hafdi gengit undir Sveinn. Þess
 getr Arnorr:

Svík red eigi eklo
 allvalldr. Dönom giallda
 let fullhugadr falla
 Falstr-byggva lid tiggj.
 Hlód enn 'hala tíádo
 hird-menn ara grenni
 audar þorn fyrir örno
 úngr valkösto þúnga.

Síðan hellt Magnús konungr lidi síno til Flóns,
 geck þar upp oc heriadi, oc vann þar þá mikit
 hervirki. Sva segir Arnorr Jarlascáld:

Enn bar fram á Fíoni
 folld sótti gramr dróttar
 ráns gallt herr fyrir hanom
 hríng serks litudr merki.
 Minniz ölld hverr annan
 iann þarfr blám hramni
 (ört gat hilmi hiarta)
 her-skilldi tog fylldi.

CAP. XXXVI.

FRÁ ORROSTOM MAGNÚSAR KONUNGS.

Magnús konungr sat þann vetr í Danmörko, oc var
 þá góðr fridr: hann hafði átt í Danmörko orrostor
 margar, oc haft í öllom sigr. Sva segir Oddr Ki-
 kina-scáld:

Vas fyrir Michials-messo
 málm-grimm háin rimma,
 fello Vindor enn vöndoz
 vapu-hliódi miðc þjódir.
 Enn fyrir Iól var önnur
 óhlitulig litlo
 upphófs grimm med gumnom
 gunnr fyrir Arós sunnan.

Enn segir Arnor:

Hefnir fengut yrkis efni
 Oláfs geri ec slíkt at málom
 hlackar lætr þú hræ-lög drecka
 hauca nú man kvædit aukaz.
 Fiórar hefir þú randa rírir

Reyra setrs á einom vetri
allvalldr ertu ofvægr kalladr
örva hrídir frækn of görvar.

Þriár orrostor átti Magnús konungr við Svein Ulfsson. Sva segir Þiódolfr:

Hádiz heilli gódo
hilldr sem Magnús villdi
selr of sigr at þýlia
sókn-stærir mer færi.
Brand raud budlungr þrænda
ber idula síðan
hann ept her-vígi þrennin
hærra sciölld at giölldom.

CAP. XXXVII.

FRÁ MAGNÚSI KONUNGI OC ÞÓRFINNI OC
RÖGNVALLDI ORKNEYA IÖRLÖM.

Magnús konungr enn Gódi, son ens helga Olafs konungs, red fyrir Noregi sem fyrr var sagt: Þá var með hönom Rögnvalldr Iarl Brúsason: Þá red fyrir Orkneyiom Þórfinnr Iarl Sigurdarson; födur-bródir Rögnvallds. Þá sendi Magnús konungr Rögnvalld vestr til Orkneyia, oc baud sva at Þórfinnr scylldi láta hann taka við födr-leifd sinni. Þórfinnr let Rögnvalld hafa þridiung landa við sik, þviat sva hafði haft Brúsi faðir hans á deyanda degi. Þórfinnr Iarl átti þá Ingibiörgu Iarla-móður,

dóttur Finnz Arnasonar. Rögnvalldr Iarl þóttiz eiga tva luti landa, sva sem Olafr enn Helgi hafdi heitit Brúsa födur hans, oc Brúsi hafdi um hans daga. Þessi urdo upphöf til deilo þeirra frænda, oc er frá því laung Saga: átto þeir mikla orrosto í Petlandsfirði. Þá var Kálfr Arnason med Þórfinni Iarli. Sva sagdi Biarni Gull-brár-scáld:

Frágum Finnz hve mági
fylgdut Kálfr um dylgior
oc lez á síá sneckior
snarla lagt at Iarli.
Arædi vantú eyða
odd-fús sonar Brúsa
hlædi hugr enn tedut
heipt-minningr Þórfinni.

CAP. XXXVIII.

FRÁ BREFOM MAGNÚSAR KONUNGS.

Magnús konungr redi þá bæði fyrir Danmörk oc Noregi. Enn eptir þat er hann hafdi eignaz Dana-velldi, þá gerdi hann sendimenn vestr til Englands, fóro þeir á fund Iátvardar konungs, oc flutto hön-om bref oc insigli Magnús konungs: enn þat stód á brefom, med kvedio sending Magnús konungs: Þer munut spurt hafa einkamál þau, er ver Hörda-Knútr gördom med oss, at hvarr ockarr er lifdi eptir annan, þá scylldi sá taka öll lönd oc þegna,

Þá er hann hafði átt. Nú er þat sva orðit, sem ec veit at þer hafit spurt, at ec hafi tekit Danavellði í arf eptir Hörða-Knúti: enn hann átti ádr hann andadiz öngom mun sídr England enn Danmörk: köllumz ec nú eiga England eptir rettom mál-dög-om: vil ec nú at þú gefir upp ríkit fyrir mer; enn at öðrom kosti man ec sækia til med styrk hers, bæði af Danavellði oc or Noregi: man sá ráða löndom er sigurs verdr audit.

CAP. XXXIX.

SVÖR IÁTVARDAR KONUNGS.

ENN er Iátvardr konungr hafði lesit bref þessi, þá svaradi hann sva: þat er öllum mönnum kunnigt her í landi, at Adalrádr konungr, fadir minn, var ódalborinn til ríkis þessa bæði at forno oc nyo: voro ver IV synir hans: enn er hann var fallinn frá löndom, þá tók ríki þetta oc konungdóm Iátmundr bródir minn, þvíat hann var ellstr vor brædra; unda ec þá vel vid medan hann lifði. Enn eptir hann tók ríkit Knútr konungr stiúp-fadir minn: var þá ecki dællt til at kalla medan hann lifði. Enn eptir hann varð konungr Haralldr bródir minn medan hönom var lífs audit. Enn er hann andadiz, þá red Hörða-Knútr bródir minn fyrir Danavellði oc Englandi: oc þótti þat þá eina rett brædra-

skipti með ockor, at hann væri konungr bæði yfir Englandi oc Danmörk; enn ec hefda ecki ríki til forráða. Nú andadiz hann; var þat þá ráð her allra landsmanna at taka mic til konungs her í Englandi. Enn medan ec bar ecki tignar-nafn, þíónada ec mínom höfðingiom, eigi stórligar enn þeir er einga átto ætt til ríkis her í landi. Nú hefir ec tekit her konungs nafn oc vígslo, oc sva fulliga bunad oc konungdóm, sem fadir minn hafði fyrir mer: nú man ec þetta nafn eigi upp gefa at mer lifanda. Enn ef Magnús konungr kemr hingat til lands með her sinn, þá man ec eigi lidi samna móti hönom, oc mun hann kost eiga at eignaz England, oc taka mic ádr af lífdögom. Segit hönom sva mín ord. Fóro þá sendimenn aptr á fund Magnús konungs, oc sögdo hönom allt sitt eyrendi. Konongrinn svaradi tómliga, mællti þó sva: ec ætla hitt muno vera sannast oc best fallit, at láta Iátvard konung hafa ríki sitt í ró fyrir mer, oc hallda ec þesso ríki er Gud hefir mic eignaz látit.

IX.

SAGAN AF HARALDE
HARDRÁÐA

CAP. I.

HARALDR KEMZ OR STICLASTADA BARDAGA.

Haraldr son Sigurðar Syr, bróðir Olafs hins Helga sammæðri, var á Sticlastöðum í orrosto, oc þá XV vetra, er Olafr konungr enn Helgi fell, sem fyr er ritat; varð Haraldr sárr, oc komz á brott með öðrom flóttamönnum. Á þat qvedr Þjóðolfr scáld, í drápu þeirri er hann orti um Harald konung, er köllut er Sexstefia:

Hvast frá ec Haugi et næsta
hlíf-elld á gram drífa
enn Bolgara brénnir
bræðr sínum vel tædi.
Skildiz hann oc huldí
hiálm setr gamall vetra
tiggí tólf oc þriggja
traudr víð Olaf daudan.

Rögnvaldr Brúsason slutti Harald or orrostonni, oc kom hönom um nóttina eptir bardagann til bónda nockurs, er bió í skógi langt frá öðrom mönnum; tók sá búandi víð Haralldi, oc hafði hann á laun,

óć var Haralldr þar læknadr til þess er hann var heill. Sídan fylgdi son bónda hönom austr um Kiöl, oc fóro þeir allt markleidi, þar er sva mátti, enn ecki alþydo veg. Vissi bónda son ecki til hveriom hann fylgdi; oc er þeir rido á milli eydiscóga nockurra, þá qvad Haralldr þetta:

Reid ec enn beniar blæda
 búþegna sá ec megna
 lidi feck lindar vodi
 lífs grand í böð standa.
 Nú læt ec skóg af skógi
 skreidaz lítills heidar
 hver veit nema ec verda
 víða frægr um sídir.

Hann fór austr um Kiöl, oc um Jamtaland oc Helsingialand, oc kom fram í Svíþíód, fann hann þar Raugnvalld Brúsason, oc miöc marga adra þá er flúit höfdo af Stiklastödom or orrostinni, Olafs konungs menn, dvölduz þeir þar um vetrinn.

CAP. II.

FERD HARALLDS TIL MIKLAGARDS.

Enn eptir um várit fengu þeir Haralldr oc Rögnvalldr ser scipan, oc fóro um sumarit austr í Gardaríki, á fund Iarizleifs konungs, oc voro þar um vetrinn. Sva segir Bölverkr skáld í drápo þeirri er hann orti um Haralld konung:

Milldingr strauktu um mækis
 munn er letz af gunni
 holdz vant hrafn of sylldan
 hrás þaut vargr í ási.
 Enn gramr ne ec frá fremra
 sólkherdi þer verða
 austr vartu árin næstu
 aurdig lyndr í Gördom.

Iarizleifr konungr tók vel við þeim Haralldi oc Rögnavalldi, oc gerdiz Haralldr þá höfðingi yfir landvarnar-mönnom konungs, oc annar Eilifr son Raugnavalldz Iarls. Sva segir Þíódolfr:

Eit höfðoz at
 Eilifr þar er sat
 höfðingar tveir
 hamallt fylkðo þeir.
 Austr-Vindom oc
 í öngom krók
 vara Læsjom lettr
 lids-manna retr.

Þess getr Arnorr Iarla-scáld, at Rögnavalldr Brúason var lengi landvarnar madr í Gardaríki, oc átti þar orrostor margar:

Deilldiz af sva at alldin
 el grasnínga þelar
 Göðdlar niördr í Gördom
 gunn-brádr tíu háði.

Haralldr dvalldiz í Gardaríki nockora vetor, oc fór víða um austr-veg. Síðan byriadi hann ferd sína

úti Grikland, oc hafði mikla sveit manna; þá hellt hann til Miklagardz. Sva segir Baulverkr:

Hart knydi svöl svartan
sneckio brand frá landi
skúr, en skrautla báro
skeidor bryniadar reidi.
Mætr hilmr sá málma
Miklagardz fyrir bardi
mörg skrido beitt at borgar
barmfögr ham armi.

CAP. III.

FRÁ HARALLDI SIGURDARSYNI.

Þá red firi Gricklandi Zoe drottning en Ríka, oc med henni Mickael Katalactus. Enn er Haraldr kom til Miklagardz, oc á fund drottningar, þá geck hann þar á mála, oc fór þegar um haustit á galeidr med hermönnom þeim er foro úti Gricklandz haf. Hellt Haraldr sveit af sínom mönnom. Þá var höfdingi yfir öllom hermönnom sá madr er nefndr er Gyrgir, hann var frændi drottningar; enn Haraldr hafði litla hríd verit ádr í lidino, en Væringiar þydduz miöc til hans, oc fóro þeir allir samt þegar er bardagar voro, kom þá sva at Haraldr giördiz höfdingi yfir öllom Væringiom. Fóro þeir Gyrgir víða um Gricklands Eyar, oc unno þar herskap mikinn á Kussarom.

CAP. IV.

LUTAN HARALDS OC GYRGIS.

Þat var eitthvert sinn er þeir höfðu farit of land, oc scylldo taka ser nátt-ból vid skóga nockora, oc komo Væringiar fyrstir til náttstadar, oc völdo ser tialldstadi þá er þeir sá bezta oc hæst lágo, þvíat þar er sva háttat, at landit er blautt, oc þegar er regn koma, þá er þar sva illt at húa er lágt liggr. Þá kom til Gyrgir höfðingi hersins, oc er hann sá hvarr Væringiar höfðu tialldat, bad hann þá brott fara oc tiallda í ödrom stad, segir at hann vill þar tiallda. Haralldr svaradi sva: Ef þer komit fyrri til nátt-bóls, þá taki þer ydr tialld-stadi, munom ver þá tiallda í ödrom stad, þar sem oss líkar; giöri þer nú oc sva, tialldit þar sem þer vilit í ödrom stad: hugda ec, at þat væri rettr Væringia her í Grickia konungs velldi, at þeir skyldo vera friálsir oc siálfráða um alla luti firi öllom mönnum, enn vera konungi einom oc drottningo þíónosto bundnir. Þreyttu þeir þetta med kappmælum sín á milli, þar til er hvarirtveggio vapnudoz, oc var þá vid siálft, at þeir mundi beriaz. Komo þá til hinir vitrosto menn, oc skildo þá; sögdo þeir sva, at betr var fallit, at þeir sættiz um þetta mál, oc gördi skipan á med ser glöggliga, sva at ecki þyrfti optarr slíka deilo. Var þá stefnolagi ákomit med

þeim, oc skylldo þar um dæma hinir bestu menn, oc hinir vitrasto. Enn á þeirri stefno redo þeir þat, sva ásamt kom med öllom, at hluti skylldi í skaut bera, oc luta med Grickiom oc Væringiom, hvarir fyrri skylldo ríða eda róa, eda til hafnar leggja, oc kíosa um tialldstadi; skylldo því þá hvarirtveggio una, sem lutir segdi. Síðan voro lutir görvir oc markadir. Þá mælti Haralldr vid Gyrgi: Ek vil síá hvernog þú markar þinn lut, at ecki markom vid einnog bádir; hann gerdi sva. Síðan markadi Haralldr sinn lut oc kastadi í skaut, oc sva bádir þeir. Enn sá madr er lutinn skylldi upptaka, þá tók hann upp annan oc hellt milli fingra ser, oc brá upp bendinni, oc mælti: þessir skulo fyrir ríða oc róa, oc til hafnar leggja, oc kíosa ser tialld-stadi. Haralldr greip til handarinnar, tók lutinn oc kastadi á sæ. Síðan sagdi hann: þessi var varr lutr. Gyrgir sagdi: hví letz þú eigi fleiri menn síá? Se her nu, sagdi Haralldr, þann er eptir er, mantu þar kenna þitt mark. Síðan var athugat um þann lutinn er eptir var, oc kendo allir þar mark Gyrgis. Var þat dæmt síðan, at Væringiar skylldo hafa kiörna kost of allt þat er þeir þrættu um. Fleiri lutir urdo þeir, er þeir urdo ei ásáttir, oc lauk iafnan sva, at Haralldr hafdi sitt mál.

CAP. V.

HERNADR HARALLDS KONUNGS Í SERKLAND.

Þeir fóro allir samt um sumarit oc herið. Þá er allr var saman herinn, let Haralldr sína menn vera fyrir utan bardaga, eda elligar þar er hönom þótti minst manhætta vera, oc letz varaz vilja, at hann tyndi herlidi síno. Enn er hann var einn saman med síno lidi, lagdi hann sva fast til at beriaz, at annattveggia skyldi hann fá sigr edr bana. Sva bar til optliga, þá er hann var höfðingi yfir lidino, at hann vann sigr þá er Gyrgir vann eigi. Þetta fundu hermenn, oc köllodo betr fara mundo sitt mál, ef Haralldr einn væri höfðingi yfir öllom herinóm, oc ámællto hertoganóm, at eigi yrði af hönom eda hans lidi. Gyrgir sagdi, at Væringiar vildo eigi lid veita hönom, bad hann þá fara í annan stad Haralld med sínóm mönnóm, enn hann færi med ödrom herinóm, oc vinna þvílíkt sem þeir mætti. Fór þá Haralldr frá herinóm, oc Væringiar vid hönom oc Látino menn, enn Gyrgir fór med Grickia her. Syndiz þá hvat hvarir máttó: feck Haralldr íafnan sigr oc fe, enn Grickir fóro heim til Miklagardz med lidi síno, nema úngir drengir þeir er fá villdo ser fiár, söfnudoz til Haralldz, oc höfdo hann fyri hertoga. Hann lagdiz þá med her

66 *SAGAN AF HARALDI HARDRADA.*

sinn vestr í Africa, er Væringiar kalla Serkland, efdiz hann þá miðc at lidi. Í Serklandi vann hann LXXX borga, voro sumar gefnar hönom upp, enn sumar tók hann með valldi. Síðan fór hann til Sikileyar. Sva segir Þiódolfr:

Togo má tekna segia
tand-rauds á Serklandi
úngr hætti ser átta
ormtorgs hatudr borga.
Adr herskordudr hardan
hilldar leik und skilldi
Serkiom hættir í slettri
Sikileyo geck heya.

Sva segir Illugi Bryndæla-skálld:

Brautz und Mikial mæztan
mágom heim sem frágom
sonr Budla band sínom
Sunnlönd Haralldr raundo.

Her segir þat, at þá var Mikial Grickia konungr í þenna tíma. Haralldr dvalldiz marga vetor í Africa, oc feck hann þar of lausa-fiár, gull oc gersemar, oc allzkonar dyr-gripi. Enn allt fé þat. er hann feck, er hann þyrfti eigi at hafa til kostnadar ser, sendi hann með trúnadar mönnom sínom norðr í Hólmgard, í valld oc gæzlo Íarisleifs konungs; dróz þar saman ógrynni fiár, sem glíkligt er at vera mundi, er hann heriadi þann luta heims, er audgaztr er at gulli oc dyr-gripom, oc sva mikit sem

hann gördi at, er med sönno var ádr sagt, at hann mundi eignaz hafa LXXX borga med sínom manndómligom atburdom.

CAP. VI.

ORROSTA Í SIKILEY.

Enn er Haralldr kom til Sikileyar, þá heriadi hann þar, oc lagdi med lidi síno til einnar borgar mikillar oc fiölmenurar; settiz hann um borgina, þvíat þar voro sva sterkir veggir, at hönom þótti ósynt at brióta mundi mega. Borgar-menn höfdo vist nóga oc önnor faung þau er þyrfto til varnar. Þá leitadi Haralldr ráds þess, at fuglarar hans tóko smá-fugla þá er hreidroduz í borginni, oc flugo á skóg um daga at taka ser mat. Haralldr let binda á bak fuglonom lokar-spánu af tyr-vidi, oc steypa vaxi oc brenno-steini, oc let slá í elldi; flugo fuglarnir þegar er lausir urdo allir í senn í borgina, at vitia únga sinna oc híbyla er þeir átto í hús-þekiom, þar er þakt var reyr eda hálmi; laust þá elldinom af fuglonom í hús-þekiornar; enn þó at einnhverr bæri litla byrði elldz, þá vard þat skiótt mikill elldr, er margir fuglar báro til, oc vída í hús-þekior, oc því næst brann hvert hús at ödro, þar til er borgin logadi, geck þá fólk allt út or borginni, oc bad ser miskunnar, þeir hinir sömo er ádr höfdo marga daga drembiliga látit oc háduliga, til Grickia hers

oc höfðingia þeirra. Haralldr gaf öllum mönnum grid þeim er þess beiddo; feck hann síðan valld yfir þeirri borg.

CAP. VII.

ORROSTA UM ADRA BORG.

Aunnor borg var sú er Haralldr lagdi til lidi síno, sú var bædi fiölmenn oc sva sterk, at engi ván var at þeir fengi brotit borgina. Vellir slettir oc hardir voro umhverfis borgina. Þá let Haralldr taka til at grafa gröft, þar frá sem fell einn bekr, oc var þat diúpt gil, sva at eigi mátti þannog síá or borginni: þeir flutto molld alla út á vatnit, oc leto straum braut bera; voro þeir at þesso verki bædi dag oc nótt, var skipt til sveitom, enn herinn gekk alla daga utan at borginni, en borgarmenn gengo í vígskörd, oc skuto hvarir á adra, enn um nætur sváfo þeir hvarirtveggio. Enn er Haralldr skildi þat at iardhús þat var gört sva langt, at þat mundi komit inn um borgar-vegginn, þá let hann vapnaz lid sitt. Þat var móti degi er þeir gengu í iardhúsit. Enn er þeir komo til enda, grofo þeir upp yfir höfud ser þar til er steinar lím-settir urdo fyrir, þat var gólf í steinhöll einni. Síðan bruto þeir upp gólfrit, oc gengo upp í höllina; þar sátu fyrir menn margir af borgar-mönnum, snæddo oc drucko, oc var þeim þetta hinn mesti úvísa-vargr, þvíat Vær-

ingiar gengo þegar við brugðnom sverðom, oe drápo þar suma, enn sumir flyðu, þeir er því komu við. Væringiar sóltu eptir þeim, enn sumir tóko borgarhlidinn oc lueo upp, geek þar þá inn allr fiölldi hersins. Enn 'er þeir komu í borgina, þá flyði borgar-lydrinn, enn margir báðu lidit gríða, oc fengo þat allir þeir er gáfuz upp: eignadiz Haralldr borgina með þessom hætti, oe þar með ógrynni fiár.

CAP. VIII.

ORROSTA VIÐ ENA ÞRIDIO BORG.

Ena þridio borg hitto þeir þá er mest var af hin-
om öllum oe sterkost, oe ríkast at fe oe fiölmenni,
voro um þá borg stór diki, sva at þeir sá at eigi
mátti þar vinna með þvílíkom brögðom, sem hinar
fyrri borgir, lágo þeir þar miðe lengi, sva at þeir
fengo eeki atgört. Enn er borgar-menn sá þat, þá
dirfðoz þeir við: þeir setto fylkingar sínar upp á
borgar-veggjum, síðan luko þeir upp borgar-hlidinn,
oe æpðu á Væringia oc eggjodo þá, báðu þá at
ganga inn í borgina oe fryðu þeim hugar, sögðu at
þeir væri eigi betr til orrosto enn hænsn. Haralldr
bad menn sína láta sva sem eigi vissi hvat þeir
skyldo við gjöra, edr skildi eigi hvat þeir sögðu:
ver gerom eigi at, sagði hann, þótt ver rennim til
borgarinnar, þeir bera vapn sín á oss undir fætor

ser nidr; enn þótt ver komim í borgina með nokrorar sveitir, þá hafa þeir valld á at byrgia inni þá er þeir vilja, en suma úti, þvíat þeir hafa öll borgar-hlidin at gæta. Ver skolom gera þeim eigi minna spott, oc láta þá síá at ver óttumz þá eigi: skolo varir menn gánga fram á völlum sem næst borginni, oc gæta þó þess at gánga eigi í skotmál þeirra; skolo varir menn allir fara vapnlausir oc giöra ser leik, oc láta þat síá borgarmenn, at ver hirdom eigi um fylkingar þeirra. Síðan var sva nockora daga at ecki vannz at.

CAP. IX.

FRÁ ÚLFI OC HALLDORI.

Tveir menn Islenskir voro nefndir, þeir voro þar með Haralldi, Halldor son Snorra Góða, hann hafði þessa frásögn hingat til lands; annar Ulfr son Ospaks, sunar Osvífurs ens Spaka. Þeir voro bádir enir sterkusto menn, oc allvapn-diarfir, oc voro hinir kærsto Haralldi; þeir voru bádir í leik þessom. Enn er þessa leid hafði framfarit nockora daga, þá vildo borgar-menn syna enn meira kapp, gengo þeir eigi með vapnom uppá borgar-veggina, enn leto þó opin standa borgar-hlidin. Enn er þat sá Væringiar, þá gengo þeir einn dag sva til leiksins, at þeir höfdo sverd undir mötlom, enn hialma undir höttom. Enn

er þeir höfðu leikit um ríð, þá sá þeir at borgar-
menn vöruduz eigi, þá tóko þeir sciótt vapnin,
runnu síðan at borgar-hlidino. Enn er borgarmenn
sá þat, gengo þeir í móti vel, oc höfðu allvæpni,
tókz þar bardagi í borgar-hlidino. Væringiar höfðu
eingar hlífar, nema þat er þeir sveifðu mötlunom
um vinstri hönd ser, urðu þeir sárir, enn sumir
fello, enn allir voro nauduliga staddir. Haralldr oc
þat lid med hönom er í her-búðunom var, sótti til
at veita sínom mönnom. Enn borgar-menn voro
þá komnir upp á borgar veggina, skuto oc grytto
á þá, varð þá hörd orrosta: þótti þeim er í borgar-
hlidino voro, vera seinna gengit at hiálpa ser, enn
þeir villdo. Enn er Haralldr kom at borgar-hlidino,
þá fell merkis-madr hans, þá mælti hann Haralldr
við Halldor: tak þú upp merkit. Halldor svarar,
oc tók upp merki-stöngina, oc mælti óvitrlega: hverr
man merki bera fyrir þer, ef þú fylgir sva blaud-
liga sem nú er um ríð? var þat meir reidi-mál enn
sann-yrdi, þvíat Haralldr var hinn vapn-diarfasti
madr. Sótto þeir þá inn í borgina, var þá bardagi
hardr, oc lauk sva at Haralldr hafði sigr oc vann
borgina. Halldor varð sárr miðc í andliti, oc varð
þat sár líótt alla æfi hans.

CAP. X.

ORROSTA VID FIÓRDO BORG.

Sú var hinn fiórda borg er Haralldr kom til með her sinn, er mest var af öllum þessum er ádr var frásagt, hon var oc sva sterk, at þeir sá at eingi var ván at þeir fengi hana brotit: settuz þeir um borgina, sva at eigi mátti faung flytia til borgarinnar. Enn er þeir höfdo litla hríd dvaliz, þá feck Haralldr siúkleik sva at hann lagdiz í reekio; let hann setia sitt land-tialld brott frá ödrom herbúdonom, þvíat honom þótti ser þat ró, at heyra eigi guý oc glaum her-lidsins. Menn hans gengo iafnan með flocka til hans til oc frá, oc spyria hann ráðagiördar; þat sá borgar-menn, at nockor nylynda var með Væringiom: gerdo þeir til niósnaar-menn, at forvitnaz hverio slíkt mundi gegna. Enn er niósnaar-menn komo aptr til borgar, þá kunno þeir at scgia siúkleik höfðingia Væringia-hersins, oc fyrir þá sök var eingi atsókn til borgarinnar. Enn er sva hafdi framfarit um ríd, þá minkadi mátt Haralldz: giördoz þá hans menn miöc hug-siúkir oc daprir; slíkt allt spurdo borgar-menn. Þar kom at sva þröngdi sótt Haralldz, at andlát hans var sagt um allan herinn. Síðan foro Væringiar til tals við borgar-menn, oc sögdo þeim líflát höfðingia síns, bádo kennimenn veita hönom gröft í borginni. Enn

er borgar-menn spurdo þessi tíðindi, þá voro þeir margir er þar redo fyri klöstrom eda ödrom stór-stödom í borginni, er hver villdi giarna hafa þat lík til sinnar kirkio, þvíat þeir visso at þar mundi fylgia ofr mikit fe. Skryddiz þá mikill fiölldi ken-nimanna, oc geek út or borginni med krossa oc skrin, oc helgadóma, oc giördo fagra processio. Væringiar giördo oc mikla lík-ferd: var þar lík-kista borin hátt oc tialldat yfir pellom, oc borin þar fyrir merki mörg. Enn er líkit var borit inn um borgar-hlidit, þá skuto þeir nidr kistonni of þvert hlidit borgarinnar, oc hleypto slagbröndom fyrir hurdirnar; bleso þá Væringiar í alla lúdra her-blástr, oc brugdo sverdonom, þusti þá allr herinn Væringia or her-búdonom med alvæpni, liöpo þá til borgarinnar med ópi oc kalli. Enn múnkar oc adrir kennimenn, þeir er í mót höfdo gengit líkino, kepp-tiz hverr vid annan at fyrstr oc fremstr villdi út-gánga, oc at taka vid offrino, þá var þeim nú hálfo meira kapp á því at vera sem first Væringiom, þvíat þeir drápo hvern þann er þeim var næstr, hvart er hann var klerkr eda úvígdr. Væringiar gengo sva um alla borg þessa, at þeir drápo mann-fólkit, enn rænto alla stadi í borginni, oc tóko þar ógrynmi fiár.

CAP. XI.

FRÁ HARALLDI KONUNGI.

Haralldr var marga vetor í hernadi þessom, er nú var frásagt bæði á Serklandi oc Sikileyo. Síðan fór hann aptr til Miklagardz med her þenna, oc dvaldiz þar litla hríd ádr hann byriadi ferd sína út í Iorsala-heim. Þá let hann eptir mála-gull Grickia konungs, oc allir Væringiar þeir er til ferðar redoð med hönom. Sva er sagt at í öllum þessom ferðom hafi Haralldr átt XVIII fólk-orrostur. Sva segir Þiódolfr:

Þiód veit at hefir háðar
 hvar grimligar rimmor
 rofuz hafa opt firi iðfri
 átian Haralldr sáttir.
 Haus arnar rauttu hvassar
 hróðigr konungr blóði
 imr gat kars hvar komut
 klær ádr hingat færir.

CAP. XII.

IORSALA-FERD HARALLDS KONUNGS.

Haralldr fór med lidi síno út til Iorsala-lands, fór þá síðan upp til Iorsala-borgar, enn hvar sem hann fór um Iorsala-land, þá voro allar borgir oc kastalar gefnar í hans valld. Sva segir Stúfr skálld, er heyrt hafði konung siálfan fra þessom tíðindom segia:

Fór ofr-hugi en æfri
egg-diarfr und sic leggja
folld var víga valldi
virk Iorsali ok Grickiom.
Oc med eino ríki
óbrunnin kom gunnar
heimil iörd und herdi
hafi ríks þars vel líkat.

Her segir frá því, at þetta land kom óbrunnit oc óheriat í valld Harallds. Fór hann þá út til Iordanar, oc laugadi sic þar, sem háttr er annara pálmara. Haralldr varði stór-fe til grafar Drottins oc krossins helga, oc annara heilagra dóma á Iorsalandi. Þá fridadi hann veginn allt út til Iordanar, oc drap raufara oc annat hernadar-fólk. Sva segir Stúfr skáld:

Stóðoz rád oc reidi
rann þat svíkom manna
Egda grams á ymsom
ord Iordanar bandom.
En fyrir afgord sanna
illa gat frá stilli
þíód feck vísan vada
víst of alldr med Kristi.

Þá fór hann aptr til Miklagardz.

CAP. XIII.

HARALLDR KONUNGR SETTR Í DYBLISSO.

Þá er Haralldr var kominn til Miklagardz utan af

Iorsala-landi, fystiz hann at fara í Nordr-lönd til ódala sinna: hafði hann þá spurt, at Magnús Olafsson, brodrson hans, var ordinn konungr í Noregi oc sva í Danmörko, sagði hann þá upp þíónosto vid Grickia konung. Enn er Zoe drottning vard þessa vör, vard hon reid miöc, oc hóf upp sakargiftir vid Haralld, taldi þat, at hann mundi hafa misfarit med Grickia konungs fe, því er fengiz hafði í bernadi, þá er Haralldr hafði verit höfðingi yfir herinom. Mariá het ein mæz úng oc fríd, hon var bróður-dóttir Zoe drottningar, þeirrar meyar hafði Haralldr bedit, enn drottning syniadi. Sva hafa sagt Væringiar nordr hingat, þeir er verit hafa í Miklagardi á mála, at sú sögn væri þar höfd af fródom mönnum, at Zoe drottning villdi siálf hafa Haralld ser til manns, oc sú sök væri reyndar mest vid Haralld, er hann villdi brott fara or Miklagardi, þó at annat efni væri uppborit fyrir alþydo. Þá var Grickia konungr sá er het Constantinus Monomachus, hann red ríkino med Zoe drottningo. Af þessom sökum let Grickia konungr taka höndom Haralld, oc færa hann til dyflizo.

CAP. XIV.

IARTEGNIR OLAFS KONUNGS; BLINDADR
GRICKIA KEISARI.

Enn er Haralldr kom miðc sva til dyflizonnar, þá syndiz hönom hinn helgi Olaf konungr, oc sagði at hann mundi hiálpa hönom. Þar á strætino var síðan giör capilla, oc helgod Olafi konungi, oc hefir sú capilla þar stadið síðan. Dyfliza sú var þannig giör, at þat er turn hárr oc opinn ofan, enn dyrr af strætino í at gánga; var Haralldr þar innlátinn, oc þeir Halldor med hönom oc Ulfr. Næsto nótt eptir kom ein rík kona ofan á dyflizona, oc hafði gengit upp med stigom, oc þíónosto-menn hennar II med henni; þau leto síga ofan streng í dyflizona, oc drógo þá upp. Þessi kono hafði hinn helgi Olaf konungr unnit bót fyrr, oc hafði þá vitraz henni, oc bad hon skyldi leysa bróðr hans or prisund. Þá fór Haralldr þegar til Væringia, oc stódo þeir upp allir þegar í móti, oc fögnudo hönom vel. Síðan vapnadiz allt lidit, oc gengo þar til er konungriinn svaf; þeir tóko konunginn höndom, oc stínga út bæði augun. Sva segir Þórarinn Skeggia-son skáld í sinni drápo:

Náði görr enn glódom
Gricklandz iöfr banda
stól-þengill geck ströngo
stein-blindr adal-meini.

Sva segir oc Þiódolfr skálld:

Stól-Þengils let stínga
styriölld var þá byriod
eydir augo bædi
út heidingia sútar.
Lagdi alvalldr Egda
austr á bragning hraustan
grálikkt mark en Girkia
göto ílla fór stillir.

I þessom tveim drápom Haralldz, oc mörgom öðrom kvædom hans er getit þessa, at Haralldr siálfr blindadi Grickia konung; nefna mætti þeir til þess hertoga edr greifa, eda annarskonar tigna menn, ef þeir vissi þat sannara vera, þvíat siálfr Haralldr konungr flutti þessa sögn oc þeir menn adrir er þá voro þar með hönom.

C A P. XV.

FERD HARALLDZ KONUNGS OR MIKLAGARDI.

Þá nótt hina sömo gengo þeir Haralldr at þeim herbergiom er Maria svaf í, oc tóko hana í brott med valldi. Síðan gengo þeir þar til er galeidur Væringia varo, oc tóko II galeidurnar oc skipudo, röro síðan inn í Sævidar-sund. Enn er þeir komo þar er iárn-rekendornar lágo um þvert sundit, þá mællti Haralldr at menn skylldo skipaz til ára á hvarritveggio galeidinni, enn þeir menn er eigi röro, skylldo

allir laupa aptr í galeidurnar, oc hafa hverr húdfat sit í fadmi ser; rendo sva galeidornar uppá iárnrekendornar. Enn þegar er festi í, oc skridinn tók af, þá bad Haralldr alla mennina laupa framm í. Þá steypdi galeidi þeirri er Haralldr var á, oc stöck sú af iárnonom vid ridin, enn önnor sprack er reid á iárnonom, oc tyndiz þar mart, enn sumt var tekit af sundi. Med þesso komz Haralldr út af Miklagardi, fór sva inn í Svarta-haf, oc ádr hann sigldi frá landi, setti hann uppá land iúngfrúna, oc feck henni gott föroneyti aptr til Miklagardz, bad hana segia Zoe drottníngo, frændkono sinni, hverso mikit valld hon hafdi á Haralldi, eda hvart nockot hefði drottníngar ríki fyrirstadit, at hann mátti fá iúngfrúna. Þá sigldi Haralldr norðr í Ellipallta, oc fór þadan allt um Austrríki. I þessom ferdom orti Haralldr gaman-vísor, oc ero saman XVI, oc er eitt midrlag á öllum. Þessi er ein:

Sneid fyri Sikiley víða
súd vorom þá prúdir
brynt skreid vel til vánar
vengis hiörtr und drengiom.
Vætti ec minnr at motti
mani enn þinnig nenna
þó lætr Gerdr í Gördom
gollhríngs vid mer skolla.

Þvi veik hann til Ellisíar, dóttur Iarízleifs konungs í Hólmgardi.

CAP. XVI.

FRÁ HARALDI KONUNGI.

Enn er Haralldr kom til Hólmgardz, fagnadi Iarizleifr konungr hönom forkunnar vel, dvaldiz hann þar eptir um vetrinn; tók þá í sína vardveizlú gull þat allt, er hann hafði ádr sent þannog utan af Miklagardi, oc margskonar dyr-gripi, var þat sva mikít fe, at eingi madr í Nordr-löndom hafði set slíct íafnmikít í eins mans eigo. Haralldr hafði III sinnom komít í polota-svarf, medan hann var í Miklagardi. Þat ero þar lög, at hvert sinn er Gric-kia konungr deyr, þá skulo Væringiar hafa polota-svarf: þeir skulo þá gánga of allar polotur konungs, þar sem fehirdzlor hans ero, oc scal hverr þar eignaz at friálso þat ser, hvert er höndom kemr á.

CAP. XVII.

KONFANG HARALLDS KONUNGS.

Þann vetr gípti Iarizleifr konungr dóttor sína Haralldi, sú er het Elisabeth; þá kalla Nordmenn Ellisif. Þetta tíáir Stúfr blindi:

Mægd gat allvalldr Egda
ógnar milldr þá er villdi
gulls tók gumna spialli
gnótt oc bragnings dóttir.

Enn

SAGAN AF HARALLDI HARDRADA. 8:

Enn at vari byriadi hann ferd sína or Hólmgardí, oc fór um varit til Aldeigio-borgar, feck ser þar skip oc sigldi austan um sumarit. Sneri fyrst til Svíþjóðar, oc lagdi til Sigtúna. Sva segir Valgandr á Velli:

Skauzt þú und farm enn frídztu
frami veitiz þer beiti
færdir þú gull or Gaurdom
grunnlaust Haralldr austan.
Styrdir hvatt í haurdo
hvardyggr iöfr glyggvi
sáttu þá er sæ-drif letti
Sigtún en skip hnigdo.

CAP. XVIII.

FELAG HARALLDS KONUNGS OC SVEINS
ULFSSONAR.

Haralldr fann þar fyrí Svein Ulfsson, þat haust er hann hafði flyit fyrí Magnúsi konungi við Helganes. Enn er þeir fundoz, fagnadi hvarr öðrom vel. Olafur enn Sænski, Svía-konungr, var móður-fadir Ellisifjar, kono Haralldz. Enn Astrídr módir Sveins, var systir Olafs konungs. Giördo þeir Haralldr oc Sveinn felagscap sinn, oc bundo þat einkamálom. Allir Svíar váro vinir Sveins, þvíat hann átti þar hina stærsto ætt í landi. Giördoz þá oc

allir Svíar vinir Haralldz oc lidsinnis-menn: var þar margt stórmenni bundit í mægdum við hann. Sva segir Þiódolfr:

Reist eiki-kiölr austan
 aurdikt vatn or Gördom
 Svíar tíðo þer síðan
 sniallr landreki allir.
 Geck med gulli miklo
 glygg fell of tiggia
 höll á hle-bord sollin
 Haralldz skeid und vef breidom.

CAP. XIX.

HERNADR HARALLDS KONUNGS.

Síðan redo þeir ser til skipa Haralldr oc Sveinn, oc dróz þeim brátt herr mikill; oc er lid þat var búit, þá sigldo þeir austan til Danmarkar. Sva segir Valgadr:

Eik slaung und þer Yngvi
 ógnblídr vedr síðan
 rett var ydr of ætlat
 ódal frá Svíþíðo.
 Hynd bar rif þars rendi
 rett á stig fyrri sletta
 skeidor enn skelkto brúdir
 Skáney Dönom nánar.

Þeir lögdo fyrst herinom til Siólandz, oc heriðo

þar oc brendo víða. Síðan helldo þeir til Fíóns,
gengo þar upp oc heríodo. Sva segir Valgandr:

Haralldr görva leztu heriat
huiggr þú andscotom tiggí
brátt rann vargr at vitia
valfallz Selund alla.
Geck á Fíón en feckat
fiölmeðr konungr hiálmom
brast ríkula ristín
rít erfíði lítit.

Brann í bæ fyrí sunnan
biartr elldr Hróizkelldo
rönn let rásir nenninn
reyk vell ofan fella.
Lágo landzmenn gnógir
ló hels sumom frelsi
drósk harm vesælt hyski
hliótt til skógs á flóttu.

Dvaldi dapurt skillda
drífo þeir er eptir lífdo
ferd en fengin urdo
fögr sprund Danir undan.
Las helld líki drósar
leid fyrí ydr til skeida
bító fíkula fiötrar
fliód mart haurund biarta.

CAP. XX.

LEIDÁNGR MAGNÚSAR KONUNGS.

Magnús konungur Olafsson hellt um haustit norðr í Noreg, eptir Helganes bardaga; þá spyrr hann þau tíðindi, at Haralldr Sigurdarson, frændi hans, var kominn til Svíþjóðar, oc þat med, at Svein Ulfsson oc Haralldr höfðu gert felagskap sinn, oc höfðu her mikinn úti: ætludo enn at leggja undir sic Danavellði, enn síðan Noreg. Magnús konungur bydr út leidangr af Noregi, oc dregz hönom brátt herr mikill; hann spyr þá at þeir Haralldr oc Sveinn voro komnir til Danmarkar, brendo þar allt oc brælldo, enn landz-fólkit geck víða undir þá; þat var oc sagt med, at Haralldr væri meiri oc sterkari enn adrir menn, oc sva vitr, at hönom var ecki ófært, oc haun hafði iafnan sigr er hann bardiz; hann var oc sva audigr af gulli, at eingi madr vissi dæmi til. Sva segir Þjóðolfr:

Nú er val meidom víðis
veitt drott mikinn ótta
skeidor hefir herr fyri haudri
hætt góðs fridar vætta.
Míldr vill Magnús hallda
mordz hlunn gótom nordan
ítr enn önnor skreytir
unnvigg Haralldr sunnan.

CAP. XXI.

SÆTTALEITAN MAGNÚSAR KONUNGS VID
HARALLD.

Menn Magnús konungs þeir er voro í ráðagiörd med hönom, tala þat at þeim þickir í óvænt efni komit, ef þeir Haralldr frændor skulo beriaz oc beraz bana-spiót eptir: biódaz nú margir menn til þess, at leita um sættir med þeim, oc af þeim fyrirtölom samþyckiz konungr því. Varo þá menn giörvir á leypi-skúto, oc fóro þeir sem skyndiligast sudr til Danmerkr; fengo þar til Danska menn, þá er fullkomnir voro vinir Magnús konungs, at bera þeirra erendi Haralldi. Þetta mál fór miðc af hliódi. Enn er Haralldr heyrdi þetta sagt, at Magnús konungr frændi hans mundi bióða hönom sætt oc felagskap, oc Haralldr mundi hafa skulo hálfan Noreg vid Magnús konung, enn hvarr þeirra vid annan hálfu lausa-fe beggia þeirra; fóro þessi ein-kamál þá aptr til Magnús konungs.

CAP. XXII.

BRUGDIT SÆTT HARALLDS OC SVEINS
KONUNGS.

Litlo sídar var þat, at þeir Haralldr oc Sveinn töludo eitt kvæld vid dryckio: spurdi Sveinn hveria gripi Haralldr hefði, þá er hönom var mest virkd

á? hann svarar, at þat var merki hans Landeyda. Þá spurdi Sveinn, hvat merkino fylgdi þess, er þat var sva mikil giorsemi? Haralldr sagdi, þat var mælt, oc sva hefði orðit síðan hann feck þat, at sá mundi hafa sigr er merkit var fyri borit. Sveinn svarar: Þá mundi ec trúa, at sú náttúra fylgdi merkino, ef þú átt III orrostor vid Magnús konung frænda þinn, oc hefir þú sigr í öllum. Þá svaradi Haralldr styggliga: Veit ec frændsemi ockra Magnús konungs, þóttu minnir mic eigi á þat, oc er eigi fyri því sva, at vid farimz í móti med herskilldi, at eigi mundi ockrir fundir verda skapligri adrir. Sveinn brá þá lit, oc mælti: Geta þess sumir, Haralldr, at þú hafir giört sva fyrr, at hallda þat eitt af einka-málunom, er þer þickir sem þitt mál dragi hellst fram. Haralldr svarar: minni stadi mantu á vita, at ec hafa eigi halldit einka-málin, enn ec veit at Magnús konungr muni kalla at þú hafir eigi halldit vid hann; geck þá sína leid hvarr þeirra. Um kvelldit, þá er Haralldr geck til svefnis í lypting á skipi síno, mællti hann vid skó-sveinn sinn: Nú man ec eigi liggia í reckionni í nótt, þvíat mer er grunr á, at eigi muni allt vera svikalaust. Ec fann í kvelld, at Sveinn mágr minn vard reidr miök vid bermæli mín: scaltu hallda vörd á, ef her verdr nockot í nótt til tíðinda. Geck þá Haralldr í annan stad at sofa, en lagði þar í rúm sitt tre-stobba

einn. Enn um mid-nætti var róit á báti at lyptingonni, oc geck madr upp þar, oc spretti lyptingar-tialldino, geck sídan upp hiá, oc hió í rúm Haralldz med mikilli öxi, sva at föst stód í treno. Sá madr lióp þegar úti bátinn, enn nida-myrkr var á, oc reri hann þegar í brott, enn öxiu var eptir föst í treno til iartegna. Sídan vaeði Haralldr upp menn sína, oc let þá vita vid hver svik þeir voro komnir: megom ver þat siá, sagði hann, at ver höfom her eigi lids vid Svein, þegar er hann vill sláz á svik-ræði vid oss; man sá varr enn bezti kostr at leita brott hedan medan má: leysom ver nú skip vár, oc róm brott hlióðliga. Þeir giördo sva, róa um nóttina norðr med landi fyrri dag nockro; fara sídan dag oc nótt þar til er þeir fundu Magnús konung, þar sem hann lá med herr sinn. Geck þá Haralldr á fund Magnús konungs frænda síns, oc vard þar fagna-fundr, sva sem Þiódolfr segir:

Vatn letz vísir slitna
 vid kudr af skör þudri
 dyr kluso flóð þars fórot
 flaut or Danmörk austan.
 Baud hálf vid sic sídan
 sonr Olafs þer hála
 frændor hyck at þat syndiz
 feguir lönd oc þegna.

Sídan tala þeir frændor milli sín, oc fór þat allt sáttgiarnliga.

CAP. XXIII.

MAGNÚS KONUNGR GAF HARALLDI HÁLFAN
NOREG.

Magnús konungr lá við land, oc hafði landtialld á landi uppi; hann baud þá Haralldi frænda sínom til bordz síns, oc geck Haralldr til veitzlonnar við LX manna, var þar allfögr veizla. Enn er áleiddaginn, geck Magnús konungr inn í tialldit þar er Haralldr sat, menn gengo með hönom oc báro byrðar, þat voro vapn oc klædi. Þá geck konunginn at inom yzta manni, oc gaf þeim sverð gott, oc öðrom skiöld, þá kyrtil, þá klædi, eða vapn, eða gull, öllum gaf hann nockorn grip, þeim stærri er tignari voro. Síðan kom hann fyrir Haralld frænda sinn, oc hafði í hendi sér reyr-teina tva, oc mælti sva: hvarn villtu her þiggja teininn frændi? Þá svarar Haralldr: þann er nærri mér er. Þá mælti Magnús konungr: Með þessom reyr-sprotu gef ec yðor hálf Noregs velldi með öllum skyldom oc sköttom, oc allri eign er þar liggr til, með þeim formála, at þú skalt íamn-rettr Konungr í öllum stödom í Nor-egi sem ec; enn þá er ver erom allir saman, skal ec vera fyrirmadr í allri heilsan oc þíónan, oc at sæti. Ef þeir ero tignirmenn, skal ec í midio sitia; ec skal hafa konungs-lægi oc konungs-bryggio. Þer skulut oc styrkia oc flytia vart ríki í þann stad, at

ver giörom ydr at þeim manni í Noregi, er ver hugdom at engi skyldi verda medan varr hauss væri uppi fyrir ofan molld. Þá stóð upp Haralldr konungr, oc þackadi hönom vel tign oc vegsemd. Sctiaz þá nidr bádir, oc voro allkátir. Þann dag at aptni geck Haralldr oc hans menn til skip síns.

CAP. XXIV.

HARALLDR KONUNGR VEITTI MAGNÚSI KON-
UNGI HÁLFT GULL VID SIC.

Enn eptir um morguninn let Magnús konungr blása til þings öllo lidino. Enn er þing var sett, þá lysti Magnús konungr fyrir öllum herinom giöf þeirri, er hann hafdi gefit Haralldi frænda sínom. Þórirr á Steig gaf Haralldi konungs-nafn þar á þingino. Þann dag baud Haralldr konungr Magnúsi konungi til bordz síns, oc geck hann um daginn vid LX manna til land-tiallda Haralldz konungs, þar sem hann hafdi veizlo búit; voro þar þá bádir kongarnir í hásæti oc samsæti, oc var þar veizla fögr, oc veitt it kappsamligsta, voro konungar kátir oc gladir. Enn er áleid daginn, þá let Haralldr konungr bera tauskor í tialldit miöc margar; þar báro menn oc klædi oc vapn, oc annarskonar gripi, þat fe midladi Haralldr oc scripti med mönnom Magnús konungs, þeim er voro í veizlonni. Sidan let hann

leysa tauskornar, oc mælti til Magnús konungs: Þer veittut oss fyrra dag ríki mikít, er þer höfdu áðr unnit af óvinom ydrom oc varom, enn tóku oss til samlags við yðr, var þat vel giört, þvíat þer hafit mikít til unnit. Nú er her í annan stad, er þer höfom verit útlendis, oc þó verit í nockrom mannhættom áðr enn ec hefi saman komit þesso gulli, er þer munut nú síá mega; vil ec þetta leggja til felags við yðr, Magnús konungr; skulo við eiga lausa-fe allt báðir, oc hafa iöfnom höndom, sva sem við eigom ríki hálfu hvarr ockar í Noregi. Ec veit at skaplyndi ockar er ólíkt, er þú madr aurvari myklo enn ec: munu við sáptu fe þesso með ockor at iafnadi, ferr þá hvarr með sinn lut sem vill at friálso. Síðan let Haralldr breiða niðr nautz-lúð mikla, oc staupa þar á gullino or töskunom; því næst voro teknar skálir oc met, oc reitt í sundr gullit oc skipt öllu at iöfno með vagom, oc þótti öllum mönnum er sá mikil furða er í Nordr-löndin skyldi vera sva mikít gull samankomit í einn stad. Þetta var þó reyndar Gríckia konungs eign oc audr, sva sem allir menn segja, at þar se rautt gull húsom fullom. Konungarnir voro þá allkátir. Þá kom upp staup eitt, þat var sva mikít sem mans-höfud; tók Haralldr konungr upp staupit oc mælti: hvar er nú þat gull, Magnús frændi, er þú reidir í móti þessom knapp-höfda? Þá sagði Magnús konungr: Sva hefir

hefir gefiz ófridrinn oc stórir leidánger, at nálíga allt gull oc silfr er uppgengit þat er í minni vard-veizlu er. Nú er eigi meira gull en hrínger þessi í minni eign: tók hann þá hrínginn af hendi ser oc seldi Haralldi. Haralldr leit á oc mælti: þetta er lítit gull, frændi, þeim konungi er tveggja konungaríki á, enn þó muno sumir efa um hvart þú átt at retto þenna hríng. Þá svaradi Magnús konungr áhyggiosamlíga: Ef ec á eigi þenna hríng at retto, þá veit ec eigi hvat ec hefi rett fengit; þvíat Olafr konungr hinn Helgi, fadir minn, gaf mer þenna ríng at þínom efsta skílnadi. Þá sagdi Haralldr konungr læiandi: satt segir þú, Magnús konungr, at fadir þinn gaf þer þenna ríng; þann ríng tók hann af föðr mínom fyrir ecki mikla sök: er þat oc satt, at þá var eigi gott smá-konungom í Noregi ér fadir þinn var sem ríkistr. Haralldr konungr gaf Steigar-Þóri at veizlonni mösor-bolla, hann var gídr med silfri, oc silfr-hallda yfir, oc gyllt hvartveggia, oc fullr upp af skírom silfr-peningóm; þar fylgdo oc II gull-hríngar, oc stódo mörk bádir saman; hann gaf hönom oc skickio sína, þat var brúnn þúrpuri, oc hvít skinn undir, oc het hönom miclom metnadi oc vinátto sinni. Þórgíls Snorrason vitr madr segir sva, at hann sá altaris-klædi þat er gíört var or mötlinom: enn Gudríd dóttir Guthorms Steigar-Þórissonar sagdi, at hann qvad, Guthorm

födr sinn eiga bollann sva at hon sá. Sva segir
Baulverkr:

Heimil vard er ec heyrda
hodda strídir þer síðan
græn enn gull bautt hanom
grund er Magnús fundot.
Endiz yckar frænda
allfrilliga á milli
sátt en síðan vætti
Sveinn rómölldo einnar.

CAP. XXV.

FRÁ MAGNÚSI KONUNGI.

Magnús konungr oc Haralldr konungr redo bádir
Noregi enn næsta vetr eptir sætt þeirra, oc hafði
sína hird hvarr þeirra. Þeir fóro um vetrinn um
Upplönd at veizlom, oc voro stundum bádir samt,
enn stundum ser hvarr þeirra; þeir fóro allt norðr
til Þrándheims, oc til Nidaróss. Magnús konungr
hafði vardveitt helgan dóm Olafs konungs síðan er
hann kom í land, klippti hár hans oc negl á hve-
riom XII mánadom, oc hafði siálfr lykil þann er
skrínit mátti upplúka med. Urdo þá margskonar
iarteinir at helgom dómom Olafs konungs. Brátt
giördoz greinir í of samþycki konunga, oc voro
margir sva illgiarnir, at þeirra gengo sva illa í milli.

CAP. XXVI.

FRÁ SVEINI KONUNGI ULFSSYNI.

Svein Ulfsson lá eptir í höfninni, þá er Haralldr hafði brott farit. Síðan leiddi Sveinn at spurningom um farar hans. Enn er hann spurdi, at Magnús oc Haralldr höfðu sættz, oc þeir höfðu þá einn her bádir, þá hellt hann lidi síno austr fyrir Skáneyiar sído, oc dvaldiz þar til þess er hann spurdi um vetrinn, at Magnús konungr oc Haralldr konungr höfðu norðr halldit lidi síno til Noregs. Síðan hellt Sveinn lidi síno suðr til Danmerkr, oc tók hann þar þá allar konungs-tekior þann vetr.

CAP. XXVII.

UM KONUNGS-LAGI.

Enn er vára tók búdo þeir út leidángri af Noregi Magnús konungr oc Haralldr konungr frændi hans. Þat barsk at eitt sinn, at frá er sagt at Magnús konungr oc Haralldr konungr lágo um nótt í einni höfn, enn um daginn eptir var Haralldr konungr fyrri búinn, oc sigldi hann þegar; enn at kvelldi lagdi hann til hafnar þeirrar er þeir Magnús höfðu ætlat at vera þá nótt. Haralldr lagdi skipi síno í konungs-lægi oc tiöldodo þar. Magnús konungr sigldi síðar um daginn, oc kom þar sva til hafnar,

at þeir Haralldr konungr höfdo tialldat ádr. Siá þeir at Haralldr hafði lagt í konungs-lægit, och hann ætlar þar at liggia. Enn er þeir Magnús konungr höfdo hladit seglom sínom, þá mælti Magnús konungr: greidi menn nú atródrinn, oc setiz med endilöngom bordom, enn sumir brióti upp vapn sín oc vapniz; enn med því at þeir vili eigi brott leggia, þá skulom ver beriaz. Enn er Haralldr konungr serr, at Magnús konungr ætlar at leggja til bardaga vid þá, mælti hann vid sína menn: höggvi þer festarnar, oc látit slá skiponom or lægi, reidr er Magnús frændi nú. Sva giördo þeir, at þeir lögdo skipin or lægino, enn Magnús konungr legg skipom sínom í lagit. Þá er hvarrirtveggio höfdo umbúiz, geck Haralldr konungr med nockora menn á skip Magnúsar konungs: konungr fagnadi hönom vel oc bad hann vel kominn. Þá svaradi Haralldr konungr: þat hugda ec, at ver værim med vinom komnir, enn nockot grunadi mic um ríd, hvart þer munit sva vilia vera láta; enn þat er satt sem mælt er, at bernska er bráðged: vil ec eigi virða á adra leid, enn þetta væri æsku-bragd. Þá sagdi Magnús konungr: þetta var ættar-bragd enn eigi æsku, þótt ec mættag muna hvat ec gaf, eda hvat ec varnada: enn ef þessi litli lutr væri tekinn nú fyrri vart ráð, þá mundi vera brátt annar; enn alla sætt vilíom ver hallda þá er giör er, oc þat sama vilíom ver

af ydr hafa er ver eigom skilt. Þá svarar Haralldr konungr: þat er oc forn sidr at enn vitrari vægi; geck sídan aptr á skip sitt. I þvilíkom vidscriptom konunganna fannz þat, at vant var til at gæta: tölðo Magnús konungs menn at hann hefði rett at mæla, enn þeir er úvitrari voro, tölðo þat, at Haralldr konungr væri nockot svívirðr. Enn Haralldz konungs menn sögðo, at eigi væri adra lund skillt med þeim, enn Magnús konungr skyldi lægit hafa, ef þeir kæmi iafn-snimma, enn Haralldr væri eigi skyldr at leggja or lægino, ef hann kæmi fyrí: tölðo þeir Haralld hafa or vel oc vitrliga ráðit. Enn þeir er verr villdo umræða, tölðo at Magnús konungr villdi riúfa sætt, oc sögðo at hann hafði giört rángt oc ósæmd Haralldi konungi. Vid slikar greinir giörðoz brátt umræða óvitra manna til þess at konungom vard sundrþycki at; márt fannz þa annat til þess, þat er konungom þótti sinn veg hvarom, þó at her se fátt ritat.

CAP. XXVIII.

ANDLÁT MAGNÚSAR KONUNGS GÓDA.

Magnús konungr oc Haralldr konungr helldo her sínom sudr til Danmarkar. Enn er Sveinn spurdi þat, þá flyði hann undan austr á Skáni. Þeir Magnús konungr oc Haralldr konungr dyöllðoz lengi

um sumarit í Danmörko, lögdo þá land allt undir sic. Þeir voro á Iotlandi um haustit. Þat var eina nótt, þá er Magnús konungr lá í hvílo sinni, at hann dreymdi at hann þóttiz staddr þar sem var fadir hans, hinn helgi Olafr konungr, oc þótti hann mæla við sic: hvern kost villdo sonr minn? at fara nú með mer, eda verda allra konunga ríkastr oc lífa lengi, oc giöra glæp þann, at þú fáir annat-hvart trautt bætt eda eigi. Enn hann þóttiz svara: ec vil at þú kíósir fyrri mína hönd fadir; þá þótti hönom konungrinn svara: þá skalltu með mer fara. Magnús konungr sagdi þá draum sinn mönnum sínom. Enn litlo sídar feck hann sótt, oc lá þar er heitir Suda-þorp. Enn er hann var nærr kominn bana, þá sendi hann Þóri bróðr sinn með iartegnom til Sveins Ulfssonar þess erendis, at hann skyldi veita hiálp Þóri þá sem hann þyrfti: þat fylgdi ord-sendingonni, at Magnús konungr gaf Sveini Dana-velldi eptir sinn dag, sagdi at þat var makligt, at Haralldr redi fyrri Noreg, en Sveinn fyrri Danmörk. Sídan andadiz Magnús konungr Gódi, oc var hann allmiök harm-daudi allri alþýdo. Sva segir Oddr Kikina-skálld:

Felldo menn þá er milldan
mörg tár í gröf báro
þúng byrdr var sú þengil
þeim er hann gat seima.

Deilldiz

Deilldiz hugr sva at helldo
 húskarlar grams varla
 siklings þíód en síðan
 sat opt hnipin vatni.

CAP. XXIX.

LÍK-FERD MAGNÚSAR KONUNGS.

Eptir þessi tíðindi hafði Haralldr konungr þíng
 við lídit, sagði mönnom ætlan sína, at hann vill
 fara með herinom til Vebiarga-þíngs, oc láta sic
 taka til konungs yfir allt Dana-velldi, vinna síðan
 landit, telr þat íamnvel sína erfð sem Noregs-velldi,
 eptir Magnús konung frænda sinn, bíðr þá lídit at
 efla sic, lætr þá munu Noregs-menn vera allan alldr
 yfirmenn Dana. Þá svarar Einar þambar-skelfir,
 let sér vera skyldra at flytia lík Magnús konungs
 fóstura síns til graftar, oc færa hann fedr sínom
 Olafi konungi norðr í Nidarós, enn beriaz útlendis,
 eða ágirnaz annars konungs velldi oc eign. Lykr
 sva málino, at betra þótti hénom at fylgia Magnúsi
 konungi daudom, enn hveriom annarra konunga
 lífanda: let síðan taka líkit oc búa um vegliga, sva
 at síá mátti umbúnadinn á konungs skipit. Þá biog-
 goz allir þrændir oc allir Nordmenn til heimferdar
 með líki Magnús konungs, oc raulfz þá leidángriinn.
 Sér þá Haralldr konungr þann sinn kost beztan, at

fara aptr til Noregs, oc eignaz þat velldi fyrst, oc esfaz þadan at lidi: ferr nú Haralldr konungr aptr med öllo lidino til Noregs. Enn þegar er hann kom í Noreg, átti hann þing við lands-menn, oc let taka sik til konungs yfir land allt: fór hann sva allt austan um Víkina, at hann var til konungs tekinn á hverio fylki í Noregi. Einar þambar-skelfir fór med liki Magnús konungs, oc med hönom allr þrænda-herr, oc fluttu likit til Nidaróss, oc var hann iardadr at Clemens-kirkio: þar var þá skrin hins heilaga Olafs konungs. Magnús konungr hafdi verit medalmadr á vöxt, rettleitr oc liósleitr, oc lióss á hár, sniall-mæltr, skiót-ordr, skörung-lyndr oc hinn mildasti af fe; hann var hermadr mikill oc hinn vapn-diarfasti, allra konunga var hann vinsælastr, sva bædi lofodo hann vinir oc óvinir.

CAP. XXX.

FRÁ SVEINI KONUNGI ULFSSYNI.

Svein Ulfsson var þat haust staddr á Skáni, oc byriadi ferd sína austr í Svía-velldi, oc ætladi at gefa upp konungs-nafn þat er hann hafdi tekit í Danmörko. Enn er hann var kominn til hestz síns, þá rido þar til hans menn nockorir, oc sögdo hönom tíðindi þau hinn fyrsto, at Magnús konungr Olafsson var andadr, oc þat med at allr Nordmanna-

her var brott-farinn or Danmörko. Sveinn svarar því sciótt oc mælti: því skyt ec til Guds, at alldri sídan scal ec flyia Dana-velldi medan ec lifi. Steig hann þá á hest sinn oc reid sudr á Skáni: dreif þá þegar lid mikit til hans. Þann vetr lagdi hann undir sic allt Dana-velldi, tóko þá allir Danir hann til konungs. Þórir, bródir Magnús konungs, kom til Sveins þegar um haustit med ordsending Magnús konungs, sva sem fyrr var ritat: tók Sveinn við hönom vel, oc var Þórir lengi med hönom sídan í gódo yfirlæti.

CAP. XXXI.

AF HARALLDI KONUNGI SIGURDARSYNI.

Haralldr konungr Sigurdarson tók konungdóm yfir öllum Noregi eptir andlát Magnús konungs Olafssonar. Enn er hann hafði ráðit Noregi einn vetr, oc at vári kom, þá baud hann leidángri út af öllu landi, hálfom almenningi at lida oc skipom, oc hellt sudr til Íótlands; hann heriadi um sumarit víða oc brendi, oc lagdi inn í Góðnar-fiörd. Þá orti Haralldr konungr þetta:

Látom ver medan lirlar
 líneik veri sínom
 Gerdor í Góðnar-firdi
 galldrs ackeri hallda.

Þá mælti hann til Þiódolfs skállds, bad hann þar
 vid yrkia; hann qvad:

Sumar annat skal sunnar
 segi ec eina spáfleini
 ver aukom kaf kroki
 kalldnefr furo hallda.

Til þessa vísar Bölverkr í sinni drápo, at Haralldr
 fór et næsta sumar eptir andlát Magnús konungs til
 Danmerkr. Sva segir Bölverkr:

Leidángur bióttu af láði
 laugr geck um skip fögro
 giálfr stódom reistu grædi
 glæstom ár it næsta.
 Skockr lá dyrr á dockri
 Danir váro þá báro
 skeidor sá herra fyrri haudri
 hládnar illa stadnir.

CAP. XXXII.

FRÁ GEYSO-DÆTROM.

Þá brendo þeir bæ Þórkels Geysu, hann var höfð-
 ingi mikill, voro þá leiddar dætor hans bundnar
 til skipa. Þær höfdo giórt spott mikit ádrum vetr-
 inn um þat, at Haralldr konungr mundi fara til
 Danmerkr med her-skipom, þær skáro or osti ack-
 eri, oc sögdo at slíc mundo vel hallda skipom No-
 regs konungs. Þá var þetta kvedit:

Skáro iast or osti
 eybaugs Dana meyar
 þau of öngrudo þengil
 þing ackeris hrínga.
 Nú ser mörg í morgon
 mærlær at því færi
 ærnan krók or iarni
 allvalldz skipom hallða.

Sva segia menn, at niósnaðr mælti við dætor
 Þórkels Geyso, sá er set hafði flota Haralldz kon-
 ongs: þer saugdo þat Geyso-dætor, at Haralldr kon-
 ungr mundi eigi koma til Danmerkr. Dotta Þór-
 kels-dóttir svaradi: sva var í gærna. Þórkell leysti
 út dætor sínar með ógrynni fiár. Sva segir Grani:

Let alldregi úti
 úsvífr Kraka drífo
 hlauck í harda þjóckom
 Hornskógi brá þorna.
 Fila drottinn rak flótta
 fianda grams til strandar
 aud vard út at reida
 allskiótt fadir Dotto.

Haralldr konungr heriadi allt þetta sumar í Dan-
 mörk, oc feck ógrynni fiár, enn eigi vard hann
 flendr á því sumri í Danmörko. Fór hann aptr til
 Noregs um haustit, oc var þar um vetrinn.

CAP. XXXIII.

FRÁ QVON-FANGI OC BÖRNOM HARALLDS
KONUNGS INS HARDRÁDA.

Haralldr konungr feck Þóro, dóttur Þórbergs Arnasonar, enn næsta vetr eptir er Magnús konungr andadiz. Þau átto II sono, het hinn elldri Magnús, en annarr Olafr. Haralldr konungr oc Ellisif drottning átto dætur II, het önnor Maria, en önnor Ingigerdr. Enn it næsta vár eptir þessa herferd er nú var ádr frásagt, baud Haralldr konungr lidi ut, oc fór um sumarit til Danmerkr oc heriadi, oc sídan hvert sumar eptir annat. Sva segir Stúfr skálld:

Autt vard Falstr at frettom
feck drótt mikinn ótta.
Gæddr var hrafn enn hræddir
hvert ár Danir váro.

CAP. XXXIV.

UM HERS-TILBÚNAD SVEINS KONUNGS ULFSONAR OC HARALLDS KONUNGS.

Sveinn konungr red fyrri öllu Dana-velldi sídan er Magnús konungr andadiz; hann sat um kyrt á vetr-om, enn lá úti med almenning á sumrom, oc heitadiz at fara norðr í Noreg med Dana-her, oc giöra þar eigi minna illt, enn Haralldr konungr giörði í

Danmörk. Sveinn konungr baud Haralldi konungi um vetrinn, at þeir skyldi finnaz um sumarit eptir í Elfinni, oc beriaz þar til þrautar, eda sæltaz el-ligar. Þá bioggo hvarirtveggio allan vetrinn skip sín, oc hafa úti hálfan almenning bádir eptir of sumarit. Þetta sumar kom utan af Islandi Þórleikr fagri, oc orti flokk um Svein konung Ulfsson; hann spurdi, þá er hann kom í Noreg, at Haralldr kon-ungr var farinn súdr til Elfinnar móti Sveini kon-ungi. Þá qvad Þórleikr þetta:

Ván er at vísa kænna
vigs á rakna stigom
ört í odda snerto
Inn-prænda lid finni.
Þó má enn hvarr annan
aundo nemr eda löndom
lítt hyggj Sveinn á sáttir
sialldfestar Gud vallda.

Oc enn qvad hann þetta:

Færir reidr sá er rauda
raund hefir opt fyr löndom
breid á Budla slódir
bord raukn Haralldr nordan.
Enn lauks um sæ sækia
Sveins fagr drifin steini
glæsi dyr þess er geira
gullmunnut rydr sunnan.

Haralldr konungr kom til áqvedinnar stefno med her sinn; þá spurdi hann at Sveinn konungr lá

sudr vid Siáland med sínom flota. Þá skipti Haralldr konungr lidi síno, let aptr fara flestan bónda-herinn, hann fór vid hird sinni oc lendum mönnum oc villdarlidino, oc allt þat af bónda-lidino er næst var Dönom. Þeir fóro sudr til Iotlandz fyrri sunnan Vendilskaga, sva sudr um Þjódo, fóro þar allt her-skilldi. Sva segir Stúfr skálld:

Flydo þeir á Þjódo
Þengils fund af stundo
stórt red hugprútt hiarta
Harallds aund ofarr löndom.

Þeir fóro allt sudr til Heida-bæjar, tóko kaupstadinn oc brendo. Þá orto menn Harallds konungs þetta:

Brendr var upp med endom
allr enn þat má kalla
hraustligt bragd er ec hugda
Heida-bærr af reidi.
Ván er at vinnim Sveini
varc í nótt fyrir ótlo
gaus hárr logi or húsom
harm á borgar armi.

Þessa getr oc Þórleikr í sínom flokki, þá er hann hafði spurt at eigi hafði ordit orrosta vid Elfi:

Hví hefir til Hauka-bæjar
heipt-giarn konungr árnat
fólk-raugnir getr fregna
fylkis sveit hinn er veitat.

þá er til þengils bæjar
þarflaust Haralldr austan
at þat án of væri
endr byr-skíðom rendi,

CAP. XXXV.

UNDANFERD HARALLDS KONUNGS Á IOT-
LANDS HAFI.

Þá fór Haralldr konungr norðr oc hafði LX skipa,
oc voro flest stór oc hláðin miðc af herfáangi, er
þeir höfðu tekit um sumarit. Enn er þeir sigldo
norðr fyrri Þjóðo, þá kom Sveinn konungr af landi
ofan með her mikinn, hann bauð þá Haralldi kon-
ungi at beriaz, oc gánga á land. Haralldr kon-
ungr hafði lið meirr en hálfo minna, hann bauð
Sveini konungi at beriaz á skipom við sic. Sva segir
þórlleikr fagri:

Bauð sá er beztrar tíðar
borinn varð und Midgardi
ríkri Þjóð at riðða
randir Sveinn á landi,
þó letz helldr ef helldi
hvat-ráðr konungr láði
á byriar val beriaz
bil-styggr Haralldr vilia.

Eftir þetta sigldi Haralldr konungr norðr fyrri
Vendilskaga, bægið þeim þá veðr, oc lögðu undir
Hlesey, oc lágu þar um nótt. Þá giörði miörkva

sæ-lægian; enn er mornadi, oc sól rann upp, þá sá þeir annan veg á hafit sem elldar nockorir brynni. Þá var þat sagt Haralldi konungi, þá sá hann til oc mælti þegar: láti tiölld af skipom, oc taki menn ródr; Dana-herr mun kominn at oss, mun rodit myrkvanom þar sem þeir ero, man sól skína á dreka-höfud þeirra, þau gullögd ero. Sva var sem hann sagdi, þar var þá kominn Sveinn Dana-konungr med óvígian her. Röro þeir þá hvarirtveggio sem mest máttu. Danir höfdu skip ár-flíótari, enn Nordmanna skip voro bædi sollin oc sett miöc; dró þá saman miöc med þeim. Þá sá Haralldr konungr, at eigi mundi lyda sva búit: dreki Harallds konungs fór síðast allra skipa hans. Þá mælti Haralldr konungr, at kasta skyllði fyrri bord vidom, oc láta koma á klædi oc gripi góða; logn var sva mikit, at þetta hóf fyrri straumi. Enn er Danir sá fe sitt reka á hafino, þá viko þeir þar til er fyrstir voro; þótti þat dælla at taka er flaut laust, enn sækia inn um bord at Nordmönnom; dvaldiz þá eptir ródrinn. Enn er Sveinn konungr kom eptir þeim med scip sín, eggiadi hann oc qvad skömm vera mikla, sva mikinn her sem þeir höfdu, ef þeir skyllði eigi fá tekit þá, er þeir höfdu lid lítit, oc eiga valld þeirra. Þá tóko Danir at herda ródrinn í annat sinn. Enn er Haralldr konungr sá at meira gengo skip Dana, þá bad hann sína menn letta

skipin, oc bera fyri bord mallt oc hveiti oc flesk, oc höggva nidr dryck sinn; stóð þá við um ríd. Þá let Haralldr konungr taka víg-gyrdla oc verpla, oc tunnor er tómar voro, oc kasta fyri bord, oc þar med herteknom mönnum. Enn er þat rak allt saman á síónom, þá bad Sveinn konungr hialpa mönnum, oc var sva giört, enn í þeirri dvöl dró í sundr med þeim. Snero þá Danir aptr, enn Nordmenn fóro leid sína. Sva segir Þórleikr fagri:

Allt of frá ec hve elti
Austmenn á veg flausta
Sveinn en siklingr annar
snar-lundadr hellt undan.
Fengr vard þrænda þengils
þeir letto skip fleiri
allr á eli sollao
Iotlandz hafi fljóta.

Sveinn konungr veik aptr flotanom sudr undir Hlesey, hitti þar VII skip af Nordmönnum, þat var leid-ángurs-lid oc bændor einir. Enn er Sveinn konungr kom at þeim, þá bado þeir ser grida, oc budo fe fyri sic. Sva segir Þórleikr fagri:

Sætt budo seggia drottni
siklings vinir mikla
svæfdo hialldr þeir er höfdo
hug-stinnir lid minna.
Oc snarrádir síðan
sókn er ordom tókoz

aund var yta kindom
ófaul búendur dvöldu.

CAP. XXXVI.

FRÁ HARALLDI KONUNGI.

Haralldr konungr var madr ríkr oc stíórnsamr innanlandz, spekingr mikill at viti, sva at þat er alþydo mál, at engi höfðingi hafi sá verit á nordr-löndom er iamn-diúp-vitr hafi verit sem Haralldr, eda rád-sniallr. Hann var orrostomadr mikill oc enn vapn-diarfasti; hann var sterkr oc vapn-færr hveriom manni betr, sva sem fyrr er ritat, enn þó er miklo fleira óritat hans frægdarverka; kemr til þess ófrædi var, oc þat annat, at ver viliom eigi setia á bækor vitnis-lausar sögur, þótt ver hafim heyrtr rædor, eda getit fleira luta, þá þickir oss hedan í frá betra at vid se aukit, enn þetta sama þurfu or at taka. Er saga hans mikil sett í Kvædi þau er Islendzkir menn færdo hönom siálfom eda sonom hans, var hann fyri þá sök vinr þeirra mikill; hann var oc hinn mesti vin hingat til allra landzmannanna; oc þá er var mikit hallæri á Islandi, þá leyfdi Haralldr konungr IV skipom miölleyfi til Islands, oc qvad á, at ecki skippund skyllði vera dyrra, en fyri hundrat vadmála; hann leyfdi utanferd öllom fátækom mönnom þeim er ser fengo vistir um haf, oc þadan af nærdiz land þetta aptr

til ár-ferdar oc batnadar. Haralldr konungr sendi út hingat klucko, til kyrkio þeirrar er hinn helgi Olafr konungr sendi vidinn til, er sett var á Þíngvelli; þvilík minni hafa menn hingat til landz Haralldz konungs, oc mörg önnor í stórgiöfom, er hann veitti mönnom þeim er hann sóttu heim.

CAP. XXXVII.

FRÁ HALLDORI SNORRASYNÍ.

Halldor Snorrason oc Ulfr Ospaksson, þeir er fyrr var getit, komo í Noreg med Haralldi konungi. Þeim var ólíkt farit at í mörgo. Halldor var manna mestr oc sterkastr, oc enn frídasti síonom. Þat vitni bar Haralldr konungr hönom, at hann hefði verit þeirra manna med hönom, er sízt brygdi við vaveifliga luti, hvart er þat var mann-háski eda fagnadartíðindi, eda hvat sem at hendi kom, þá vard hann eigi gladari oc eigi ógladari; eigi svaf hann meira ne minna, eda drack eda neytti matar, enn sva sem vandi hans var til. Halldor var madr fá-mælltr oc stírd-ordr, ber-mælltr oc stríð-lundadr oc ómiúkr, enn þat kom þá illa við konunginn, er hann hafði med ser marga adra göfga menn oc þíonosto-fulla; dvaldiz Halldor litla hríd med konunginom, fór hann til Islandz, oc geyrði þar bú í Hiardarholhti, bió þar til elli, oc vard gamall.

CAP. XXXVIII.

FRÁ ULFI OSPAÐSSYNI.

Ulfur Ospaksson var með Haralldi konungi í miklöm kærléiköm, hann var enn vitrastí maðr, sníallr í máli, skörungr mikill, trygg og einfalldr. Haralldr konungr gíorði Ulf stallara sinn, og gíptí hanöm Iórunni Þórbergss-óóttur, systur Þóro er Haralldr konungr átti. Börn Ulfs og Iórunnar voro þau Ióann sterki á Rasvelli, og Brígíða móðir Sauba-Ulfs, fauðr Petrs Byrðar-Sveins, föðr Sveins og þeirra Ulfs Flys. Son Ions sterka var Erlendr Himalldi, faðir Eysteins Erki-biskups og bræðra hans. Haralldr konungr gaf Ulf stallara lénðsmans rétt, og XII marka veizlur, og umfram hálfé fylki í Þrándheimi. Sva segir Steinn Herðísarson í Ulfs-floeki.

CAP. XXXIX.

KIRKNA OG HÚSA BYGGING.

Magnús konungr Olafsson lét gíöra Olafs-kirkíö í kaupáangi; í þeim stað haðí nátt-sett verit lík Olafs konungs, þat var þá fyrir ofan bæinn. Hann lét þar og reisa konungs-garðinn. Kirkían varð eigi algör áðr konungrínn andaðiz; lét Haralldr konungr fylla þat er áskorti. Þar í garðinom lét hann og efna at gíöra sér steinn-höll, og varð hon eigi full-

komin ádr hann letz. Haralldr konungur let reisa af grund-velli Mario-kirkio uppi á Melinom, nær því er heilagur dómr konungsins lá í iördo, inn fyrsta vetr eptir fall hans; þat var mikit musteri, og gert sterkliga at límino, sva at varla feck brotit, þá er Eysteinn Erki-biscop let ofan taka. Heilagur dómr Olafs konungs var vardveittr í Olafskirkio medan Mario-kirkia var í giörd. Haralldr konungur let húa konungs gardinn ofan frá Mariokirkio vid ána, þar sem nú er; enn þar sem hann hafdi látit höllina giöra, þá let hann þat hús vígia til Gregorius kirkio.

CAP. XL.

UPPHAF HÁKONAR HVÍTA IVARSSONAR.

Ivarr Hvíti er madr nefndr, hann var lendrmadr göfugr, hann átti bú á Upplöndom, hann var dóturson Hákonar Iarls hins Ríka. Ivarr var allra manna frídastr synom. Son Ivars het Hákon, frá hönom er sva sagt, at hann var umfram alla menn, þá er í þann tíma voro í Noregi, at frídleik og afli og atgiörfi; hann var þegar á unga alldri í herferdom, og afladi ser sva mikillar fremdar, og giördiz Hákon enn ágætasti madr.

CAP. XLI.

FRÁ EINARI ÞAMBAR-SKELFI.

Einarr þambar-skelfir var ríkastr lendramanna í Þrándheimi. Helldr var fátt um með þeim Haralldi konungi; hafði Einar þó veizlor sínar þær er hann hafði haft meðan Magnús konungr lifdi. Einar var miðe stór-eignadr, hann átti Bergliótu dóttur Hákonar Iarls, sva sem fyrr er ritat. Eindridi son þeirra var þá alroskinn, hann átti þá Sigríði dóttur Ketils Kalfssonar oc Gunnhilldar, systur-dóttur Harallds konungr. Eindridi hafði fríðleik oc fegurð af móðr-frændom sínom, Hákonu Iarli edr sonom hans, enn vöxt oc afl hafði hann af föðr sínom Einari, oc alla þá atgiörfi er Einar hafði umfram adra menn; hann var oc hinn vinsælasti madr, oc þeir bádir frændor, sva sem vattar víða í sögom.

CAP. XLII.

FRÁ ORMI IARLI.

Ormr var þá Iarl á Upplöndom; móðir hans var Ragnhilldr, dóttir Hákonar Iarls ins Ríka. Ormr var oc iun mesti ágætis madr. Þá var á Iadri austr á Sóla Aslacr Erlingsson, hann átti Sigríði, dóttur Sveins Iarls Hákonarsonar. Gunnhilldi, adra dóttur Sveins Iarls, átti Sveinn Ulfsson Dana-konungr. Slíkt
var

var afkvæmi Hákonar Iarls þá í Noregi, oc mart annat gaufugra manna, oc var ætt sú öll miclo frídari synom enn annat mannsfólk, oc flest atgervimenn miklir, enn allt göfugmenni.

CAP. XLIII.

HARDÝDGI HARALLDS KONUNGS.

Haralldr konungr var rík-lundadr, oc óx þat sva sem hann festiz í landino, oc kom sva at flestom mönnum dugdi illa at mæla í móti hönom, eda draga fram annat mál en hann vildi vera láta. Sva segir Þiódolfr skálld:

Þegn skyli herr sem hugnar
hialldr vitiadar sitia
dólg stæranda dyrom
drottinn vandr oc standa.
Lytr fólk-stara fæiti
fátt er til nema iátta
þat sem þá vill gotnom
þiód öll konungr bióða.

CAP. XLIV.

MIS-SÆTT HARALLDS KONUNGS OC EINARS ÞAMBAR-SKELFIS.

Einar þambar-skelfir var mestr forstióri fyri bændonom allt út um þrándheim, hellt hann upp svörom

fyri þá á þíngom, þótt konungs menn sóttu. Einar kunní vel til laga; skórti hann oc eigi dirfd til at flytia þat fram á þíngom, þó at siálfr konungr væri vit; lidsinnato hönom allir bændor. Konungr reiddiz því miöc, oc kom sva at lyedom, at þeir þreytto kappmæli med ser. Sagdi Einar, at bændor villdi eigi þola hönom ólaug, ef hann brautt landz-rett á þeim; oc fór sva nockorom sinnom á millom þeirra. Þá tók Einar at hafa siölmenni um sic heima, en þó miklo meira, þá er hann fór til bæiar, sva at konungr var þar fyri. Þat var eitt sinn at Einar fór inn til bæiar, oc hafdi lid mikit, lág-skip mikil VIII eda IX, oc nær fimn hundrut manna. Enn er hann kom til bæiar, geck hann upp med lid þat. Haralldr konungr var í gardi sínom, oc stóð úti loptsvödom, oc sá er lid Einars geck af skipom; oc segia menn at Haralldr qvad þá:

Her sec upp en aurva
 Einar þann er kann skeina
 þíálma þambar-skelmi
 þángs siölmennan gánga.
 Full-asli bídr fyllar
 finn ec opt drífr minna
 hilmis stóls á hæla
 húskarla lid Iarli.

Riódandi mun ráða
 randabliks or landi

oss nema Einar kyssi
 öxar munn inn þunna.

Einarr dvaldiz í bænom nockora daga.

CAP. XLV.

FALL EINARS OC ENDRIDA.

Einn dag var átt mót í bænom, oc var konungur siálfr á mótino; hafdi verit tekinn í bænom þjófr einn, oc var færdr á mótit. Madrinn hafdi verit fyrr med Einari, oc hafdi hönom vel getz at man-ninom. Þetta var Einari sagt, oc þóttiz hann vita, at konungr mundi eigi manninn láta undanganga fyri því at helldr, þótt Einari þætti þat máli skipta: lætr þá Einar vapnaz lid sitt, oc gánga síðan á mótit; tekr Einarr manninn af mótino med valldi. Eptir þetta gengo at beggia vinir, oc báro sáttmál milli þeirra; kom þá sva, at stefnolagi var ákomit, oc skyldo þeir hittaz siálfir. Mál-stofa var í konungs gardi vid ána Nid; geck konungr í stofona vid fá menn, enn annat lid hans var úti í gardinom. Konungr let snúa fiöl fyrir liórann, oc var lítit opit á. Þá kom Einarr í gardinn vid sitt lid; hann mællti vid Eindrida son sinn: verto med lidino úti, vid eingo man mer þá hætt. Eindridi stóð úti vid stofo-dyrin. Enn er Einarr kom inn í mál-stofona, þá mællti hann: myrkt er nú í mál-stofa konungsins. Iam-skiótt liópo menn at hönom, lögdo

sumir, en sumir hioggo. Enn er Eindridi heyrdi þat, þá brá hann sverdino oc hlióp inn í stofona; var hann þegar felldr oc bádir þeir. Þá liópo konungs menn oc fyri dyrnar, enn bændom felloz hendor, þvíat þeir höfdo þá eingan forgaungo-mann; eggiaði hver annan, sögdo at skömm var í, at þeir skylldo eigi hefna höfðingia síns: enn þó vard eigi af atgaungomni. Konungrinn geck út til lids síns, skaut á fylking oc setti upp merki sitt: enn eigi vard atgánga bóndanna. Þá geck konungr út á skip sitt oc allt lid hans, röri síðan út eptir ánni, oc sva út á fiörd leid sína. Bergliot kona Einars spurdi fall hans, var hon þá í herbergi því er þau Einarr höfdo ádr haft úti bænom; geck hon þegar upp í konungs gardinn, þar sem bónda-lidit var: hon eggiaði þá miöc til orrosto; enn í því bili reri konungr út eptir ánni. Þá mællti Bergliót: missom ver her nú Hákonar Ivarssonar frænda míns; eigi mundo bana-menn Einars róa her út eptir ánni, ef Hákon stædi her á ár-backanom. Síðan let Bergliót búa um lík þeirra Einars oc Eindrida; voro þeir iardadir at Olafs-kirkio hiá leidi Magnús konungs Olafssonar. Eptir fall Einars var Haralldr konungr sva miöc óþockadr af verki þesso, at þat eina skorti á at lendirmenn oc bændor veitto eigi konungi atferd oc helldo bardági vid hann, at eingi var forgaungo-madr til at reisa merki fyri bónda-herinom.

CAP. XLVI.

FRÁ HARALLDI KONUNGI OC FINNI
ARNASYNI.

Finnr Arnason bió þá á Yriom á Austrátt, hann var þá lendrmadr Harallds konungs. Finn timer átti Berglióto dóttur Hálfðanar Sigurdarsonar Syr. Hálfðan var bróðir Olafs hins helga oc Haralldz konungs. Þóra, kona Harallds konungs, var bróðor-dóttir Finnz Arnasonar; var Finn timer hinn kærasti konungi, oc allir þeir bræðor. Finn timer Arnason hafði verit nockor sumor í vestr-víking, oc höfðo þeir þá verit allir saman í hernadi Finn timer oc Gutthormr Gunnhillðarson oc Hákon Ivarsson. Haralldr konungur fór út eptir Þrándheimi, oc út á Austrátt; var hönom þar vel fagnat. Síðan talaz þeir við konunginn oc Finn timer, oc ræddo sín á milli of þessi tíðindi, er þá höfðo gerz fyrir skemsto í aftöko Einarar oc þeirra fedga, oc sva kurr þann oc þys, er þrændir gerdo at konungi. Finn timer sagði skiót-ordliga: Þer er vest farit at hvívetna; þú gerir hvervetna illt, enn síðan ertu sva hræðr, at þú veitz eigi hvar þú hefir þic. Konunginn svarar hlæiandi: Ek vil nú senda þic mágr inn til bæiar, vil ec at þú sættir bænder við mic; enn ef þat fæz eigi, þá vil ec at þú farir til Upplanda, oc komir því við Hákon Ivarsson, at hann se eigi mótgango-madr

minn. Finnur svarar: hvat skaltu tilleggia við mic, ef ec fer forsendo þessa, þvíat bæði þrændir oc Upplendingar ero fiandor þínir sva miklir, at ein-gom sendi-manni þínom er þangat fært, nema sín nióti við. Konungr svarar: far þú mágr sendi-förina, þvíat ec veit at þú kemr áleidiz, ef nockr kemr, at giöra oss sátta, oc kiós at oss bæn síðan. Finnur sagdi: halltu þá Konungr orð þín; enn ec mun kiósa bænina; ec kys grid oc landzvist Kálfi bróðr mínom, oc eignir hans allar, oc þat med, at hann hafi nafn-bætur sínar oc allt ríki sitt, slikt sem hann hafði áðr hann fór or laudi. Konungr iátar öllu þesso er Finnur mælti; höfdo þeir at þesso vitni oc hand-festar. Síðan mælti Finnur: hvat skal ec Hákon frambióða til þess, at hann iáti þer gridom, hann rædr nú mest fyrri þeim frændom. Konungrinn svarar: hitt skaltu nú fyrst heyra, hvat Hákon mælir til sætta fyrri sína hönd. Síðan kom þú míno máli sem þú mátt framast, enn at lyedom þá neita þú konungdóminom einom. Síðan fór Haralldr konungr sudr á Mæri, oc dró at ser lid oc giördiz fiölmennr.

CAP. XLVII.

FERD FINNS ARNASONAR.

Finnur Arnason fór inn til bæiar, oc hafði med ser húskarla sína, nær LXXX manna. Enn er hanu

kom til bæiarins, þá átti hann þing við bæiar-menn. Finnur taladi á þingino langt og sniallt, og bad bæiar-menn og bændor taka allt annat ráð, enn hataz við konung sinn, eða reka hann á brott; minnti þá á, hversu mart illt hafði yfir þá gengit, síðan er þeir höfðu þat giört við enn helga Olaf konung; sagði þat og, at konungr vill bæta víg þessi, sva sem hinir bezto menn og vitrosto gerdo. Lauk Finnur sva sinni ræðu, at bændor heto því at líta þetta mál standa kyrt þar til er aptr komi sendimenn þeir, er Bergliót hafði gert til Upplanda á fund Hákonar frænda síns Ivarssonar. Síðan fór Finnur út til Orkadals með þá menn er hönom höfðu fylgt til bæiar, þadan fór hann upp til Dofrafiallz, og austr um fiáll. Fór Finnur fyrst á fund Orms Iarls mágs síns. Iarlinn átti Sigríði, dóttor Finns; hann sagði Iarli til örenda sína.

CAP. XLVIII.

FRÁ FINNI OG HÁKONI IVARSSYNI.

Síðan lögðu þeir stefnolag við Hákon Ivarsson, enn er þeir finnaz, þá ber Finnur upp örendi sín fyrir Hákon, þau er Haralldr konungr baud hönom, fannz þat brátt í ræðu Hákonar, at hönom þótti ser skyllða mikil á vera, at hefna Eindrida frænda síns; sagði sva, at hönom varo þau ord komin or Þrándheimi,

at hönom myndi þar nógr styrkr fáz til uppreistar móti konungi. Síðan tíaði Finnur fyri Hákon, hve mikill munur hönom var, at betra var, at taka sva mnikil met-ord af konungi, sem hann kynni siálfr at beida, helldr enn hætta til þess, at reisa orrosto móti konungi þeim er hann var ádr þíónosto-bundiinn við, sagði at hann muni fara ósigr, oc hefir þú þá fyrigiört fe oc fridi. Enn ef þú sigraz á Haralldi konungi, þá mantu heita drottins sviki. Iarlinn studdi oc þessa rædo med Finni. Enn er Hákon hugsadi þetta fyri ser, þá lauk hann þat upp er hönom var í skapi, oc mællti sva: Ec mun sættaz við Haralld konung, ef hann vill gipta mer Ragnhildi, dóttur Magnús konungs Olafssonar, frændkono sína, med þvílíkri heiman-fylgio sem henni samir oc henni líkar. Finnur sagði at hann vill þesso iáta af konungs hendi. Stadfesta þeir þetta mál milli sín. Síðan fór Finnur aptr norðr til Þrándheims, settiz þá niðr þessi ófridr oc agi, sva at konungr hellt þá enn ríki síno í fridi innan-lands, þvíat þá var niðrdrepið sambandi því öllo er frændor Eindrida höfðo haft til mótsstödo við Haralld konung.

CAP. XLIX.

BÓN-ORD HÁKONAR IVARSSONAR.

ENN er sú stefna kom, er Hákon skylldi vitia þessa einka-mála, þá fór hann á fund Harallds konungs. Enn er þeir tóko tal sitt, þá segir konungr at hann vill hallda allt þat af sinni hendi, sem í sætt hafði komit med þeim Finni. Skalltu Hákon, sagði konungr, tala mál þetta vid Ragnhilldi, hvart hon vill samþyckia þetta ráð, enn eigi er þer oc eingom ödrom þat ráðanda at fá Ragnhilldar, sva at eigi se hennar samþycki til. Síðan geck Hákon á fund Ragnhilldar, oc bar upp fyrir hana bón-ord þetta. Hon sagði sva: opt finn ec þat, at mer er al-daundr Magnús konungr fadir minn, ef ec scal giptaz bónda einom, þó at þú ser frídr madr eda vel búinn at íþróttom. Enn ef Magnús konungr lifði, þá mundi hann eigi gipta mic minna manni enn konungi. Nú er þess eigi ván, at ec vilia giptaz ótignom manni. Síðan geck Hákon á fund Harallds konungs, oc sagði hönom vidtal þeirra Ragnhilldar, innir þá upp einkamál þeirra Finnz, var þá oc Finnr hiá, oc fleiri menn þeir er vid höfdo verit rædo þeirra Finnz: segir Hákon sva til allra þeirra vitnis at sva var skillt, at konungr skylldi sva Ragnhilldi heimgjöra sem henni líkadi; nú vill hon eigi ciga úti-ginn mann, þá mego þer gefa mer tignar-nafn, be-

fir ec til þess ætt oc burdi at ec má heita Iarl, oc sva nockora luti adra, at því er menn kalla. Konungrinn svarar: Olafr konungr bródir minn oc Magnús konungr son hans, þá er þeir redo ríki, leto þeir einn Iarl vera senn í landi, hefir ec oc sva gört, síðan er ec vard konungr kalladr, vil ec eigi taka tign af Ormi Iarli, þá er ec hefi ádr gefit hönom. Sá þá Hákon sitt mál, at þat mundi eigi vidgángaz, líkadi hönom þá stór-illa. Finnur var oc allreidr. Sögdo þeir at konungr hélldi eigi ord sín, oc skilduz at því.

CAP. L.

HÁKON FÓR TIL DANMERKR.

Hákon fer þá þegar or landi, oc hafdi lánq-skip vel skipat; hann kom fram sudr í Danmörko, fór þegar á fund Sveins konungs mágs síns, tók konungr veggamliga vid hönom, oc feck hönom þar vczlor miklar; gerdiz Hákon þar landvarnar-madr Sveins konungs fyri víkingom, er miöc herido í Dana-vellði, Vindor oc Kúrir, oc adrir austrvegmenn oc víkingar; hann lá úti á her-skipom vetr sem sumar.

CAP. LI.

DRÁP ASMUNDAR.

Asmundr er madr nefndr, er sagt er at væri systor-

son Sveins konungs, oc fóstr-son hans. Asmundr var allra manna görviligastr, unni konungrinn hönom mikit. Enn er Asmundr dróz á legg, vard hann brátt ofstopa-madr mikill, oc hann gerdiz víga-madr. Konungi líkadi þat illa, oc let hann fara frá ser, oc feck hönom len gott, þat er hann mátti vel hallda sic oc sveit med ser. Enn þegar er Asmundr tók vid konungs fe, dro hann lid mikit at ser, enn hönom endiz eigi þat fe til kostnadar síns, er konungr hafði veitt hönom, þá tók hann annat miklo meira, þat er konungr átti. Enn er konungr spurdi þat, þá stefndi hann Asmundi á sinn fund. Enn er þeir hittuz, þá sagdi konungr at Asmundr skyllði vera í hird hans, oc hallda einga sveit; oc vard sva at vera sem konungr vildi. Enn er Asmundr hafði verit litla hríd med konungi, þá undi hann eigi þar, oc hliópz á brott um nótt, oc kom aptr til sveitar sinnar, oc görði þá enn fleira illt enn fyrr. Enn er konungr reid yfir land, oc kom þar nærr sem Asmundr var, þá sendi hann lid til at taka Asmund med valldi. Síðan let konungr setia hann í iárn, oc hallda hann sva um ríd, oc hugdi at hann mundi spekiaz. Enn er Asmundr kom or iárnino, þá líóp hann þegar brott oc feck ser lid oc her-skip, tók hann þá at heria bædi utan-landz oc innan-landz, oc gerdi it mesta her-virki, drap mart manna oc rænti víða. Enn þeir menn, er

fyrir þessom úfrídi urðo, komo til konungs, oc kærdo skada sinn fyrir honom; hann svárar: hvat segi þer mer til þess? hví fari þer eigi til Hákonar Ivarssonar, hann er landvarnar-madr minn, oc til þess settr at fríða fyrir ydr bændom, enn hegna víkinga; var mer sva sagt, at Hákon væri diarfr madr oc frækn, enn nú lítz mer sem hann vili hvergi þar tilleggia, er hönom þickir mann-hætta í vera. Þessi ord konungs voro flutt til Hákonar, oc mörgom vid aukit. Síðan fór Hákon med lidi síno at leita Asmundar, vard fundr þeirra á skipom, lagdi Hákon þegar til orrosto, vard þar hörd orrosta oc mikit mannfall. Hákon geck uppá skip Asmundar, oc raud skipit: kom sva at þeir Hákon oc Asmundr skiptuz siálfir vapnom vid oc höggom; þar fell Asmundr; Hákon hió höfut af hönom. Síðan fór Hákon scyndiliga á fund Sveins konungs, oc kom til hans sva at konungriinn sat of mat-bordi. Hákon geck fyri bordit, oc lagdi höfut Asmundar á bordit fyri konunginn, oc spurdi ef hann kendi? Konungriinn svaradi eingo, oc vard dreyr-raudr á at siá. Síðan geck Hákon á brott. Litlo síðarr sendi konungr bod til hans, oc bad hann fara á brott or sinni þíonosto, seg at ec vil eigi mein giöra hönom, enn eigi má ec gæta allra frænda varra,

CAP. LII.

KVON-FÁNG HÁKONAR IVARSSONAR.

Síðan fór Hákon brott or Danmörk, oc norðr í Noreg til eigna sinna. Þá var andadr Ormr Iarl frændi hans. Menn urðu Hákonni fegnir mið, frændor oc vinir, urðu þá til þess margir göfgir menn at gánga um sættir milli Haralldz konungs oc Hákonar, kom sva at þeir sættuz med því móti, at Hákon feck Ragnhíldar konungs-dóttur, enn Haralldr konungr gaf Hákonni Iarl-dóm, oc vellði slíkt sem haft hafði Ormr Iarl. Hákon svardi Haralldi konungi trúnaðar-eiða til þíonosto þeirrar sem hann var skylldr til.

CAP. LIII.

SÆTT HARALLDZ KONUNGS OC KÁLFS.

Kálfr Arnason hafði verit í vestr-víking síðan er hann fór or Noregi, enn opt á vetrom var hann í Orkneyiom med Þórfinni Iarli mági sínom. Finnur Arnason giörði ord Kálfi bróðr sínom, oc let segia hönom einka-mál þeirra Haralldz konungs, at Kálfr skyldi hafa landz-vist í Noregi oc eignir sínar, oc slíkar veizlor sem hann hafði haft af Magnúsi konungi. Enn er Kálfi kom sá ord-sending, þá bióz hann þegar til ferðar, fór austr í Noreg fyrst á fund Finns bróðr síns, síðan tók Finnur Kalfi grid

af konungi, oc funnuz þeir siálfir konungr oc Kálfr, gerdo þá sætt sína, eptir því sem konungr oc Finnur höfdo fyrr bundit einka-málom med ser. Geck Kálfr þá til festo vid konung, oc allz skildaga slíks sem hann hafdi bundit fyrr vid Magnús konung, at Kálfr væri skylldr at göra þau verk öll sem Haralldr konungr villdi, oc hönom þætti sitt ríki bæta. Tók Kálfr þá upp eignir sínar allar oc veizlor, sem hann hafdi fyrr haft.

CAP. LIV.

FALL KÁLFS ARNASONAR.

Enn et næsta sumar eptir hafdi Haralldr konungr leidángur úti, oc fór sudr til Danmerkr, oc heriadi þar of sumarit; enn er hann kom sudr til Fíóns, þá var þar lid-safuadr mikill fyri þeim. Þá let konungr lid sitt gánga af-skipom, oc bióz til uppgaugo; hann skipadi lidi síno, let vera fyrir sveit Kálf Arnason, oc bad þá gánga fyrsta upp, oc sagdi þeim hvert þeir skyldo stefna, enn hann qvez mundo gánga upp sídarr, oc koma þeim at lidi. Þeir Kálfr gengo upp, oc kom brátt lid móti þeim, red Kálfr þegar til orrosto, oc varð sá bardagi eigi lángr, þvíat Kálfr var brátt ofrlidi borinn, oc kom hann á flótta oc lid hans, enn Danir fylgdo þeim vel, oc fell mart af Nordmönnom: þar fell Kálfr Arnason. Haralldr konungr geck upp á land med fylking

sína, vard þat brátt á leid þeirra, at þeir sá valinn
fyri sér, oc fundu brátt lík Kálfs, var þat borit
ofan til skipa; enn konungr geck á land upp oc
heriadi, oc drap þar mart manna. Sva segir Arnor:

Raud en ryrt vard síðan
rann elldr of siot manna
frána egg á Fíóni
Fíón-byggva lid tiggja.

CAP. LV.

FERD FINNZ ARNASONAR OR LANDI.

Eptir þetta let Finn Arnason sér fiandscap í þic-
kia við konung um fall Kálfs bróðr síns, kalladi
hann at konungr væri ráð-bani Kálfs, enn þat veri
blecking ein við Finn, er hann hafði teigdan Kálfr
bróðr sinn vestan um haf á valld oc trúnat Har-
allds konungs. Enn er þessi ræða kom á lopt, þá
mællto þat margir menn, at þat þætti grun-sælikt,
er Finn hafði trúat því, at Kálfr mundi fá trúnat
Haralldz konungs; þótti þeim sem konungr væri
heipt-rækr um smærri hluti, enn þá er Kálfr hafði
til saka gört við konung. Konungr let her ræða
um slíkt hvern er villdi, sannadi þat eigi, oc eigi
syniadi hann; fannz þat eitt á, at konungi þótti þat
vel ordit. Haralldr konungr qvad víso þessa:

Nú emk ellifo allra
eggjomz vígs oc tveggja

þau ero enn sva ec man manna
 mord ráð-bani vordinn.
 Ginnir enn gráleik inna
 golls er ferd med skolli
 lytendr kveda lítit
 lauki gæst til auka.

Finnr Arnason let ser sva mikit um finnaz mál þetta, at hann ferr af landi brott, oc kom fram sudr í Danmörko, fór hann á fund Sveins konungs, oc feck þar allgóðar vidtekior, oc tölodo þeir laung-om einmæli, oc kom þat upp at lyktom, at Finnur geck til handa Sveini konungi, oc gerdiz hans madr. Enn Sveinn konungr gaf Finni Iarldóm oc Halland til yfirsóknar, oc var hann þar lengi Iarl, til land-varnar fyri Nordmönnom.

CAP. LVI.

FRÁ GUTHORMI GUNNHILLDARSYNI.

Guthormr het sonr Ketils Kálfs oc Gunnhilldar á Ríngo-nesi, systr-son Olafs konungs oc Haralldz konungs. Guthormr var madr görviligr oc snemma roskinn-mannligr; var hann optliga med Haralldi konungi, oc þar í miklom kærleikum oc ráðagiördom med konungi, þviat Guthormr var vitr madr, hann var oc hinn vinsælasti madr. Guthormr var optliga í hernadi, oc heriadi miök í vestrLönd; hann

hann hafði lid mikit. Frid-land hafði hann oc vetr-seto í Dyflinni á Irlandi, oc var þar í kærleikom miklom med Margadi konungi.

CAP. LVII.

VIDSKIPTI GUTHORMS OC MARGADS IRA-KONUNGS.

Um sumarit eptir fór Margadr konungr oc Guthormr vid hönom, oc heriodo á Brettlund, oc fengo þar ógrynni fiár. Sidan lögdo þeir í Aungulseyar-sund, þar skyldo þeir skipta her-fáangi síno. Enn er framn var borit þat mikla silfr, oc konungr sá þat, þá vildi hann einn saman hafa feitt allt, oc virði þá lítils vingan sína vid Guthorm. Guthormi líkadi þat illa, ef hann skyldi vera lut-ræningr oc hans menn. Konungr sagdi, at hann skyldi eiga II kosti fyri höndom, sá annar at una því sem ver vilom vera láta, hinn er annarr at hallda vid mic bardaga, oc hafi þá sá fe, er sigr hefir, oc þat med, at þú skalt ganga af skipom þínom, skal ec þau hafa. Guthormi syndiz vandi mikill á bádar hendur, þóttiz eigi mega láta sémiliga skip sín oc fiármuni, fyrir önga tilgörninga; þat var oc allháskasamligt at beriaz vid konung oc þat mikla lid er hönom fylgdi, enn lids þeirra var sva mikill munr,

at konungr hafði XVI lánng-skip enn Guthormr V. Þá bad Guthormr koming líá ser III náttu frest um þetta mál, til umráða við menn sína, hugdiz þá munda mykia konung mega nockot á þeirri stund, oc koma sva síno máli í betri vingan við konung, með fortöloom sinna manna, enn þat feckz eigi af konungi, sem hann mællti til. Þá var Olafs vauko aptan. Nú kaus Guthormr helldr þann kost, at deyia með drengskap eda vega sigr, helldr enn hitt at þola skaum oc svívirðo oc klækis-ord af sva mikilli misso. Þá kalladi hann á Gud oc hinn helga Olaf konung frænda sinn, bad þá fulltíngis oc hiálpar, oc het til þess helga mans húss at gefa tíund af öllo því her-fáangi er þeir lyti, ef þeir fengi sigr. Síðan skipadi hann lidi síno, oc fylkdi í móti þeim mykla her, oc red til orrosto, oc bardiz við þá. Enn með fulltíngi Guds oc hins helga Olafs konungs, feck Guthormr sigr. Þar fell Margadr konungr, oc hverr madr er hönom fylgdi, úngr oc gamall; oc eptir þann háleita sigr vendir Guthormr heim gladr með öllum þeim fiárlut, er þeir höfdo fengit í orrostonni. Þá var astekit silfrino því er þeir höfdo fengit, hinn tíundi hver peningr, sva sem heitit hafði verit hinom helga Olafi konungi, oc var þat sva mikit fe, at af því silfri let Guthormr ródo göra eptir vexti sínom, eda stafn-búa síns, oc er þat likneski VII fóta hátt. Guthormr

gaf ródo þá sva búna til stadarins hins helga Olafs konungs, hefir hon þar verit síðan til sigr-minningar Guthorms, oc iartegna hins helga Olafs konungs.

CAP. LVIII.

IARTEGNIR OLAFS KONUNGS Í DANMÖRK.

Greifi einn var í Danmörk illr oc öfund-fullr, hann átti ambátt eina Norræna æzkada or Þrænda-laugom, hon dyrkadi hinn helga Olaf konung, oc trúdi fastliga hans heilagleik. Enn sá Greifi, er áðan gat ec, tortrygdi allt þat er honom var frásagt þess helga mans iartegnom, qvad eigi vera nema qvitt oc pata einn, giördi ser at gabbi oc gamni lof oc dyrd þá er lands-fólk allt veitti þeim góða konungi. Enn nú kom at þeim hátíðar-degi er sa milldi konungr let lif sitt á, oc allir Nordmenn helldo, þá villdi sá hinn úvitri Greifi eigi heilagt hallda, oc baud hann ambátt sinni at hon skyldi baka oc ellda ofu á þeim degi. Vita þóttiz hon ædi þessa Greifa, at hann mundi henni sárliga hefna, ef hon leti eigi at því sem hann baud; gengr hon til naudig oc bakadi ofninn, oc kveinadi miöc, medan hon starfadi, oc heitadiz vid Olaf konung, oc qvadz alldregi mundi á hann trúa, nema hann hefndi med nockorri bendingo þessi ódæmi. Nú mego þer her heyra makligar refsingar oc sannligar iartegnir. Allt

var þat iafn-skiótt oc á einni stundo, at Greifi sá vard blindr bádóm augom, oc braud þat vard at grióti er hon hafði í ofninn skotit. Komit er af því grióti til stadar hins helga Olafs konungs, oc víða annarstadar. Síðan hefir Olafs-messa halldin verit ávallt í Danmörk.

CAP. LIX.

ÍARTEGNIR OLAFS KONUNGS VID KRYPLING.

Vestr á Vallandi var einn madr vanheill, sva at hann var kryplingr, geck á kníám oc á knúm; hann var staddr um dag úti á veg, oc var þar sofnadr; þar dreymdi hann at madr kom til hans göfugligr, oc spurdi hvert hann gerdiz? enn hann nefndi til einhvern bæ, enn hinn göfgi madr mællti vid hann: Far þú til Olafs-kyrkio þeirrar er í Lundunom stendr, oc muntu þá heill verda. Síðan vaknadi hann oc fór þegar á leit Olafs-kyrkio, enn um síðir kom hann til Lunduna bryggio, oc spurdi þar borgarmenn, ef þeir kynni segia hönom hvar Olafs-kyrkia væri? enn þeir svörudo, oc kvado miklo fleiri kyrkior vera þar, helldr enn þeir vissi hveriom manni hver þeirra væri helgad. Enn litlo síðar geck þar madr at hönom, oc spurdi hvert hann gerdiz? hann svarar hönom oc sagdi, at hann vill fara til Olafs-kyrkio, enn sá mællti síðan: vit sku-

lom fara bádir saman til Olafs-kyrkio, oc kann ec leid þángat. Síðan fóro þeir yfir bryggiona, oc fóro þat stræti er til Olafs-kyrkio lá: enn er þeir komo til kyrkiogards-hlidsins, þá ste sá yfir þreskolld þann er í hlidino var, enn kryplingrinn velltiz þar inn yfir, oc reis þegar heill upp. Enn þá er hann sáz um, þá var horfinn förunautr hans:

CAP. LX.

HERNADR HARALLDS KONUNGS Í DANMÖRK.

Haralldr konungr let reisa kaupstad austr í Oslo, oc sat hann þar opt, þvíat þar var gott til atflutningar, landzmegin mikit umhverfis; sat hann þar vel til landz-gæzlo fyri Dönom, sva oc til áhlaupa í Danmörk, hann var opt því vanr þó at hann hefði eigi mikinn her uti. Þat var á einu sumri, at Haralldr konungr fór med nockorom letti-skipom, oc hafði eigi mikit lid; hann hellt sudr í Víkina, enn er byr gaf sigldi hann yfir undir Iotland oc heriadi, enn landz-menn söfnudoz saman, oc vördo land sitt. Þá hellt Haralldr konungr til Lima-fiardar, oc lagði inn í fiördinn. Sva er hættat Lima-firdi, at þat er inn at fara sva sem allniör ár-ós, enn er inn kemr eptir firdinom, þá er þar sem mikit haf. Haralldr konungr heriar þá á bædi lönd, enn Danir höfdo safnad hvervetna fyrir. Þá lagði

Haralldr konungr skip sín at ey nockorri, þat var litit land oc óbygt. Þeir höfdo dryck-fátt á skiponom, þeir gengo uppá eya at leita vatns, enn er þeir leitudo þá fundo þeir eigi vatn, oc sögdo til konungi; hann let leita ef lyngormr nockorr fyndiz í eyonni. Enn er hann sanz, þá færa þeir hann konungi; hann let færa orminn til elldz, oc baka hann oc mæda, at hann skyldi þyrsta sem mest. Sídan var þrádr bundinn um spordinn, oc ormrinn laus látinn, hrökdiz hann þá í brott, enn þrádrinn rakdiz af tvinna-bnodano, gengo menn eptir orminom þar til er hann steypdiz nidr í iördina. Konungr bad þar grafa til vatns, oc sva var gört, fundo þeir þar vatn sva at eigi skorti. Haralldr konungr spurdi þau tíðindi af niósnarmönþom sínom, at Sveinn konungr var kominn med skipa-her mikinn fyrir fiardar-munnit; vard hñonom seint iñn at fara, er eitt mátti senn fara skipit. Haralldr konungr hellt þá sínom skipom inn í fiördinn, oc þar er hann var breidastr, er heitir Lúsbreid; enn þar or víkinni innanverdri er eid miótt vestr til hafsins, þannog röro þeir Haralldr konungr um kvelldit, enn um nóttina er myrkt var ordit, ruddo þeir skipin oc drógo um eidit, oc höfdo þat syslat allt fyri dag, oc búit skipin annat sinni. Þeir helldo þá norðr fyrir Iotlandz sído, þá mællto þeir:

Skrapp or höndom Haralldr Dönom.

Þá sagði konungr, at hann skal sva koma næsta sinn til Daumerkr, at hann skal meira lid hafa og stærri skip. Fór Haralldr konungr þá norðr í Þrándheim.

CAP. LXI.

SKIP-GERD HARALLDS KONUNGS.

Haralldr konungr sat eptir um vetrinn í Nidarósi, hann let reisa skip um vetrinn út á Eyrom, þat var Bússu-skip. Skip þat var gert eptir vexti Orms hius Langa, og vandat at öllu sem mest; var dreka-höfot á frammi, enn aptr krókr, og voro svírar allir gulli búvir. Þat var hálf-fertogt at rúma-tali, og mikit at því, og var hit frídasta: let konungr vanda allan búnat til skipsins, bæði segl og reipareida, ackeri og streingi.

CAP. LXII.

UTBOD HARALLDS KONUNGS.

Haralldr konungr görði bod um vetrinn suðr til Danmarkar Sveini konungi, at hann skyldi eptir um várit koma suðnan til Elfar til mótz við sic og beriaz, sva at þeir skipti þá löndom, og hefði annarrhvarr bæði konungs-ríkin. Þann vetr baud Haralldr konungr út leidánger almenning af Noregi; enn er váradi dróz herr mikill saman. Þá let Har-

alldr konungr setia út skip þat it mikla á ána Nid;
 síðan let hann uppsetia dreka-höfudin. Þá qvad
 Þiódolfr skállð:

Skeid sá ec fram at flóði
 fagrt sprund í á hrundit
 kendo hvar liggir fyri landi
 löng súð drekans prúða,
 Orms glóa faux und farmi
 frá sízt ytt var hánom
 báro búnr svírar
 brunnit gull af hlunni.

Síðan let Haralldr konungr búa skip þat oc ferd
 sína. Enn er hann var búinn hellt hann út or
 ánni drekanom, þá var vandadr ródr miöc. Sva
 segir Þiódolfr:

Slyngr laugardag laungo
 lid-balldr af ser tialldi
 út þar er éckior líta
 Orms súð or bæ prúðar.
 Vestr red or Nid næsta
 nyri skeid at styra
 úngr er árar drengia
 allvalldr í sjá falla.

Rett hann rödi slíta
 ræsis herr or verri
 eckian stendr oc undraz
 ára-burd sem furdo.
 Ort man snót ádr snerto
 sæfáng í tvo gængi

þaull leggur við fríð fullan
fer-kleyf á þat leyfi.

Sorgar veit ádr slitiz
sæföng or mar ströngom
þar herr helldr til varra
hár siötigom ára.
Nordmedr róa nadri
negldom straum inn helgða
út er sem innan liti
arnar væng af iarni.

Haralldr konungur hellt herinóm sudr með landi,
oc hafði úti almenning at skipóm oc lidi. Enn er
þeir sækia austr í Víkina, fengo þeir andvidri stor,
oc lá herrinn víða í höfnóm, bæði við úteyar oc
inn í fiördom. Sva segir Þiódolfr:

Eigut skiól und skógi
skafnir sneckio stafnar
læsir leidángs vísi
lönd her-skipa bröndom.
Almenningr liggr innan
eid láta sor skeidar
hábrýniadar hlyia
hveria vík í skeríom.

Enn í stór-vedrom þeim er álögðoz, þá þyrfti it
mikla skipit góðra grunn-föra. Sva segir Þiódolfr:

Hless-eyar lemr háfan
hlym-gard konungr bardi
neytir þá til þrautar
þengill sneckio strengia.

Eigi er iárni biúgo
indæll skadi lindiss
gnegr af gaddi digrom
griót oc vedr in lióto.

Enn er byr gaf, hellt Haralldr konungr herinom
austr til Elfar, oc kom þar at kvældi dags. Sva
segir Þiódolfr:

Haralldr þeysti nú hraustla
helfing sinn at elfi
náttar Noregs drottinn
nær at landa-mæri,
Gramr á þing vid þumla
þar er eindagaðr Sveini
hrafni skyldr nema halldi.
hans fundr Danir undan.

CAP. LXIII.

FRÁ HER HARALLDIS KONUNGS.

Enn er Danir spyria, at Nordmannna herr var kominn í Elfina, þá flyia allir þeir, er því komo vid. Nordmenn spyria, at Dana-konungr hefir oc her úti, oc liggr hann sudr vid Fíón oc of Siáland. Enn er Haralldr konungr spurdi, at Sveinn konungr villdi eigi hallda stefno-lag vid hann eða orrosto sem mællt var, þá tók hann þat ráð enn sem fyrr, let aptr fara bónda-lidit, enn skipadi hálfu annat hundrat skipa, hellt hann síðan liti

Því sudr fyrir Halland, oc heriadi víða; hann lagdi herinóm inn í Lófo-fiörd, oc heriadi þar á land upp. Litlo síðar kom þar at þeim Sveinn konungr med Dana-her, hann hafði CCC skipa. Enn er Nordmenn sá herinn, þá let Haralldr konungr blása saman öllum herinóm, mællto þat margir at þeir skyldo flyia, oc sögdo at ófært væri at beriaz. Konungrinn svarar sva: fyrr skal hverr varr falla um þveran annan, enn flyia. Sva segir Steinn Herðisarson:

Sagdi hitt er hugdi
 hauklyndr vera myndo
 þar qvad þengill eirar
 þrotna ván fyrir hánom.
 Helldr qvad hvern varn skyldo
 hilmir frægr enn vægia
 menn bröto upp of annan
 aull vapn þveran falla.

Síðan lagdi Haralldr konungr skipa-her sínóm til framlögo, lagdi hann fram dreka sinn inn mikla í midio lidi. Sva segir Þiódolfr:

Let vingiasa veitir
 varg-holtr dreka skolla
 lyste fyri leidángurs briósti
 lids oddr var þat midio.

Þat skip var allvel skipat oc fiölment á. Sva segir Þiódolfr:

Fast bad fylking hrausta
ferd-vandr iöfr standa
hamallt syndiz mer hömlor
hilldings vinir skillda,
Ramsyndan lauk raundom
rádandi mann-dáda
nytr fyr Nizi utan
nadr sva at hver tók adra.

Úlfr stallari lagdi sitt skip á annat bord konungs-
skipino; hann mællti við sína menn, at þeir skyll-
do vel framleggja skipit. Steinn Herdísarson var
þá á skipi Úlfs; hann qvadr:

Het á oss þá er títi
Úlfr hákesiur skulfo
ródr var greiddr á grædi
gráms stallari alla.
Vel bad skip með skyliá
skel eggjadr fram leggja
sitt en seggir iátto
sniallz landreka spialli.

Hákon Ivarsson lá ytztr í arminn annan, oc fylg-
do hönom mörg skip, oc var þat líd allvel búit;
enn ytztr í annan arminn lágo þrænda-höfðingiar,
var þat oc mikill herr oc frídr.

CAP. LXIV,

FRÁ HER SVEINS KONUNGS.

Sveinn Dana-konungr skipaði oc sínom her, lagdi
hann sitt skip fram í móti skipi Haralldz konungs,

í midio lidi, enn næst hönom lagdi fram Finnur Iarl Arnason sitt skip, skipudo Danir þar næst öllu því lidi, er fræknast var oc bezt búit. Sídan tengdo hvarirtveggio sín skip saman allt um midian flo-tann. Enn fyri því at sva var mikill herinn, þá var þat allr fiölldi skipanna, er laus fór, oc lagdi þá hverr sá fram sitt skip sem skap har til, enn þat var allmisiafnt. Enn þó at lidsmunr væri all-mikill, þá höfdo hvarirtveggia óvígian her. Sveinn konungr hafði í lidi med ser VI Iarla. Sva segir Steinn Herdísarson:

Hætti hersa drottinn
 hugstránger skipa lángra
 hinn er vid hálfst beid annat
 hundrat Dana fundar.
 Næst var þat er red rista
 ræidr at sæti Hleidrar
 þáungs lád mörom þíngat
 þrimr hundrödom sunda.

CAP. LXV.

UPPHAF NIZÁR ORROSTO.

Haralldr konungr let blása her-blástr þegar er hann hafði búin skip sín, oc let þá greida atródr-inn sína menn. Sva segir Steinn Herdísarson:

Vaun fyri módo mynoi
 meinfært Haralldr Sveini

varð þviát vísi gerðit
 vidrnám fridar bidia.
 Herdo hiörvi gyrdir
 Halland iöfurs spiallár
 heit bles und fyr utan
 atródr á laug blódi.

Síðan tókz orrosta, oc varð hin snarpasta, eggíadi hvartveggi konunga lid sitt. Sva segir Steinn Herðisarson.

Nytr bað Skiölldungr skióta
 skamt var lids á midli
 hlífar styggr oc höggva
 hvarttveggi lid seggia.
 Bædi fló þá er blódi
 brandr braud af ser raudo
 þat brá feigra flotna
 fiörvi griót oc aurvar.

Þat var síðarla dags er orrosta seig saman, oc hellz sva alla nóttina. Haralldr konungr skaut af boga lánga ríð. Sva segir Þiódolfr:

Alm dró Upplendzkr hilmir
 alla nótt hinn snialli
 hremsor let á hvítar
 hlífar landreki drífa.
 Búand mönnom smo brynior
 blódogr oddr þars stódo
 flugr óx fafnis vigra
 Finna giöllð í skiölldom.

Hákon Iarl oc þat lid er hönom fylgdi, tengdi eigi

sín skip, oc röri at Dana skipom þeim er laus foro, enn hvert skip er hann tengdiz vid, þá hraud hann. Enn er þat fundu Danir, þá dró hverr þeirra frá sitt skip, þar er Iarl fór, sótti hann eptir Danom, sva sem þeir hömlodo undan, oc var þeim þá atkomit flóttu. Þá röri skúta at skipi Iarls, oc var kallat á hann oc sagt, at fyri leti annar fylkingar armrinn Harallds konungs, oc þar var fallit mart lid þeirra. Síðan röri Iarl þángat til, oc veitti þar harda atlögo, sva at Danir leto þá enn undan síga; fór Iarl sva alla nóttina, lagdi þar fram er mest þörf var á, enn hvar sem hann kom til þá hellz eigi vid hönom. Hákon röri it ytra um bardagann. Hinn efra lut nætr braz megin flóttinn á Dönom, þvíat þá hafdi Haralldr konungr upp gengit med sína sveit á skip Sveins konungs, var þat sva vendiliga hrodit, at allir menn fello á skipino, nema þeir er á kaf hliópo. Sva segir Arnorr Iarlaskálld:

Geckat Sveinn af sneckio
sak-laust hinn forrausti
málmr kom hardr vid hiálma
hugi minn er þat sinni.
Fars-kostr laut at fljóta
fliót mætz vinar lóta
ádr en ödlingr flydi
audr verdung daudri.

Enn er merki Sveins konungs var fallit, oc hrodit

skip hans, þá flydo allir hans menn, enn sumir fello. Enn skip þau er tengd voro saman, mátti eigi leysa, oc líópo men á kaf af þeim, enn sumir komoz á aunnur skip þau er laus voro; enn allir menn Sveins konungs röro þá undan þeir er því komo vid; þar vard allmikit mannfall. Enn þar er konungarnir siálsir höfdo bariz, oc tengd voro flest skipin, þar lágo eptir aud skip Sveins konungs meirr enn VII tigur. Sva segir Þiódolfr:

Sogas qvado gram gegnan
glæst siötigir et fæsta
senn á svipstund einni
Sveins þiódar skipp brióða.

Haralldr konungr röri eptir Daunom oc rak þá, enn þat var eigi hægt, þvíat skipa flotinn var sva þröngur fyrri, at varla mátti framkoma. Finnur Iarl villdi eigi flyia, oc vard hann hand-tekinn; hann var oc lítt syndr. Sva segir Þiódolfr:

Sveinn át sigr at launa
sex þeim er hvöt vexa
innan eina gunni
aurleiks Dana Iörlom.
Vard sá er vildit forða
víg-biartr snöro liarta
í fylkingo fánginn
Finr Arnason midri.

CAP. LXVI.

FLÓTTI SVEINS KONUNGS.

Hákon Iarl lá eptir med skip sín, er konungr oc annat lidit rak flóttann, þvíat Iarls skipit mátti eigi þar fram koma fyri skipom þeim er fyri lágo. Þá röri einn madr á báti at skipi Iarls, oc lagði at lyptingonni, sá var mikill madr, oc hafði víðan hött. Sá kalladi upp á skipit: hvar er Iarl? sagði hann; hann var í fyrir-rúmíno, oc stöðvadi blóð manni einom. Iarl sá til hattar-mannzins, oc spyr hann at nafni; hann svaradi: Vandrádr er her, mæl þú við mik, Iarl. Iarlinn laut út yfir þbordit til hans; þá mællti bát-madrinn til hans: þiggia man ec líf at þer Iarl, ef þú vill veita. Iarl rettiz upp, oc nefndi til II menn sína, þá er hönom voro bádir kærir, sagði sva: stigit á bátinn, oc flytit Vandrád til landz, fylgit hönom til Karls bónda, vinar míns, oc segit hönom þat til iartegna, at hann fái Vandráði hest, þann er ec gaf Karli inn fyrri dag, oc södol sinn, oc son sinn til fylgdar. Síðan stigo þeir á bátinn, oc taka til ára, enn Vandrádr styrði. Þetta var í öndverda lysingina; var þá oc mestr skipa-gánggrinn, röro sumir til landzins, sumir út til hafsins, bæði smám skipom oc stórom. Vandrádr styrði þar er hönom þótti rymst milli

skipanna. Enn þar sem Nordmanna skip röro nærr þeim, þá sögdo Iarls menn til sín, oc leto allir þá fara hvert er þeir villdo. Vandrádr styrdi fram med ströndinni, oc lagdi eigi at landi fyrr enn þeir komo umfram þar sem skipa fiöldinn var. Síðan gengo þeir upp til bæiar Karls, oc tók þá at lysa; þeir gengo inn í stofo, var Karl þar, oc ny-klæddr. Iarls menn sögdo hönom sitt erindi; Karl mælti at þeir skulo snæda fyrst, oc let setia þeim bord, oc seck þeim laugar. Þá kom hús-freyia í stofo, oc mælti þegar: Undr mikit er þetta, er við fáam alldregi svefn eda ró í nótt fyrir ópi oc glammi. Karl sagdi: Veitz þú eigi þat, at konungar hafa bariz í nótt? Hon spurdi: hvarir hafa betr haft? Karl sagdi: Nordmenn hafa sigraz; hon mælti: flyit man enn hafa konungr varr, segir hon. Karl sagdi: Eigi vita menn þat, hvert hann er fallinn, eda flyinn. Hon mælti: Vesöl eru ver konungs, hann er bædi halltr oc ragr. Þá mælti Vandrádr: Eigi man konungr ragr, en eigi er hann sigrsæll. Vandrádr tók síðan laugarnar, enn er hann tók dúkinn, þá strauk hann sér kurteisliga á midiom. Húsfreyja tók dúkinn, oc kipti frá hönom, mælti: fátt gott kantu þer, þat er þorparaligt at væta allan dúkinn senn. Vandrádr svarar: þar kem ec þá enn, at ec þerri mer meir á midri þerro. Síðan tók Karl upp bord fyri þá, oc settiz

Vandráðr í midio. Snæddo þeir um ríd, enn síðan gengo þeir út, var þá hestr búinn, oc sonr Karls at fylgia hönom, oc hafði hann annan hest; ríða þeir brott til skógar, enn Iarls menn gengo til bátz síns, oc róá út til skips Iarls, oc segia sína ferd.

CAP. LXVII.

FRÁ HARALLDI KONUNGI.

Haralldr konungr oc hans lid ráko skamt flóttann, röri síðan aptr, til þar sem skipin lágo þau hin audo, var þá rannsakadr valrinn, fannz á konungs skipino fiölldi dauðra manna, enn eigi fannz lík Sveins konungs, enn menn þóttuz þó vita at hann var fallinn. Let þá Haralldr konungr veita umbúnat líkom manna sína, enn binda sár hinna er þess þyrfto. Síðan let hann flytia til landz lík Sveins manna, oc sendi bod bændom, at þeir skyllðo iarda líkin. Síðan let hann skipta herfángi, hann dvalldiz þar nockora ríd. Þá spurdi hann þau tíðindi, at Sveinn konungr var kominn til Siálandz, oc var þá kominn til hans her sá allr er flyit hafði or orrosto, oc mikit annat, oc hafði hann þá óvígian her fengit.

CAP. LXVIII.

GEFIN GRID FINNI ARNASYNI.

Finnr Iarl Arnason vard handtekinn í orrosto, sva

sem fyrr var ritat; hann var leiddr til konungs. Haralldr konungr var þá allkátr, oc mælti: her fundomz vid nú, Finnr, enn næst í Noregi, hefir hirdin sú en Danska eigi stadið allfast fyrir þer, oc hafa Nordmenn illt at-verki, er draga þic eptir ser blindan oc gamlan, oc vinna þat til lífs þer. Þá svarar Iárlinn: mart verða Nordmenn nú illt at vinna, oc þat þó verst allt, er þú bydr. Þá mælti Haralldr konungr: villtu nú grid, þótt þú sert ómakligr? Iarlinn svarar: eigi af hundinom þínom. Konungr mælti: villtu þá at Magnús frændi þinn gefi þer grid? Magnús son Haralldz konungs styrði þá skipi. Þá svarar Iarlinn: hvat mun hvelpr sá ráða gridom? Þá hló konungrinn, oc þótti gaman at erta hann, oc mælti: Villdu taka grid af þóro frænd-kono þinni? Þá sagði Iarlinn: er hon her? Her er hon, sagði konungrinn. Þá mælti Finnr Iarl ordskræmi þat, er síðan er uppi haft hverso reidr hann var, er hann feck eigi stillt ordom sínom: Eigi er kynligt, at þú hafir nú vel bitiz, er merrin hefir fylgt þer. Finni Iarli voro fengin grid, oc hafði Haralldr konungr hann med ser um ríd; var Finnr helldr ókátr oc ómiúkr í ordom. Þá mælti Haralldr konungr: Se ec þat Finnr, at þú villt nú eigi þydaz vid mic eða frændor þína, vil ec nú gefa þer orlof at fara til Sveins konungs mágs þíns. Iarl sagði: þat vil ec þiggja, oc því

Þacksamligarr er ec kem fyrr í brott hedan. Síðan let konungr flytia Finn Iarl þar á land upp, tóko Hallandzfarar vel við hönom. Haralldr konungr hellt þá lidi síno norðr í Noreg, fór fyrst inn til Oslo, oc gaf þá heimleyfi öllu lidi síno, því er fara villdi.

CAP. LXIX.

FRÁ SVEINI KONUNGI.

Sva segia menn, at Sveinn konungr sat í Danmörk þann vetr, oc hellt enn ríki síno sem ádr. Hann sendi menn of vetrinn norðr á Halland eptir Karli bónda oc þeim hiónom. Enn er hann kom til konungs, þá kallar hann Karl fyri sic; síðan spyr konungr, ef Karl kendi hann, eda þættiz sed hafa fyrr? Karl svarar: kenni ec ydr konungr, oc kenda þic fyrr þegar ec sá, oc er þat Gudi at þacka, er þer kom til gagns sá enn litli forbeini er ec veitta þer. Konungrinn svarar: alla þá daga síðan er ec lifi, á ec þer þat at launa. Nú skal þat it fyrsta, at ec gef þer bú þat á Siálandi, er þú kyss þer, oc þat med at ec skal göra þic mikinn mann, ef þú kant þat med höndom hafa. Karl þackadi konungi vel örd sín, oc sagði at enn var eptir bæn sú er hann villdi bidia. Konungr spyr hver sú væri? Karl sagði, at hann vill þess bidia, at konungr láti hann hafa við ser kono sína. Konungr svarar: þat mun

ec þer eigi veita, þvíat ec scal fá þer miklo betri kono oc vitrari; enn kona þín fari med búkot þat er þit hafit ádr haft, þat mun henni framflutning. Konungr gaf Karli mikit bú oc göfugligt, oc seck hönom gott kvan-fáng, oc vard hann þá mikill madr firi ser. Þetta vard frægt oc spurdiz víða; þat kom norðr hínгат í Noreg.

CAP. LXX.

FRÁ RÆDO HIRDMANNA.

Haralldr konungr sat þann vetr eptir Nizar-orrosto í Oslo. Um haustit er lidit kom sunnan, þá var mikil umræða oc frásögn um orrosto þá, er verit hafði um haustit firi Nizse, þóttiz hver sá er þar hafði verit, nockot kunna fráségia. Þat var eitt sinn, at menn nockorir sátu í undir-skemmo nockorri, oc drucko, oc voro allkátir oc allmálgir; þeir ræddo um Nizar-orrosto, oc þat med hverir þadan hefði borit bestan ordstír eda mestan; þeir urdo allir á eitt sáttir, at engi madr hefði þar slíkr verit sem Hákon Iarl; hann var vapn-diarfaztr, oc hann var kænstr, oc hann var gæfo-mestr, oc þat vard allt at mesto lidi, er hann giörði, oc hann vá sigriinn. Haralldr konungr var þar úti í gardinom, oc taladi vid menn nockora. Síðan geck hann fyri skemmo-dyrnar oc mællti: Hákon mundi her nú hver heita vilia, oc geck síðan leid sína.

CAP. LXXI.

ATFERD AT HÁKONI IARLI.

Hákon Iarl fór um haustit til Upplanda, oc var þar um vetrinn í ríki síno; hann var allvinsæll við Upplendinga. Þat var um várit er áleid, eitt sinn er menn sátu við dryckio, at rætt var enn um Nizar-orrosto, oc lofodo menn miðc Hákon Iarl, enn sumir tóko eigi midr adra til. Enn er þeir höfdo þetta rætt um ríd, þá svarar einhver madr: vera kann, at fleiri menn hafa diarfliga bardiz fyrri Nizi en Hákon Iarl; enn þó mun sá eingi þar verit hafa, at ec hygg slíct happ muni hafa sótt, sem hann. Þeir sögdo þat mundi mest happ hans, er hann hafdi rekit á flóttu sva marga af Danom. Sá hinn sami svarar: meira happ var hitt þat, er hann gaf líf Sveini konungi. Einnhverr svarar hönom: þetta mantu eigi vita, er þú segir; hann svarar: þetta veit ec allgiörla, þvíat sá sagdi mer siálfr, er konunginn flutti til landz. Enn þá var sem opt er mællt, at mörg ero konungs eyro; var konungi þetta sagt, oc iamn-skiótt let konungr taka marga hesta, oc reid þegar um nóttina með CC manna, reid hann alla þá nótt, oc eptir um daginn. Þá rido móti þeim menn þeir er fóro til bæiar með miöd oc mallt. Madr het Gamall, er í för var með konungi, hann reid at bóndanom einom, sá

var kunningi hans; þeir tölodo einmæli. Gamall sagði: Ec vil kaupa at þer, at þú rídir sem ákafli-gast laun-stigi þá er þú veitz skemsta, oc kom til Hákonar Iarls oc seg hönom, att konungr vill drepa hann, þvíat konungr veit nú at Hákon hefir skotit Sveini konungi á land firi Nizi. Þeir kaupa þesso saman; reid sá bóndi, oc kom til Iarls, sat hann þá oc drack, oc var eigi sofa genginn. Enn er bóndinn hafdi sagt sit erindi, stód Iarl þá þegar upp oc allir hans menn: let Iarl flytia á brott lausafe sitt allt af bænom til skógar, fóro oc brott af bænom menn allir um nóttina. Þá er konungr kom, dvalldiz hann þar um nóttina, enn Hákon Iarl reid leid sína, oc kom fram austr í Svía-velldi til Steinkels konungs, oc dvaldiz med hönom um sumarit. Haralldr konungr sneri sídan aptr út til byiar, fór konungr norðr til Þrándheims, oc dvaldiz þar um sumarit, en fór aptr um haustit austr í Vík.

CAP. LXXII.

FRÁ HÁKONI IARLI.

Hákon Iarl fór þegar um sumarit aptr til Upplanda, þegar er hann spurdi at konungr var norðr farinn, dvaldiz þar til þess er konungr kom norðan. Síðan fór Iarl austr í Vermaland, oc dvaldiz þar leingi um vetrinn, veitti Steinkell konungr Iarli

þar yfirsókn; hann fór um vetrinn er áleid vestr á Raumaríki, oc hafdi hann lid mikit, er Gautar oc Vermir höfdo fengit hönom; þá tók hann landskylldir sínar oc skatta af Upplendingom, þá er hann átti. Síðan fór hann austr aptr til Gautlandz, oc dvaldiz þar um vorit. Haralldr konungr sat um vetrinn í Oslo, oc gerdi menn sína til Upplanda, at heimta þar skatta af oc landskylldir konungs oc sakeyri. Enn Upplendingar sögdo sva at þeir mundi greida allar skylldir þær er þeir átto at greida, oc fá í hendur Hákoní Iarli medan hann var á lifi, oc hann hafdi eigi fyrirgört ser edr ríki síno; oc feck konungr þadan eingar landskylldir á þeim vetri.

CAP. LXXIII.

SÆTT HARALLDS KONUNGS OC SVEINS
KONUNGS.

Þann vetr fóro bod oc sendi-menn milli Noregs oc Danmerkor, oc var þat í bundit, at hvarirtveggio Nordmenn oc Danir villdo göra frid milli sín oc sætt, oc bádo konunga til þess. Oc fóro þær ord-sendingar helldr líkliga til sætta, oc kom sva at lycdom, at sættar-fundr var stefndr í Elfi milli Harallds konungs oc Sveins konungs. Enn er vá-rar, safnar hvartveggi konunganna lidi miklo oc skipom til þessar ferðar, oc segir skálldit í einom

flocki frá ferd þeirra konunganna, oc hefr hann þar upp:

Nordr lykr gramr sá er gerdir
grund frá Eyrar-sundi
hrafn gælir sparn hæli
höfn láng-skipa stöfnom.
Rista gulli glæstir
giálfr en súdir skjalfa
hvast und her fyrí vestan
Hallandi fram brandar.

Gerdir opt firi iördo
eid-fastr Haralldr skeidom
Sveinn sker oc til annars
ey sund konungs fundar.
Ut hefira lid lítit
lof-sniallr Dana allra
hinn er hvern vag sunnan
hrafn grænnir lykr stafnom.

Her segir þat, at konungar þessir hallda stefno-lag
þat er gert var milli þeirra, oc koma þeir bádir til
landa-mæris. Sva segir Halli Strídi:

Systot sudr þar er æsto
sniallr gramr Danir allir
enn serr eigi minni.
efni mælltrar stefno.
Sveinn tekr nordr at nenna
nær til landa-mæris
Vard fyrí vídri iördo
viudsamt Haralld finna.

Enn er konungar funduz, þá tóko menn at ræða um sættir konunganna. Enn þegar er þat var í munni haft, þá kærdo margir skada sinn, er fengit höfdo af hernadi, rán oc manna-lát, oc var þat lánga rid er ólíkligt þótti um sættir. Sva sem her segir:

Telia hátt er hittaz
hvarstveggia miöc seggir
ord þau er ángra firða
all mörg búendor sniallir.
Láta þeir er þræta
þegnar allt í gegnom
svellr ofr-hugi iöfrom
eigi brátt vid sáttom.

Of-reidi vard iöfra
allhætt ef skal sættaz
menn þeir er midla kunno
mál aull vega í skáлом.
Dugir siklingom segia
slíkt allt er her líkar
velldr ef verr skulo hauledar
vili girndar þv skiliaz.

Sídan átto hlut i enir besto menn, oc þeir er vi-trastir voro, geck þá saman sætt konunga med þeim hætti, at Haralldr skyllði hafa Noreg, enn Sveinn Danmörk, til þess landa-mæris sem at for-no hafdi verit millum Danmerkr oc Noregs; skyll-do hvarigir ödrom bæta; skyllði þar hernadr leg-

giaz, sem hafiz hafdi, enn sá hafa happ er hlótit hafdi. Sá fridr skyllði standa, medan þeir væri konungar. Sú sætt var eidom bundin. Síðan skilduz konungar, oc selduz gisla, sva sem her segir:

Hitt hefi ec heyrt at setti
Haralldr oc Sveinn vid meinom
Gud syslir þat gisla
gladr hvartveggi adrom.
þeir halldi sva særom
sátt laukz þar med váttom
oc öll í frid fullom
ferd at hvargi skerdi.

Haralldr konungr hellt lidi síno norðr í Noreg,
enn Sveinn konungr fór suðr í Danmörk.

CAP. LXXIV.

ORROSTA HARALLDZ OC HÁKONAR IARLS.

Haralldr var í Víkinni um sumarit, enn er hann gerdi menn sína til Upplanda, eptir skulldom oc skauttom er hann átti þar, þá gördó bændor þar eingan greida á, oc qváðoz mundo láta bíða allt þar Hákonar Iarls, ef hann kæmi til þeirra. Hákon Iarl var þá uppi á Gautlandi, oc hafði lid mikít. Enn er áleid sumarit, hellt Haralldr konungr suðr til Kongahello. Síðan tók hann lettiskip öll, þau er hann feck, oc hellt upp eptir Elfinni; let hann draga of alla forsa, oc flutti skipin upp í

vatnit Væni. Síðan röri hann austr yfir vatnit, þar sem hann spurdi til Hákonar Iarls. Enn er Iarl feck niósn af för konungs, þá sótti hann ofan af landi, oc villdi eigi at konungr heriadi á þá. Hákon Iarl hafði lid mikit, er Gautar höfðu fengit hönom. Haralldr konungr lagði skipom sínom upp í módo neckora, síðan red hann til land-gaungo, enn let eptir sumt lidit, at gæta skipa. Konungr siálfr reid oc sumt lidit, enn miklo fleira geck. Þeir átto at fara yfir skóg neckorn, oc voro þar fyri þeim kiarr-myrar neckrar, oc þá en hollt; enn er þeir komo upp á holltit, sá þeir lid Iarls: var þá fyri þeim myr ein milli þeirra. Fylkdo þá hvarirtveggio. Þá mællti Haralldr konungr, at lid hans skyldi sitia uppi á backanom, freistom fyrst ef þeir vilia áráða: Hákon Iarl er óbil-giarn, sagði hann. Frost var vedrs, oc sniódrif neckot, sátu þeir Haralldr undir skiölldom sínom, enn Gautar höfðu lítt klædi, oc gördi þeim svallt. Iarl bað þá bíða þess er konungr gengi at, oc þeir stæði allir iafn-hátt. Hákon Iarl hafði merki þat, er Magnús konungr Olafsson hafði haft oc átt. Laugmadr Gauta het Þórvidr, hann sat á hesti, oc var bundinn taumrinn við hæl einn, er stóð í myrinni; hann taladi oc mællti: þat veit Gud, at ver höfom her lid mikitt oc frítt, oc hellsti frækna menn, látom þat spyria Steinkel konong, at ver

veittom vel lid þessom góða Iarli. Veit ec þat, þótt Nordmenn leiti á oss, at ver tökum örugt móti þeim. Enn ef ungmennit skialar, oc vill eigi bíða, þá rennom eigi lengra en her til becksins; enn ef meirr skialar ungmennit, sem ec veit at eigi man vera, þá rennom eigi lengra en her til högsins. I því bili lióp upp her Nordmanna, oc æpdi heróp, oc bardi á skiölldo sína; tók þá oc Gautaherr at æpa. Enn hestr Lögmans hnyckdi sva fast, er hann fældiz vid herópit; at hællinn geck upp, oc hröckdi hönom upp um höfud Lögmanninom; hann mællti: skióttu allra Nordmanna armastr, hleypdi lögmadr þá í brott. Haralldr konungr hafði ádr sagt lidi síno sva: þótt ver görim brak oc óp um oss, þá göngom ver eigi fyri backann, fyrr en þeir koma her at oss, oc gördo þeir sva; enn þegar er herópit kom upp, þá let Iarl bera fram sitt merki, enn er þeir koma undir backann, þá steypdiz konungs-lidit ofan á þá, fell þá þegar sumt lid Iarls, enn sumt flydi. Nordmenn ráko flóttann eigi langt, þvíat kvæld var dags. Þeir tóko þar merki Hákonar Iarls, oc slíct af vapnom oc klædom sem þeir fengo. Haralldr konungr let bera fyri ser bædi merkin, er hann fór ofan. Þeir ræddo med ser hvart Iarl mundi fallinn; enn er þeir rido ofan um skóginn, þá mátti einn rida iasfn-fram. Madr hleypdi um þvera gautuna, oc lagdi kesio í gögnom þann

er þar merki Iarls, hann þreif merki-stöngina, oc leypti annan veg í skóginu med merkit. Enn er þetta var sagt konungi, þá mællti hann: lifir Iarl; fáit mer brynio mína: reid þá konungr til skipa sinna um nóttina; mællto margir at Iarl hefði hefnt sín. Þá kvad Þiódolfr:

Aulld var sús Iarli skyllði

ógn teitom lid veita

sterkr olli því stillir

Steinkels gefin helio.

Enn því at illa reyndiz

afls ván þadan hánom

fyrir let Hákon hörva

hvat segir hinn er þat fegrir.

CAP. LXXV.

VÍG HALLS CODRANSBANA.

Haralldr konungr var þá nótt á skipom sínom þat semleptir var, enn um morguninn er lióst var, þá var ús lagdr allt um skipin svo þiockt, at gán- ga mátti umhverfis. Þá bad konungr sína menn, at þeir skyldo höggva ísinn frá skiponom oc úti vatnit, gengo menn þá til, oc redo á ís-höggit. Magnús son Haralldz konungs styrði því skipi er ned-arst lá í módonni, oc næst lá úti vatnino. Enn er menn höfdo miðe höggvit út ísinn, þá lióp madr út eptir ísinom, þar til er höggva skyllði, oc let

síðan sem væri óðr oc galinn at íshauggino. Þá mællti madr: Nú er enn sem optar, at engi madr er íafn líd-góðr, hvar sem hann gengr til, sem hann Hallr Kodransbani; se nú hversu hann höggv ísinn. Einn madr sá var á skipi Magnús konungs-sonar, er Þórmóðr het Eindridason; enn er hann heyrði nefndan Kodransbana, þá lióp hann at Halli, oc hió hann bana-högg. Kodran var Gudmundar-son Eyiolfssonar; enn Valgerðr var systir Gudmundar, móðir Iorunnar, móðr Þórmóðar. Þórmóðr var vetr gamall, þá er Kodran var veginn, oc hafði hann alldregi sed Hall Otryggsson fyrr en þá. Þá var oc ísinn út höggvinn í vatnit, oc lagði Magnús sitt skip út í vatnit, oc tók þegar til segls, oc sigldi vestr yfir vatnit; enn konungs skipit lá innast í vökinni, oc komz þat seinst út. Hallr hafði verit í sveit konungs, oc hönom allkærr, oc var konungr inn reidasti. Konungr kom síð til hafnar, hafði Magnús þá skotit vegandanom í skóg; oc baud þat fyrri hann; oc var víð síálft, at konungriinn mundi gánga at þeim Magnúsi, áðr vinir þeirra komo til oc sætuo þá.

CAP. LXXVI.

FRÁ HARALLDI KONUNGI.

Vetr þenna fór Haralldr konungr upp á Raumaríki, oc hafði líd mikit, bar hann sakir á hendur þæn-

bændom þar, at þeir höfðu halldit fyrir hönom sköttom oc skylldom, enn eflit fiand-mennu hans til ófridar við hann; let hann taka bændor, hamla suma, suma drepa, enn marga ræna all-eiginni; þeir flydo er því komo við; allvíða let hann brenna herödin, oc giördi aleydo. Sva segir Þiódolfr:

Tök holm-búa hneykir
hardan taum við Rauma
þar byck fast ins frækna
fylking Haraldz gengo.
Elldr var görr at gialldi
gramr enn þa red tedi
hár í hof at færa
hrot garmr blöndor arma.

Síðan fór Haraldr konungr upp á Heidmörk, oc brendi þar, oc gördi þar her-virki eigi minna enn á Raumaríki. Þaðan fór hann út á Hadaland oc út á Ríngaríki, brendi þar oc fór allt her-skilldi. Sva segir Þiódolfr:

Gagn brann greipra þegna
glóð varð faust í tróði
laust hertoga hristir
Heina illom steini.
Lífs báðo ser lydir
logi þíngadi Hríngom
naudgan dóm ádr næmiz
nidr fall Halfs galla.

Eptir þat lögdo bændor allt sitt mál á konungs valld. Eptir þat er Magnús konungr var andadr, lido XV vetor ádr Nizar-orrosta var, enn síðan II ádr Haralldr oc Sveinn sættiz. Sva segir Þiódolfr:

Ferdi fylkir Haurda
fridr namz ár it þridia
rendr bito stál fyrí ströndo
starf til króks at Hvarfi.

Eptir sætt þeirra vardi deila konungs við Upplendinga III misseri. Sva segir Þiódolfr:

Nú er of verk þau er vísi
vandmællt sva at af standezc
audan plóg at eiga
Upplendingom kendi.
Ser hefir sva lángs tírar
svinnz at æ man vinnaz
þrið misserin þessi
þengils höfut fengit.

CAP. LXXVII.

FRÁ ENGLANDZ KONUNGOM.

Iátvardr Adalrádsson var konungr í Englandi eptir Hörda-Knútt, bródr sinn; hann var kalladr Iátvardr inn Gódi, hann var sva. Módir Iátvardar konungs var Emma drottning, dóttir Rikardar Rudo-Iarls; bródir hennar var Rodbert Iarl, faðir Vilhiálms Bastardar, er þá var hertogi í Rudo í Nordmandi.

Iátvardr konungr átti Gydo drotningo, dóttor Gudena Iarls Ulfnadssonar. Brædor Gydo varo þessir: Tosti Iarl, hann var ellstr, annar Mauro-Kári Iarl, III Valpiófr Iarl, fiórði Sveinn Iarl, fimti Haralldr, hann var yngstr; hann fæddiz upp í hird Iátvardar konungs, oc vár hans fóstr-son, oc unni konungr hönöm geysi mikit, oc hafði hann fyrir son ser; þvíat konungrinn átti eigi barn.

CAP. LXXVIII.

FRÁ HARALLDI GUDINASYNI.

Þat var á eino sumri, at Haralldr Gudinason átti ferd til Brettlandz, oc fór á skipi, enn er þeir komo í hafit, þá tók þá andvidri, oc rak út í haf. Þeir tóko land vestr í Nordmandi, oc höfdo fengit storm mann-hættan. Þeir lögdo til borgarinnar Rudo, oc fundo þar Vilhiálm Iarl, tók hann vid Haralldi seginsamliga oc hans föroneyti, dvalldiz Haralldr þar lengi um haustit í gódom fagnadi, þvíat stormar lágo á, oc var eigi í haf fært; enn er at leid vetr-nóttom, þá ræddo þeir þat Iarl oc Haralldr, at haun mundi þar dveliaz um vetrinn, sat Haralldr í hásæti á adra hönd Iarli, enn til annarar handar kona Iarls, hon var hverri kono frídari, er menn höfdo sed. Þau taulodo öll saman ser gaman iafnan vid dryckio. Iarl geck optazt snemma at sofa, enn Haralldr sat lengi á kvölldom, oc taladi vid kono

Iarls; fór sva fram lengi um vetrinn. Eitt sinn, er þau töludo, segir hon Haralldi: nú hefir Iarl rætt um við mik, og spurdi hvat við taladim sva þrátt; og er hann nú reidr. Haralldr svarar: við skolom hann nú láta vita sem skiótast allar ræðor okrar. Eptir um daginn kalladi Haralldr Iarl til tals við sik, og gengo þeir í mál-stofo, þar var þá og kona Iarls, og ráðone yti þeirra. Þá tók Haralldr til máls: þat er at segia ydr, Iarl, at fleira byrr í hingat-komo miuni, enn þat er ec hefir enn upp borit fyrir ydr. Ec vil bidia dóttir þinnar til eigin-kono mer, hefir ec þetta mál rætt fyri móðor hennar optliga, og hefir hon mer því heitit, at lidsinna þetta mál við ydr. Enn þegar er Haralldr hafði þetta mál uppborit, þá tóko allir því vel þeir er við voro, og flutto þat fyrir Iarli, kom þessu sva at lykdom, at mærin var föstnod Haralldi. Enn fyri því at hon var ung enn þá, þá var mællt nockorra vetra frest á til brullaups-stefno.

CAP. LXXIX.

DAUDI IÁTVARDAR KONUNGS.

Enn er vár kom, þá bió Haralldr skip sitt, og ferr í brott, skilduz þeir Iarl með kærleikom miklom, fór þá Haralldr út til Englands, á fund Iátvardar konungs, og kom eigi síðan til Vallandz, at vitia þessa ráds. Iátvardr var konungr yfir Englandi

XXIII vetor, oc vǫrd sótt-dauðr í Lundunom none Januarii, hann var iardadr at Páls-kirkio, oc kalla Enskir menn hann helgan.

CAP. LXXX.

HARALLDR GUDINASON TIL KONUNGS

TEKINN Á ENGLANDI.

Synir Gudina Iarls voro þá ríkastir menn á Eng-landi; var Tosti settr höfðingi yfir her Engla konungs, oc var hann landvarnar-madr, þá er konungr tók at elldaz; hann var settr yfir alla Iarla adra. Haralldr bróðir hans var íafnan innan hirdar, oc var konungi enn næsti madr um alla þíonosto, oc hafði allar fe-hirdzlor konungs at giæta. Þat er sögn manna, at þá er framleid at andláti konungs, þá var Haralldr nærr oc fátt manna annat; þá laut Haralldr yfir konung oc mællti: Því skírskota ec undir alla yðor, at konungrinn gaf mer nú konungdóminn, oc allt ríki í Englandi; því næst var konungr hafðr dauðr or hvílonni. Þann sama dag var þar höfðingia-stefna, var þá rætt um konungstekio, let þá Haralldr bera fram vitni sín þau, er látvardr konungr gaf hönom ríkit á deyianda degi; lauk sva þeirri stefno, at Haralldr var til konungs tekinn, oc vígðr konungs-vígslo inn XIII dag í Páls-kirkio. Gengo þá allir höfðingar til handa hönom,

oc allt fólk. Enn er Tosti Iarl spurdi þat, bródir hans, likadi hönom illa, þóttiz hann eigi verr tilkominn at vera konungr: vil ec, sagdi hann, at landz-höfðingar kíosi þann til konungs, er þeim þickir best vera tilfallinn; oc fóro þau ord milli þeirra brædranna. Haralldr konungr svarar sva, at hann vill eigi upp gefa konung-dóminn, fyrir því at hann var stól-settr í þeim stad sem konung átti at taka, enn verit síðan smurdr oc vígdr konungsvigslo; hvarf oc til hans allr styrkr fiölmennis, hafdi hann oc fe-hirdzlor konungs allar.

CAP. LXXXI.

FERD TOSTA TIL DANMERKR.

Enn er Haralldr konungr vard þess varr, at Tosti Iarl bródir hans villdi hafa hann af konung-dóminom, þá trúdi hann hönom illa, þvíat Tosti var madr forvitri, oc hermadr mikill, oc átti vel vingat vid landz-höfðingia. Tók þá Haralldr konungr af Tosta herstiörnina, oc allt þat valld er hann hafdi ádr haft, framar enn adrir Iarlar þar í landi. Tosti Iarl vildi þat fyrir eingan mun þola, at vera þíó-nosto-madr bródr síns samborins: fór hann þá oc brott med lidi síno sudr um síá í Flandr, oc dvalldiz þar litla ríd, fór þá til Fríslanz, oc þaðan til Danmerkr á fund Sveins konungs frænda síns. Þau voro systkyn Ulfr Iarl fadir Sveins konungs,

oc Gyda modir Tosta Iarls; bidr Iarl Svein konung fulltíngs oc lid-vcizlo. Sveinn konungr baud hönom til sín, oc sagdi hann skuli hafa þar Iarlsríki í Danmörk þat, er hann megí vera þar sæmiligr höfdingi. Iarl svarar: Þess girnir mic, at fara til Englands aptr til ódala minna. Enn ef ec fæ öngan styrk til þess af ydr, konungr, þá vil ec þat helldr tilleggia vid ydr, at veita ydr allan styrk þann, er ec á kosti í Englandi, ef þer vilit fara med Dana-her til Englandz, at vinna landit, sva sem Knútr modur-bródir þinn. Konungr svarar: sva miklo em ec minni madr enn Knútr konungr frænda minn, at varla fæ ec halldit Dana-ríki fyri Nordmönnom; enn Gamli Knútr konungr eignadiz at erfd Dana-ríki, en med hernadi oc orrosto Eng-land, oc var þó um ríd þat eigi óvænna, at hann mundi þar eptir leggja lifit. Noreg feck hann or-rosto-laust. Nú kann ec at ætla mer hóf meirr eptir míno lítilrædi, en eptir framkvæmd Knútz konungs frænda míns. Þá mælti Tosti Iarl: min-na verdr mitt erendi hingat, en ec hugda at þú mundir vera láta, sva göfigr madr, í naudsyniom frænda þíns. Kann nú vera, at ec leita þannog vináttonnar, er myklo er ómakligra; enn þá má vera, at ec finna þann höfdingia, er midr vaxi fy-rir augom at ráða miök stórt enn þer konungr. Sí-dan skildoð þeir konungr oc Iarl, oc varliga sáttir.

CAP. LXXXII.

FERD TOSTA TIL NOREGS.

Tosti Iarl sneri þá ferðinni, oc kom fram í Noreg, oc fór á fund Haralldz konungs, var hann þá í Víkinni. Enn er þeir finnaz, ber Iarl upp fyri konung erindi sín, segir hönom allt um ferdir sínar síðan er hann fór af Englandi, biðr konung fá ser styrk, at sækia ríki sitt í Englandi. Konungr svarar sva, at Nordmenn muno þess eigi fúsir, at fara til Englands at heria, oc hafa þar Enskan höfðingia yfir ser; mæla menn þat, segir hann, at þer hinir Enskø se eigi alltrúir. Iarl svarar: hvart er þat med sannendom sagt, er ec hefi menn heyrt segia í Englandi, at Magnús konungr frændi þinn sendi menn til Iátvardar konungs, oc var þat í ord-sending, at Magnús konungr átti England slíkt sem Danmörk, oc hafði í arf tekit eptir Hörða-Knútt, sem swardagar þeirra höfðu tilstadit? Konungr svarar: hví hafði hann þat eigi, ef hann átti þat? Iarl svarar: hví hefir þú eigi Danmörk, sva sem Magnús konungr hafði fyri þer? Konungr svarar: eigi þurfa Danir at hælaz vid oss Nordmenn; margan dila höfom ver brent þeim frændom þínom. Þá mælti Iarl: villtu eigi mer segia, þá mun ec þer segia. Þvi eignadiz Magnús konungr Danmörk, at þar landz-höfðingiar veitto hönom; enu því feckt

þú eigi, at allt landz-fólk stóð i móti þer. Því bardiz Magnús konungr eigi til Englandz, at allr landz-lydr villdi hafa látvard at konungi. Villt þú eignaz England, þá má ec sva gera, at meiri luti höfðingia í Englandi muno vera vinir þínir, oc lid-sinnis-menn; eigi skortir mic meira vid Haralld bródir minn enn konungs-nafn eitt. Þat vito allir menn, at engi her-madr hefir slíkr sæz á Nordr-löndom sem þú, oc þat þicki mer undarligt, er þú bardiz XV vetor til Danmerkr, enn þú vill eigi hafa England, er nú liggr laust fyri þer. Haralldr konungr hugsadi vandliga hvat Iarl mællti, oc skilldi, at hann sagdi mart satt, oc í annan stad giördiz hann fúss til at fá ríkit. Síðan tölodo þeir konungr oc Iarl löngom oc opt, setto þeir þá ráða-giörd þessa, at þeir skyldo fara um sumarit til Englandz, oc vinna landit. Sendi Haralldr konungr ord um allan Noreg, oc baud út leidángri, hálfom almenningi; vard þetta nú allfrægt, voro margar getur á, hvernog förin mundi verda, mællto sumir oc tölldo upp stór-virki Haralldz konungs, at hánom mundi eigi ófært vera: enn sumir sögdo, at England mundi verda torsótt, mann-fólk ofa-míkit á, oc þat lid er kallat er þínga-manna-lid, þeir voro menn sva fræknir, at betra var lid eins þeirra en II Harallds manna hinna besto. Þá sagdi Ulfr stallari:

Era stallorom stillis
 stafn-rúm Haralldz iafnan
 ónaudgr fær ec audar
 innan þaurf at hverfa.
 Ef haur breckan hrockva
 hrein skulom tveir fyri einom
 úngr kendak mer undan
 annat þínga-manni.

Ulfr stallari andadiz þat vár. Haralldr konungr stód yfir grepti hans, oc mællti er hann geck frá: Þar liggr nú sá er dryggvastr var oc drottin hollastr. Tosti Iarl sigldi um várit vestr til Flæmingia-landz, á móti lidi því er hönom hafdi fylgt utan af Englandi, oc því ödro er safnadiz til hans bædi af Englandi oc þar í Flæmingia-landi.

CAP. LXXXIII.

DRAUMR GYRDAR.

Herr Haralldz konungs safnadiz saman í Solundom. Enn er Haralldr konungr var búinn at leggja út or Nidarósi, þá geck hann ádr til Skrínis Olafs konungs, oc lauk upp, oc klipti hár hans oc negl, oc læstir sídan Skríniuo, enn kastadi lyklinom út á Nid; enn sumir segia, at hann kastadi utanbordz fyrir Agdanesi; oc hefir eigi sídan verit upplökit Skríni ins helga Olafs konungs. Þá var lidit frá falli hans XXXV vetor, hann lifdi oc hálfan fiórda

tög vetra her í heimi. Haralldr konungr hellt því lidi, er hönom fylgdi, sudr til mótz við lid sitt. Þar kom saman lid mikit, sva at þat er sögn manna, at Haralldr konungr hefði nær CC skipa, oc umfram vista-byrðingar oc smá-skútor. Þa er þeir lágo í Solundom, dreymdi mann þann er var á konungs skipino, er Gyrdr er nefndr: hann þóttiz þar vera staddr á konungs skipino, oc sá uppá eyna, hvar tröll-kona stóð mikil, oc hafði skálm í hendi, oc í annari hendi trog; hann þóttiz oc siá yfir öll skip þeirra, oc þótti hönom fugl sitia á hveriom skip-stafni, þat voro allt ernir oc rafnar. Tröll-konan qvad víso:

Víst er at allvalldr austan
eggiaz. vestr at leggja
mót við marga knútu
minn snúdr er þat prúða.
Kná val-þidurr velia
veit hann erna ser beito
steik af stóði Gjúka
stafns fylgi ec því iasnan
oc stafns fylgi ec því iasnan.

CAP. LXXXIV.

DRAUMR ÞÓRDAR.

Þórdr er annar madr nefndr, er var á skipi því, er skamt lá frá skipi konungs. Hann dreymdi um nótt, at hann þóttiz siá flota Haralldz konungs fara

at landi, oc þóttiz vita at þat var England; hann
 sá á landino fylking mikla, oc þótti sem hvarir-
 tveggio biöggiz til bardaga, oc höfdo merki á lopti.
 Enn fyri lidi landz-manna reid tröll-kona mikil,
 oc sat á vargi, oc hafdi vargrinn mans hræ í mun-
 ni, oc fell blód um kiptana; enn er hann hafdi
 þann etit, þá kastadi hon ödrom í munn varginom,
 oc síðan hveriom at ödrom, enn hann gleypti hvern.
 Hon qvad:

Skód lætr skína raudan
 skiölld er dregr at hialldri
 brúdr ser aurnis ióða
 óför konungs giörfa.
 Sviptir í svardar kipta
 svanni holldi manna
 úlfs munn litar innan
 ódlát kona blódi
 ódlát kona blódi.

CAP. LXXXV.

DRAUMR HARALLDZ KONUNGS.

Haralldr konung dreymdi um nótt, at hann væri
 í Nidarósi, oc litti Olaf konung bródr sinn, oc qvad
 Olafr víso fyrir hönom:

Gramr vá frægr til fremdar
 flestan sigr en Digri
 hlaut ec því at heima sátom
 heilagt fall til vallar.

Uggir ec enn at tiggir
 ydr mani feigd of byriod
 traullz gefit fákom fyllar
 síks velldrat Gud slíko.

Margir adrir drammar oc fyriburdir voro þá sagdir, oc flestir dapurligir. Haralldr konungr, ádr hann fór af Þrándheimi, hafdi þar látit taka til konungs Magnus son sinn, oc setti hann til ríkis í Noregi, er konungr fór í brant. Þóra Þórbergs dóttir var oc eptir, enn Ellisif drottning fór med hönom, oc dætor hennar Maria oc Ingigerdr. Olafr, son Haralldz konungs, fór oc med hönom or landi.

CAP. LXXXVI.

ORROSTA VID SKARDABORG.

Enn er Haralldr konungr var búinn, oc byr gaf, sigldi hann út á haf, oc kom af hafi vid Hialtland, enn sumt lid hans kom vid Orkneyar, lá Haralldr konungr skamma hríd vid Hialtland, ádr hann sigldi til Orkneyia, oc hafdi þadan med ser lid mikit, oc Iarlana Pál och Erling, syni Þórfinnz Iarls; enn let þar eptir Ellisif drottning oc dætor þeirra Maríam oc Ingigerdi. Þadan sigldi hann vestr fyri Skotland, oc sva fyrir England, oc kom þar vid land, er heita Klislönd, þar geck hann á land, oc heriadi þegar, oc lagdi landit undir sic, oc feck einga vidstödo. Sídan lagdi hann til Skardaborgar,

oc bardiz þar við borgar-menn; hann gekk uppá bergit þat, sem þar verdr, oc let þar göra bál mik-it, oc leggja í elld. Enn er bálit logadi, tóko þeir forka stóra, oc skuto bálino ofan í bæinn, oc tók þá at brenna hvert hús af öðro, gafz þá upp allr stadrinn; drápo Nordmenn þar mart manna, enn tóko fe allt þat er þeir fengo; vard þá Enskom mönnum engi kostr annar fyrir höndom, ef þeir skyldo hallda lífino, nema gánga til handa Haralldi konungi. Lagdi hann þá undir sic landit allt, þar er hann fór. Síðan lagdi Haralldr konungr med allan herinn sudr med landi, oc lagdi at við Hell-ornes, kom þar safnadr í móti hönom, oc átti Haralldr konungr þar orrosto, oc feck sigr.

CAP. LXXXVII.

FRÁ FYLKING IARLANNA.

Síðan lagdi Haralldr konungr til Humbro, oc upp eptir ánni, oc lagdi þar við land. Þá voro Iarlar upp í Iorvík Mauro-Kári Iarl, oc Valþiófr Iarl af Hunda-túnom, bródir hans, oc höfdo óvígán her. Þá lá Haralldr konungr í Uso, er herra Iarla sótti ofan. Þá gekk Haralldr konungr á land, oc tók at fylkia lidi síno: stóð fylkingar-armrinn annar fram á ár-backann, enn annar vissi á landit upp at díki nockoro; þat var fen díúpt oc breitt, oc fullt af vatni. Iarlar leto síga fylking sína ofan med ánni,

vid öllum múginom. Konungs merkit var nærr ánni, var þar allþykt fylkt, enn þunnast vid dikit, oc lidit þat ótraustast. Þá sótto Iarlar ofan med díkino: veik þá fyrir armr fylkingar Nordmanna, sá er vissi at díkino, enn Enskir menn sótto þar fram eptir þeim, oc hugdo at Nordmenn mundo flya vilia. Fór þar fram merki Mauro-Kára Iarls.

CAP. LXXXVIII.

ORROSTA VID HUMBRO.

Enn er Haralldr konungr sá at fylking Enskra manna var kominn ofan med díkino gegnt þeim, þá let hann blása her-blástr, oc eggjandi herinn ákassiga, let þá frambera merkit Landeydona, snaradi þá atgaungo sva harda, at allt brauck fyrir: gördiz þá mannfall mikit í lidi Iarla. Sneriz þá lidit brátt á flótta, flyði sumt upp med ánni eda ofan, enn flest fólk lióp út á dikit, lá þar sva þycktt valrinn, at Nordmenn máttu ganga þurfætis yfir fenit. Þar tyndiz Mauro-Kári Iarl. Sva segir Steinn Herdísarson:

Þíóð fórsk mörg í módo
menn drucknodo socknir
drengr lá ar of ungan
ófár Mauro-Kára.
Fíla drottinn rak flótta
framr tók her á ramri
rás fyrir rauskom vísa
rík-lundadr vítt undan.

Þessa drápo orti Steinn Herdísarson um Olaf, son Haralldz konungs, oc getr hann þess, at Olafr var í orrosto med Haralldi konungi fedr sínom. Þessa getr oc í Haralldz Sticka:

Lágo fallnir
í fen ofan
Valþíófs lidar
vapnom höggvir.
Sva at gunn hvatir
gánga máttu
Nordmenn yfir
at nám einom.

Valþíófr Iarl, oc þat lid er undan komz, flydi upp til borgarinnar í Iorvík, vard þar it mesta mannfall. Orrosta var midvikodag inn næsta fyrir Mathias messo.

CAP. LXXXIX.

FRÁ TOSTA IARLI.

Tosti Iarl hafdi komit vestan af Flæmingia-landi til Haralldz konungs, þegar er hann kom til Eng-landz, oc var Iarl í öllum orrostum þessom. Fór þá sva sem hann hafdi sagt Haralldi konungi fyrr er þeir fundoz, at fiöldi manna dreif til þeirra í Englandi; þat voro frændor oc vinir Tosta Iarls, oc vard konungi þat mikill styrkr lids. Eptir þessa orrosto, er ádr var frásagt, geck undir Haralld kon-

konung lid allt um en næsto herod, enn sumt flydi. Þá byriadi Haralldr konungr ferd sína, at vinna borgina, oc lögdo herinom vid Stafnfurdo-bryggior. Enn fyrir þá sank, at konungr hafdi unnit sva mikinn sigr vid stóra höfðingia oc ofrefli lids, var allt fólk rætt oc örvæntiz mótstaudo. Þá gördo borgar-menn ráð fyri ser, at senda bod Haralldi konungi, oc biódaz í valld hans, oc sva borgina. Var þetta allt sysslat, sva at Sunnodaginn fór Haralldr konungr vid öllom herinom til borgarinnar, oc setto þing utan borgar konungr oc menn hans, ean borgar-menn sóttu til þingsins; á því þingi iátadiz allt fólk undir lydni vid Haralld konung, oc fengo hönom gisla tíginna manna sonu, sva sem Tosti Iarl kunni skyn allra manna í þeirri borg, oc fór konungr um kvelldit ofan til skipanna med siálf-görom sigri, oc var allkátr. Var ákvedit þingit snemma mánadagiun í borginni; skyldi þa Haralldr konungr skipa stadiun med ríkis-mönnom, oc gefa retto oc len. Þat sama kvelld, eptir sólarfall, kom sunnan at borginni Haralldr konungr Gudenason med óvigan her, reid hann í borgina at villd oc þocka allra borgar-manna, voro þá tekin öll borgar-lid, oc allir veggir, at eigi skyldi niósn koma Nordmönnom; var þessi herr um nóttina í stadnom.

CAP. XC.

UPPGÁNGA HARALLDZ KONUNGS.

Mána-daginn, er Haralldr konungr Sigurdarson hafði mataz at dagverdar máli, þá let hann blása til land-gaungö; byrr sic þá herinn, oc skiptir lidino, hverir fara skulo, eda hverir eptir skulo vera; hann let uppgánga í hvarri sveit II menn, þar er einn var eptir. Tosti Iarl bió sic til uppgöngo med Haralldi konungi vid sína sveit; enn eptir varo til skipa-gæzlo Olafr konungsson, oc Páll oc Erlendr, Orkneyinga Iarlar, oc Eysteinn Orri, son Þórbergs Arnasonar, er þá var ágætastr oc kærstr konungi alla lendra manna: þá hafði Haralldr konungr heitit hönom Mario dóttor sinni. Þá var vedr forkunnliga gott, oc heitt skin. Menn leto eptir brynior sínar, enn gengo upp med skölldom oc hiálmom, oc kesiom, oc sverdom gyrdir, margir höfdo oc skot oc boga, oc váro allkátir. Enn er þeir sóttó í nánd borginni, fór í móti þeim lid mikít, sá þeir ió-reykinn, oc undir fagra skiölldo oc hvítar brynior. Þá staudvadi konungr lid sitt, let kalla til sín Tosta Iarl, oc spyrr hvat þetta lid man vera? Iarl svarar, letz þickia meiri van, at úfridr mundi vera, let oc hitt vera mega, at þetta mundi vera nockorir frændor hans, oc leita til vægðar oc vipátto, enn fá i mót af konungi traust och trúnat.

Þá mælti konungr, at þeir mundo fyrst hallda kyrro fyrir, oc forvitnaz um herinn; þeir gördó sva, oc var lidit því meira, er náligarr fór, oc allt at siá, sem á eina ís-möl sæi, er vapnin glóado.

CAP. XCI.

RÁÐ TOSTA IARLS.

Þá mælti Haralldr konungr: tókóm nú gott ráð nockot oc vitrligt, þvíat eigi er at dyliaz í, at ófridr er, oc mun kominn konungr siálfr. Þá svaradi Iarl: Þat er it fyrsta, at snúa aptr sem skiótast til skipa, eptir lidi voro oc vápnom, veitom þá vidr-töko eptir efnom; enn at ödrom kostom látom skip-in gæta var, oc eigo þá riddarar eigi valld yfir oss. Þá sagdi Haralldr konungr: annat ráð vil ec hafa, at setia hina skiótusto hesta undir þríá vaska drengi, oc rídi þeir sem hvatligast, oc segi lidi voro, man þá skiótt koma oss lidveizla, fyri því at Englizmenn skulo eiga enn snarpa hríd, ádr enn ver berim inn lægra lut, Þá sagdi Iarl, had konung ráða þesso sem ödro, letz oc vera eigi giarn at flya. Þá let Haralldr konungr setia upp merki sitt Land-eydo; Frirekr het sá er mer-kit bar.

CAP. XCII.

FRÁ FYLKING HARALLDZ KONUNGS.

Síðan fylkdi Haralldr konungr lidi síno, let fylking lánka enn eigi þjócka: þá beygdi hann armana aptir á bak, sva at saman tóko, var þat þá vidr ríng, oc íafn-þyckr öllum megin utan: skiölldr vid skiölld, oc sva yfir ofan, enn konungr siálfr oc konungs sveitin var fyrir innan hrínginn, oc þar merkit; þat var oc valit lid; oc í öðrom stad var Tosti Iarl med sína sveit, hafdi hann annat merki: var fyrir því sva fylkt, at konungr vissi, at riddarar voro vanir at ríða á ríðlom, oc þegar aptr. Nú segir konungr, at hans sveit oc Iarls sveit skal þar fram gánka, er mest er þörf; enn bog-menn varir skulo þar oc vera med oss, enn þeir er fremstir standa, skulo setia spiótz-hala sína í iörd níðr, enn setia oddana fyrri brióst ríðdrom, ef þeir ríða at, enn þeir er næstir standa, seti sína spiótz-odda fyrri brióst hestom þeirra.

CAP. XCIII.

FRÁ HARALLDI GUDINASYNI.

Haralldr konungr Gudínason var þá kominn med her óvígán, bæði ríðdara oc fót-gángandi menn. Haralldr konungr Sigurdarson reid þá um fylking sína, oc skyniadi hvernog fylkt var; hann sat á

svörtom hesti blesottom, hestrinn fell undir hönom, oc konungr af fram; stóð hann upp skiótt, oc mællti: fall er farar-heill. Þá mællti Haralldr Engla konungr til Nordmanna þeirra, er med hönom voro: kendo þer þann inn mikla mann, er þar fell af hestinom, vid hinn blá kyrtil, oc hinn fagra hiálm? Þat er konungr siálfr, sögdo þeir. Engla konungr sagdi: Mikill madr oc ítrmannligr; oc er þat vænna, at farinn se nú at hamingio.

CAP. XCIV.

FRÁ TALI HÖFDINGIA.

Riddarar XX rído fram af þínga-manna lidi fyrí fylking Nordmanna, oc voro albryniadir, oc sva hestar þeirra; þá mællti einn riddari: hvart er Tosti Iarl í lidino? hann svarar: eigi er því at leyna, her muno þer hann finna. Þá mællti einn riddarinn: Haralldr konungr, bródir þinn, sendir þer kvedio, oc þau ord med, at þú skalt hafa grid oc Nordumbraland allt, oc helldr en eigi vilir þú til hans neigiaz, þá vill hann gefa þer þridiong ríkis síns alls med ser. Þá sagdi Iarl: þá er nockot bodit annat enn úfridr oc svívirðing, sem í vetr, oc hefði þá verit þetta bodit, þá væri margr sá madr á lífi, er nú er daudr, oc betr myndi þá standa til ríki í Englandi: nú tek ec þenna kost,

edr hvat vill hann þá bióða Haralldi konungi Sigurdarsyni fyri sitt starf? Þá mællti riddarinn: sagt hefir hann þar nockot frá, hvers hann mun hönom unna af Englandi, VII fóta rúm, eda því lengra sem hann er hærri enn adrir menn. Þá sagði Iarl: farit þer nú oc segit Haralldi konungi, at hann skyldi búaz til orrosto; annat skal satt vera at segia med Nordmönnom, enn at Tosti Iarl fór frá Haralldi konungi Sigurdarsyni, oc í fianda-flock hans, þá er hann skyldi beriaz í Englandi vestr: helldr skulo ver allir taka eitt ráð, deyia med semd, eda fá England med sigri. Þá rido aptr riddarar. Þá mællti Haralldr konungr Sigurdarson við Iarl: hverr var þessi inn mál-snialli madr? Þá sagði Iarl: þat var Haralldr konungr Gudenason. Þá mællti Haralldr konungr Sigurdarson: óf-lengi voro ver þesso leyndir; þeir varo sva komnir fyri lid vart, at eigi myndi þessi Haralldr kunna at segia bana-ord varra manna. Þá sagði Iarl: satt er þat, herra, óvarliga fór slíkr höfdingi, oc vera mætti sva sem þer segit; oc sá ec þat, at hann villdi mer grid bióða oc ríki mikit, enn ec vera bana-madr hans, ef ec segda til hans; vil ec helldr at hann se minn bana-madr, en ec hanns, ef annathvert skal vera. Þá mællti Haralldr konungr Sigurdarson til sinna manna: lítill madr var þessi, oc stóð steigriga í stig-reipnom.

Sva segia menn, at Haralldr konungr Sigurdarson
 qvad víso þessa:

Fram göngo ver
 í fylkingo
 brynio lausir
 und blár eggjar.
 Híálmar skína
 hefkat ec mína
 nú liggr skruð vart
 at skipom nidri.

Emma het brynia hans, hon var síð, sva at hon
 tók á mit bein hánom, oc sva sterk, at alldri hafdi
 vapn á fest. Þá mællti Haralldr konungr Sigurdar-
 son: þetta er illa ort, oc mun verða at göra adra
 betri; þá qvad hann:

Kriðpom ver við vapna
 valteigs brákan eigi
 sva baud hilldr at bialldri
 halld-ord í bug skialldar.
 Hátt bad mic þar er mættuz
 menskord bera forðom
 hlackar ís oc hausar
 biálm stall í gay málma.

Þá kvad oc Þiódolfr:

Skalka ec frá þótt fylkir
 falli siálfr til vallar
 gengr sem Gud vil úngom
 grams erfingiom hverfa.

Skína sól á syni
 snarráds en þá báða
 Haralldz ero haukar görfir
 hefnendr konungs efni.

CAP. XCV.

UPPHAF ORROSTONOAR.

Nú hefr upp orrosto, oc veita Enskir menn áreid Nordmönnum, verdr vidtakan hörd, vard óhægt Enskom mönnum at ríða at Nordmönnum, fyrí kesionom, oc ríðo þeir í hríng um þá, var þar þá fyrst laus orrosta, medan Nordmenn helldo vel fylkingonni, enn Enskir menn ríðo at hart, oc þegar frá, er þeir fengo eigi at syst. Enn er Nordmenn sá, at þeim þótti, blaudliga atríðit, þá sóttu þeir eptir þeim, oc villdo reka flottann; enn er þeir höfdo brugðit skialld-borginni, þá ríðo Enskir menn at þeim öllum megin, oc báro á þá skot oc spiót. Enn er Haralldr konungr Sigurdarson sá þat, geck hann fram í orrosto þar er mestr var vapna-burðrinn, vard þar þá hinn hardasta orrosta, oc fell mikit líd af hvaromtveggjom. Þá vard Haralldr konungr Sigurdarson sva óðr, at hann líóp allt fram or fylkingonni, oc híó bádom höndom, hellt þá hvarki víð hönom híálmr ne brynja; þá stueko frá hönom allir þeir er næstir voro: var þá víð síálft, at Enskir menn mundi flyia. Sva segir Arnorr Íarla-skálld:

Hafdi brióst ne bifðiz
 böð-snart konungs hiarta
 í hiálm þrimo hilmir
 hlit styggr fyri ser lítit.
 þars til þengils herfa
 þat sá her at skatna
 blóðögr hiörr hins barra
 beit döglunga hneitis.

CAP. XCVI.

FALL HARALLDZ KONUNGS SIGURDAR-
SONAR.

Haralldr konungur Sigurdarson var lostinn auro í ostinn, þat var hans bana-sár, fell hann þá oc aull sú sveitin, er framgeck med hönom, nema þeir er aprtr opodo, oc helldo þeir merkino; vard þá enn inn hardasti bardagi, geck þá Tosti Iarl undir konungs merkit: tóko þá hvarirtveggio at fylkia annat sinni, oc vard þá á dvöl miöc löng orrostinni. Þá qvad Þiódolfr:

Aulld hefir afrád golldit
 fillt nú qved ec her stilltan
 baud þessa ferd þiódom
 þarslaust Haralldr austan.
 Sva lauk siklings æfi
 snialls at ver rom allir
 lofdungr beid inn leyfdi
 lífs grand í stad vandom.

Enn ádr en saman sigi en sídari orrostan, þá baud Haralldr Gudenason grid Tosta Iarli bróðr sínom, oc þeim mönnum öðrom, er þá lifdo eptir af lidi Nordmanna, enn Nordmenn æpdo upp allir senn, oc sögdo sva, at hverr skyldi falla of þveran annan, fyrr en þeir gengi til grida vid Enska menn. Æpdo þá hverirtveggio her-óp, tókz þá orrosta í annat sinn. Sva segir Arnorr Iarla-skálld:

Eigi vard ens ægia
audligr konungs daudi
hlífðot hlenna sofi
hoddom roðnir oddar.
Helldr kuro meirr ins mæra
míldings en grid villdo
of fólk snaran fylki
falla lids-menn allir.

CAP. XCVII.

ORRA-HRÍÐ.

Eysteinn Orri kom í því bili frá skiponom med því lidi, er hánom fylgdi, voro þeir albryniadir, feck þá Eysteinn merki Haralldz konungs Landeydona: verdr nú orrosta í þridia sinn, oc var sú hinn snarpasta, fello þá miöc Enskir menn, oc var vid siálft at þeir mundi flyia. Sú orrosta er köllod Orra-hríd. Þeir Eysteinn höfdo farit sva ákafliga frá skiponom, at þeir voro fyrr sva módir, at nálíga

voro þeir ófærir, fyrr enn þeir komo til orrosto, enn síðan voro þeir sva ódir, at þeir hlífdo ser eigi medan þeir máttu uppistanda; at lyedom steypdoz þeir or hringa-brynionom, var þá Enskum mön-
nom hægt at finna högg-stadi á þeim, enn sumir sprúngo med öllo, oc dó ósárir, fell nálíga allt stór-
menni Nordmanna. Þetta var inn efra lut dags; varð þat sem ván var, at þar voro enn eigi allir iafnir, flydo margir, oc þeir er sva komoz undan, at ymissa audno báro til; gördi oc myrkt um kvældit, ádr en lokit væri öllom manna-dráponom.

CAP. XCVIII.

FRÁ STYRKÁRI STALLARA.

Styrkár Stallari Haralldz konungs Sigurdarsonar, komz á brot, ágætr madr; hann feck hest, oc reid sva brott um kvældit, gördiz á vindr nockr helldr svalr, enn Syrkár hafdi eigi klædi fleiri en skyrtó eina, oc hiálm á höfði, oc nöckvid sverd í hendi ser. Hönom svaladi, er hann hratt af ser mædin-
ni; þá kom í móti hönom vagn-karl einn, oc var í kausungi fódrodom, þá mælti Styrkár: villto selia mer kausunginn, bóndi? eigi þerna, svarar hann, þú mant vera Nordmadr, kenni ec mál þitt. Þá sagdi Styrkár: ef ec em Nordmadr, hvat villtu þá? bóndi svarar: ek vilda drepa þic, enn nú er sva

illa, at ec hefir eigi vapn til, þat er nýtt se. Þá mælti Styrkár: ef þú bóndi mátt eigi mic drepa, þá skal ec freista at ec mega þic drepa: reidir upp sverdit, oc setr á háls hönom, sva at geck af höfudit; tók hann síðan skinnhiúpinn, oc lióp á hestinn, oc fór til strandar ofan. Olafr Haralldzson var eigi á landi med, oc er hann spurdi fall föður síns, bióz hann til brottlögo med þat lid er eptir var.

CAP. XCIX.

FRÁ VILHIÁLMI BASTARDI.

Vilhiálmr Bastardr Rudo-Iarl spurdi andlát Iátvardar konungs frænda síns, oc þat med, at þá var til konungs tekinn á Englandi Haralldr Gudínason, oc hafdi tekit konungs vígslo; enn Vilhiálmr þóttiz betr tilkominn ríkis í Englandi, en Haralldr, fyrir frændsems sakir þeirra Iátvardar konungs; þat var oc med, at hann þóttiz eiga at giallda Haralldi svívirðing, er hann hafdi slitit festamálom við dóttur hans, oc af öllo þesso saman dró Vilhiálmr her saman í Nordmandí, oc hafdi allmikit flölmenni, oc nógan skipa-kost. Þann dag, er hann reid or borginni til skipa sinna, oc hann var kominn á hest sinn, þá geck kona hans til hans, oc vildi tala við hann. Eun er hann sá þat, þá laust hann til hennar med hælinom, oc setti sporann fyrri brióst henni,

svo at á kaf stóð, fell hon við og fekk bana, enn Iarl reid til skips, fór hann með her sinn út til Englandz. Þar var með hanom Otta Erki-biskop bróðir hans. Enn er Iarl kom til Englandz, tók hann at heria, og lagði undir sig landit, hvar sem hann fór. Vilhiálmr Iarl var hveriom manni meiri og sterkari, og riddari hinn mesti, her-madr mikill, og helldr grimmr, og enn vitrasti madr, og kalladr eigi alltryggr.

CAP. C.

FALL HARALLDZ KONUNGS GUDINASONAR.

Haralldr konungr Gudínason lofadi brautferð Olafi syni Haralldz konungs Sigurdarsonar, og því lidi er hönom hafði fylgt, og eigi hafði fallit í orrostonni; enn Haralldr konungr sneriz þá með her sinn sudr á England, þvíat hann hafði þá spurt, at Vilhiálmr Iarl Bastadr fór sunnan á England með lid mikit, og lagði landit under sig. Þar voro þá með Haralldi konungi bræðr hans Sveinn og Gyrdr og Valþjófr Iarl. Fundr þeirra Haralldz konungs og Vilhiálms Iarls varð sudr á Englandi við Helsingia-port, varð þar orrosta mikil: þar fell Haralldr konungr og Gyrdr Iarl bróðir hans, og mikill luti lids hans. Þat var XIX nóttom eptir fall Haralldz konungs Sigurdarsonar. Valþjófr Iarl bróðir Haralldz

kom á flóttu undan, oc síð um kvelldit mætti Iarl sveit nockorri af Vilhiálms mönnum. Enn er þeir sá lid Valþíófs Iarls, þá flydo þeir undan á eydi-skóg nockorn; þat var C manna. Valþíófr Iarl let elld leggja í skóginn, oc brenna upp allan saman. Sva segir Þorkell Skallason í Valþíófs-flocki:

Hundrat let í heitom
 hirdmenn iöfurs brenna
 sóknar yggr en seggiom
 svido kveld var þat eldi.
 Frett er at firdar knátto
 flagd viggs und kló liggja
 imleitom feckz áta
 öls black vid hræ fracka.

C A P. C I.

DRÁP VALÞÍÓFS IARLS.

Vilhiálmr let sic til konungs taka í Englandi, hann sendi bod Valþíófi Iarli, at þeir skyldo sættaz, oc selldi hanom grid til fundar. Iarl fór vid fá menn; enn er hann kom á heidina fyrir nordan Kastala-bryggio, þá komo á móti hönom ár-menn II Vilhiálms konungs med sveit manna, oc tóko hann höndom, oc setto í fiötr, oc síðan var hann höggvinn, oc kalla Enskir menn hann helgann. Sva segir Þorkell:

Víst hefir Valþíóf hraustan
 Vilhiálmr sá er raud málma
 hinn er haf skar sunnan
 hælt í trygd of væltan.
 Satt er at síð muno letta
 snarr enn minn var harri
 deyr eigi milldingr mærr
 mann-dráp á Englandi.

Vilhiálmr var síðan konungr á Englandi XXI vector, oc hans afkvæmi iafnan síðan. Vilhiálmr var sótt-daudr í Nordmandi; eptir hann var Vilhiálmr Raudi son hans konungr í XIV ár. Þá tók ríki oc konungdóm Henrikr bródir hans, sonr Vilhiálms konungs hins fyrra.

CAP. CII.

ÆTTAR-TÖLUR.

Vilhiálmr var sonr Rodbertz Lángaspiótz, sonar Rikardz Rikardzsonar, Vilhiálmssonar, Göngo-Hrolfssonar, sem fyrst vann Nordmandi, oc voro þeir allir Rudo-Iarlar, þat ero Greifar í Rothmaga í Nordmandi, hvarr eptir annan. Göngo-Hrolfr var sonr Rögnvalldz Mæra-Iarls, bródir Þóris Iarls ens Þegianda oc Torf-Einars í Orkneyom, sem drap Halfdán Hálegg, fyrir þat hann hafdi drepit födr hans Rögnvalld Mæra-Iarl, sem segir í Sögo Haralldz Hárfagra. Adalrádr konungr í Englandi átti Emmu drottningo,

systor Vilhiálms Greifa Bastards af Nordmandi; átti hann við henni tvo sonu Iátvard og Edmund, sem eftir hann varð konungur í Englandi, enn síðan rekinn or landi af Knúti konungi enom Ríka í Danmörk, og Iátvardr eðr Edvardr hinn helgi, sem síðan varð konungur í Englandi, eftir dauda Hörða-Knútz konungs. Knútr hinn Ríki eignadiz Emmu drottningo, eftir dauda Adalráðs, og gat við henni Haralld og Hörða-Knútt. Edvardr konungur átti Gyðu Godvins (Gudina) dóttur, dóttur-dóttur Þórgíls Sprakaleggs; hon var föðr-systur-dóttir Sveins Ulfssonar Dana-konungs, og átto þau Edvardr konungur eigi barn saman, þar fyrir tók hennar bróðir Haralldr ríki eftir Edvard konung, og kom sva England undan ættar-stofni Adalráðs konungs ens Góða. Haralldr Gudínason hafði þá verit konungur hálfantíunda-mánad í Englandi, er hann fell, og var þá enginn maðr eftir af Godvins Iarls afkomendom, utan synir Tosta Iarls, Ketill og Skuli, og Gyða Harallds-dóttir; hennar fekk Valdimar konungur af Holmgardi, sonr Iarizleifs konungs og Ingigerðar drottningar, sem var dóttir Olafs konungs Svenska: við henni átti hann Haralld konung, sem átti Kristínu dóttur Inga konungs Steinkelssonar í Svía-ríki; dætor þeirra voru Málfríðr og Ingibiörg. Sigurðr lorsalafari fekk Málfríðar, enn síðar átti hana Eiríkr kon-

konungr Eymuni í Danmörk. Enn Knútr Hertogi Lávarðr feck Ingibiargar Harallds-dóttur; þeirra börn voro Valdimar Dana-konungr, Kristin, Katrin oc Margret. Valdimar konungr feck Sophiu dóttir Valaders konungs af Polen, oc Rikeze drottningar; börn þeirra Sophiu voro Knútr konungr oc Valdimar konungr, oc Kristin, sem átti Karl konung Sörkvisson; þeirra börn voro Sörkvir konungr oc Valdimar konungr, oc Ríkiza drottning. Margret dóttir Knúts konungs Lávars átti Stig Hvítaledr; þeirra börn voro Nicolás oc Kristin, sem átti Karl konung Sverkison; þeirra son var Sverki konungr, fadir Iohans konungs. Módir Karls konungs var Ulfhildr drottning, dóttir Hákonar Finnzsonar, Hárekssonar af Þiótto. Ulfhildr átti fyrst Nicolás Dana-konung, oc síðan Inga konung Hallsteinsson í Svíaríki. Síðan feck hennar Sverki Karlsson oc Ríkitzu drottningar, sem síðan átti konung Eirík Knútsson í Svíaríki.

CAP. CIII.

FERD ÓLAFS HARALLDZSONAR Í NOREG.

Olafr, son Haralldz konungs Sigurdarsonar, hellt lidi síno brott af Englandi, oc sigldi út. af Hrafnseyri, oc kom um hanstit til Orkneyia, oc var þat

Þar tíðenda, at Maria, dóttir Haralldz konungs Sigurdarsonar, hafði orðit brád-dauð þann sama dag, oc á þeirri sömo stundo, er Haralldr konungr hafði fallit, fadir hennar. Olafr dvalldiz þar um vetrinn, enn eptir um sumarit fór hann austr til Noregs: var hann þá þar tekinn til konungs med Magnúsi bróðor sínom. Ellisif drottning fór vestan of haf med Olafi stiúpsyni sínom, oc Ingigerdi dóttor hennar. Þá kom oc vestan um haf med Olafi Skúli son Tosta Iarls, er síðan var kalladr konungs-fóstri, oc Ketill Krókr brodir hans. Þeir voro bádir göfgir menn oc kyn-stórir af Englandi, oc bádir forvitra: voro þeir bræðor hinir kærsto Olafi konungi. Fór Ketill Krókr norðr á Hálogaland, seek Olafr konungr hönom þar kvanfáng gott, oc er frá hönom komit mart stór-menni. Skúli konungs-fóstri var skaurungr mikill, oc manna frídastr siónom; hann gördiz forstióri í hird Olafs konungs, oc taladi á þíngom, oc red öllum land-ráðom med konungi. Olafr konungr baud at gefa Skúla fylki eitt í Noregi, þat er hönom þótti bezt, med öllum tókum oc skylldom þeim er konungr átti. Skúli þackadi hönum vel þod sitt, oc letz helldr vilia beidaz af hönom annarra luta, fyri því ef konungs-skipti verda, sagði hann, kann vera at riúfiz giöfin. Ec vil helldr, segir hann, þiggja nockorar eignir þær er liggja nærr kaupstödom þeim, er þer herra erud

vanir at sitia, oc taka Íóla-veizlor. Konungr iátaði hönom þesso, oc skeytti hönom iardir austr við Konunga-hello, oc við Oslu, við Tunsberg, við Borg, við Biörgyn, oc norðr við Nidarós: þær voro náliga hinar bezto eignir í hveriom þessom stad, oc hafa þær eignir legit síðan undir þá att-menn, er af Skúla ero komnir. Olafr konungr gipti Skula frænd-kono sína Guðrúno Nefsteins-dóttur. Módir hennar var Ingiridr, dóttir Sigurðar konungs Syrs oc Asto, módur Olafs konungs helga: Ingiridr var systir Olafs konungs hins helga oc Haralldz konungs. Sonr Skúla oc Guðrúnar var Asolfr á Reini; hann átti Þóro, dóttur Skopta Augmundarsonar, oc var sá Skopti sonarson Þórbergs Arnasonar; enn dóttir Skúla oc Guðrúnar var Ragnbilldr, sem átti Orm kyrping: hans dóttir var Asa, módir Biörns búks. Sonr þeirra Asolfs var Gutthormr á Reini, fadir Bárdar, födur Inga konungs oc Skúla hertoga. Dóttir þeirra Asolfs oc Þóru var Sigrídr, sem átti Hallkel Húk; þeirra son var Ion, fadir Hallkels, Rögnvallds oc Gregorii. Guttormr á Reini feck Elrídar, systur Hallkels Húks; þeirra dætor voro Rangrid, Ingrid oc Guðrud. Rangrid átti Biörn Byrdarsvein, þeirra dætor voro Elrid oc Ingibiörg. Elrid átti Magnus konung, þeirra dóttir var Kristin, sem átti Reidar Sendimann. Þórir Skinnfelldr hafði ádr átt Elrídi, oc við henni tvo sono Kiniad oc Þórgím

Klofa; enn eptir dauda Magnusar konungs Haralldzsonar giftiz hon lögmanninom í Gautlandi, þeirra son var Haralldr. Synir Ingibiargar voro Þórsteinn Skáldmóld. Rangrid giftiz síðan Fridriki Kiæna, þeirra dóttir var Astrídr. Ingirídr dóttir Guttorms á Reini átti Guttorm Austmannsson af Iamtalandi. Guttormr á Reini átti síðan Berglióto, þeirra son var Asúlfr, hans dóttir var Þórbiörg, sem átti Eirík Gríffil, þeirra son var Asúlfr. Síðan eignadiz Þórbiörg Reidar frænda konungs. Guttormr á Reini fekk síðan Sigrídar, dóttor Þórkels oc Hallkötlu. Hallkatla var dóttir Sveins Bryniúlfssonar oc Ingirídar, systur Knútz Ríka; en Sveinn var bródir Sverkis í Sogn. Börn Guttorms oc Sigrídar voro Bárdr Guttormsson, sem fyrst átti Ulfhildi, dóttor Páls biskups, oc síðan Ceciliu, dóttor Sigurðar konungs Haralldzsonar; þeirra synir voru þeir Ingi konungr, Skúli hertugi, oc Guttormr, oc dóttir Sigrídr.

CAP. CIV.

FRÁ HARALLDI KONONGI SIGURDARSYNI.

Einom vetri eptir fall Haralldz konungs, var flutt vestan af Englandi lík hans, oc norðr til Nidaróss, oc var iardat í Mario kirkio, þeirri er hann let gera. Var þat allra manna mál, at Haralldr konungr hafi verit umfram adra menn at speki oc allri ráðsníld,

hvert er hann skyldi skiótt tiltaka, eda göra laung
rád fyrir sér eda ödrom; hann var oc allra manna
vapn-diarfastr oc hinn mesti fullhugi í bardaga, oc
sigrsæll allt til dauda-dags, sva sem nú var ritat
um hríd, því hugrinn rædr hálfom sigri. Sva segir
Þiódolfr:

Arædis naut eydir
alldyggr Sælundz byggja
hugr rædr hálfom sigri
Haralldr sannar þat manna.

Haralldr konongr var frídr madr synom oc tígu-
ligr; bleikhárr oc bleikt skegg, hann hafdi skamt
skegg oc lánga kampa, neckoro ofarr önnor brúnin
en önnor; miklar hendur oc fætur, oc vel vaxit
hvertveggja; fim álna er hátt mál hans; hann var
grimmr óvinom oc refsingasamr of allar mótgördir.
Sva segir Þiódolfr:

Refsir reyndan ofsa
ráðgegn konongr þegnom
hyck at hilmis reckar
halldi upp því er vallda.
Sverdz hafa slikar byrðar
sans nytr hver vid annan
Haralldr skiptir sva heiptom
hliótendor er sér brióta.

Haralldr konongr var hinn ágiarnasti til ríkis oc allra
farsælligra luta; hann var stórgjöfull vid vini sína,
þá er honom líkadi vel vit. Sva qvad Þiódolfr:

Maurk let veitt fyrir verka
 vekandi mer sneckio
 hann lætr hylli sinnar
 hialldrs tilgerdir vallda.

Haralldr konongr var þá fimtögr at alldri, er hann fell. Öngvar frásagnir merkiligar höfo ver frá uppruna hans, fyrr en hann var XV vetra, þá er hann var á Stiklastödom í orrosto með Olafi konongi bróðr sínom, en síðan lifði hann hálfan fiórda tögvetra; en alla þá stund var hönom alldregi milli aga oc ófridar. Haralldr konongr flyði alldregi orrosto, en opt leitadi hann ser farborda fyrir ofresli lids, ef hann átti vid at eiga. Allir menn sögdo þat, er fylgdo Haralldi konongi í orrosto eda í hernadi, at þá er hann vard staddr í miklom vanda, oc bar skiótt at höndom, at þat ráð mundi hann upptaka, sem allir sá eptir, at vænst hafdi verit at hlyda myndi.

CAP. CV.

SAMIÖFNUDR HARALLDZ KONONGS OC
ÓLAFS KONONGS.

Halldorr son Bryniólfs Gamla Úlfallda var vitr madr oc höfdingi mikill, hann mællti þá er hann heyrði rædur manna, at menn misiöfnodo miöc skaplyndi þeirra brædra, Olafs hins Helga oc Har-

allds konongs, oc sagði sva: Eg var með þeim bádom bræðrum í kærleikom miklom, oc var mer hvarstveggja skaplyndi kunnigt; fann ec alldregi tva menn skaplikari; þeir voro bádir enir vitrosto oc hinir vapn-diörfosto menn, ágiarnir til siár oc ríkis, ríkyndir oc eigi alþydligir, stiórnsamir oc refsingasamir. Olafir konongr braut landz-fólk til Kristni oc rettra sida, en refsadi grímmiliga þeim er daufheyrdoz víð; þoldo landz-höfðingar hönom eigi íafundæmi oc rettdæmi, oc reisto her móti hönom, oc felldo hann á eign sinni siálfs, oc yard hann fyrir því heilag. En Haralldr konongr heriadi til frægðar ser oc ríkis, oc braut allt fólk undir sic, þat er hann mátti, oc fell hann á annara kononga eign. Bádir þeir bræðor voro menn hversdagliga síðlátir oc veglátir; þeir voro oc víðförlir oc eliumenn miklir, oc urdo af slíko víðfrægir oc ágætir.

CAP. CVI.

DAUDI MAGNUSAR KONONGS.

Magnus konongr Haralldzson red fyrir Noregi inn fyrsta vetr eptir fall Haralldz konongs, enn síðan red hann landi II vetor með Olafi konongi bróðr sínom. Voro þeir II konongar þá fyrir Noregi, hafði Magnus konongr enn nyrðra lut landz, enn Olafir inn eystra. Magnus konongr átti son er Hákon

het, hann fóstradi Steigar-Þorir í Gudbrandzdal, sem var sammæddr bróðir Magnusar konongs Olafs-sonar; var Hákon inn vænsti madr. Eptir fáll Haralldz konongs Sigurdarsonar talldi Sveinn Dana-konongr, at slitit væri fridi milli Nordmanna oc Dana; talldi eigi verit hafa lengr frid settan, en þeir lifdo báðir, Haralldr oc Sveinn. Voro þá út-bod í hvarotveggia ríkino. Höfdo synir Haralldz úti almenning fyrri Noregi at lidi oc skipom, enn Sveinn konongr fór sunnan med Dana-her. Fóro þá sendimenn milli þeirra, oc báro sættar-bod; sög-do Nordmenn, at þeir villdo annathvart hallda hina sömo sætt, sem fyrr var gör med þeim Haralldi konongi oc Sveini, eda beriaz at ödrom kosti vid Dani þar strax í sama stad. Því var þetta kvedit:

Vardi ógnar orðom
 Olafr oc frídmálom
 iörd sva at engi þordi
 allvallda tilkalla.

Sva segir Steinn Herdisarson í Olafs-drápo:

Síu ódol mun Sveini
 sokn-stránger í kaupangi
 þar er heilagr gramr hvílir
 hann er ríkr iöfurr banna.
 Ætt sinni mun unna
 Olafr konongr hála
 Ulfs þarf at því arfi
 allz Noregs til kalla.

Oc fyrir medalgöngu góðra manna var komit á stefnolagi milli kononganna, skyldi sá sættarfundr vera vid Kononga-hello. I þessom stefno leidángri var sætt gör milli kononga, enn fridr milli landa. Oc gerdiz sáttinn med því stöðug, at Olafr konongr skyldi fá dóttur Sveins konongs Ingirídi, oc þessi fridr hellz lengi sídan, oc sat Olafr med kyrd, meir enn fyrrum var venia í Noregi. Magnus konongr feck vanheilindi, reforma-sótt, oc lá í þeirri sótt nockora ríd: hann andadiz í Nidarósi, oc er þar iardadr; var hann vinsæll konongr, oc harmadr af allri alþydo.

X.

SAGAN AF OLAFE KYRRA.

CAP. I.

FRÁ VEXTI OC YFIRLITOM OLAFS
KONONGS.

Olafr var þá einn konongr yfir Noregi eptir andlát Magnusar konongs bróðr síns. Olafr var madr mikill á allan vöxt, oc vel vaxinn: þat er allra manna sögn, at eigi hefði sed fegra mann, eda tígugligra syndom; hann hafði gult hár sem silki, oc fór afarvel; hann var hörundsbiartr, oc hafði biartan

likam, eygdr manna best oc limadr vel, fámáligr optast, oc eigi taladr á þíngom, gladr við öl oc at dryckiom, dryckiomadr mikill oc málrætinn í kyrd; blídmælltr oc frídsamr meðan hans ríki stóð; hóg-læti of hófsemd elskadi hann í öllum greinom. Þess getr Steinn Herðisarson:

Lönd vil þengill þrænda
 Þat líkar vel skötnom
 Öll við ærna snilli
 eggdiarfr í fríd leggja.
 Hugnar þíód er þegna
 Þrá-lyndr til frídmála
 kúgar Engla ægir
 Olafr borinn fólo.

CAP. II.

FRÁ SIDOM ÓLAFS KONONGS.

Þat var forn sidr í Noregi, at konongs hásaeti var á midiom lánghalli, var öl um ellð borit, en Ólafr konongr let fyrst göra sit hásaeti á hápalli um þvera stofo, hann let oc fyrst göra ofn-stofo, oc strá golf um vetr sem um sumar. Um daga Ólafs konongs hófoz miöc kaupstadir í Noregi, enn sumir settuz at upphafi. Ólafr konongr setti kaupstad í Biörgvin, giördiz þar brátt mikit setr audigra manna, oc tilsiglingar kaupmanna af ödrom löndom; hann let þar reisa af grundvelli Kristz-kirkio ena miklo

stein-kirkiona, oc varð at henni lítit gört. Enn let hann algöra tre-kirkiona fono Kristz-kirkio. Olafur konungur let setja mikla gilldi í Nidarósi, oc mörg önnur í kaupstaðom, en ádr voro þar hvirfings-dryckior; eun þá mátti engi drecka nema í þeim verndar-stofom oc laufs-húsom í Noregi; þá var bæjar-bót in mikla hvirfings-klucka í Nidarósi; hríng-do þeir henni til gilldis. Hvirfings-bræðor leto þar göra Margretar-kirkio stein-kirkio í Nidarósi. A dög-om Olafs konungs hófoz skytningar oc leidzlo-dryc-kior i kaupstöðom, oc þá tóko menn upp sundr-gördir, útlenda síðo oc klæða-snid; höfðo dramb-hosor lerkadar at beini. Sumir spento gullhríngom at fótleggiom ser, oc þá höfðo menn drag-kyrtla laz at síðo, ermar fim álna lángr, oc sva þröng-var, at draga skyllði við hand-tygill, oc lerka allt at öxlom upp, hávir skúar oc allir silki saumadir, en sumir gull-lagdir. Mörg aunnor sundrgörd var þá.

CAP. III.

FRÁ HIRD-SIDOM ÓLAFS KONONGS.

Olafur konungur hafði þá hird-siðo eptir sið útlendra kononga, at hann let standa fyri bordi síno skutil-sveina, oc skenkia með bord-kerom, oc sva öllum tignom mönnum, þeim er at hans bordi sátu; hann hafði oc kerti-sveina, þá er kertom helldo fyri bordi,

oc iam-mörgom, sem tignir-menn sátu upp. Þar var oc stallara-stóll utarr frá trapizo, er stallarar sátu á, oc adrir gædingar, oc horfdo þeir innar í móti hásetino. Haralldr konongr, oc adrir konongar fyrir hann, voro vanir at drecka af dyra-hornom, oc bera öl ur aundugi um elld, oc drecka minni á þann er honom syndiz. Sva segir Stúfr skálld:

Vissac hilldar hvessi
hann var nytztr at kanna
af gódom byr gríðar
gagnsælan mer fagna.
Þá er blóð-stara brædir
baugom grimmr at haugi
giarn med gylldo horni
geck sjálfr á mic drecka.

CAP. IV.

HIRDSKIPAN ÓLAFS KONONGS.

Olafr konongr hafdi CXX hirdmanna oc LX gesta, oc LX húskarla þeirra er flytia skyldo til konongs-gardsins þat er þyrfti, eda starfa adra luti, þá er konongr villdi. En bændor spurdo konong þess, fyrri hví hann hefði meira lid en lög stódo til, eda fyrri konongar höfdo haft, þá er hann fór á vezlor þær sem bændor giördo fyrir hönom. Konongr svarar sva: Eigi fæ ek betr styrt ríkinu, oc eigi stendr meiri ógn af mer en af födr mínom,

þó at ec hafa hálfó meira lid enn hann hafði; en engi pynding gengr mer til þessa við ydör, eda þat at ec vilja þröngva kostom ydrom.

CAP. V.

DAUDI SVEINS KONONGS ÚLFSSONAR.

Sveinn konongr Ulfsson varð sótt-daудr X vetrom eptir fall Haralldanna. Þar næst var konongr í Danmörk Haralldr Hein, son hans, III vetor; þá Knútr hinn Helgi, annar son Sveins, VII vetor; þá Olafr, þridi son Sveins konongs, enn VIII vetor. Olafr Noregs konongr feck Ingiridar, dóttur Sveins Dana-konongs; en Olafr son Sveins Dana-konongs feck Ingigerdar, dóttur Haralldz konongs, systor Olafs Noregs konongs. Olafr konongr Haralldzson, er sumir menn köllodo Olaf enn Kyrra, en margir Olaf Bón-da, því at hann sat í kyrd, oc hafði engi stríð utan-landz ne innan, oc eigi gaf hann helldr ödrom yrkis-efni at heria á hans ríki; hann gat son við þó-ro. Íóans-dóttir, sá var nefndr Magnús; var sá sveinn inn frídasti synom oc all-mannvænn, óx hann upp í hird konongs.

CAP. VI.

IARTEGNIR ÓLAFS KONONGS.

Olafr konongr let göra stein-munsteri í Nídarósi, oc let setia þar sem fyrst hafði verit iardat lík Olafs

konongs, oc var þar yfir sett alltarit sem gröftr konongs hafdi verit, þar var vígd Kristz-kirkia, var þá oc þannug flutt skríni Olafs konongs, oc sett þar yfir alltari: urdo þar þá margar iartegnir. En annat sumar eptir at iamlengd þess er kirkian hafdi vígd verit, þá var all-fiölment; þat var Olafs-vöko aptan, at blindr madr feck þar syn sína. En síálfan messo-daginn, þá er skrinitt oc heilagir dómar voro úthafdir oc bornir, enn skrinitt var sett nidr í kirkio-gardinn, sva sem sidvenia var til, þá feck einn madr mál sitt, er lengi ádr hafdi mállaus verit, oc söng þá lof Gudi oc hinom heilaga Olafi konongi med miúko túngo-bragdi. Kona var enn inn þridi madr, er þannug hafdi sótt af Svíþjódo austan, oc hafdi í þeirri för þolat mikla naud fyrir siónleysis sakir; en þó treysti hon miskun Guds, oc kom þar farandi at þeirri hátíð. Hon var leidd siónlaus í mustarit at messo um daginn, en fyrr enn tíðom var lokit, sá hon báðom augom, oc var þá skygn oc biarteygd, en ádr hafdi hon verit blind fiortan vetor. Fór hon þadan med háleitom fagnadi, lofandi Gud oc hinn helga Olaf konung.

CAP. VII.

FRÁ SKRÍNI ÓLAFS KONONGS.

Sá atburdr giördiz í Nidarósi, at skríni Olafs konongs var borit um stræti, at haufogt vard skrinitt,

sva at ei fengo menn borit fram or stad; en síðan var skrínit nidrsett, en brotit upp strætít, oc leitat hvat þar var undir, oc sanz þar barns-lik, er myrt hafdi verit, oc fólgit þar; var þat þá á brott borit, en búit aptr strætít, sva sem ádr hafdi verit, en borit skrínit at vanda.

CAP. VIII.

FUNDR KONONGANNA ÓLAFS KYRRA OC
KNÚTZ HELGA, OC HERBÚNADR

TIL ENGLANDZ.

Olafr konongr inn kyrrí var vinr mikill Knútz Dana-konongs mágs síns. Þeir lögdo stefno með ser, oc hittuz í Elfinni við Kononga-hello, þar sem konongar voro vanir at finnaz. Rædir þá Knútr konongr, at hann villdi at þeir gördi her vestr til Englandz, slíks sem þeir áttu at hefna þar, Olafr konongr at upphafi, oc síðan Dana-konongar. Gör nú annat-hvart, sagdi Knútr konongr, at ec mun fá þer LX skipa, oc görsc þú höfdingi fyrir, eda ellar man ec görasc höfdingi fyrir, oc fá þú mer LX skipa. Þá mællti Olafr konongr: Þetta mál er þer talit, Knútr konungr, sagdi hann, er mer skap-fellt; en þat er miöc ólíkt oc óíafnt: þer frændor hafit borit til meiri gipto at vinna England með miklom sóma, sem var Knútr konongr inn Ríki; nú

er líkligt at þat muni ættgengt med yekor. En þá er Haralldr konongr, fadir minn, fór vestr til Eng-landz, feck hann bana; var þá í landino allt it besta lidit; eyddiz þá Noregor sva at mannvali, at síðan hefir eigi slíks kostur verit, oc fyrst at upphafi foringi slíkr sem var Haralldr konongr, bæði at viti oc hardfengi; var sú ferd at öllum lutom ágætliga vel búin, oc gafz sem þer vitit. En nú kann ec ætla mitt ráð, hversu myklo ec em vanfærri til at göraz höfðingi fyrir, oc vil ec ydr tilkiósa, at þer farit med minni eslingo. Oc feck Olaf konongr Knúti LX stór-skipa, med ágætom búnadi oc trausto lidi, oc setti þar fyrir höfðingia lenda-menn sína; oc var þat mællt, at stórmannliga væri herinn tilfenginn. Er þat oc sagt í Knútz Sögo, at Nordmenn einir rufo eigi leidágrinn, þá er saman var kominn herinn; voro þeir Knúti lydu-gir. Enn Danir bido eigi konongs, fóro Nordmenn þá aptr til Noregs med villd oc samþycki Dana-konongs. Þat virdi Knútr konongr vid Nordmenn, er þeir fóro heimleidis, oc gaf þeim leyfi at fara í kaupferdir í gegnom hans land oc straua, hvart er þeir villdi; oc sendi hann Noregs konongi dyrligar gíafir fyrir sitt lidsinni, en hann lagði á Dani reidi oc segialld mikit her fyrir, þá er hann kom heim í Danmörk; fóro þeirra skipti svo, at þeir

siálfir

siálfir Danir drápo Knút konong, oc þoldo hönom eigi rettdæmi.

CAP. IX.

FRÁ ÓLAFI KONONGI KYRRA OC BÓNDA
NOCKROM ER SKILLDI FUGLS RÖDD.

Þat barsk at eitt sinn of sumar, þá er menn Olafs konongs höfdo farit um land, oc dregit saman tekior oc landz-skylldir hans, at konongr fretti er þeir komo heim, hvar þeim var bezt fagnat í för þeirri? Þeir sögdo þat vera hiá bónda nockrom í eino fylki í Lista-leni; þar er búandi-karl einn gamall, sá er veit fyrir marga luti, oc höfo ver spurt hann margs, oc hefir hann orleyst, oc einkis höfom ver hann þess spurt, at hann gerdi eigi grein á; oc þat hygiom ver, at hann kunni fugls-röddo at skilia. Konongr mællti: hvat fari þer med hegóma slíkan? qvad hann mikla heimsko at trúa slíko. Þat bar at litlo sídar, er konongr sigldi fyri land fram, oc mællti er þeir sigldo of sund nockor: hvat bygdom er her á land upp? Þeir svörudo: frá þesso fylki sögdom ver ydr, herra, at oss væri her best fagnat. Þá mællti konongr: hvat húsí stendr þar uppi frá sundino? Þeir svara: þat hús á sá hinn fróði karl, er ver sögdom ydr frá. Þeir sá eitt ross hiá húsino.

Þá mællti konngr: farit nú þá, oc takit rossit oc drepit. Þeir svörudo: eigi viliom ver gjöra hönom skada. Konngr mællti: ec vil ráða, heyggit höfut af rossino, oc variz at blóðit komi nidr, berit út á skip mitt rossit, farit síðan eptir karli, oc segit hönom eigi til, en líf ydart man vidliggia. Síðan göra þeir sva sem fyrir var mællt; finna karl, oc bera hönom konngs örindi, oc er hann hittir konng, þá mællti konngr til hans: hver á gard þann, er þú byrr á? hann svarar: þer eigut, herra, oc takit leigur af. Konngr mællti sva: seg oss leid fram fyrir nesit, því þer mun her vera kunnigt. Karl geck í bátinn, oc reri fyri konngs-skipino; oc er hann hafdi skamma stund róit, flygr kráka ein fram um skipit oc lætr illiliga. Bóndi lítr til hennar. Konngr mællti: þicki þer nockors umvert, búandi? Svo er víst, segir hann, herra. Þá flygr önnur kráka oc yfir skipit, oc skrækti vid oc let illa. Þá vard bónda sva illt vid, at hann gáði eigi at róa, oc verdr árin laus í höndom hönom. Þá mællti konngr: miöc íhugar þú bóndi krákona, eda þat er hon segir. Bóndi mællti: herra, nú er mer grunr á, hvat hon segir. Oc it þridia sin fló kráka, oc let sú verst, oc legz nær nidr at skipino, en bóndi kastadi þá áronom, oc gáir eigi róðrar, oc stendr upp í móti konngi. Þá mællti konngr: mikils þicki þer nú umvert, bóndi, eda hvat segir

hon nú? Bondi mællti: þat er líkligt, at hon viti
eigi, eda ec. Konongr mællti: seg nú. Þá kvad
bóndi víso:

Segir vetr gömul
veit sú ógörla
segir tvæ-vefr
trúic eigi at helldr.
pre-vefr segir
þikira mer líkt
kvedr mic róa
merar-höfði
en þic konongr
þióf míns fiár.

Sú pre-vefra segir, at þer bidit mic at róa her á
skipi fyrir ydr, en hafit þó látit taka frá mer se
mitt. Konongr mællti: hvar er nú, bóndi, villtu
kalla mic þióf? eigi mæliz þer þá vel til vor. Svo
er herra, segir bóndi, eigi er þat vel mællt, oc
eigi þyfi ec ydr, enn haft munut þer hafa vid mic
nockurn prett, því krákan segir þer hafit ross
(naut) mit her í skipino. Oc eptir nockrar sam-
rædor þeirra konongs oc bónda, veitti konongr hön-
om góðar giasar, oc gaf hanom upp landskylldir
iardar þeirrar er hann bió á, oc þar med gardin
til æfinligrar eignar, oc umfram þat miklar giasir
adrar. Olafur konongr var óhnöggr at fegiðfum vid

menn, oc gaf hann allskyns gersimar. Sva segir Stúfr scálld:

Gefr áttstudill iðfra
aurr oc steinda knaurro
hann vill hnöggvi sinnar
há-bryniot skip synia.
þíód nytr Olafs audar
annar konongr mannom
se þú hverr slíkt fe reidir
sik beztan gram miklo.

Her þengill gledr hringum
hodd-örr sá er rydr odda
beck-sagnir lætr bragna
bragningr geofum fagna.
Nordmönnom gefr nenninn
Noregs konongr stórum
örr er Engla þverrir
Olafr borinn sólo.

Hilmir gefr oc hiálma
hird sva at eingis virðir
konongs pryda þau klædi
kynstórr firum brynior.
Dyggir lætr þúngar þiggia
þengill af ser drengi
vas launar sva vísi
verdungu hálsf gerdar.

Olafr gefr sva iðfra
galli engi má sniallra

höggvit gull til hylli
 hildinga konr milldi.
 Gramr er und heidum himni
 hann er fremstr konung-manna
 spurdo hve glict má görva
 giöflundr borinn undir.

CAP. X.

DAUDI ÓLAFS KONONGS.

Olafr konongr Kyrri sat optliga í heradi at stórbúom sínom; en er hann var austr í Ranríki á Haukabæ at búi síno, þá tók hann sótt þá, er hann leiddi til bana; þá hafdi hann konongr verit at Noregi XXVI vetor, en hann var til konongs tekinn einom vetri eptir fall Haralldz konongs. Lík Olafs konongs var flutt norðr til Nidaróss, oc iaradat at Kristz-kirkio þeirri, er hann let siálfr göra. Hann var hinn vinsælasti konongr, oc hafdi Noregr mikit audgaz oc prydz undir hans ríki.

XI.

SAGA MAGNUSAR KONONGS
INS BERFÆTTA.

CAP. I.

UPPHAF MAGNUSAR KONONGS BERFÆTTA
OC HÁKONAR BRÆDRUNGS HANS.

Magnus son Olafs konongs var þegar til konongs tekinn í Víkinni, eptir andlát Olafs konongs, yfir allan Noreg. En er Upplendingar spurdo andlát Olafs konongs, þá tóko þeir til konongs Hákon Þóris-fóstra, brædrung Magnusar konongs. Síðan fóro þeir Hákon oc Þórir norðr til Þrándheims, en er þeir komo til Nidaróss, þá stefndo þeir Eyra-þíng, oc á því þíngi heiddi Hákon bændor at gefa ser konongs nafn, oc var hanom þat veitt, at Þrændor tóko hann til konongs yfir hálfan Noreg, sva sem haft hafði Magnus konongr fadir hans. Hákon tók af vid Þrændi allt land-aura-gialld, oc gaf þeim margar adrar rettarbætur; hann tók þá oc af vid þá íóla-giafir. Sneroz þá oc allir Þrændir til vinátto vid Hákon konong. Þá tók Hákon konongr ser hird, oc fór síðan aptr til Upplanda; hann veitti Upplendingom rettarbætur allar slíkar sem Þrænd-

om, gerdoz þeir oc fullkominir vinir hans. Þá var þetta qvedit í Þrándheimi:

Ungi kom Hákon hingat
hann er bestr alinn manna
frægdar milldr á folldo
fór med Steigar-þóri.
Syni Olafs band síðan
siálfr upp Noreg hálfan
milldr en Magnus villdi
málsniállr hafa allan.

CAP. II.

DAUDI HÁKONAR KONONGS.

Magnus konongr fór um haustit norðr til kaupánga, en er hann kom þar, þá fór hann þegar í konongs-garð, oc var þar at herbergino, oc dvalldiz þar aundverðan vetr; hann hellt VII lánghskip í vök þydri fyri konongs-garði í Nid. En er Hákon konongr spurdi, at Magnus konongr var kominn í Þrándheim, þá fór hann austan of Dofrafiáll, oc sva til Þrándheims oc til kaupánga, oc tók hann ser herbergi í Skúla-garði, ofan frá Clemens-kirkio, þar var hinn forni konongs-garðr. Magnusi konongi líkadi illa stór-giafir þær er Hákon konongr hafði gefit bændom til vinsælldar ser, oc þótti Magnusi konongi sin eign gefin öngom mun síðr: oc yfdiz hugr hans miöc við þat, oc þóttiz mishalldinn

af vit frænda sinn, er hann skyldi sva miklo minni tekior hafa, en fadir hans hafdi haft eda forellri; oc kendi hann þessi ráð þori. Hákon konongr oc Þórirr urdo þessa varir, oc var uggr á, hver tiltæki Magnus mundi hafa, þótti þeim þat helldr grunsamligt, er Magnus hafdi lángskip á floti tiöldut oc búin. Um várit eptir Kyndilmesso þá lagdi Magnus konongr brott or bænom á náttar-þeli med tiöldudom skipunom, oc höfdo liós undir tiöldom; þeir helldo út til Hefringar, oc bió þar um nóttina; þeir gördo þar ellda stóra á landi uppi. Þá hugdi Hákon konongr oc lid þat, er í bænom var, at þat væri gört til svika, oc let hann blása lidino út á Eyrar, oc sótti allr kaupánga lydr til hans, oc voro í lidsafnadi alla nótt. En um morguninn er lysti, oc Magnús konongr sá allzheriar lyd á Eyronom, þá hellt hann út or firdinom, oc sva sudr í Gulaþínga-laug. En Hákon konongr þackar mönnom lidsinni sitt, er þeir höfdo nú synt vid hann; oc bió þá ferd sína í Vik austr, oc átti ádr mót í bænom, taladi þá oc bad menn vinátto, oc het sinni vinátto öllom, hann qvad ser nockurn skugga á vera of vilia Magnuss kononga frænda síns; Hákon konongr sat á hesti, oc var farbúinn: allir menn heto hönom fullkominni sinni vinátto med gódom vilia oc fylgd, ef hann þyrfti til at taka, oc fylgdi honom undir Steinbiörg út allr lydr. Hákon kon-

ongr fór þá upp til Dofra fiallz. En er hann fór yfir fiallit, reid hann um daginn eptir riúpo nokkorri, er fló undan hanom; oc í þeirri ferd feck hann sótt þá er hann leiddi til bana, oc andadiz þar á fiallino; oc var lík hans norðr flutt, oc kom hálfom mánadi síðarr til kaupánga enn hann hafði brott farit. Móti líkama hans geck allr bæar-lydr klöckvandi, oc flestir grátandi, þvíat allir menn unno hönom hóg-ástum. Lík Hákonar konongs var niðrsett í Kristz-kirkio; oc höfðo þeir Magnus konongr þá ráðit landino II vetor. Hákon konongr var madr vel hálf-þrítoyr at alldri, hann hefir höfðingi verit einn ástsælastr í Noregi af allri alþydo. Hann hafði farit norðr til Biarmalandz, oc átti þar orrostor, oc feck sigr.

CAP. III.

HERNADR Í HALLANDI.

Magnus konongr hellt um haustit austr í Vík; enn er váradi, hellt hann sudr til Hallandz, oc heriadi þar víða. Þá brendi hann þar Víkars-dal, oc eun fleiri heröð; feck hann þar fe mikit, oc fór síðan aptr í ríki sitt. Sva segir Biörn hinn Krepphendi í Magnuss-drápo:

Vítt let Vorsa drottinn
vard skiótt rekinn flótti

hús sveid Hörða ræsir
 Halland farit brandi.
 Brendi budlúngr þrænda
 bles kastar hel fasta
 vakti Víkdölsk eckia
 vids mörg heröd sídan.

Her getr þess, at Magnus konngr gördi it mesta
 hervirki á Hallandi.

CAP. IV.

FRÁ STEIGAR-ÞÓRI.

Sveinn er madr nefndr son Haralldz Flettis, Danskr
 madr at kyni, hann var hinn mesti víkingr oc bar-
 daga-madr, oc hinn hraustasti, ættstórr madr í síno
 landi; hann hafði verit med Hákonu konongi Mag-
 nussyni um hríd, oc verit í kærleikom miklom vid
 hann. Enn eptir fráfall Hákonar konongs þá trúði
 Steigar-Þórirr illa því, at hann mundi komaz i sætt
 eda vinátto vid Magnus konong, ef ríki Magnus
 konongs gengi yfir land allt, fyrir sakir tilverka oc
 mótgöngo þeirrar er Þórir hafði ádr haft vid Mag-
 nus konong. Sídan hófo þeir Þórir oc Sveinn ráð
 þat, er sídan vard framgengt, at þeir reistu flokk
 med styrk oc fiölmenni Þóris í mót hönom. Enn
 fyrir því, at Þórir var þá gamall madr oc þúng-
 færr, þá tók Sveinn vid stjórn oc höfðingia-nafni
 fyrir flockinom. At þesso ráði hurfo fleiri höfðingia-

giar: þeirra var æztr Egill son Aslaks af Örlandi. Egill var lendr-madr, hann átti Ingibiörgo, dóttur Augmundar Þórbergssonar, systur Skopta í Gizka. Skíálgr het madr ríkr oc audugr, Erlingsson af Iadri, er enn kom til flocksins. Þess getr Þorkell Hamars-skálld í Magnus-drápo:

Vítt dró sínar sveitir
saman stór-hugadr Þórir
helldr vorot þau haulldom
haglig ráð med Agli.
Snörp frá ec á því er urpo
endr Skíalgs vinir lendir
menn vid mord hauks brynni
mein of afl ser steini.

Þeir Þórir hófo flokkinn á Upplöndom, oc komo ofan í Raumsdal á Sunnmæri, oc öfludo ser þar skipa, helldo síðan norðr til Þrándheims.

CAP. V.

FRÁ ATGERDOM ÞÓRIS.

Sigurdr Ullstrengr het lendrmadr, sun Lodins Viggiarskalla, hann samnadi lidi med aurvar-bodi, þá er hann spurdi til flocks þeirra Þóris, oc stefndi öllu lidi því, er hann feck, til Viggio. Enn Sveinn oc Þórir helldo oc þángat lidi síno, oc bördoz vid þá Sigurd, oc fengo sigr, oc veitto mikit

mann-spell, en Sigurdr flydi, oc fór á fund Magnus konongs. Þeir Þórir foro til kaupánga, oc dvöldoz þar um hríd í firdinom, oc kom þar mart lid til þeirra. Magnus konongr spurdi þessi tíðindi, oc stefndi þegar lidi sáman, oc hellt síðan norðr til Þrándheims. Enn er hann kom inn í fiördinn, oc þeir Þórir spurdo þat, þá þeir lágo út við Hefring, oc voro búnir at hallda út or firdinom, þá röro þeir á Vagnvík á strönd, oc gengo þeir af skipom, oc komo nidr í Þexdal í Selio-hverfi, oc var Þórir borinn í börom of fiallit. Síðan redo þeir þar til skipa, oc fóro norðr á Hálogaland. Enn Magnus konongr hellt eptir þeim, þá er hann var búinn, or Þrándheimi. Þeir Þórirr fóro norðr allt í Biark-ey, oc flydi Ión undan oc Vidkunnr son hans. Þeir Þórir rænto þar lausa-fe öllo, en brendo bæ-inn oc langskip gott, er Vidkunnr átti. Þá mællti Þórir, er sneckian brann oc skipit halladiz: Meir á stiórnborda, Vidkunnr! Þá var þetta ort:

Bredr í Biarkey midri
 ból þat er ec veit golazt
 tæra þarft af þóri
 þytr vandar ból standa.
 Jóan mun eigi frya
 ellz ne ráns er kvelldar
 svidr biartr logi breidan
 by leggrr reykr til skyia.

CAP. VI.

DAUDI ÞÓRIS OC EGILS.

Þeir Ión oc Vidkunnr fóro dag oc nótt, til þess er þeir fundu Magnus konong. Þeir Sveinn oc Þórirr helldo oc norðr lidi síno, oc rænto víða um Hálogaland. Enn er þeir lágo á firði þeim er Harmr heitir, þá sá þeir Þórir sigling Magnus konongs, oc þóttuz þeir eigi hafa lid til at beriaz, oc röro undan oc flydo. Sneri Þórirr oc Egill til Hesiotúna, en Sveinn reri út til hafs, en sumt lidit þeirra reri inn í fiördinn. Magnus konongr hellt eptir þeim Þóri. Enn er skipin rendoz at í lendingonni, þá var Þórir í fyrir-rúmino á skipi síno. Þá kalladi Sigurdr Ullstrengr á hann: ertu heill Þórirr? Þórirr svaradi: heil at höndom en hrumr at fótum. Þá var þetta qvedit:

Spurdi Ullstrengr orði
at rendo scip hualta
suerd bito snarpra fyrða
sætt hue Þórirr mætti.
Lundr quaszt heill at höndom
hiörs frágom þat giörva
giördiz glamm á bordom
griöts enn hrumr at fótum.

Þá mællti Sigurdr: feitr ertu Þórirr; hann svarar: matr min velldr því oc munngát. Þá flydi lidit þeirra Þóris allt á land upp, en Þórir vard hand-

tekinn. Egill var oc hand-tekinn, þvíat hann villdi eigi flyia frá kono sinni. Magnus konongr let flytia þá Þóri báða í Vambar-hólm; en er Þórirr var uppleiddr, reikadi hann á fótom; þá mællti Vidkunnr: Meir á bakborda, Þórir! Sídan var Þórir leiddr til gálga, þá mællti hann:

Varom felagar fiórir
fordom einn vid styri.

Oc er hann kom at gálganom, mællti hann: Ill ero ill rád. Sídan var hann hengdr; oc þá er upp-reid gálg-treit, var Þórir sva höfigr, at sundr slitnadi hálsinn, oc fell búkrinn nidr til iardar. Þórirr var manna mestr bædi hár oc digr. Egill var oc til gálga leiddr, enn er konongs þrælar skylldo hengia hann, þá mællti Egill: Eigi skulo þer mic fyri því hengia, at eigi veri hverr ydar makligri at hánaga. Þá var þetta kvedit:

Ord frá ec Agli verda
unnar dags á munni
sól vid siklings þræla
satt einardar latta.
Hvern þeirra kvad hærra
hialldr bliks en sic miklo
beid ofmikit eydir
ánger makligra at hánaga.

Magnus konongr sat hiá á medan þeir voro hengdir, oc var sva reidr, at engi var hans manna sva

diarfr, at þyrði at bidia þeim fridar. Þá mælti konongr, er Egill sparn gálgann: Illa koma þer göfgir frændor í þörf. I því syndiz, at konongr villdi hafa verit bedinn, at Egill hefði lífit. Sva segir Biörn enn krepphendi:

Snarr raud Sygna harri
sverd á úthlaups ferdom
vitt rann vargr at slíta
varma brád á Harmi.
Fráttu hve fylkir mátti
fór sva at hengdr var þórir
fór vard gunnar görvis
greid Drottins svik leida.

CAP. VII.

FRÁ REFSINGOM VID ÞRÆNDI.

Magnus konongr hellt síðan sudr til Þrándheims, oc lagdi inn í Þrándheim, oc veitti þar stórar refsingar þeim mönnom, er sannir voro landráða vid hann, dráp hann suma, enn brendi bú fyrir sumom. Sva segir Biörn enn Krepp-hendi:

Hrafn greddir vann hrædda
hlífar stygdr í bygdom
Þrænska drótt er þótti
þeim markar böl sveima.
Hygg ec at hersa tveggja
her balldr lyki alldri

sinniör vera svaro

svangr flaug aurn til hánga.

Sveinn Haralldzson Flettis flydi fyrst í haf út, oc sva til Danmarkar, oc var þar til þess er hann kom ser í sætt við Eysteinn konong, son Magnus konongs, hann tók Sveinn í kærleika, sva hann gerdi hann skutil-svein sinn, oc hafði hann í virðingom. Magnus konongr hafði þá ríki einn saman; hann fridadi vel fyrir landino, oc eyddi öllum víkingom oc útilego-mönnom; hann var madr röskr oc herskárr, starfsamr, oc líkari í öllu Haralldi konongi födr-födr sínom at skaplyndi, enn födr sínom.

CAP. VIII.

FRÁ SVEINKA BÓNDA OC ELFARGRÍMOM OC SIGURDR ULLSTRENG.

Madr het Sveinki, oc var Steinarsson, hann bió austr í Vík við Elfi, enn ríkasti madr. Hann hafði fóstrat Hákon Magnússon ádr Þórir af Steig tók við hönom. Sveinki hafði eigi þá enn gefiz í valld Magnusi konongi. Magnus konongr let kalla til sín Sigurd Ullstreng, oc sagði hanom, at hann vill senda hann at boda Sveinka af löndom oc konongs eignom, þvíat hann hefir enn eigi til var hneigz, ne sóma gört; sagði vera lendamenn í Vík austr,

Svein

Svein Bryggiofót, Dag Eilífsson oc Kolbiörn Klacka, at flytia vart mál til rettra laga. Þá mællti Sigurdr: eigi vissac þess manns van í Noregi, er þrír lendir menn mundi þyrfa til at koma vid mitt fulltingi. Konongr mællti: eigi er tiltekit, nema þurfi. Nú byrr Sigurdr ferd sína eino skipi, oc hellt austr til Víkur, oc stefnir saman lendom mönnom, oc síðan er þings kvatt of Víkina, oc þeim tilbodit austan Elfar byggionom, oc öllom ödrom, oc verdr þar fiölment, en er þingit var sett, átto menn of hrid at bíða Sveinka. Síðan er sen ferd manna, oc var þat lid sva vel búit at vapnom, sem á eina is-möl væri at líta; oc koma þeir Sveinki á þingit, oc setiaz nidr í einn hring; voro þeir allir iárnklæddir, oc glóadi á; þeir höfdo V hundrot manna. Þá stendr Sigurdr upp, oc mællti: Guds qvedio oc sína sendir minn herra Magnus konongr Guds vinom oc sínom, öllom lendom mönnom, och ödrom sínom undir-mönnom í ríkino, ríkom bændom, med allri alþydo, oc þar med fögur ord oc vináttu-heit; bydr hann þeim öllom vinátto sína oc gódvilia, þeim er til hans vilia hneigiaz. Nú vill konongr syna sic í allri blído oc gódom fridi til allra sinna manna, þeirra er til hans vilia þíóna, vill hann vera þeirra oc allz ríkisins nádugr herra; baud hann sic til forysto, oc vera brióst fyrir öllom Noregs mönnom:

er ydr gott vel at taka konongs máli oc slíkom bodom. Þá stendr upp madr í floeki þeirra Elfargrímanna mikill vexti ofsa þrútuligr í lodkápo, hann hafði refdi um öxl, oc stál-hatt mikinn á höfði; hann leit reiduliga til, oc mællti: Erat hlums vant, qvad refr, dró haurpo at ísi; hann taladi eigi fleiri ord, oc setz þá nidr aptr. Nockoro sídarr stóð upp Sigurdr Ullstreng, oc tekr sva til orða: Litlar greinir oc tengingar konongs mála höfom ver or floeki þeirra Elfargrímanna, oc medallagi vingiarnligar; en sic mettr hverr í slíko, oc mun verda en at göra berara konongs crindi. Þá beiddiz hann land-skyllða af ríkis mönnom oc leidángers görða, oc alls annars konongligs sóma, renni hver hugom heim, hve þat mun gört hafa, unni hver ser sóma, en konongi rettra laga, ef ádr hefir nockot áskort. Setz nidr sídan. Sami madr rís upp í floeki Elfargrímanna, sem fyrr, hann varpadi nockvat sva hettnom, oc svarar snæliga: Snuggir sveinar, qvodo Finnar, áttu andra fala; setz nidr sídan. Oc nockoro sídarr reis Sigurdr upp, oc hafði ádr tal tekit vit lenda menn, sagdiz eigi þurfa fiödr at draga um sköruligt konongs crindi; oc er nú helldr reiduligr, segiandi at þeim heyrdi eigi at taka sva hædiliga konongs bodum oc eyrendum, því þat væri eigi sæmiligt. Hann var í raudum skarlats kyrtli, oc hafði vesl blátt yfir ser; hann varpadi veslino, oc mællti en framari:

Nú er sva komit, at hverr verdr at hafa gætur á siálfom ser, oc stunda eigi at draga dár at öðrum, en hverr lysir siálfr hverr madr at se; þarf eigi af manni at skera, er nú þat sed hvers ver þickiom verdir, er þat þolanda, en hitt er meira, er neysuliga er svarat konongs erindi, virdir þó hverr sic. Madr heitir Sveinki, oc er Steinarsson, byrr hann austr við Elfi, konongr vill hafa af hönom rettar land-skylldir oc sínar eignir, eda boda hönom af landom ellar; oc er eigi at slota við eda svara skot-yrdom; muno verda hönom iafn-ríkir, þótt hann taki óvirdiliga voro máli, oc er nú betra enn síðar at snúa áleidis síno máli með sóma, en bíða neyso fyrir þrióska; oc setz nidr. Þá rís Sveinki upp, oc kastadi hettinom á bak ser aptr, veitti hann Sigurdi mörg hædidilig ord, oc mællti: Putt, putt, sagdi hann, skömm hundum, skitu refar í brunn karls; heyr á fyrr, aumur ermlauss madr oc af bakskyrtnan, hvat bodar þú mer af löndom? sendir voro fyrr þeirra erinda þer skylldir, Sigurdr Ullbelgr, het annar Gilli Bakrauf, en annar verra nafni, voro nótt í húsi, oc stálo hvars komo: hvat bodar þú mer af löndom? Letsto eigi sva mikit fordum, var minna kapp þitt, meðan Hákon konongr fóstri minn var á lífi, er þú vart sva hræddr fyrir hanom, ef þú vart á leid hans, sem mús er í skreppo; vartu sva hulldr fótom, sem hundr á skipi; var þer trodit í

kyl, sem korni í belg; vartu sva elltr af ódöloom, sem árs gelldingr or stódi; áttir þú einn veg andar-rúm, sem otr í kelpo: muntu boda mer af löndom? hvat þá, lát þú helldr góðra giallda vert, því þú hefir audno á, ef þú kemz med fiörvi brott; oe stöndom upp oe at þeim. Sprutto þá upp allir hans menn, oe gerdo mikit vapna-brak. Sá þá Sveinn Bryggiofótr oe adrir lendir menr þat eitt fänga rád, at skióta hesti undir Sigurd, oe reid hann sva á skóg á brott. Lykr sva, at Sveinki fer heim til iarda sinna; en Sigurdr Ullstrengr komz land-veg vid illan leik norðr í Þrándheim á fund Magnus konongs, oe sagdi hönom sva búit af ferd sinni. Þá mællti konongr: Þurftir þú nú nockvat traust lendra manna minna. Sigurdr let illa yfir ferdinni, oe kvedz fyrir hvern mun hefna vilia, oe eggíadi konong miöc. Magnus konongr let húa V skip, oe ferr þegar hann er búinn sudr med landi, oe sva austr til Víkur, þiggr þar dyrligar veizlor af lend-om mönnom sínom. Konongr sagdi þeim, at hann villdi hitta Sveinka; er því fyrir ydor at lysa, segir hann, at ec ætla hann muni vilia vera konongr yfir Noregi. Þeir segia, at Sveinki var madr bæði ríkr oe ódæll. Nú fer konongr or Víkinni, þar til er hann kom fyrir bæ Sveinka. Þá beidaz hinir lendo menn at vita tíðindi, oe gánga fyrst upp frá skipom; en er þeir koma siálfir uppá land, siá þeir ferd

Sveinka, at hann var kominn á leid frá bæ sínom með her mans, oc allvel búit. Þeir hinir lendo menn hallda á lopt hvítom frid-skilldi; oc er Sveinki ser þat, stöðvar hann lidit, oc hittaz sídan. Þá mællti Kolbiörn Klacki: Magnus konongr sendir þer qvedio Guds oc sína, oc bidr þic gæta sæmdar þinnar en tignar konongs, oc búaz eigi vid ofstopa at beriaz vid konong; baudz Kolbiörn til at bera fridmál milli þeirra, oc bidr hann stöðva lid sitt. Sveinki sagdiz bíða mundi, fóro ver því á mót, at eigi trædi þeir akra vara. Þeir hitto konong, oc sögdo allt myndo á hans valldi. Konongr mællti: skiótr er dómr minn, flyi hann af landi brott, oc komi alldri til Noregs aptr medan mitt ríki er; láta skal hann oc feit allt. Mun eigi þat meiri sæmd, sagdi Kolbiörn, oc betra ödrom konongom til spurningar, at þú görir hann or landi, oc hann megi vera með ríkom mönnom fyri fiár sakir; en hann man alldregi aptr koma, medan ver höfom löndin, en þú görir þá ríkdómliga: hygg at vid siálfom þic, oc vird til ord var. Konongr mællti: fari hann í brott þegar. Þá hitta þeir Sveinka, oc segia hönom blíd ord konongs, oc þat með at konongr bidr hann or landi fara, oc göra hönom þann sóma, fyrir þat er hann hafdi afbrugdit vid hann; er þat sómi hvars-tveggja, at unna konongi sæmdar, hygg at. Þá mællti Sveinki: skipan er þá á ordin, ef konongr

mælir blidliga til vor; hví mynda ec lönd flyia, eda eigur mínar? heyr á, segir hann, betra þicki mer at falla á eignom mínom, en flyia ódol mín. Segit sva konongi, at eigi fly ec sva langt hedan, at se eitt aur-drag. Kolbiörn mællti: eigi er þat einsætt; er betra at vægiaz til virðingar vid inn bezta höfðingia, en bægiaz til stórra vandræða. Er gódom dreng gott, þar sem hann lifir. Mant þú þar mest metinn, er menn ero ríkastir fyrir, en halldit hlut þínom vid slíkan höfðingia. Heyr heit var, oc virð nockurs var erindi, biódumz ver til forvisto um eignir þínar, oc trúligrar vardveizlo; oc þat med, er þú kemr aptr til iarda þinna, at giallda alldregi skatt, nema þat se þinn vili; skulo ver þar til leggja bædi fe oc fiör: drep eigi hendi vid, oc firr sva góða drengi vandrædom. Þá þagnar Sveinki, oc mællti sídan: vitrliga er eptirleitit, en þó grunar mic, hvart eigi mun vera hallat konongs erindi, en fyrir sva mikinn góðvilía sem þer synit, skal virða ord ydar, oc man ec fara or landi vetr-lángt, ef þá skal ec í fridi hafa eignir mínar, vid þessi heit ydar; seg þau mín ord konongi, at fyrir ydrar sakir göri ec þat, en eigi konongs. Þá hitta þeir konong, oc segia, at Sveinki legg allt á hans valld, en beidir þar fyrrir sóma af ydr, vill vera í brott III vetor, oc þá aptr koma, ef þat er konongs vili; gör fyrir konongdóm þinn oc bæn vara, lát sva

vera, er alt er á þínom dómi, oc skulom ver allt vidleggja, at hann komi eigi aptr, nema at þínom vilia. Þá mælti konngr: drengiliga flyti þer, oc fyrir ydrar sakir þá skal slíkt vera, sva sem þer beidit; segit hönom sva. Þeir þöekndo konongi med fögrom ordom; fóro síðan at hitta Sveinka. Segia hönom blidlig konongs ord; erom ver fegnir ordnir, ef þid mættit sættaz: beidiz konngr þess, at nefnd væri á III vetra frest of brautferd þína, en væntom þess, ef ver vitom sannendi, at hann man fyrri eigi þykiaz þín mega án vera, oc er virdingar rád at neita eigi. Sveinki sagdi: hvat er þá helldr? þá segit konongi, at ec göra hönom eigi nú fyrst skap-raun í hervist minni, oc taki þer vid varnadi mínom. Snyr lidi síno heim á bæinn, oc þegar á brott, oc var ádr búinn vid þesso. Kolbiörn er eptir, oc byr þar til veizlo í móti Magnúsi konongi, sem þat væri ádr rádit. En Sveinki rídr nú uppá Gautland med öllo lidi síno, því er hönom likar. Konngr þiggr veizlor at búom sínom, ferr síðan aptr til Víkr, oc ero þat síðan kalladar konongs eignir er Sveinki hefir átt, en Kolbiörn lætr vardveita. Konngr tekr veizlor í Víkinni. Síðan ferr hann nordr; er nú kyrt um hríd. Nú legz á þá illþydi Elfar-grímana, er höfðingialaust er, oc ser konngr, at eydaz man ríkit austr þannog. Þótti þat þá einsætt, at unna Sveinka at brióta straum fyrir, syniz þat hæfiligaz;

oc sendir konngr Sveinka ord tysvar, en hann fór eigi fyrr en Magnus konngr fór siálfr sudr til Danmarkar; þar fann hann konung, oc sættuz þeir Sveinki at fullu, oc fór Sveinki þá heim til iarda sinna oc búa, oc var iafnan síðan hinn mesti oc trúasti vin Magnus konongs, oc styrkti ríki hans austr þar; helldo þeir kærleikom medan þeir lifdo.

CAP. IX.

HERNADR MAGNUS KONONGS Í SUDREYOM.

Magnus konngr byriadi ferd sína or landi, oc hafdi med ser lid mikit oc frítt, oc góðan skipakost, hellt hann lidi því vestr um haf, oc fyrst til Orkneyia; hann tók þar höndom Iarlana Erlend oc Pál, oc sendi þá báða austr í Noreg. En hann setti eptir Sigurd son sinn til höfðingia yfir eyonom, oc feck hönom rádoneyti. Magnus konngr hellt lidi síno til Sudreyia, en er hann kom þar, tók hann þegar at heria oc brenna bygdina, en drap mannfólkit, oc rænto allt þar er þeir fóro, en landzlydrinn flydi undan víds vegar, sumir inn í Skotlandz fiördo, en sumir sudr inn í Satíri eda út til Irlandz, sumir fengo grid, oc veitto handgaungo. Sva segir Biörn enn Krepphendi:

Lek of lióðhús fíkiom
limsorg nærri himni

vitt bar ferd á flóttu
 fúss gaus elldr or húsom.
 Aurr skiöldungur fór elldi
 í vist búendor misto
 róg geisla vann ræsir
 raudan lífs oc audar.

Húgr þverrir let heriat
 hríðar gagls á skídi
 taunn raud tyrvist innan
 teitr vargs í ben margri.
 Grætti Grænlandz drottinn
 geck bátt Skota steckvir
 piód rann mylsk til mædi
 meyar sudr í eyom.

CAP. X.

FRÁ LÖGMANNI SYNI GUDRAUDS KONONGS.

Magnus konongr kom lidi síno vid eya helgo, oc gaf þar grid oc frid öllum mönnom oc allra manna varnadi. Þat segia menn, at hann lyki upp Kolumba kirkio hinni litlo, oc geck konongr eigi inn, oc lauk þegar aptr hurdina í lás, oc mælti, at engi skyldi sva diarfr vera sídan, at gánga inn í kirkio þá, oc hefir sídan sva gört verit. Þá hellt Magnus konongr lidino til Ilar, heriadi þar oc brendi. En er hann hafdi unnit þat land, þá fór hann sudr firi Satiri, heriar þar á bædi bord, á Irland oc

Skotland, fór sva allt herskilldi sudr til Manar, oc heriadi þar sem í ödrom stödom. Sva segir Biörn Krepphendi:

Vítt bar sniallr of sletta
 Sandey konongr randir
 rauk um Il þá er iðko
 allvallz menn á brennur.
 Saotiri laut sunnar
 seggia kind und eggjar
 sigr gædir red síðan
 sniallr Manveria falli.

Lögmadr het son Gudraudar Sudreyia konongs; Lögmadr var settr til landvarnar í Nordreyom. En er Magnus konongr kom til Sudreya med her sinn, þá flydi Lögmadr undan her oc hvar um eyar, en at lykdom tóko menn Magnus konongs hann med scipsögn manna, þá er hann villdi flyia út til Irlandz; let konongr hann í iárn setia, oc hafa í gæzlo. Sva segir Biörn Krepphendi:

Hætt var hvert þat er átti
 hvarf Gudrodar arfi
 lönd vann lofdungr þrænda
 Lögmanni þar bannat.
 Nytr feck nesiom utar
 nadrs bing töpud fingin
 Egda gramr þar er umdo
 úngr vættrima túngor.

CAP. XI.

FALL HUGA JARLS INS PRÚDA.

Síðan heilt Magus konongr lidino til Brettlandz. En er hann kom í Önguls-eyar-sund, þá kom þar á móti hönom herr af Brettlandi, oc redo Jarlar tveir fyrir, Hugi Prúdi oc Hugi Digri, oc lögdo þegar til orrosto, vard þar hardr bardagi. Magnus konongr skaut af boga, en Hugi Prúdi var albryniadr, sva at eigi var bert á hönom nema augun ein. Magnus konongr skaut auro at hönom, oc annar Háleyskr madr, er þar stód hiá konongi; skuto þeir bádir senn; kom önnur auriu í nef-biörg hiálmsius, oc lagdiz nef-biörgin fyrir út af annan veg, en annat skotit kom í auga Jarlinom, flaug þat aptr í gegnom höfudit, oc er þat konongi kent. Fell þar Hugi Iarl, en síðan flydo Brettar, oc höfdo látit mikit. Sva segir Biörn inn Krepphendi:

Líf spelli red laufa
lundr í Aunguls-sundi
broddr fló þar slaug snuddo
snúdigtr Huga ins Prúda.
Öll hefir Ióta fellir
eyland farit brandi
víttr liggr dyggs und dróttom
döglings grund of stundir.

Oc enn var þetta qvedit:

Dundi broddr á brynio
bragningr skaut af magni

sveigdi allvalldr Egða
 álm stauck blóð á hialma.
 Strengs fló hagl í hrínga
 hne ferd en let verða
 Haurda gramr í hardri.
 hjarl-sókn banat Iarli.

Magnus konongr feck sigr í þeirri orrosto, þá eignadiz hann Aunguls-ey, sva sem hinir fyrri Noregs konongar höfdo lengst sudr eignast ríki, þeir er í Noregi höfdo verit. Aunguls-ey er þridiongr Brettlandz. Eptir orrosto þessa sneri Magnus konongr aptr lidi síno, oc hellt fyrst til Skottlandz. Þá fóro menn milli þeirra Mælkolls Skota konongs, oc gördo þeir sætt milli sín; skyllði Noregs konongr eignaz eyar þær allar, er liggia fyri vestan Scotland, oc stiórnfausto seipi mætti fara í milli oc meginlandz. En er Magnus konongr kom sunnan til Satíriss, þá let hann draga skúto um Satíriss-eid, oc leggja styri í lag; konongr siálfr settiz í lypting, oc hellt á hialmun-völ, oc eignadiz sva land þat, er þá lá á bakborda. Satíri er mikit land, oc er betra enn hin bezta ey í Sudr-eyom, nema Mön. Eid miótt er milli oc meginlandz á Skottland; þar ero opt dregin lángskip yfir.

C A P. XII.

DAUDI ORKNEYIA JARLA.

Magnus konongr var um vetrinn í Sudr-eyom, þá

fóro menn hans um alla Skotlandz fiördo, röro fyrir innan eyar allar bædi bygðar oc óbygðar, oc eignudo lönd öll Noregs konongi fyri vestan Skotland. Magnus konongr feck til handa Sigurði syni sínom Biadmynio dóttur Myriartaks konongs, Þialfasonar Ira konongs; hann red fyri Kunnoktum, oc gaf hönom konongs nafn, oc setti hann yfir Orkneyar oc Sudreyar, oc feck hann í hendur Hákoní Pálssyni frænda sínom. Eptir um sumarit fór Magnus konongr lidi síno austr í Noreg. Erlendr Jarl vard sótt-daurd í Nidarósi, oc er þar iardadr, en Páll Jarl í Biörgun. Skopti Augmundarson Þórbergssonar var lendr madr ágætr, hann bió í Gizka á Sunnmæri, hann átti Guðrúno dóttur Þórdar Folasonar, sem bar merki Olafs konongs á Sticklastödom, er hann fell; börn þeirra voro Augmundr, Finnur, Þórdr, Þóra er átti Asolfr Skúlasonr. Synir þeirra Skopta oc Guðrúnar voro enir mannvænsto menn í æsko oc hinir vinsælusto.

CAP. XIII.

DEILA MAGNÚSAR KONONGS OC INGA
KONONGS.

Steinkell Svía konongr andadiz nær falli Haralldanna. Hákon het sá konongr er næstr var í Svíþjóð eptir Steinkel konong. Síðan var Ingi konongr son Stein-

kæls konongs, góðr konongr oc ríkr, oc allra manna mestr oc sterkastr, hann var þá konongr í Svíþíód, er Magnus konongr var yfir Noregi. Magnus konongr taldi þat verit hafa landaskipti at forno, at Gautelfir hefði skilit ríki Noregs konongs oc Svía konongs, en síðan Væni til Vermalandz, taldiz Magnus konongr eiga alla þá bygd, er lá fyrri vestan Væni til Vermalandz, en þat er Sunn-dalr oc Nord-dalr, Vear oc Vardyniar, oc allar Markir er þar liggia til; en þat hafði þá lánga ríd legit undir Svía konongs vellði, oc til Vestra-Gautlandz at skylldom; en Marka-menn villdo þá vera sem fyr undir Svía konongi. Magnus konongr reid or Víkinni oc uppá Gautland, oc hafði lid mikit oc frítt. En er hann kom í mark-bygdina, heriadi hann oc brendi, oc fór sva um allar bygdir, geck fólkit undir hann, oc svardi hönom lydni. En er hann kom upp til vatnsins Væniss, leid á haustit. Þá fóro þeir út í Kvaldins-ey, oc gördó þar borg af torfi oc vidom, oc grofo diki um. En er þat virki var gört, þá var þar flutt í vist oc önnor faung, þau er þyrfti. Konongr setti þar í CCC manna, oc voro þar höfdingiar fyrir Finnir Scoptason oc Sigurðr Ullstreng, oc höfdo it frídasta lid; en konongr sueri þá ofan aptr í Vikina.

CAP. XIV.

FRÁ NORDMÖNNOM.

Enn er Svía konongr spurdi þetta, þá dró hann lid saman, oc fóro þau ord um, at hann mundi ofan ríða á hendur Nordmönnom, en þat frestadiz um ríd; þá qvado Nordmenn þetta:

Allengi dvelr Ingi
ofan reid inn þiðbreidi.

En er ísa lagdi á vatnit Væni, þá reid Ingi konongr ofan, oc hafdi nær XXX hundrada manna. Hann sendi ord Nordmönnom þeim er í borginni sátu, at þeir skyldu í brott fara med fang allt þat er þeir höfdu fengit, oc aptr í Noreg. En er sendimenn báro þeim konongs ord, þá svarar þeim Sigurdr Ullstreng, sagdi at Ingi konongr mundi ödro verða vit at koma, en vísa þeim brott sem hiörd í haga, oc qvad hann ádr nærr mundo gánga verða. Sendimenn báro aptr þau ord til konongs. Síðan reid Ingi konongr úti eyrna vid allan herinn; þá sendi hann annat sinni ord til Nordmanna, bad þá brott fara, oc hafa vapn sín oc klæði oc hesta, en láta eptir ráns-fe oc klæði; þeir neitudo þesso. Síðan veitti konongr þeim atgöngo, oc skutuz þeir á. Þá let konongr bera til griót oc vido, oc fylla díkit. Síðan let hann taka ackeri oc drengia vid ása lánga, oc bera þar uppá timbr-vegginn: gengo þar margir

menn at, oc drógo sundr vegginn; þá voro görvar cisor stórar, oc skólit á þá logandi bröndom. Þá bádo Nordmenn grida. En konongr bad þá utganga vapnlausu oc yfirhafnarlausu. En er þeir gengo út, þá var hverr þeirra sleginn lima-högg, oc fóro síðan brott við sva búit oc heim aptr í Noreg; en Markamenn allir sneroz þá aptr undir Inga Svía konong. Þeir Sigurdr oc hans felagar sóttu á fund Magnus konongs, oc sögdo hönom sínar ófarar.

CAP. XV.

ORROSTA Á FOXERNI.

Þegar um varit er ísa leysti, þá fór Magnus konongr með lidi miklo austr til Elfar, oc hellt upp eptir hinni eystri kvísl, oc heriadi allt í velli Svía konongs. En er hann kom uppá Foxerne, þá gengo þeir á land upp frá skipom, en er þeir komo yfir á eina er þar verdr, þá kom í móti þeim her Gauta, oc varð þar orrosta, oc voro Nordmenn ofr-lidi bornir, oc komo á flóttu, oc var drepit mart af þeim við fors einn. Magnus konongr flyði, en Gantar fylgdo þeim, oc drápo slíkt er þeir máttu. Magnus konongr var audkendr, manna mestr, hann hafði randan hiúp yfir brynio, hárit silki-bleikt, oc fell á herdar áptr. Augmundr Skoptason reid á adra
hlid

hlid konongi, hann var oc manna mestr oc frídastr: hann mællti: gef mer hiúpinn, konongr. Konongr svaradi: hvat skal þer hiúprinn? Ek vil hafa, sagdi Augmundr, gefit hefir þú mer stærra. Þar var sva háttat, at vellir slettir voro víða, oc sázc þeir þá ávallt Gautar oc Nordmenn, en þá varo enn kleifar á millom oc skógar-kiörr, oc fal þá syn; þá feck konongr Augmundi hiúpinn, oc fór hann í. Sídan rido þeir fram á völlum; sneri þá Augmundr þvers í brott oc hans menn. En er Gautar sá þat, þá hugdo þeir þat konong vera, oc rido þannog allir eptir, enn konongr reid þá leid sína til skips. En Augmundr dró naudoliga undan, oc kom þó heill til skips. Hellt Magnus konongr sídan ofan eptir ánni, oc sva norðr í Víkina.

CAP. XVI.

ÖNNOR ORROSTA MAGNUSAR KONONGS OC
INGA KONONGS Á FOXERNE.

Sá madr kom til Magnus konongs, þá er hann var í Vík austr, er Gíparðr het, Valskr madr, oc kvadz vera riddari góðr, oc baud sic til þiónosto við Magnus konong, kvadz hafa spurt at konongr átti stiórnsamt ríki: konongr tók vel við hanom. Þá bióz Magnus konongr at fara uppá Gautland, þvíat

hann kalladi þar til ríkis, oc letz eiga at giallda Gautom þann svadil, er hann þóttiz farit hafa fyrir þeim um várit; þá hafði hann mikit lid, oc gengo Vestr-Gautar undir hann allt um hinar nyrdstu bygdir. Síðan settiz hann vid landamærit, oc biöggo í tiölldom, oc hugdiz til áreidar. Ingi konongr frá þat, oc safnar lidi, oc stefnir á fund Magnusi konongi; oc er Magnusi konongi kom niósn um ferdir haus, eggiodo lidshöfðingar konong aptu-hvarfs, enn konongr villdi þat víst eigi, oc helldr í móti Svía konongi, fyrr er hann vardi, á náttar-þeli. Þeir funduz þar sem heitir á Foxerni; oc er hann skipaði lidi síno, þá spyrr konongr þá at: hvar er Gipardr? en hann fanz hvergi. Þá mællti konongr:

Vill hann eigi flokk varn fylla
falsk riddari inn Valski.

Þá tók undir skálld eitt, er með kononginóm var:

Spurdi gramr hvat gördi
Gipardr þá er lid bardiz
ver rudom vapn í dreyra
varat hann kominn þannog.
Framreidar var fnaudi
fulltraudr á ió raudom
vill eigi flokk varn fylla
falsk riddari enn Valski.

Þar vard mikill mann-skadi, oc lauk sva þessi or-rosto, at fiölldi lá eptir af Svíóm, er slegit var,

en Ingi konongr frelsadiz með flóttu; Magnus konongr feck mikin sigr. Þá reid Gipadr af landi ofan, oc mælltiz eigi vel um, er hann var eigi við orrosto; fór hann síðan í brott, oc vestr til Englandz, oc var útvíst þeirra hörd, oc lá Gipadr löngum. Þá geck til austrar Islendzkr madr, er Elldiarn het, oc er hann sá hvar Gipadr lá, þá qvad hann þetta:

Hví samir hitt at dúsa
hirdmanni gedstirdom
verdu nú þótt kiöl kosti
knár riddari in hári.
þat er satt at ec byd bytto
breid-húfom þer reida
austr er til hár í hesti
hval-jardar Gipardi.

Oc er þeir komo vestr til Englandz, segir hann at Nordmenn höfdo nítt hann, var þá mótz kvatt, oc kom þar til einn Greifi, oc var fyrir hann borit málit, enn hann qvedz þá enn lítt vera vanr málom manna, er hann var úngr madr, oc skamma stund forrædi haft, en þó qvedz hann þat síðst kunna, oc eigi annan lut midr en þann, at skynia er kvedit var; en þó megom ver heyra. Þá qvad Elldiarn:

Frá ec at flóttu rákut
falsk annat lid manna
þar var hardr er ec heynda
hernadr á Föxerñi.

Vard hiálm þrimo herdis
 hár þar er staddir várot
 gánger þá er Gautzka drengi
 Gíparðr í hel bardir.

Þá mællti greifinn: lítt em ec scaelldinn, enn heyra kann ec, at þetta er eigi níð, oc þer er vegr at þesso. Hann kann oc ei um at tala, oc sinnr at þetta er spott.

CAP. XVII.

KONONGA-STEFNA Í ELFINNI.

Annát sumar eptir var lögd kononga-stefna við Kononga-hello í Elfi, oc komo þar Magnns konongr, oc Ingi Svía konongr, oc Eirekr Sveinsson Dana konongr, oc var sú stefna bundin með gridom. En er þing var sett, þá gengo konongar fram á völlinn frá ödrom mönnum, oc töludoz við litla ríd, gengo þá aptr til lids síns, oc var þá gör sættin, at hverr þeirra skyldi hafa þat ríki, er ádr höfdo haft fedr þeirra; en hverr þeirra kononga bæta við sína menn rán oc mannskada, en hverr þeirra síðan iafna við annan. Magnus konongr skyldi fá Margretar, dóttur Inga konongs; hon var síðan köllut Frid-kolla. Birtu þeir þetta fyri mönnum sínom, urdo þá á stuttri stundo mesto óvinir besto vinir. Þat var mál manna, at eigi hefði set höfðingligri menn en þeir voro allir. Ingi konongr var einna

mestr oc þrekoligastr, oc þótti han vera auldr-mannligstr. En Magnus konongr þótti sköroligastr oc hvatligastr; en Eiríkr konongr var einna segurstr: en allir voro þeir menn frídír, stórir, oc gaufugligir, oc ord-sniallir, oc skilduz þeir at sva búno.

CAP. XVIII.

KVON-FÁNG MAGNUS KONONGS.

Magnus konongr feck Margretar, dóttur Inga konongs, sem fyr var ritat, var hon send austan af Svíþíód til Noregs með vegligo fauroneyti. En Magnus konongr átti ádr nockur börn, þau er nefnd ero. Eysteinn het son hans, oc var hans móðerni litit: annar het Sigurdr, oc var hann vetri yngri; Þóra het hans móðir. Olafr het hinn þridi, oc var hann myklo yngstr; móðir hans var Sigrídr dóttir Saxa í Vík, gaufugs mans í Þrándheimi; hon var fridla konongs. Sva segia menn, at þá er Magnus konongr kom or vestr-víkingo, at hann hafði miöc þá sido oc klæda-búnat, sem títt var í vestr-löndom, oc margir hans menn; gengo þeir ber-leggiadir um stræti, oc höfðo stutta kyrthla, oc sva yfir-hafnir; þá köllodo menn hans hann Magnus Berfætt eda Berbein. Sumir köllodo hann Magnus Háfa, en sumir Styrialldar-Magnus. Hann var manna hæstr, mark var gört um hæd hans á Mário-kirkio í kaup-

áangi, þeirri er Haralldr konongr hafdi göra látit; þar á nordr-dyrom voro klappadar á steininom crossar III, einn Haralldz hæd, annar Olafs hæd, þridi Magnus hæd, oc var cross fyrir hveria hæd, oc þar markat hvar þeim var hægst at kyssa á; var ofast Haralldz kross, en lægstr Magnus kross, en Olafs kross-mark iannær bádom hinna. Þessi vísa er kend Magnusi konongi, at hann hafi ort til Keisarans dóttur:

Ein er sú er mer meinar
Matthilldr oc vegr hilldi
már dreckr sudr or sárom
sveita leik oc teiti.
Sá kennir mer svanni
sín lönd er ver raundo
sverd bito högna hurdir
hvít-iarpr sofa litit.

Enn qvad hann:

Hvat er her í heimi betra
hyggr skálld af þrá sialldan
miöc er lángi sá er dvelr drengi
dagr en viven fögro.
þungan ber ec af þingi
þann harm er ec skal svanna
skreytaz menn á móti
minn alldregi sinna.

Þá hafdi Magnus konongr spurt vingiarnlig ord dóttur Keisarans til sín, at hon hefði þat mællt,

at slíkr madr þótti henni sæmiligr, sem Magnus konongr var; þá kvad hann þetta:

Jörp mun eigi verpa
armín á glæ sínom
ord spyr ec gull-bríngs gerdar
gód um skálld í hliódi.
Ann ec þótt eigi finnæk
opt gudvefiar þopto
viti menn at ec hygg hennar
hála ræktar málom.

CAP. XIX.

ÓSÆTT MAGNÚSAR KONONGS OC SCOPTA.

Scopti Augmundarson vard missátttr vid Magnus konong, oc deildo þeir um dáiinn arfnockorn, hellt Scopti, en konongr kalladi til med sva mikilli freko, at þat var vid vada siálfan; varo þar at áttar margar stefnor, oc lagdi Scopti þat ráð til, at þeir fedgar skylldo alldregi allir senn vera á konongs valldi, sagdi at þá myndi þeim hlyða. Þá er Scopti var fyrri konongi, flutti hann þat fram, at skyllð frændsemi var milli þeirra konongs oc hans, oc þat med, at Scopti kvadz verit hafa íafnan kær vinr konongs, oc sva födr hans, oc alldregi skiopladiz þeir í vinátto; sagdi oc sva, at menn mætti þat skilia, at hann var sva viti borinn, at ec man eigi, segir hann, þat mál hallda í deilo vid ydr konongr,

ef ec mællta rángt, en því bregdr mer til forellris míns, at ec hallda rett-mæli fyrir hveriom manni, oc göra þar öngan manna mun at. Konongr var hinn sami, oc mykdiz eigi skap hans vid slíkar rædor. Fór Scopti heim.

CAP. XX.

FERD FINNZ SCOPTASONAR.

Sídan fór Finnr Scoptason á konongs fund, oc taladi vid hann, oc báð konong þess, at hann skyldi láta þá fedga ná rettendom af þesso máli. Konongr svarar styggliga oc strítt. Þá mællti Finnr: til annars hugda ec at ydr konongr, en þer mundot göra mik lög-ræning, þá er ec settumz í Kvaldímsey, er fáir villdo adrir vinir þínir, oc sögdo sem satt var, at þeir voro framselldir, er þar sátu, oc til dauda dæmdir, ef Ingi konongr hefði eigi lyst vid oss meira höfðingia-skap, en þer hafdit fyrir oss set, oc mun enn þó mörgom virdaz, sem ver bærim þadan svívirding, ef þat veri nockurs vert. Konongr skipadiz eigi vid slíkar rædor, oc fór Finnr heim.

CAP. XXI.

FERD AUGMUNDAR SCOPTASONAR.

Sídan fór Augmundr Scoptason á fund konongs, en er hann kom fyri konong, bar hann upp erindi sitt,

oc bad kononginn göra þeim fedgom rett. Konongr svarar, at þat var rett, er hann mællti, oc þeir voro firna diarfir. Þá mællti Augmundr: koma muntu konongr þesso áleidis, at göra oss rángt fedgom, fyrí sakir ríkis þíns; mun oc þat her sannaz, sem mællt er, at flestir launa illo eda öngo, er lífit er gefit. Skal þat oc fylgia míno máli, at alldregi sídan skal ec koma í þína þíonosto, oc engi varr fegda, ef ec ræd. Fór Augmundr sídan heim, oc sázc þeir alldregi sídan.

CAP. XXII.

FERD SCOPTA OR LANDI.

Scopti Augmundarson byriadi ferd sína um varit eptir af landi á brott; þeir höfdo V lánsskip, oc öll vel búin; til þeirrar ferdar redoð med hönom synir hans Augmundr oc Finur oc Þórdr. Urdo þeir helldr síð-búnir; þeir helldo um haustit til Flæmingia-landz, oc voro þar um vetrinn. Suemma um varit sigldo þeir vestr til Vallandz, oc varo þar um sumarit. Sigldo þeir út um Nörfasund, oc um haustit til Roma-borgar; þar andadiz Scopti. Allir aundadoz þeir fedgar í þeirri ferd. Þórdr lifdi lengst þeirra; hann andadiz í Sikiley. Þat er sögn manna, at Scopti hafi fyrstr siglt Nörfa-sund Nordmanna, oc varð sú ferd hin frægsta.

CAP. XXIII.

IARTEGNIR ÓLAFS KONONGS VID ELLDZ-BRUNA.

Sá atburdr giördiz í kaupáangi, þar sem Olafr konongr hvílir, at elldr kom í hús í bynom, oc brann víða. Þá var borit út or kirkionni scrín Olafs konongs, oc sett á mót elldinom. Síðan lióp at madr einn hvat-vís oc úvitr, oc bardi scrínit, oc heitadiz vid þann helga mann, sagði sva, at allt mundi þá uppbrenna, nema hann byrgi þeim med bænom sínom, bædi kirkian oc aunnur hús. Nú let almáttugr Gud vidberaz bruna kirkionnar; en þeim úvitra manni sendi hann augna-verk þegar eptir um nóttina, oc lá hann þar allt til þess hinn helgi Olafr konongr bad hönom miskunar vid almáttugan Gud, oc bættiz hönom í þeirri sömo kyrkio.

CAP. XXIV.

IARTEGNIR ÓLAFS KONONGS Á KREPTRI KONO.

Sá atburdr vard en í kaupáangi, at kona ein var færd þangat til stadarins, þar sem hinn helgi Olafr konongr hvílir; hon var sva armsköput, at hon var kropnut öll saman, sva bádir fætur lágo biúgir vit þíóin uppi. Ok er hon var iduglīga á bænom, oc hafði heitit á hann grátandi, þá bætti hann henni

Þá miklu vanheilso, svo fætur oc leggir oc adrir limir rettuz or lyckiðm, oc þíónadi síðan hverr lidr oc limr rettri skepno; mátti hon ei áðr kriúpa þángat, en þadan geck hon heil oc fegin til sinna heim-kynna.

CAP. XXV.

HERNADR Á IRLANDI.

Magnus konongr byriadi ferd sína af landi, oc hafði her mikinn; þá hafði hann konongr verit yfir Noregi IX vetor; hann hellt vestr um haf, oc hafði it frídasta lid, er til var í Noregi. Hanom fylgdo allir ríkis-menn, er í voro landino, Sigurdr Hranason oc Ulfr bróðir hans, Vidkunnr Iónsson, Dagr Eilífsson, Serkr or Sogni, Eyvindr Aulbogi, stallari konongs, oc margir adrir ríkismenn. Fór konongr vid þesso lidi öllo vestr til Orkn-eyia, oc hafði þadan med ser sono Erlendz Jarls, Magnus oc Erling; þá sigldi hann til Sudr-eyia, oc er hann lá vid Skotland, þá lióp Magnus Erlendzson um nótt af skipi konongs, oc svam til landz, fór síðan upp í skóg, oc kom fram í hird Skota konongs. Magnus konongr hellt lidino til Irlandz, oc heriadi þar; þar kom Myriartak konongr til lids vid hann, oc unno þeir mikit af landino, Dyflini oc Dyflinar skiri. Magnus konongr var um vetrinn uppi í Kunn-oektum med Myriartak konongi, en setti menn sína

til gæzlo landz þess, er hann hafði ádr unnit. En er váradi, fóro þeir konongar með her sinn vestr allt á Uladstir, oc átto þar orrostor margar, oc unno landit, oc höfdo unnit mestan lut af Uladstir, þá Myriartak fór heim á Kunnacktir.

CAP. XXVI.

UPPGÁNGA MAGNUS KONONGS.

En Magnus konongr bió þá skip sín, oc ætladi austr til Noregs, en setti menn sína til landgæzlu í Dyflinni. Hann lá við Uladstir öllu lidino, oc voro þeir segl-búnir. Þeir þóttuz þurfa strand-höggva, oc sendi Magnus konongr menn sína til Myriartaks konongs, at hann skyldi senda þeim strand-högg, oc qvad á dag, nær koma skyldi, hinn næsta dag fyrir Bartholomeus messo, ef sendimenn veri heilir; en fyrir messo-dags aptaninn voro þeir eigi komnir. En siálfan messo-daginn, er sól rann á vidu, þá geek Magnus konongr á land með mestan luta lids síns frá skipom, oc villdi leita eptir mönnom sínom oc strand-höggvi. Vedr var vindlaust oc sól-skin, leidið lá yfir myrar oc fen, oc voro þar höggnar yfir klappir, en kiarr-skógar tveggja vegna frá brauto. Þá er þeir sóttu fram, var fyrir þeim leiti nockut miöc hátt, þadan sá þeir vida. Þeir sá ió-reyk mikinn uppá landit;

ræddo þá um milli sín, hvart þar mundi fara her Ira, en sumir sögdo, at þar mundi fara menn þeirra med strand-höggit. Námu þeir þá stad; þá mælti Eyvindr Aulbogi: herra, sagdi hann, liveria ætlan hafi þer á ferd þessi, óvarliga þickir mönnom þú fara, veitzo at Irar ero svikalir, oc ætlit nú ráð nockut fyrir lidi ydro. Þá mælti konongr: fylkiom nú lidi voro, oc verom vidbúnir, ef þetta cro svik. Var þá fylkt, geck konongr oc Eyvindr fyrir fylkingonni; hafdi Magnus konongr hiálm á höfði, oc raudan skiöld, oc lagt á med gulli Leon, gyrdr sverdi því er Legg-bítr het, tann-hiölltat, oc gulli vafidr medal-kaslinn, oc it bitrasta sverd; hann hafdi kesio í hendi, oc silki-hiúp raudan yfir skyrto, oc skorit fyrir oc á bak Leon med gulu silki; oc var þat mál manna, at eigi hefði sed vaskligra mann ne skörugligra. Eyvindr hafdi oc silki-hiúp raudan, oc vid sama hætti sem konongr, var hann oc mikill madr oc frídr, oc hinn hermannligsti.

CAP. XXVII.

FALL MAGNUS KONONGS.

En er ió-reykrinn nálgadiz, þá kendo þeir þar sína menn, oc fóro þeir med strand-höggit, er Ira konongr hafdi sendt þeim, oc hellt hann vel öll ord

sín við Magnus konong. Síðan snero þeir út til skipanna, oc var þá mid-degis-skeid. En er þeir koma út á myrarnar, fórsk þeim seint yfir fenin, þá þusti her Ira fram or hverio skógarnefi at þeim alla vegna, oc redo þegar til bardaga, en Nordmenn fóro dreift oc tvístrott, þá fello þegar brátt margir af þeim. Þá mællti Eyvindr við konong: óheppiliga fer lid vart, tókum nú skiótt gott ráð. Konongr mællti: blásit herblástrinn öllo lidino undir merkit, en þat lid sem her er, skióti á skialld-borg, oc för-om síðan undan á hæli út yfir myrarnar, síðan man eigi saka, er ver komom á slett-lendit. Irar skuto diarfliga, en þó fello þeir all-þyckt, en æ komo tveir í eins mans stad. En er konongr var kominn at næsta diki, þá var tór-færa mikil, oc fá-stadar yfir fært, fello þar Nordmenn miöc. Þá kalladi konongr Þórgrím Skinn-húfo, lendan mann sinn, hann var Upplendskr, oc bad hann fara yfir dikit með sína sveit, en ver munom, segir hann, veria medan, sva at ydr man eigi saka; farit síðan á hólm þann, er þar verdr, oc skiótit á þá þad-dan, medan ver förom yfir dikit, þvíat þer erut bog-menn gódir. En er þeir Þórgrím komo yfir dikit, köstudo þeir skiölldunom á bak ser, oc run-no til skipa ofan. En er konongr sá þat, mællti hann: ódrengiliga skilz þú við konong þinn, óvitr var ec, þá er ec giörda þic lendan mann, en ec

görða útlagðan Sigurð Hund, alldri mundi hann sva fara. Magnus konongr feck sár, oc var hann lagdr kesio gegnom bæði lærin fyrir ofan kne. Konongr greip skaptit millum fóta ser, oc braut or keflit, oc mællti: sva briótom ver hvern sperri-legginn, sveinar, gángit vel fram, eigi man mic saka. Litlo síðar var Magnus konongr höggvinn á hálsinn med spördo, oc var þat hans bana-sár; þá flydo þeir er eptir voro. Vidkunr Ionsson drap þegar þann mann, er konongi veitti bana-sár, oc flydi síðan, oc hafði III sár; hann bar til skipa sverdit Legg-bít oc merki konongs; þeir runno síðarst Vidkunr, annar Sigurðr Hranason, þridi Dagr Eilífsson. Þar fell med Magnusi konongi Eyvindr Olbogi, Ulfr Hranason, oc margir adrir ríkis-menn; fell mart af Nordmönnom, en miklo fleira af Irum. En þeir Nordmenn er undan komoz fóro brott þegar um haustit. Erlingr son Erlendz Jarls fell á Irlandi med Magnusi konongi. En þat lid er flyit hafði af Irlandi kom til Orkneyia. Oc er Sigurðr spurdi fall Magnusar konongs födr síns, þá redz hann þegar til ferðar med þeim, oc let eptir dóttur Ira konongs, oc fóro þeir þegar um haustit austr til Noregs med öllu lidino.

CAP. XXVIII.

FRÁ MAGNUSI KONONGI OC VIDKUNNI
ÍÓNS-SYNI.

Magnus konongr var konongr í Noregi X vetor, oc var á hans dögum fridr góðr innan-landz, en menn höfdo miðc starfsamt af leidöngrom. Magnus konongr var hinn vinsælasti af sínóm mönnóm, en bændom þótti hann hardr. Þat herma menn frá ordóm hans, þá er vinir hans mællto, at hann læri opt óvarliga, er hann heriadi utan-landz; hann svarar sva: till frægðar skal konong hafa, en eigi til lánghífis. Magnus konongr var nærr XXX at alldri, er hann fell. Eigi flúdi Vidkunnr fyrr en hann hafði drepit þann mann, er bana-madr var Magnuss konongs; oc af þessom sökum tóko synir Magnus konongs hann í inn mesta kærleik.

XII.

SAGA AF SIGURDI KONONGI
IORSALA-FARA

OC BRÆDROM HANS

EYSTEINI KONONGI OC
OLAFI KONONGI.

CAP. I.

UPPHAF SONA MAGNUS KONONGS.

Eptir fall Magnus konongs Berfættz tóko synir hans konong-dóm í Noregi, Eysteinn, Sigurdr oc Olafr; hafdi Eysteinn en nordra lut landz, enn Sigurdr en sydra. Olafr konongr var þá IV edr V vetra; en þann þridiong landz, er hann átti, höfdo þeir bádir til vard-veizlo. Sigurdr konongr var til konongs tekinn, þá er hann var XIII vetra edr XIV, en Eysteinn var vetri elldri. Þá er synir Magnus konongs voro teknir til kononga, komo utan or Iorsala-heimi, oc sumir or Mikla-gardi, þeir menn er farit höfdo med Scopta Augmundarsyni, oc voro þeir hinir frægsto, oc kunno margskonar tíðindi at segia; en af þeim nynæmom girntiz siölldi mans í Noregi til þeirrar ferdar; þat var oc sagt, at í

Mikla-gardi fengo Nordmenn full-sælo fiár, þeir er á mála villdo gánga. Þá bádo menn kononga, at annar-hver þeirra, Eysteinn eda Sigurdr, skyldi fara, oc vera fyrir lidi því, er til útferdar redz; en konongar iátudo því, oe biuggo ferd þá med beggia þeirra kostnadi. Til þeirrar ferdar redo margir ríkis-menn, bædi lendir-menn oc bændor. En er ferdin var búin, þá var þat afrádit, at Sigurdr skyldi fara, en Eysteinn skyldi hafa land-rád af beggia þeirra hendi.

CAP. II.

FRÁ ORKNEYIA JÖRLÖM.

Einom vetri eda II eptir fall Magnus konongs Berfættz, kom vestan af Orkneyom Hákon son Páls Jarls. Konongar gáfo hönom Jarl-dóm, oe yfirsóku í Orkneyom, sva sem Jarlar höfdo haft fyrir hönom, Páll Jarl fadir hans, eda Erlendr födur-bróðir hans. Fór Hákon Jarl þá þegar aptr til Orkneyia.

CAP. III.

FERÐ SIGURDAR KONONGS OR LANDI.

Fiórom vetrom eptir fall Magnus konongs, fór Sigurdr konongr við lidi síno or Noregi; þá hafði hann LX skipa. Sva segir Þórarinn Stutt-felldr:

Sva kom fylkiss
framt lid saman
marg spaks mikit
millðingi villt.
At skip vid skip
skarfögur of lög
hreins grams hedan
hnigo sextigir.

Sigurdr konongr sigldi um haustit til Englandz: þá var þar konongr Heinríkr, son Vilhiálms Bastardar; var Sigurdr þar um vetrinn. Sva segir Einar Skúlason:

Vas auflugr red vísi
vestr helmingi mestom
ód at Ensko ládi
ægiss marr und harra.
Stál let hilmir hvílaz
heipt-gladr oc var þadra
ne gramr á val vimrar
vetr-lengiss stígr betri.

CAP. IV.

FERD SIGURDAR KONONGS.

Sigurdr konongr hellt eptir um várit lidino vestr til Vallandz, oc kom fram um haustit út á Galizo landi, oc dvaldiz þar annan vetr. Sva segir Einar Skúlason:

Oc sá er özt gat ríki
 ól þíód-konongr sólar
 aund á Jacobs landi
 annan vetr und ranni.
 Þar frá ec hílmi heriar
 hialldrs laus-mæli giallda
 gramr svan bræddi snemma
 snar-lyndr frömom Jarli.

En þat var med þeim atburd, at Jarl sá er þar red fyrir landi, gördi sætt vid Sigurd konong, oc skylldi Jarl láta setia torg þeim Sigurdi konongi til mat-kaupa allan vetrinn, en þat endiz eigi lengr enn til Ióla, oc gördiz þá illt til matar, þvíat landit er skarpt oc litit mat-land. Þá fór Sigurdr konongr med miklo lidi til kastala þess er Jarl átti, oc flydi Jarl undan, þvíat hann hafði litit lid. Sigurdr konongr tók þar vist mikla, oc mikit herfáng annat, oc let flytia til skipa sima, bióz sídan í brott, oc fór vestr fyrir Spán. Þá er Sigurdr konongr sigldi fyrir Spán, barsk þat at, at víkingar nockurir þeir er fóro at sefángi, komo í móti hönom med galeida-her, en Sigurdr konongr lagdi til orrosto vid þá; hóf þar sína fyrsto orrosto vid heidna menn, oc vann af þeim VIII galeidur. Sva segir Halldor Skvalldri:

Oc fá-dyrir fóro
 sölms rotz at móti
 víg-ásom hlóð vísi
 víkingar gram ríkom.

Náði herra at hrióða
hlaut drengia vinr fengi
fyrdóm hollr en fellat
fátt lid galeidur átta.

Síðan hellt Sigurðr konungur til kastala þess er Sintre het, oc bardiz þar adra orrosto, hann er á Spáni; þar sat í heidit fólk, oc heriadi þadan á christna menn; hann vann kastalann, oc dráp þar allt fólk, þvíat eigi vildi kristnaz láta, oc tók þar fe mikit. Sva segir Halldor Skvalldri:

Stór skal ec vere þau er váro
vanar dags á Spani
þrútt let slöngvir sóttan
Sintre konungs inna.
Görðiz helldr við harða
hermenn gramr beriaz
grátt er görva neitto
Guds retti ser bodnom.

CAP. V.

UNNIN LISSIBON.

Eftir þat hellt Sigurðr konungur lidino til Lissibonar, þat er borg mikil á Spáni, oc hálf kristin, en hálf heidin; þar skilr Span hinn kristna oc Span heidna, ero þau heröd heidin öll, er vestr liggia þadan. Þar átti Sigurðr konungur orrosto hina þridio við heidna menn, oc hafði sigr; feck hann þar fe mikit. Sva segir Halldor Skvalldri:

Sudr vant sigr inn þridia
 sniallr vid borg þá er kalla
 lofdungs kundr er lendot
 Lissibon at fróni.

þá hellt Sigurdr konongr lidino vestr fyrir Span
 heidna, oc lagdi til borgar þeirrar, er köllut er
 Alkassi, oc átti þar ena IV orrosto vid heidna
 menn, oc vann borgina, oc drap þar mart fólk,
 sva at hann cyddi borgina. Þeir fengo þar ofa fe
 mikit. Sva segir Halldorr Skvalldri:

Ut frá ec ydr þar er heitir
 Alkassi styr hvassan
 fólk þeysandi fysaz
 fiórda sinn at vinna.

Oc enn þetta:

Unnit frá ec í cinni
 efddri borg til sorga
 hitti herr á flóttu
 heidins vífs at drífa.

CAP. VI.

ORROSTA Í FORMINTERO.

þá hellt Sigurdr konongr fram ferdinni, oc lagdi
 út til Nörva-sunda; en í sundonom var fyrir hönom
 víkinga-her mikill, oc lagdi konongr til orrosto vid
 þá, oc átti þessa hina V orrosto vid heidna menn,

frá því er hann sigldi af Noregi, oc hafdi sigr.
Sva segir Halldor Skvalldri:

Treystuz' egg fyrir austan
ydr tíódi Gud rióða
ná-skári fló nyrra
Nörfa-sund til unda.

Síðan lagdi Sigurdr konongr herinóm fram lit sy-
dra med Serk-landi, oc kom til eyiar þeirrar, er
köllut er Formintera; þar hafdi þá setz her mikill
blámanna heidiunna í helli nockorn, oc sett fyrir
framan hellis-dyrin sterkan stein-vegg, var oc hátt
upp at múrnóm, sva at hverr sem upp vildi gánga
vard hrakinn í brott med grióti oc skotum; þeir
heriödo víða um landit, oc flutto til hellissins allt
her-fáng. Sigurdr konongr veitti uppgöngu í ey
þeirri, oc fór til hellissins, oc var hann í bergi
nockoro, oc var hátt at gánga upp hallinn til stein-
veggisins, en biargit skútti yfir fram stein-vegginn.
Heidingiar vörö stein-vegginn, oc hrædduz eigi
vapn Nordmanna, þvíat þeir máttu þera griót oc
skot niðr undir fætor ser ofan á Nordmenn. Nord-
menn redo oc eigi til uppgangunnar at sva búno.
Þá tóko heidingiar pell oc adra dyr-gripi, oc báro
út á vegginn, oc skóko at Nordmönnóm, æpö á
þá, eggíödo oc fryöo þeim hugar. Þá leitadi Si-
gurdr konongr ser ráða: hann let taka tva skip-
báta, er barkar hoita; oc draga uppá bergit yfir

hellis-dýrnar, oc let drengia með strengið digrom allt undir inn-vidona oc um stafnana. Síðan gengo menn þar í, sva sem rúm höfðu, leto þeir síga skipin ofan fyrir hellinn með strengið, skuto þeir þá oc grytto er á skipunum voro, sva at heid-ingiar hrucko inn af stein-vegginnom. Þá geck Sigurðr konongr með herinn uppí bergit, undir stein-vegginn, oc gáto brotit hann, oc komoz sva upp í hellinn, en heidingiar flydo undan inn um stein-vegginn, þann er settr var um þveran hellinn. Þá let konongr bera í hellinn vido stóra, oc kasta bál mikit í hellis-dyronom, oc slá elldi í. En heid-ingiar, er elldr oc reykr sótti þá, leto sumir lífit, sumir flydo, sumir gengo á vapn Nordmanna, sumt fólk var drepit, en sumt brent. Þar fengo Nordmenn it mesta her-fáng þess er þeir hefði tekit í þessi ferd. Sva segir Halldor Sqvalldri:

Vard fyrir stafni.

styriar giörnom

frid-raskadar—

Formintera.

þar vard eggjar

oc elld þola

blámanna líð

ádr bana fengi.

Oc enn þetta:

Baud-styrkr letz þú barka

bragnings verk á Serkiom

fræg hafa giörzc fyrir gygiar.
 gagn-stig ofan síga.
 En í hall at helli
 her-nennin fiölmennom
 gaundlar þings med gengi
 gny þröttir nedan sóttir.

En segir þórarinn Stutt-felldr:

Bad gramr guma
 gunn-hagr draga
 byr-varga á biarg
 blá-svarta tva.
 þá er í reipom
 ram-dyr þrama
 sígo fyrir helliss
 hlid dyr med lid.

C A P. VII.

ORROSTUR Á IVITZO OC MANÖRC.

Þá fór Sigurdr konongr á leid, oc kom til eyiar
 þeirrar, er Ivitza er köllut, oc átti þar ina VII
 orrosto, oc feck sigr. Sva segir Halldor Skvalldri:

Marg-dyrkadr kom merkir
 mord-hióls skipa stóli
 súss var fremdar ræsirr
 frid-slitz til Ivitzo.

Eptir þat kom Sigurdr konongr til eyiar þeirrar,
 er Manork heitir, oc átti þar hina átto orrosto við

heidna menn, oc feck sigr. Sva segir Halldor Skvalldri:

Knátti enn hina átto
odd-hríð vakit síðan
Finns let giöllt á grænni
grams ferd Manörk verða.

CAP. VIII.

GEFIT RODGEIR JARLI KONONGS-NAFN.

Sigurdr konongr kom um várit til Sikileyar, oc dvalldiz þar lengi. Þar var þá Rodgeir hertogi, hann fagnadi vel konongi, oc baud hönom til veizlo. Sigurdr konongr kom þíngat, oc mikit lid med, var þar dyrligr fagnadr, oc hvern dag at veizlonni stóð Rodgeirr hertogi oc þíonadi fyrir bordi Sigurðar konongs, oc hinn VII dag veizlunnar, þá er menn voro komnir til bordz, oc höfðu tekit laugar, þá tók Sigurdr konongr í hönd hertoganom, oc leiddi hann uppí hásetit, oc gaf hönom konongs nafn, oc þann rett, at iafnan skyldi konongr vera yfir Sikileyar-velldi, en áðr höfðu Jarlar oc hertogar verit yfir því ríki.

CAP. IX.

FRÁ RODGEIRI KONONGI.

Þat er skrifad í Croniconom, at Rodgeir let sic fyrst kalla konong yfir Sicilien Anno Christi 1102,

þar hann ádr let ser nægia med Jarls nafn alleina yfir Sicilien, oc var þó hertogi yfir Calabria oc Apúlia, oc var kalladr Rodgeir hinn ríki; því hann þar eptir gördi ser skattgilldenn kononginn í Tunet eda Tunis í Africa, oc let því grafa þessi ord á sitt sverd: *Apulus & Calaber, Siculus mihi servit & Afer*. Rodgeir Sikileyar konongr var hinn ríkasti konongr, hann vann Pul allann, oc lagdi undir sie, oc margar adrar stór-eyar í Gricklandz hafi; hann var kalladr Rodgeir inn ríki. Hans son var Vilhiálmr konongr í Sikiley, er lengi hafdi ófrid mikinn vid Micklagardz keisara. Vilhiálmr konongr átti III dætur, en öngan son; hann gipti eina dóttur sína Heinriki keisara, syni Fridreks keisara, en þeirra son var Fridrekr, er fyrir skömмо var keisari Roma-borgar. Adra dóttur Vilhiálms konongs átti hertogi af Kypur; ena III átti Margrit yfir-kussari; Henrikr keisari drap þá báda. Dóttur Rodgeirs ríka Sikileyar konongs átti Manuel keisari í Micklagardi, var þeirra sun Kirialax keisari.

CAP. X.

IORSALA-FERD SIGURDAR KONONGS.

Um sumarit sigldi Sigurdr konongr út um Gricklandz haf til Iorsala-landz, hann kom af hafi vid Akers-borg, oc let þar eptir skipin, fór þadan land-

veg upp til Iorsala-borgar, oc er þat fretti Balldvini Iorsala konongr, at Sigurdr konongr mundi sækia til borgar, let hann sækia dyrdlig klædi, oc breida nidr á veginn, oc því meir vöndut, er nær var borginni, oc mællti síðan: þat viti þer, at nú mun koma vor at vitia frægr konongr nordan or heimi, ero nú mörg hans snilldar-brögd sögd, oc ágætlig verk, skulom ver hönom vel fagna: en í þessom lut, er nú görom ver, manom ver marka stórmennsko hans oc ríkdóm: rídr hann rettan veg at borginni, oc lætr ser lítils þikia vert um þenna fyrirbúning, þá virði ec, sem hann muni slíca luta gnótt eiga í síno ríki; en ef hann rídr af rettom veg, virði ec minna konongs-sóma hans. Sigurdr konongr rídr nú at borginni med miklo drambi, oc ser hann hverso fyrir er búit, rídr hann fram á klædin, oc sva bidr hann alla sína menn göra. Balldvini konongr fagnadi Sigurdi konongi forkunnar vel, oc reid med hönom allt út til árinna Iordanar, oc síðan aptr til Iorsala-borgar. Sva segir Einar Skúlason:

Húf let hálmir svifa
 haf-kalldan lof skálldi
 es at of alvalldz risno
 einfallt í grik-sallti.
 Adr vid einkar breida
 aud-lestir skip festi

aull beid ölld með stilli
Akrborg fegins morgin.

Oc enn qvad hann:

Get ec þess er gramr fór vitia
glygs Iorsala bygdar
mædr vitud audling ædra
ógn-blídr und sal vídom.
Oc leyg-hati laugaze
leyft ráð var þat náði
hauka fróns í hreino
hvatr Iordanar vatri.

Sigurdr konongr dvalldiz miöc lengi á Iorsala-landi
um haustit oc aundurdan v .r.

CAP. XI.

UNNIN SÆTT.

Ballðvin konongr gördi veizlo fagra Sigurdi konongi, oc lidi miklo með hönom. Þá gaf Ballðvin konongr Sigurdi konongi marga helga dóma, oc þá var tekinn spánn af krossinóm helga, at ráði Ballðvinar konongs oc Patriarcha, oc svördo þeir bádir at helgom dómi, at þetta tre var af hinom helga krossi, er Gud siálfr var píndr á. Síðan var sá heilagr dómr gefinn Sigurdi konongi, með því at hann svardi ádr oc XII menn með hönom adrir, at hann skyldi fremia kristni með aullom mætti sínóm, oc Erkibiskups stóli koma í land í Noregi,

ef hann mætti; oc at krossin skyldi þar vera, sem hinn helgi Olafr konongr hvíldi, oc at hann skyldi tíund fremia, oc siálfr göra. Sigurdr konongr fór síðan aptr til skipa siuna í Akrs-borg, oc þá bió Balldvini konongr her sinn at fara til Syrlandz til borgar þeirrar er Sætt het; meina sumir þat hafa verit Sidon á Syrlandi; sú borg var heidin, oc villdi hann vinna hana frá heidingiom, oc undir þá christno. Til þeirrar farar redz Sigurdr konongr med hönom, med öllo síno lidi oc LX skipom, oc þá er konongar höfdo litla ríd setit um borgina, gáfoz heidnir menn upp, oc eignuduz þá konongar borgina, oc ofa-fe mikit, en lids-menn annat her-fáng. Sigurdr konongr gaf Balldvina konongi sinn hluta í borginni. Sva segir Halldor Skvalldri:

Borg heidna tokt brædir
 benia tíkr vid ríki
 háðiz hverr vid prydi
 hilldr en gaft af milldi.

Einar Skúlason segir oc her frá:

Sætt frá ec dæla drottinn
 drengr minniz þess vinna
 tóko hvast í hristar
 bríd valslöngur ríða.
 Sterkr braut válikt virki
 vals munn-litadr gunnar
 faugur rudoz sverd en sigri
 snarr bragningr fagnar.

Eptir þat fór Sigurdr konongr til skipa sinna, oc bióz brott af Iorsala-landi. Þeir sigldo norðr til eyiarinnar Kypr, oc dvalldiz Sigurdr konongr þar nockora hríd; fór síðan til Gricklandz, oc lagdi at öllo lidino út við Engilsnes, oc lá þar hálfan mánad, oc var hvern dag rad-byri at sigla norðr eptir hafino. En Sigurdr konongr villdi bíða þess byriar, er þver-skytingr væri, oc seglom öllom mætti aka at endilöngom skipom; fyrir því at aull segl hans voro sett pellom, bæði þat er fram vissi oc aptr; fyrir því at hvarugir fram-byggjar eðr aptr-byggjar villdo síá id ófegra seglanna, oc villdo þess (byriar) bíða.

CAP. XII.

FERD SIGURDAR KONONGS Í MIKLAGARD.

Þá er Sigurdr konongr sigldi inn til Mikla-gardz, sigldi hann nærr landi; þar ero allt á landit upp borgir oc kastalar oc þorp, sva at hvergi slítr. Þá sá af landino í bug allra seglanna, oc bar hvergi í milli sva sem cinn gardr væri; allt fólk stóð úti, þat er síá mátti siglingina Sigurdar konongs. Spurt hafði Kirialax keisari oc til ferdar Sigurdar konongs, oc let hann upplúka borgar-hlid þat á Miklagardi, er Gullvarta heitir, þat hlid skal innríða keisarinn, þá er hann hefir lengi ádr í brott verit frá Micklagardi, oc farit her-ferdir, oc hafi vel

sigræz; oc þá let keisarinn breida pell um öll stræti borgarinnar frá Gullvörto oc til Laktiarna, sva heita keisarans hallir inar ágæzto. Sigurdr konongr mællti til sinna manna, at þeir skyllði ríða drambsamliga í borgina, oc láta ser litit um finnaz alla ny-breytni er þeir sá, oc sva gördo þeir. Keisari let fara allt í móti þeim med leika oc söngva: reid Sigurdr konongr oc allir hans menn vid þvílíkan prís í Miklagard. Sva segia menn, at Sigurdr konongr let skúa hest sinn med gulli, ádr hann reid í borgina, oc skyllði sva tilhaga, at undan skyllði stöckva einhver skórinna á strætino, oc skyllði eingi hans manna tillíta; oc er þeir Sigurdr konongr komo til hallar hinnar ágæzto, var þar allt vel fyrirbúit. Enn er menn Sigurdar konongs voro komnir í sæti, oc búnir til dryckio, koma í höllina sendimenn keisara, oc báro milli sín í stórom töskom gull oc silfr, oc sögdo at keisarinn sendi Sigurdi konongi, en konongr leit eigi til fiárins, oc bad menn sína scripta med ser. Sendi-menn fóro oc sögdo keisara; hann svarar: sá konongr mun vera stórom ríkr oc audigr, er hann vill eigi til slíkra luta hneigiaz, edr giallda lofleg ord fyrir; bidr þá en fara med stóra Cistera fulla af gulli. Þeir koma en fyrir Sigurd konong, oc segia hönom, at þessar gíafir oc sendingar era hönom sendar af stól-konongi.

Sig-

Sigurdr konongr mællti: þetta er mikit fe oc fagurt, oc scipti þer með ydr þesso menn mínir. Sendimenn fóro aptr, oc sögdo keisara; hann svarar: tveim sciptir um þennan konong, at hann mun vera yfir ödrom konongom at ríki oc fe, eda hann mun eigi vera at iöfnom vitrleik, sem konongi sæmdi: farit nú í þridia sinn, oc færir hönom inn dyrasta purpura, oc hrokada þessa Cistera af gulli, oc þar lagdi hann á ofan tva gull-hrínga. Nú fara sendimenn oc koma fyri Sigurd konong, oc sögdo at stólkonongr sendi þetta it mikla fe Sigurdi konungi; hann stód þá upp oc tók hríngana, oc dró á hönd ser. Síðan taladi hann sniallt erendi á Grizco, oc þackadi keisara fögrom ordom allan sóma sinn oc stór-lyndi, oc scipti nú þesso fe með mönnom sínom vid miklom sóma. Sigurdr konongr dvalldiz þar nockora ríd. Þá sendi Kirialax keisari menn til hans, oc let spyria, hvart hann villdi þiggia at keisaranom VI skippund af raudo gulli, eda vildi hann, at keisarinn leti efna til leiks þess, er hann var vanr at láta leika á Padreimi? Sigurdr konongr kaus leikinn, en sendimenn sögdo, at keisarann kostadi eigi minna fe leikinn, en þetta gull var. Þá let keisarinn efna til leiks, oc var þá leikit at vanda, oc veitto allir leikar betr konongi þann dag enn drottningo, þvíat drottning á iafnan hálfan

leikinn, oc keppaz í öllum leikom menn þeirra; oc segia Grickir, at þá er konongr vinnr fleiri leika á Padreimi en drottning, þá man konongr vinna sigr, er hann fer her-ferdir. Þat segia menn, þeir er verit hafa í Micklagardi, at Padreimr se á þá leid görr, at veggr hár se settr um einn völl, sva til at iafna sem tún-svid krínglott, oc gardr umhverfis með stein-veggjom, oc síla menn þar á, en leikrinn er á vellinom; ero þar skrifot margskonar forn-tíðindi, Æsir, Volsungar oc Giúkungar, er þat steipt af kopar oc málmi, með sva miklom bagleik, at þat þickir allt kvikt vera, oc syniz mönnom sem þeir komi í leikinn; er leikrinn settr með sva miklom brögdöm oc velom, at sva syniz sem menn ríði í lopti, oc skot-elldr er þar vid, oc allskonar haurpo-leikar oc söng-færi.

CAP. XIII.

SIGURDR KONONGR HELLT SNÆDING MIKLAGARDZ KEISARA.

Þat er sagt, at Sigurdr konongr skyldi veita snæðing einn dag keisaranom, oc bad hann sína menn ætla til skörugliga alla luti, er hafa þyrfti til þeirrar veizlo; oc þá er til var fengit allra luta, sem ríkom mönnom sómdi at veita tignom maunnom, þá bad Sigurdr konongr sína menn gánga at því

stræti í borginni, er vidr væri keyptr, sagði at þeir mundi mikinn þurfa. Þeir sögdo, at konongr þyrfti eigi ugga, at vidinn mundi skorta, þvíat mörgom lössom vidar var ekit í borgina hvern dag; en er þeir þurftu til at taka, var á brott allr vidrinn, oc sögdo þeir þat konongi; hann svaradi: farit oc vitit þá, ef þer fáit valnötur, eigi munom ver þeim síðr kunna at ellda. Þeir fóro oc fengo sva miklar, sem þeir villdo. Því næst kom keisarinn oc hans höfdingjar oc hird, oc settoz saman, oc er þar margfalldr sómi, oc veitir Sigurdr konongr med mikilli prydi oc miklo kappi; oc er þat finnr keisarinn oc drottning, at ecki skortir, þá sendir hon menn at vita hverio þeir ellda, oc nú koma þeir at húsi eino, oc síá at þar var fullt af valnötom; fóro síðan oc sögdo þat drottningo; hon mælti: víst er konongr sá stór-lyndr, oc man fátt til spara síns sóma; engi vidr logar betr en þetta. Hon hafði þetta til raunar gört, hver ráð Sigurdr konongr tækí, ef hon leti bera frá hönom elldi-vidinn.

CAP. XIV.

FRÁ HEIM-FERD SIGURDAR KONONGS
IORSALA-FARA.

Eptir þetta bióz Sigurdr konongr til heim-ferdar, gaf hann keisaranom öll skip sín, oc voro höfud þau

en fe-miklo, er voro á konongs skipino, sett upp á Petrs-kirkio, ero þar síðan til synis. Kirialax keisari gaf síðan Sigurdi konongi marga hesta, oc feck hönom leid-toga um allt ríki sit, oc let setia hönom torg til matar-kaupa oc dryckiar um sitt ríki. Fór þá Sigurdr konongr brott af Micklagardi, en eptir dvalldiz mikill flölldi Nordmanna, er geck þar á mála. Sigurdr konongr fór utan fyrst um Bolgara-land, oc þá of Ungara-land, oc of Pannonia oc Svafa oc Beiara; fann hann Lozarium keisara af Roma-borg í Svafa, oc fagnadi hann hönom forkunnar vel, oc feck hönom leid-toga allt um sitt ríki, oc let hallda hanum torg, sva sem þeir þurfto til allra kaupa. En er Sigurdr konongr kom í Slezvík í Danmörk, þá veitti Eilífr Jarl hönom dyrliga veizlo, þat var um midsumars-skeid. I Heidaby hitti hann Niculas Dana konong, oc fagnadi hann hönom afar vel, oc gördi hann fyrir hönom veizlo mikla, oc fylgdi hönom siálfr norðr á Iotland, oc gaf hönom skip med öllum húnadi. Fór þá Sigurdr konongr heim til Noregs, oc var hönom vel fagnat, er hann kom heim í ríki sitt. Var þat mál manna, at eingi hefði verit farin meiri virdingar-för or Noregi, en þessi er Sigurdr konongr fór, oc þá var hann tvítugr at alldri; hann hafði III vetor verit í þessi ferd. Olafr konongr bródir hans var þá XII vetra gamall at alldri.

CAP. XV.

FRÁ ATHÖFN EYSTEINS KONONGS.

Eysteinn konongr hafði oc mart starfat í landino, þat er nytsamligt var, medan Sigurdr konongr var í ferdinni. Hann let göra í Biörgun höll hina miklo, er mest oc frægst herbergi hefir verit í Noregi; hann hóf munk-lífi í Nordnesi í Biörgun, oc lagði þar til se mikit; þar let hann göra Mikíals-kirkio, it vegligsta stein-musteri; hann let oc göra þar í konongs gardi Postula-kirkio, þar let hann oc göra höllina miklo, er vegligast tre-hús hefir gört verit í Noregi; hann let oc göra kirkio á Agdanesi, oc þar virkit, oc haufn, er ádr var auræfi; hann let oc göra í Nidarósi í konongs gardi Nicolás-kirkio, oc var þat hús allmið oc vandat at skurdom oc allri smíd; hann let oc göra kirkio norðr í Vagom á Hálogalandi, oc lagði provendu til.

CAP. XVI.

FRÁ EYSTEINI KONONGI.

Eysteinn konongr gördi ord hinom vitrostom mönnum til lamtalandz, oc hinom ríkustom, baud þeim til sín, en fagnadi öllum er komo, med blíðo mikilli, oc leiddi brott med vin-gjöfom, oc teygdi þannig til vinátto við sik. En er þeir vöndoz margir

at fara til hans, oc þágo gíafir hans, en sumom sendi hann gíafir, þeim er eigi kvamo siálfir, þá kom hann ser í fullkomna vinátto við alla þá menn, er mest redo fyrir landino. Síðan taladi hann fyrir þeim, oc sagði, at Iamtir hefdo þat ílla gört, er þeir höfdo snúiz undan Noregs konongom í hlydni eda skatt-gjöfom. Tók þar til máls, er Iamtur höfdo gengit undir ríki Hákonar Adalsteins-fóstra, oc verit síðan lengi lyd-skylldir undir Noregs kononga; inti oc þat, hverso mörg þarfindi þeir máttu hafa af Noreg, eda hverso mikil ómakindi þeim veri, at sækia til Svía konongs þat er þeir þurftu. Oc kom hann sva sínom rædom, at Iamtir siálfir budo hönom, oc báðu hann at þeir villdi snúaz til lydni við hann, oc kölludo þat vera þurft sína oc naudsyn; dró sva saman þeirra felagskap, at Iamtir gáfo landit allt undir ríki Eysteins konongs. Tóko fyrst til þessa máls ríkis-menn, oc höfdo þar trúnadar-eyða af öllu fólki. Síðan fóro þeir til Eysteins konongs, oc svördo hönom landit, oc hefir þat halldiz lengi síðan. Vann Eysteinn konongr með viti Iamtaland, en eigi með álaupom sem sumir forellrar hans.

CAP. XVII.

FRÁ ATGÖRVI EYSTEINS KONONGS.

Eisteinn konongr var madr hinn frídasti synom, blá-eygr oc nockot opin-eygr, beik-hvítr á hár oc

hrockin-hárr, ecki hár medal-madr á vöxt, spekingr at viti, fróðr at öllum lögom oc dæmom, oc mann-fróðr, rád-sniallr oc ord-spakr, oc hinn sniallasti oc mildastr af fe, manna gladastr oc lítillástr, hug-þeckr oc ást-sæll allri alþýdo. Hann átti Ingi-biörgo dóttir Guthorms Steigar-Þórisssonar; þeirra dóttir var Maria, er síðan átti Gudbrandr Skaf-haugsson. Eysteinn konongr hafði í marga stadi bætt rett landz-manna, oc hellt hann upp miðc lögunom; hann giörði ser kunnig öll lög í Noregi, hann var oc spekingr mikill at viti. A þeima lút má nockut marka, hverr dyrdar-madr Eysteinn konongr var, eda liverso hann var vin-hollr oc hugkvæmr eptir at leita vid vini sína, hvat þeim væri at harmi. Sá madr var med hanom, er Ivarr het Ingimundarson, Islenzkr madr, vitr oc ætt-stórr, oc skálld, var konongr vel til hans oc ástsamliga, sva sem syndiz í þessom lút. Ivar tók ógledi, oc er konongr fann þat, heimti hann Ivar til máls vid sik, oc spurdi, hví hann væri sva ógladr? en fyrrum er þú vart med oss, var oss margskonar skemtan at þínom rædom; hugnar þer eigi til vor? Ivar qvad þat eigi vera. Konongr svaradi; eigi leita ec af því eptir, veit ec, at þú mant vera sva vitr madr, at ec hefi öngan lut gört af vid þik; seg mer hvat er? Hann svaradi: þat sem er, herra, má ec eigi frá segia. Þá mællti konongr: geta man

ec þá til: ero menn þeir nockorir, er þer geliz
 eigi at? hann qvad eigi þat. Konongr svarar: þickiz
 þú af mer hafa minna sóma en þú vildir? hann
 sagði eigi þat vera. Konongr mælti: hefir þú sed
 nockora þá luti, er þer hefir sva mikit um fundiz,
 at þer þickir þat illa? hann qvedr eigi þat vera.
 Konongr mælti: fysisir þic til nockorra manna eda
 annarra höfðingia at fara? hann qvad eigi þat vera.
 Konongr mælti: vandaz nú getan; ero nockorar
 konor þær her eda á ödrom löndom, er þer er
 eptir-siá at? hann sagði at þat er. Konongr mællti:
 ver eigi þar um hug-siúkr; þegar er varar, far
 þú til Islandz, oc man ec fá þer se oc mikinn
 sóma, bref oc innsigli til þeirra manna, er ráða
 eigu, oc veit ec eigi þeirra manna vanir, at eigi
 muni hneigiaz fyrir mínom ummælom eda ógnar-
 ordom. Ivar svaradi: þúngligarr er farit, herra,
 bródir minn á þessa konu. Þá mælti konongr:
 hverfom þar frá; se ec þar rád til. Eptir Iól man
 ec fara á veizlor, oc far þú med mer, mantu þá
 siá kurteisar konor margar, oc ef eigi ero þær kon-
 ong-bornar, man ec fá þer í hendur oc gipta þer
 einhveria. Ivar svarar: herra, því er þúngligarr
 komit, at iafnan er ec se fagrar konor, oc dyrligar,
 þá minnir mic hinnar kononnar, oc er því harmr
 minn at mæri. Konongr mælti: þá mun ec gefa
 þer nockvat forrædi, oc eignir med at skemta þer.

Hann svaradi: eigi uni ee því. Þá mællti konougr: þá fæ ec þer fe, oc far þú þángat til landa, sem þú villt. Hann qvedz eigi þat vilia. Þá mællti konougr: vandaz mer nú eptir at leita, oc hefi ec nú leitat nær sem ec kaun. En einn er nú lutr eptir, oc er sá litis verdr hiá þessom, er ec hefi bodit þer; far þú hvern dag, er bord er nppi, á minn fund, oc ef ec sit eigi yfir vanda-málom, mun ee tala vid þie, oc ræda um kono þessa á alla vega, þess er mer iná í hug koma, oc man ee gefa mer tóm. Þat verdr stundom, at mönnom verdr harms lettara, ef um er rætt; þat skal oc fylgia, at alldreigi skaltu gíslaust á brott fara. Hann svarar: þenna vil ec, herra, oc hafit þök fyrir eptir-leitanina. Oc nú göra þeir sva íafnan, er konougr sitr eigi yfir vandamálom, þá talar konougr vid hann, oc lettiz hönom nú harms síns, oc gledz hann.

CAP. XVIII.

FRÁ SIGURDI KONONGI.

Sigurdr konougr var madr mikill oc sterkr, iarpr á hár, skörligr, eigi fagr, vel vaxinn, fá-mælltr, oc optazt ecki þydr, vin-gódr oc fastúdligr, eigi taladr miöc, sidlátr oc veglátr. Sigurdr konougr var madr stíórnsamr oc refsingasamr, hellt vel lögin, milldr af fe, ríkr konougr oc ágætr. Olaf

konongr bródir hans var madr hár oc miórr, frídr synom, gladr oc lítillátr oc vinsæll. Þá er þeir bræðor allir, Eysteinn, Sigurdr oc Olafr, voro konongar í Noregi, þá tóko þeir af margar álögur, þær er Danir höfðo lagt á lydinn, þá er Sveinn Alfifoson red Noregi, oc urdo þeir af því vinsælir stórom vid alþydo oc stórmenni.

CAP. XIX.

DRAUMR SIGURDAR KONONGS JORSALA-FARA.

Sigurdr konongr tók ógledi mikla, sva at lítt mátti nióta tals hans, sat hann oc skömmom vid dryckio. Þat þótti ráða-mönnom þúngt, oc vinom hans oc hirdinni, oc bidia síðan Eystein konong leggja til nockor ráð, at hann fengi vitat hverio gegndi, er menn fengo öngva orskurdi mála sinna, er Sigurd konong sótto at, þótt fyrir hann bæri. Eysteinn konongr svarar; vant er at ræða oc leita eptir slíkom lutom vid konong; en þá at bæn margra manna vard þat, at hann het. Oc eitthvert sinn er þeir váro bádir sáman, vegr Eysteinn konongr til vid bródr sinn, oc spurdi hví gegnir ógledi hans; er þat nú herra margs mans hrygd, er þer erut sva ógladir, villdom ver vita hvat er velldr, eda hafi þer nockor tidindi fregit, er þat se stórra luta vert? Sigurdr konongr segir, at eigi er þat. Er þat þá

bródir, segir Eysteinn konongr, vilit þer or landi, oc afla ydr meira ríkiss, sem fadir varr? hann qväd eigi þat vera. Ero nockorir menn þeir í landi her, er fyrir reidi þinni se ordnir? Konongr sagdi eigi þat vera. Þat vil ec þá vita, ef ydr hefir dreymt nokvat, þat er þer fær áhyggio. Konongr sagdi at sva var. Seg mer þá bródir, segir Eysteinn konongr, drauminn. Sigurdr konongr mælti: eigi man ec segia þer, nema þú rádir eptir því sem vera mun, oc mun ec þat allglögt vita mega, hvart þú rædr rett, eda eigi. Eysteinn konongr svaradi: þat er, herra, mikill vandi á bádar hendor; sitia fyrir reidi þinni, er á man liggia, ef eigi verdr rádit, eda ágáng múgsins, ef ec geri eigi or nockot; en þar til mun ec þó helldr ráda, at hætta á ydar miskun, þó at eigi verði rádit eptir því sem ydr líkar. Sigurdr konongr svarar: þat dreymdi mic, at mer þótti sem ver brædr iij sætim allir á einom stóli fyrir Kristz-kirkio nordr í Þrándheimi, oc þá syndiz mer sem gengi út or kirkionni hinn helgi Olafr konongr frændi varr, skryddr konungs skrudí, líómandi oc vegsamligr, hann var med hinnu dyrligsto ásióno oc miöc blídligr. Hanu geck at Olafi konongi bródr ockrom, oc tók í hönd hönom, oc mællti vid hann blíðliga: far þu med mer frændi, sagdi hann; hann syndiz mer standa upp, oc ganga med hönom inn í kirkiona. Oc nockoro sidar kon

hinn helgi Olafr konougr út af kirkionni, oc þó eigi sva blíðr oc vegsamligr sem ádr. Geek hann at þer bródir, oc mællti við þie, at þú skylldir gán-ga með ser, leiddi hann þie með ser, oc gengo þit síðan í kirkiona. Þá hugsada ee oc vænta, at hann mundi einninn út til mín koma, oc í móti mer, en þat varð eigi; þar af varð ee hrygggr, oc þá sló yfir mic hræzlo mikilli oc ómegni, oc varð ee með öllo máttlaus, oc vaknadi ee í því. Eyst-einn konougr svarar: herra, sagdi hann, sva ræð ee draum þenna, at stóllinn iartegnir ríki vart brædra, en er þer syndiz Olafr konougr koma með blíðo yfir-bragdi í móti Olafi konongi bróðr okróð, þar man hann lifa skemst vor brædra, oc mun hann eiga gott fyrir höndom, því at hann er vinsæll oc úngr at alldri, mun fátt yfir-lidit, oc mun hinn heilagi Olafr konougr hiálpa hanom. En þar er þer syndiz hann mer í móti koma, oc eigi með iafn-mikilli blíðo, þar mun ee lifa nockorom vetrom lengr, oc verðá þó eigi gamall, oc væntir mic at hans ásiá man yfir mer standa, en þat hann kom í móti mer, þar var hann eigi með iammiklom bló-ma, sem við Olaf konong bróðr okróð, mun þat fyrir því, at mart hefir mik hendt til afgiörda oc bodorda brota. En þar sem þer þótti frestaz qva-ma hans þer í móti, þat get ee at eigi muni marka heimvön þína, helldr þitt lánglíf; en vera kann at

Þú mætir nockro þúngo áfelli, er þer þótti sem nockor óbirta legdiz yfir þie oe ótti; oe get ee at þú verdir var ellztr, oc rádir lengst ríki þesso. Þá mællti Sigurdr konongr: vel er rádit oe vitrliga, oc er mest ván at gángi eptir þesso; tekr konongr nú at glediazc.

CAP. XX.

KVANFÁNG SIGURDAR KONONGS.

Sigurdr konongr feck Málmfrídar, dóttur Haralldz konongs Valldimarssonar, austan or Hólmgardí, sonar Jarizleifs Gamla; oc Ingigerdar dóttur Olafs Sænska Svía konongs. Módir Haralldz konongs Valldimarssonar var Gyda Gamla drottning, dóttir Haralldz Gudenasonar Engla konongs. Módir Málmfrídar drottningar var Christin drottning, dóttir Inga Svía konongs Steinkellssonar. Önnor dóttir Haralldz Valldimarssonar, systir Málmfrídar, var Ingibiörg, er átti Knútr Lávadr, son Eiriks hins Góða Dana konongs, sonar Sveins konongs Ulfssonar. Börn þeirra Knútz oc Ingibiargar voro þau Valldimarr Dana konongr, er konong-dóm tók í Danmörk eptir Svein Eiríksson, Margret, Kristin, Katrin. Margreto átti Stígr Hvítaledr, þeirra dóttir var Christin, er átti Karl Sörkvisson, Svía konongr; þeirra son var Sörkvir konongr, fadir Jóns konongs.

Dóttir Sigurðar konungs oc Málmfríðar var Christin, sem átti Erling Jarl Skacka.

CAP. XXI.

HER HEFR ÞÍNGA-ÞÁTT.

Sigurðr Hranason, mágr konungs, varð missáttur við Sigurð konong. Hann átti Skjalldvöro, systur Magnús konungs Berfættz sammædra. Hann hafði haft Finn-för af hendi kononga, fyrir sakir tengda oc lángrrar vinátto, oc margra góðra luta, er Sigurðr Hranason veitti konongum, oc var hann hinn merkiligasti madr oc hinn vinsælasti. En þar bar sva at, sem opt kann verða, at vandr menn oc ofundsiukir rægðu hann við konong, meirr enn sannorðir, oc báro þat í eyro Sigurði konongi, at Sigurðr Hranason mundi meira eigna sér af Finn-skattinum, en hófi gegndi; ræða þar til her um, at Sigurðr konongr lagði á hann fiandskap oc reidi sína, oc sendir eptir hönom, oc er hann kemr á konungs fund, ber konongr þetta á hann, oc segir at hann vardi eigi þat, at þu mundir sva launa mér, sagði hann, mikit len oc sóma, at eigna þer konungs eign, oc hafa meira lut af, en þer var leyft. Þá svarar Sigurðr Hranason: eigi er þat satt, er ydr er frá sagt; slíkan lut hefi ec þar af, sem ydurt er leyfi til. Sigurðr konongr mælti: eigi munto því

eino fyrir hlíta, oc rætt man ádr málit verda med meiri freko, en letti; oc skiliaz at því. Litlo sídarr med umtölom vina sinna sótti Sigurdr konongr Sigurd Hranason um þetta mál á móti í Biörgvin, oc villdi göra hann útlaga. Oc er í þat efni var komit,, oc sva mikinn vanda, þá ferr Sigurdr Hranason á fund Eysteins konongs, oc segir hönom med hversu miklo áfelli Sigurdr konongr vildi heimta málit af hönom, oc bidr hann nú ásiá. Eysteinn konongr svarar: þat er vant mál er þu heidir, at veita mót-mæli bróður sínom, segir langt þess í milli, hvart hann veitir at málino, eda gengr í móti, qvad þa bræðor báða iasnt eiga þetta mál, Sigurd konong oc sic, en fyrir sakir naudsyniar þinnar oc mág-semdar okrar, þá man ec tilleggia nockor ord. Nockro sídar hittir Eysteinn konongr Sigurd konong, oc bidr hann eirdar manninom; sagdi skylldo þá sem var, at Sigurdr Hranason átti Skialldvöro faudur-systur þeirra, oc segir hann bæta vilia þat er konongi mislíkar; þó at eigi telldi hann sik sannan at sökinni; bad konong minnaz á langt vinfengi þeirra. Sigurdr konongr sagdi þat meiri stiörn, at refsa slíka luti. Þá svarar Eysteinn konongr; ef þú villt bródir lögom at-fylgia oc eptir landz-stiörn refsa slíkt, þá er þat mun-rettligast, at Sigurdr Hranason nióti vitna sinna, oc á mál þetta á þingi at dæma, en eigi á móti, þvíat sökin veit til landz-

laga, en eigi til Biarkeyíar-rettar. Þá mælti Sigurdr konongr: vera má at sva viti sökin, Eysteinn konongr, sem þú segir, oc ef þetta ero eigi lög, þá muno ver málit á þíngi sækia. Síðan skildoz konongar, oc þótti miöc sinn veg hvarom þeirra. Þá stefndi Sigurdr konongr máli þesso til Arnar-nes þíngs, oc ætlar þar fram at hafa. Eysteinn konongr kom oc þángat, oc sótti þíngit, oc er sökin fór fram í dóm, þá geck at Eysteinn konongr, ádr en dómr felli á Sigurd Hranason; þá beiddi Sigurdr konongr lögmenn, at þeir felldi dóm á. En Eysteinn konongr svarar á þá leid: þat hygg ec at her muni vera menn sva vitrir, oc kunnig lögin í Noregi, at eigi á at dæma lendan mann utlagan á þesso þíngi. Oc flytr hann nú sva málit til laga, at öllom má þat skiliaz sannligt. Þá mælti Sigurdr konongr: kapp leggr þú á mikit Eysteinn konongr mál þetta, oc vera má at meira starf verdi fyrir, ádr en þetta mál gángiz vid, en til var lúgat, en eigi fyrir því at síðr skal framhallda. Oc giarnan vilda ec nú, at hann yrði sekr í sínom átt-haga. Þá mælti Eysteinn konongr, fátt mun þat vera, at eigi verdi framgengt, ef þer vilit fylgia, oc er þess ván sva marga oc stóra luti sem þer hafit unnit; en her er ván at í móti standi fáir menn oc smáir. Skiliaz þeir at sva búno, sva at eigi

eigi syzliz at málino. Eptir þat stefnir Sigurdr konongr Gulaþíng, oc sækir til siálfr, oc stefnir at ser mörgom dyrom höfðingium; þar kemr oc Eysteinn konongr med sínar sveitir, oc ero nú margir fundir at áttir oc stefnur at málino af vitrom mönnom, oc málit ransakat fyrir lögmönnom. Nú flytr Eysteinn konongr þetta fram, at allir þeir menn er fyri söcom voro hafdir, voro í Frosta-þíngs-lögom, oc sacir höfdo gerst á Hálogalandi. Lykz med því þíngit, at eigi er at gört, oc eydir hann sökina med þesso, oc skiliaz konongar at því, oc voro miöc reidir. Fer þá Eysteinn konongr norðr til þrándheims. Sigurdr konongr stefnir at ser öllom lendom mönnom, oc lendra manna húskörlom, oc nefnir or hverio fylki lid mikit búanda allt sunnann or landi, oc dróz at honom her mikill, stefnir hann lidino öllo norðr med landi, sækir sva allt norðr á Hálogaland, oc vill sva greipliga að at gánga, at göra Sigurd Hranason útlaga þar í frændhaga sínom, oc stefnir hann til sín Háleygiom oc Naumdælom, oc stefnir þíng í Hrafnistö. Eysteinn konongr biözc or kaupáangi med lidi miclo, oc sækir til þíngsins; hann tekr þá med hand-festi sókn oc vörn af Sigurdi Hranasyni. A þesso þíngi flutti hvari-tveggi kónonga fram sitt mál. Þá leitar Eysteinn konongr vid lögmenn, hvar þau lög ero sett í Noregi, at

bændöm se rett at dæma kononga mál, ef annar sækir mál af öðrom; flyt ec mál þat med vitnom fram, at Sigurdr hefir mer í hendr fengit málit. Nú á Sigurdr konongr við mic málit, en eigi við Sigurd Hranason. Lögmenn segia at Kononga málom ætti at skípa á Eyra-þingi í Nidarósi. Eysteinn konongr svarar: þat hugda ec at sva mundi vera, oc þangat mun sökin horfa, oc segiz konongr oc vilia þar rettan dóm falla láta um mál Sigurdar Hranasonar. Þá mællti Sigurdr konongr: Sva miðc sem þú villt þyngia oc óhægia fyrir mer of þetta mál, þá skal ec því þráligarr fylgia; oc skiliaz þeir at sva búmo. Sækia nú hvarir tveggio suðr til kaupánga, var þar stefnt VIII fylkna þing. Eysteinn konongr var þá í bænóm, oc hafdi allmikit lid, en Sigurdr konongr lá á skipom. En er til þings skyllði gánga, þá voro grid sett. Oc ec þar var komit fólk allt, oc málit skyllði kæra, þá stóð upp Bergþór Bockr, son Sveins Bryggio-fótz, oc bar fram vitni sitt, at Sigurdr Hranason hefdi leynt af Finnskattinóm. Eysteinn konongr stóð þá upp oc svarar: þó at þessi sök væri sönn, er þú ber nu fram, sem ec veit þó eigi med sannendom hver vitnisburdr þetta er; oc þó at sva væri, at þat sannadiz, þá hefir þessi sök nú verit eydd á þremr lang-þingom, oc móti ino síórda. Nú kref ec lögrettomenn at dæma Sigurd syknar sakarinnar at

lögom; oc sva var giort. Þá mællti Sigurdr konongr: ser ec, Eysteinn konongr, at þú hefir slutt fram lög-króka, en mer er eigi þat kunnigt. Nú er sú ein sóknin eptir, er ec mun vera vanari en þú, Eysteinn konongr, skal þá nú oc fram hafa; oc sneri síðan á brott til skipa sinna, oc let færa af tiölld, oc lagdi lidino öllu út til Hólms, átti þar þing, oc sagdi sva lidino, at um morguninn eptir skyldo þeir leggja árdegis inn til Ilovalla, oc gánga upp oc beriaz vid Eysteinn konong. En um kvöldit, er Sigurdr konongr sat at mat-bordi á skipi síno oc snæddi, þá vard hann eigi fyrr varr vid, en madr let fallaz nidr á þiliornar í fyrir-rúmino, oc tók um fót hönom; þar var Sigurdr Hranason, oc bad þá Sigurd konong göra af síno rádi slíkt er hann vildi, qvadz eigi vilia at af hönom hlytiz neckor vandrædi medal þeirra brædra. Geck þá til Magni Biskop oc Málmfrídr drottning, oc margir höfðingar adrir, oc bádo grida Sigurdi Hranasyni, oc med þeirra bæn tók Sigurdr konongr hann upp, oc tók af hönom fester, oc setti hann med mönnom sínom, oc hafdi hann med ser sudr í land. Um haustit feck Sigurdr konongr Sigurdi Hranasyni orlof, at fara heim norðr til eigna sinna, oc gaf hönom þá syslo af sinni hendi, oc var iafnan síðan vinr hans. Eptir þetta vard alldregi mart um milli þeirra brædra, ne blíða med ástsemd.

CAP. XXII.

DAUDI OLAFS KONONGS.

Á þrettánda ári ríkis þeirra brædra, tók Olafr konongr Magnússon sótt, þá er hann leiddi til bana; oc er hann iardadr í Nidarósi at Kristz kirkio; var hann mörgom miöc harm-ðaudi. Módir Olafs konongs var Sigridr dóttir Saxa í Vík, systir Kára Austráds, er kalladr var konongs fóstri, hann var ríkr madr oc vinsæll. Önnorr dóttir Saxa or Vík var Þóra, hon gat son, er Sigurdr het Slembidiaen, er síðan kalladiz sonr Magnus konongs Berfættz. Kári konongs fóstri átti Borghildi, dóttur Dags Eilífs-sonar, þeirra son var Sigurdr Austrádr, lendr madr, fadir Jons, er átti Sigrídi, systur Inga konongs Bardarsonar. Síðan redo þeir ij konongar landi, Eysteinn oc Sigurdr, en ádr höfðu þeir brædr iij verit konongar yfir Noreg xij vetor, v síðan er Sigurdr konongr kom í land, en vij ádr. Olafr konongr var xvij vetra, þá er hann andadiz, en þat var xj. Kalendas Januarii. Þá er Eysteinn konongr hafdi verit einn vetr austr í landi, en Sigurdr konongr var þá norðr, þá sat Eysteinn konongr lengi um vetrinn í Sarps-borg.

CAP. XXIII.

FÆDDR MAGNUS BLINDI.

Bóndi ríkr er nefndr Olafr í Dali, andugr madr,

hann bió í Aumord í Dali mikla; hann átti ij börn. Son hans het Hákon Faukr, en Borghilldr dóttir, hon var kvenna fridust oc vitr kona, oc fród miöc. Þau Olafr oc börn hans voro lengi um vetrinn í Borg, oc var Borghilldr iafnan á tali við Eysteinn konong, oc mællto menn all-misíafnt um vinfengi þeirra. En eptir um sumarit fór Eysteinn konongr norðr í land, en Sigurdr konongr fór þá austr, oc annann vetr eptir var Sigurdr konongr austr í landi, oc sat löngom í Kononga-hello, oc efldi stórmiöc þann kaupstad. Þar gerdi hann kastala mikinn af torfi oc grióti, oc let grafa um diki mikit; hann let húsa í kastalanom, oc giöra þar kirkio. Krossinn helga let hann vera í Konongo-hello, oc hellt hann eigi í því eida sína, er hann hafði svarit á Jorsala-landi, en hann framdi tíundir, oc flest allt annat þat er hann hafði svarit; hann setti Krossinn fyrir því austr við landz endann, at hann hugdi þat vera munda allz landz gæzlo; en þat varð at hino mesta óráði, at setia þann helgann dóm sva miöc undir valld heidinna manna, sem síðan reyndiz. Borghilldr Olafsdóttir heyrði þann qvitt, at menn ill-mællto þau Eysteinn konong um tal sitt oc vinátto, þá fór hon til Borgar, oc fastadi þar til iárns, oc bar iárn þar fyrir þetta mál, oc varð vel skyr. Enn er þetta spurdi Sigurdr konongr, þá reid hann þat á einom degi, er miklar voro ij dag-leidir, oc

kom fram í Dali at Olafs, var þar um nótt, þá tók hann Borghilddi frillo-taki, oc hafði hana brott með sér; þeirra son var Magnús, hann var brátt sendr til fósturs norðr á Hálogaland í Biarkey, til Vidkunns Jonssonar, oc fæddiz hann þar upp. Magnus var allra manna fríðastr, brád-görr á vöxt oc á afl.

CAP. XXIV.

MANN-JAFNADR KONONGA.

Eysteinn konongr oc Sigurdr konongr fóro einn vetr bádir at veizlom á Upplöndom, oc átti sín bú hvar þeirra, en er skamt var milli þeirra bæia, er konongar skylldo veizlor taka, þá syndiz bændom þat ráð, at þeir skylldo bádir vera samt at veizlonom, oc síno sinni at hvers búom, voro þeir fyrst bádir samt at því búi er Eysteinn konongr átti. En of kvelldit er menn tóko at drecka, var munngát eigi gott, oc voro menn hliódir. Þá mællti Eysteinn konongr: hví ero menn sva hliódir, hitt er aul-sidr meiri, at menn göri ser gledi, fám oss öl-teiti nockora, man þá enn áreitaz um gaman manna. Sigurdr bródir, þat man öllom sæmst þyckia, at vid hefiom nockorar skemt看anar ræðor. Sigurdr konongr svarar heilðr styggt: vert þú sva málugr, sem þú villt, en lát mic ná at þegia fyrir þer. Eysteinn konongr mællti: Sá aul-sidr hefir

iafnan verit, at menn taka sér iafnadar-menn, vil
ec her sva vera láta. Þá þagdi Sigurdr konongr.
Se ec, sagdi Eysteinn konongr, at ec verd at hafia
þessa teiti, mun ec þic bródir taca til iafnadar-
manns mér, færi ec þat til, at iafnt nafn höfom
við bádir oc iafna eign, göri ec öngann mun ættar
ockarrar eða uppfæzlo. Þá svaradi Sigurdr konongr:
mantu þat eigi er ec braut þic á bak ef ec villða,
oc vart þú vetri elldri. Þá svaradi Eysteinn kon-
ongr: Eigi man ec hitt sídr, er þú feckt eigi leikit
þat er miúkleikr var í. Þá mællti Sigurdr konongr:
Mantu hverso of sundit fór með ockr, ec máttu ke-
fia þic ef ec villða. Eysteinn sagdi: Eigi svam ec
skemra en þú, oc eigi var ec verr kaf-syndr, ec
kunna oc vel á ís-leggiom, sva at öngann vísar ec
þann er kepdi við mic, en þú kunnir þat eigi helldr
en naut. Sigurdr konongr svarar: höfðingligri iþrótt
oc nytsamligrí þycki mér sú, at kunna vel á boga,
ætla ec at þú nytir eigi boga minn, þóttu spyrnir
fótom í. Eysteinn konongr sagdi: Eigi em ec bog-
sterkr sem þú, en minna mun skilia bein-skeyti
ockra, en miklo kann er betr enn þú á skídom, oc
hafði þat en verit köllot fyrr góð iþrótt. Sigurdr
konongr sagdi: Þess þickir mér mikill munr, at
þat er höfðingligra, at sá er yfir-madr skal vera
annarra manna, se mikill í flokki, sterkr oc vapn-
færr, betr enn adrir menn, oc audsærr oc audkendr,

Þá er margir coma saman. Eysteinn konongr sagði: Eigi er þat síðr, oc einkanna hlutr, at madr se fríðr synom, er sá oc andkendr í mannföllda, þicki mer þat oc höfðingligt, því at fríðleikinom samir hinn besti búnaðr. Kann ec oc miklo betr til laga enn þú, oc sva hvat er við skulom tala, em ec miklo slett-ordari enn þú. Sigurðr konongr sagði: vera kann at þú hafir numit fleiri lög-pretto, því at ec átta þá annat at starfa, oc engi fryrr þer slett-mælis, en hitt mæla margir, at þú ser eigi all-fastordr, oc lítit mark se, hverio þú heilir, oc mælir eptir þeim er þá ero hiá, oc er þat eigi konongligt. Eysteinn konongr svarar: þat ber til þess, er menn bera mál sín fyrir mic, þá hugsa ec þat fyrst, at lúka sva hvers manns máli, at þeim mætti bezt þickia. Þá kemr opt annar, sá er mál á við hann, oc verdr þá opt dregit til oc midlat, at bádom skyldi líka; hitt er oc opt, at ec heiti því er ec em bedinn, því at ec villda at allir færi fegnir af mínom fundi. Se ec hinn kost, ef ec vil hafa, sem þú görir, at heita öllom illo, en eingan heyri ek efndanna fryia. Sigurðr konongr svarar: þat hefir verit mál manna, at ferd sú er ec fór or landi, væri helldr höfðinglig, en þú sazt heima á meðan, sem dóttir faudr þíns. Eysteinn konongr svarar: nú greipt þú á kyliño, eigi mynda ec þessa rædo vekia, ef ec kynna her eingo um at svara;

nærr þótti mer líno, at ec gerda þic heiman sem systr mína, ádr þú yrðir búium til farariunar. Sigurdr konongr svarar: heyrnt muntu hafa getit, þat at ec átta orrostor miðc margar í Serklandi, oc seck í öllum sigr, oc margskonar gersemar, þær er eigi hafa fyrr slíkar hingat í land komit; þóttu ec þar mest verdr er ec fann göfgasta menn, en ec hygg, at eigi hafir þú enn leynt heimdraga nafnino; fór ec til Jorsala, segir hann, oc com ec vit Púl, oc sá ec þic eigi þar, bródir, ek gaf konongdóm Rodgeiri Jarli inom ríka, vann ec víij orrostor, oc vartu at öngri. Fór ec til grafar Drottins, oc sá ec þic eigi þar bródir. Fór ec í ferð þeirri lengst út til Jordandar, þar sem Drottinn var scídr í, oc lögdumz ec út yfir ána, oc sá ec þik eigi þar; enn fyrir utan ána á backanúm var kiarr nackvat, oc reid ec þer þar knút á kiarrino, oc bídr þín þar. Mælltac sva fyrir attu skylldir leysa, bródir, eda hafa clligar þvilíkan formála er þar á var lagdr. Þá mællti Eysteinn konongr: smátt mun ec hafa her í móti; spurt hefir ec þat, at þu áttir orrostur nockurar utanlands, enn nytsamligra var hitt landi varo, er ec giörda medan. Nordr í Vogom setti ec fiskimanna búdir, at fátækir menn mætti næræz til lífs hiálpar, oc setta ec þar prests vist, oc lagda ec fe til kirkio þeirrar, er nálíga var allt heidit ádr. Mano þeir menn muna, at Eysteinn konongr hefir

verit í Norœgi. Um Dofra fiall var för or þrándheimi; urdo menn þar iafnan úti, oc fóro þar margir menn hördom förom; let ec þar sæluhús göra, oc fe til leggja; oc mano þeir vita, at Eysteinn konongr hefir verit í Norœgi. Fyrir Agdanesi voro öræfi, oc hafn-leysi, fóroz mörg skip, þar er nú höfn gör oc gott skiplagi, oc kirkia görr. Síðan let ec vita göra á há-fiöllum; nú muno þessa nióta allir menn innan-landz. Höllina let ec göra í Biörgyn oc Postula-kirkio, oc rid milli. Nú mano konongar þeir muna nafn mitt, er eptir koma. Michi-als kirkio let ec göra, oc múnklifi; skipada ec lög-om, bródir, at hver mætti hafá rettíndi víð annan, oc ef þau ero halldin, þá man betr fara landz-stiórnnin; Stöpulinn let ec göra í Sinhólms-sundi med járn-hríngum; þeim Jamtum höfom ver oc snúit undir þetta ríki, meir med blídom ordom oc viti, enn med ágangi oc ófridi. Nú er þetta smátt at telia, enn eigi veit ec víst, at landz-búunom se þetta óhallhvæmara, enn þótt þú brytiadir blámenn fyrri fiandann á Serklandi, oc hrapa þeim sva til helvítis. En þar sem þú hrósadir góðgiörningom þínom, ætla ec mer eigi minna til sálo-bótar, stadi þá er ec let setia hrein-lífis mönnom. En þar sem þú reitt mer knútinn, oc mun ec þann eigi leysa, en ríða máttu ec þer þann knút ef ec villda, at þú værir alldri konongr í Noregi, þá er þú sigldir ein-

scipa í her minn, er þú komt í land. Líti nú vit-
rir menn, hvat þú hefir umfram; oc vita sculo þer
þat, gull-hálsarnir, at menn muno enn iafnaz við
ydr í Noregi. Eptir þát þöguudo þeir bádir, oc
var hvartveggi reidr. Fleiri lutir urdo þeir í scipt-
om þeirra brædra, er þat fannz á, at hvarr dró
sic fram oc sitt mál, oc villdi hverr vera ödrom
meiri, en þó hellzt fridr millom þeirra, medan þeir
lifdo. Þat er sagt eitt sinn, at Sigurdr konongr var
kominn í sæti sitt, enn Ingibiorg Guttormsdóttir,
kona Eysteins konongs, mællti til Sigurdar konongs:
mörg oc mikil stórvirki mano lengi uppi vera, þau
er þer hafit unnit, Sigurdr konongr, í út-löndom.
Hann svaradi med víso:

Sciótt bar ec sciöllð inn hvíta
scalld bidr at Gud valldi
ár til eggja scúrar
ótraudr enn frá raudan.
þar hefi ec hogg of höggvit
hand-vist á Blálandi
Gud rædr sócn oc sigri
svauni þínom manni.

CAP. XXV.

FRÁ KER-LAUGO.

Þat er sagt, at Sigurdr konongr var at veizlo nock-
orri á Upplöndom, en þar voro laugar görvar. En

er konongr var í lauginni, oc var tialldat yfir kerit, þá þótti konongi renna fiskr í kerino hiá ser. Þá sló á hann hlátri sva miclom, at þar fylgdi stadleysi oc vitleysi, oc kom þat síðan miöe optliga at hönom. Ragnhildi, dóttur Magnús Berfættz, gipto þeir brædor hennar Haralldi Kesio, hann var son Eiríks Góða Dana konongs, oc voro synir þeirra Magnús, Olafr, Knútr, Haralldr.

CAP. XXVI.

SKIP-SMÍDI EYSTEINS KONONGS OC
DAUDI HANS.

Eysteinn konongr let göra skip mikit í Nidarósi, þat var gört at vexti oe med hætti eptir því sem Ormrinn Lángi hafdi verit, er Olafr konongr Tryggvason hafdi göra látit; var þar oe dreka höfud á framan, enn krókr aptr, oe hvart tveggja gullbúit. Skipit var bard-mikit, enn stafnarnir þóttu nockoro minni enn best væri. Hann let oe göra þar í Nidarósi naust bædi mörg oc sva stór, at afrek var í, oc gör med hinom bestom faungom, oc smídot ágæta vel. VI vetrom eptir andlát Olafs konongs barz þat at, þá er Eysteinn konongr var á veizlo á Stinn oe Hustödom, þar feck hann bráða sótt, þá er hann leiddi skiótt til bana. Hann andadiz iiij Kæendas Septembris, oc var lík hans flutt

nordr til Kaupánga, oc iardat at Krist-kirkio, oc er þat mál manna, at yfir enskis mans grepti hafi sva margir menn í Noregi iam-bryggvir stadið, sem Eysteins konongs, síðan er andadr var Magnús konongr góði, sonr Olafs hins Helga. Eysteinn var konongr xx vetr at Noregi; en eptir andlát hans var Sigurdr bróðir hans einn konongr at Noregi, medan hann lifði.

CAP. XXVII.

KRISTNUT SMÁLÖND.

Nicolás Dana konongr, son Sveins Ulfssonar, feck síðar Margretar drottningar, dóttur Inga konongs, er fyrr hafði átt Magnús konongr Berfætt, oc het son þeirra Nicoláss Magnús hinn sterki. Nicolás konongr sendi ord Sigurði konongi Jórsala-fara, oc bad hann veita ser lid oc styrk allan af síno ríki, oc fara með ser austr fyrir Svía-velldi til Smálanda, at kristna þat fólk, þvíat þeir er þar bygðo, helldo eigi kristni, þó at sumir hefði við skírn tekið. Var þann tíma víða í Svía-velldi mart fólk heidit, oc mart illa kristit, þvíat þá voro nockorir konongar þeir er kristni köstodo, oc helldo uppi blótom, sva sem Blót-Sveinn gördi, eða síðan Eiríkr enn ársæli. Sigurdr konongr het ferd sinni, oc gördi konongar stefnolag sitt í Eyrar-sundi.

Síðan band Sigurdr konongr almenningi út af öllum Noreg, bæði at lidi oc skipom. En er saman kom her sá, þá hafði hann vel ekk skipa. Nikolás konongr kom miklo fyrr til stefnunnar, oc beid þar lengi, þá kurrudo bændr illa, oc sögdo at Nordmenn mundo eigi koma. Síðan rufo þeir Danir leidánggrinn, fór konongr brott oc allr herinn. Noekro síðar kom Sigurdr konongr þar, oc líkadi honom illa; helldo þó austr í Sumarós, oc átto þar húsþing, oc taladi Sigurdr konongr um lausmæli Nicoláss konongs, oc kom þat ásamt med Nordmönnom, at þeir skyldo giöra noekut hervirki í landi hans, fyrir þessa sök. Þá tóko þeir upp þorp þat er heitir Tuma-þorp, er skamt liggir frá Lundi, oc helldo síðan austr til kaup-bæar, þess er heitir Kalmarnar, oc heriodo þar, oc sva á Smálöndom, oc lögdo vista-giöllld á Smálönd xv hundrut nauta, oc tóko Smálendingar vid kristni. Síðan vendir Sigurdr konongr herinom aptr, oc kom í sitt ríki med mörgom stórom gersemom oc fiárlutom, er hann hafði aflat í þeirri ferd, oc var sá leidánggr kalladr Kalmarna leidánggr. Þat var sumri fyrr enn myrkrit micla. Þenna einn leidánggr röri Sigurdr konongr medan hann lifdi, oc var konongr.

CAP. XXVIII.

FRÁ ÞÓRARNI STUTTFELLD.

Þat barsk at eitt sinn, þá er Sigurdr konongr geck frá skytningi oc til aptan-söngs, oc voro menn drucknir miöc oc kátir, oc sátu margir úti fyrir kirkionni, oc súngo aptan-sönginn, oc vard söngrinn ógreidr; þá mællti konongr: hvat karla er þat er ek se þar stendr hiá kirkionni í felldi neckorom? þeir svörudo, kvádoz ecki þat vita. Þá mállti konongr:

Villir hann vísdóm allan
velldr því karl í felldi.

Karl gengr fram oc mællti:

Hyck at her megi þeckia
helldr í stuttom felldi
oss enn ek læt þessa
óprydi mer hlyda.
Værir milldr ef mæra
mik villdir þú skickio
hvat hafi helldr en tötra
hilldingr muni villdri.

Þá mællti konongr: kom til mín at morni, þar er ec dreck. Lídr nú af nóttin, um morguninn fer Islendingr, er sídan var kalladr Þórarinn Stuttfelldr, oc kemr at dryckio-stofonni, en madr stód úti fyrir stofunni, oc hafdi horn í hendi, oc mællti: Islendingr, segir hann, þat mællti konongr at

Þú skylldir yrkia víso, ádr þú gengir inn, ef þú villdir þiggja nockora vingiöf át hönom, oc kveda um þann mann er Hákon Serksson heitir, er kalladr er Mör-strútr, oc geta þess í vísunni. Síá madr er vit hann ræddi het Arni Fiöro-skifr. Sídan gánga þeir inn, oc gengr Þórarinn fyrir konong, oc kvad víso:

Þú vændir mér þrænda
þengill ef ec stef fenga
frænda Serks at fundi
folk rackr gefa nockvat.
Letzu at Hákon heiti
hilldingr inn fe-milldi
enn samir mér at minnaz
Mörstrútr á þat görva,

Þá mælti konongr: þat sagda ec alldregi, oc mantu vera spottadr, oc er þat ráð at Hákon skapi þer víti fyrir, oc farir þú í svcit hans. Hákon mælti þá: vel skal hann hcr kominn med oss, oc se ek hvadan þetta er at komit, oc setr Islending it næsta scr á milli þeirra, oc voro þeir nú allkátir. Þá er áleid daginn, oc nockot tók at fá á þá dryckrinn, þá mælti Hákon: þickiz þú nockot Islendingr eiga bót-þarfa vid mic, eda þótti þer eigi helldr sett velrædi fyrir þik? Þórarinn svarar: víst þickumz ec þer bæta eiga. Hákon svarar: þá muno vid sáttr, ef þú yrkir víso adra um Arna. Hann qvedz

þess

Þess albuinn; gánga síðan yfir, þar sem Arni sat,
oc qvad Þórarinn víso:

Fullvíða hefir frædom
Fiðro-skeifr of her veifat
lýstr oc leiri kastat
lastsamr ara hins gamla.
Oc vantu eina kráko
ordvandr á Serklandi
skeifr hartu högna háfo
bræddr varliga brædda.

Arni lióp upp þegar, oc brá sverdi, oc villdi ráða
til hans. Hákon bad hann hætta, oc vera kyrran,
oc bad hann á þat mega minnaz, at hann mundi
lægga lut hera ef þeir ættiz vid. Þórarinn geck sí-
ðan fyrir konong, oc segir at hann hafði drápo ort
um hann, oc bad hann hlyða, oc þat veitti konongr
hönom, oc er þat köllut Stuttseldar drápa. Þá spyr
konongr hvat Þórarinn vill ráds síns, en hann qvadz
sudr hafa ætlat at gánga til Rums. Þá feck kon-
ongr hönom se mikit, oc bad hann til sín vitia er
hann kæmi aptr, oc qvadz þá mundo göra sóna
hans; enn her skilr eigi um þat, hvart þeir fundoz
síðan.

CAP. XXIX.

FRÁ SIGURDI KONONGI OC ÓTTARI BIRTING.

Þat er mál manna, at eigi hafi meiri skörungur verit
ne stiörnsamligri konongr í Noregi, enn Sigurdr kon-

ongr, en þó var þat er áleid stundina, at varla feek hann gætt skaplyndis síns ne lugar, at eigi yrði þat stundum med miklo áfelli oc þúngligom atburdom, en ávallt þótti hann merkiligr höfðingi oc dyrdligr af ferd sínni. Þat er frásagt einn hátíðar-dag Hvítasunno, at Sigurdr konongr sat yfir bordom vid miklo fiölmenni med mörgom vinom sínom, oc þá er hann kom í háseti sitt, sá menn at hann sat med miklo van-megni oc þúngo yfir-bragdi, voro menn hræddir um hann, hvern veg at reida mundi. Konongr leit á lyðinn, oc aurgadi auguðom, oc sá umhverfis síc á pallana, en eingi af mönnum hans þordi at tala til hans. Hann tók þá upp bókina dyro, er hann hafði haft í land; hon var öll ritin gull-stöfom, sva at eigi hafði meira gersemi komit í einni bók í Noreg. Drottning hans sat þá hiá hönom. Þá mællti Sigurdr konongr: mart kann skipaz, segir hann, á manns æfinni. Ek átti ij luti þá er mer þóttu bestir er ek kom í land; þat var bók þessi oc drottningin, en nú þicki mer hvarr ödrom verri oc andstyggiligri; þetta á ec nú sva í eigo minni, at mer þickir vest allra luta. Drottning fídr eigi hvernog hon er sva ferlig, því at geitar-horn stendr or höfði henni, oc því betri sem mer þótti hon, því aullo verri þicki mer hon nú; enn bók þessi dugir til einskis. Því næst kastadi hann bókinni á elldinn fram, er gör

var á hallar-gólfino, enn laust drottninguna kinnhest hiá augano. Drottning gret, oc þó konongs mein meirr, enn af höggino edr mótgörd ser veittri. Sá madr stóð upp fyrir konunginum, einn af kertisveinom konongs, er het Ottar Birtíng, bóndason, oc var þó kertisveinn konongs, oc skyldi þá þíona um dagiinn; hann var lítill vexti oc kurteis, vaskligr, diarfr oc skemtiligr, enn svartr á hár oc hörund, því þótti hönom auk-nesni gefit, er hann var Birtíng kalladr. Hann lióp til oc greip bókina or elldinom, er konongr hafði kastat á elldinn, oc hellt á, oc mællti til konongs: úlíkir dagar voro þeir, herra, er þer sigldut med segurd oc prydi at Noregi, oc kómz her til landz med mikilli frægd oc vegsemd, því þá runno allir vinir þínir í móti þer med fagnadi, oc fögnudo komo þinni, oc iáttu-do allir þer at konongi, oc villdo hafa þic yfir ser, med hinni mesto vegsemd oc sæmd; enn nú ero komnir yfir oss hrygdar-dagar, þvíat á þessari ágæto hátíð ero her komnir til þín vinir þínir margir, oc mego eigi kátir vera sökum þíns skaplyndis harms oc vanheilso; þat væri æskiandi, at þer gætut verit gladir med þeim, oc gör nú sva vel, góþi konongr, þigg þetta heilrædi oc sættiz nú fyrst við drottninguna, oc gledit hana med blíðskap, er þú hefir mikit afgört við, oc síðan út í frá alla höfðingia þína, vini oc þíonosto-menn, þat er mitt ráð. Þá

sagdi Sigurdr konongr: hvat muntu kenna mer rád, hinn herfiligsti kotkarls-son, fíflskofullr bónda-úngi, oe hinnar minsto ættar; oe af allra leidasta oe armasta kyni kominn; oe lióp hann þá upp síðan, oe brá sverdi, oe reiddi at hönom báðom höndom, oe let sem villki hann höggva hann: enn Ottar stóð kyrr oe rettr, oe hrærdiz eigi or stad, brá ser eigi vid ne blöskradi, eins oe væri hann með öllu ótta-laus, enn konongr brá flöto sverdino, er ofan reid at höfði Ottari, oe sló línliga rítan á herðar hönom. Því næst þagnadi hann, oe settiz níðr í há-sætit, þögnodo þá oe allir menn sem í hölliinni voru, því eingi þorði at yrkia orði á hann; þá litadiz konongr um, oe hógligar enn ít fyrri sinn, oe mællti síðan: seint má reyna mennina hvílikir ero, her sátu vinir mínir oe lendir menn, oe stallarar, skutulsveinar oe allir hinir besto menn í landino, oe varð eingom íamvel til mín sem þessom, er ydr man þíckia lítilsverdr hía ydr, enn hann unni mer nú mest. Ek kom her inn örr madr, oe villdag spilla görsemi minni, hann bætti þat með mer, oe annari hendi hræddiz hann eigi banann; taladi síðan fagurt erindi, stillti orðonom sva, at mer yrði at virðing, enn eigi talði hann þá lutina er minn harmr aukadiz vid, þat felldi hann allt níðr, er þó mátti með sönno umræða; enn sva var þó skör-uglig hans ræða, at engi var sva vitr madr hía, at

sníallara mundi mæla. En síðan lióp ec upp örvita, oc let ec sem ec villða höggva hann, enn hann var sva fullhugi, sem engi ótti væri um at vera; enn þá er ec sá þat, let ec þetta verk fyrir-faraz, sva ómakligr sem hann var. Nú skulo þer vinir mínir vita hverio ec mun launa hönom; hann er ádr kerti-sveinn, nú skal hann vera lendr madr minn, oc mun þat þó fylgia, er eigi man minna vera, at hann man merkiligasti madr vera af stund do lendra manna minna. Þá þackaði konongr bönða-syni í allra þeirra nærvero, at hann hefði stillt ged hans með vitrfigom orðom oc diörfom huga, oc gert þat sem lenz-höfðingiar hans hefði eigi þorat; gördi konongr hann at sínom ædsta lenz-höfðingia. Opt var Sigurdr konongr með þesskonar skap-lestí oc undarligom sidom, oc hverier sem þá af hans fátækum þenurum villdu áminna hann, þeim hlyddi hann bezt, oc gaf þeim gótz oc garda þar fyrir. Ottar gördiz síðan hinn merkiligsti madr í Noregi, af mörgom góðom lutom oc dyrligom.

CAP. XXX.

DRAUMR SIGURDAR KONONGS.

Ósarlíga á dögum Sigurdar konongs var hann at vèizlo á búi síno eino. Enn um morguninn þá er konongr var klæddr, var hann fánúaligr oc ókátr,

oc hrædduz vinir hans, at þá mundi enn at hönom koma vanstillit. Enn ár-madrinn var vitr madr oc diarfr; hann kvaddi konong máls, oc spurdi ef hann hefði nockot tíðinda fregnat, þau er sva væri mikils verd, at hönom stæði þat fyrir gleði, eda væri þat, at veizlan hugnadi hönom eigi vel, eda væri nockorir þeir lutir er menn mætti bætur á ráða. Sigurdr konongr sagði, at öngir lutir helldo þeir til, er hann ræddi um, enn þat helldr til segir hann, at ee hugsa draum þann er fyrir mic har í nótt. Herra, segir hann, gódr draumr skyllði sá vera, en heyra villða ec hann giarna. Konongr mællti: ek þóttumz vera úti staddr her á Jadri, oc síá út í haf, leit ec þángat sorta mikinn, oc var för í, oc er nálgadiz hingat, þá syndiz mer þat mikit tre eitt, oc ódo limarnar uppi, enn ræturnar í síá. Enn er treit kom við landit, þá braut þat, oc rak brot tresins víða um landit, bæði um meginland, oc um út-eyar, sker oc strandir; oc þá gaf mer syn, sva at ee þóttumz síá of allan Noreg ít ytra med síanom, oc sá ec at í hveria vík var rekit brot af þesso tre, oc voro sum smá, enn sum stærri. Þá svaradi ármadrinn: þat þykir mer líkast um þenna draum at þer síálfir munut best skilia, oc villdu yer at þer reðit síálfir. Þá mællti konongr: þat þykir mer líkæzt um draum þenna, at vera muni fyrir tilkvæmo mans nockors i land þetta,

oc mun hann her stadfestaz, oc hans afspríngur mun víða dreifaz um land þetta, oc vera miðc misstórt, sem í drauminom var.

CAP. XXXI.

FRÁ ÁSLÁKI HANA.

Sva bar at eitt sinn, er Sigurdr konongr sat með mörgom göfugom mönnum í strídom hug, var þat friá-kveld eitt, at dróttsetinn spurdi hvat til matar skyldi búa; konongr svarar: hvat nema slátr; enn sva mikil ógn var af ordom hans, at eingi þordi hñonom í móti at mæla. Voro nú allir ókátir, biuggoz menn nú til borda, como inn sendingar, heitt slátr, oc voro allir menn hlióðir, oc hörmudo konongs mein. Enn áðr enn matrinn væri signdr, þá tók sá madr til orða er Aslákr Hani het: hann hafdi verit lengi með Sigurdi konongi í útferðinni, eigi var hann ættstór madr, hvatr oc lítill vexti; oc er hann sá i hvert efni komit var, oc at engi mundi svara kononginom, þá mællti hann oc spurdi: hvat rykr á diskinom fyrir ydr, herra? Konongr svarar: hvat vildir þú, Aslákr hani, eða hvat syniz þer? hann svarar: þat syniz mer, herra, sem ek villða eigi at væri, at slátr se; konongr mællti: enn þótt sva se, Aslákr hani; Aslákr svarar: hörmuligt er slíkt at vita, er sva miðc skal missynaz þeim ágæta

konongi, er sva mikiinn sóma hefir fengit í verölldinni af ferd sinni; oc ödro hetz þú þá, er þú steigst or Jordan, oc hafdir laugaz í því vatni sem Gud siálfr, oc hafdir pálm í hendi, oc kross á bríngo, enn þú mundir slátr eta friádag; ok ef smærri menn gördi slíkt, væri stór-refsinga fyrir verdt; oc eigi er sva vel skiput höllin, sem líkligt veri, er engi verdur til, nema ec einn lítill madr, um slíkt at ræda. Konongr þagnadi, oc tók eigi til matarins, oc er áleid mat-málit, bad konongr brott taka slátr-diskinn, kom þá fram sá matr er hönom hæfði vel at hafa, oc tók konongr nockot at kætaz helldr, er áleid mat-málit, oc drack. Menn mællto at Aslákr skyldi forða ser, enn hann qvadz eigi mundo þat göra, veit ec eigi hvat þat mun tíóa, er sannazt at nú er gott at deyia, er ek hefi því framkomit sem ek villda, at firra kononginn glæp, enn hann á þat heimillt at láta drepa mik ef hann vill. Um kvell-dit kalladi konongr á hann oc mællti: hvær eggjadi þik Aslákr hani, at mæla slíkom ber-yrdom vid mic í mann-fiöllda? eingi, herra! sagdi hann, nema ek siálfr; konongr mællti: vita mantu nú vilia hvat þú skalt fyrir hafa þína dirfd, eda hvers þú þiekiz verdr? hann svarar: viltu vel launa, herra! þá em ec feginn, enn ef ödro-vís verdr, þá er þat þitt. Þá mællti konongr: þú mant miinni laun fyrir taka enn maktigt er; ek mun gefa þer iij bú; enn þann

veg skipti her til, sem úlíkligara mátti þieka, er þú firdir mic mico úhappi, helldr enn lendir menn; er ec átta mikit gott at, Lauk sva þesso.

CAP. XXXII.

KONA LEIDD JÓLA APTAN TIL KONONGS.

Sva bar at eitt sinn Jóla-kveld, er konongr sat í höllinni, oc bord voro framselt, þá mællti konongr: fáir mer slátr; herra! sögdo þeir, eigi er þat sidr í Noregi, at eta slátr Jóla-kveld. Konongr svarar: er þat eigi sidr, þá vil ec þó þann sid hafa. Þeir fóro, oc færdo hönom hniso; konongr stángadi vid knísinom, oc tók eigi til; þá mællti konongr: fáir mer kono inn í höllina: þeir leiddo kono fyrir hann, oc hafdi hon sítt falldat. Konongr tók hendinni til höfuds henni, oc leit á, oc mællti: úsællig kona er þetta, þó eigi sva, at eigi megi sæma vit slíkt; síðan leit hann á höndina oc mællti: ófangur hönd, oc eigi vel vaxin, enn þó verdr at sæma vid slíkt; þá bad hann at hon retti fram fótinn, oc hon gördi sva, leit hann á oc mællti: ferligr fótur oc mikill miöc, enn eigi má gaum at því gefa, sæma verdr vid slíkt. Þá bad hann at þeir skyldo þá uppleggia kyrtilinn um liana, oel er hann sá legginn, mællti hann svá: Sví verdi þínom legg, er bædi er blár oc digr, oc mantu vera

púta ein, oc bad þá leida hana brott, oc vil ec eigi vid hana búa.

CAP. XXXIII.

HARALLDR GILLI KOM Í NOREG.

Hallkell Húkr, son Jons Smiörballta, var lendr madr á Mæri, hann fór vestr um haf, oc allt til Sudreyia; þar kom til fundar vid hann, utan af Irlandi, sá madr er het Gilli Kristr, oc sagdiz vera son Magnúss konongs Berfætts; módir hans fylgdi honom oc sagdi, at hann het Haralldr ödro nafni. Hallkell tók vid þessom manni, oc flutti med ser til Noregs, oc fór þegar á fund Sigurdar konongs med Haralldi oc módur hans. Þau bera fram sitt erindi fyrir konongi, ræddi Sigurdr konongr þetta mál fyrir höfðingiom oc bad menn tilleggia sem syndiz. Enn menn lögdo her alþmisiafnt til; oc allir bádo þó konong ráða siálfan fyrir; enn fleiri voro þeir er í móti ríso, oc tók konongr meir sitt einrædi. Þá let Sigurdr konongr kalla til sín Haralld, oc sagdi hönom sva, at hann vill eigi synia hönom, at Haralldr fremi skírslu til fadernis ser; med því at hann vill þat vera láta í festo, þótt hönom beriz þat faderni, er hann segir, at Haralldr skal eigi beidaz konongdóms medan Sigurdr konongr eda Magnús konongr lifa, oc fóro þessar

festar fram með sverdógom. Sigurdr konongr sagdi, at Haralldr skyldi troda slár til fadernis ser, enn sú skírsla þótti mönnum helldr frek, þvíat hann skyldi þá skírsla fremia til fadernis ser, enn eigi til konongdóms; enn Haralldr iátti þessu oc fastadi til iárns, oc hefir sú skírsla mest gör verit í Noregi; ix plóg-iárn glóandi voro nidrlögð, oc geck Haralldr þar eptir berom fótom, oc leiddo hann Biskopar ij, hann kalladi á hinn helga Columba medan, þar var oc gör reckia hanss. Þá mællti Magnus, son Sigurdar konongs: eigi tredr hann hugmannliga iárnin. Konongr svarar: illa mælis þú oc grimmliga, þvíat hann hefir sköruliga framit. Síðan let Haralldr fallaz í reekiona, oc eptir þriá daga síðan er skírslan var framin, var skírslan reynd, voro þá fætur hanss óbrunnir. Eptir þat tók Sigurdr konongr vel við frændsemi Haralldz; enn Magnús, son hanss, óþockadiz núoc við hann, oo margir höfðingiar snero miöc eptir hönom. Sigurdr konongr treystiz sva miöc vinsælld sinni vit allt landz-fólk, at hann beiddiz þess, at allir menn skyldo þat sveria, at Magnus, son Sigurdar konongs, skyldi einu vera konongr eptir hann, oc feck hann þá sverdaga af öllu landz-fólki.

CAP. XXXIV.

VEDIAN HARALLDZ OC MAGNUSAR.

Haralldr Gilli var madr hárr oc grannvaxinn, hálslánger, helldr langleitr, svarleygdr, döekhárr, skiótligr oc fráligr, oc hafði miöc Irskan búnað, stutt-klæddr oc lett-klæddr. Haralldi var stirt miöc um Norrænt mál, oc kyfði miöc til ordanna, oc höfdo margir menn þat miöc at spotti, enn Sigurdr konongr let þat eigi duga, þegar hann var vid. Þat var vandi, at Haralldr fylgdi Sigurdi konongi til svefns á kvölldom, oc eitt sinn bar sva til, at þeir Magnus gáto hann eptir dvalit, oc sátu þeir lengi oc drucko. Haralldr taladi vid annan mann, sagði hann vestan af Irlandi, oc var þat í rædo hanns, at þeir menn voro á Irlandi, at sva voro fóthvatir, at eingi hestr tók um þá á skeidi. Magnús konongs-son heyrdi þetta, oc mællti: nú lygr hann enn, sem hann er vanr; Haralldr svarar: satt er þetta, at þeir menn muno finnaz á Irlandi, at eingi hestr í Noregi mun hlaupa um þá; ræddo þar um nockorom ordom, þeir voro bádir drucknir. Magnúsi hafði verit sendr hestr gautskr, gersemi mikil, oc skiótr miöc, ræddo þeir um er vid voro, at eingi myndi hestr vera jafnskiótr, oc viko til Harallds. Þá mællti Magnús: her skaltu vedia fyrir höfði þíno, ef þú rennr eigi

íamhart sem ec ríd hesti mínom, enn ec mun leggia í móti gullhring minn. Haralldr sagdi: eigi sagdi ec, at ec renna sva hart, helldr þat, at finna man ec þá menn á Irlandi, ec sva hart muno renna, oc má ec vedia um þat. Magnús konongs-son svarar: eigi man ec fara til Irlandz, her skule vid vedia, enn eigi þar. Haralldr geek þá brott til svefns, oc villdi eigi eiga fleira vit hann. Þetta var í Oslo. Enn eptir um morguninn þá er lokit var for-messom, reid Magnús upp í götor, oc gördi þá ord Haralldi at koma þannug. Enn er Haralldr kom, var hann sva búinn; hafdi skyrto oc il-banda brækor, stuttan möttul, hött Irskan á höfði, spiótskapt í hendi. Magnús markadi skeidit. Haralldr mælti: oflángt ætlar þú skeidit; Magnús ætladi þegar myklo lengra, oc sagdi þó vera ofskamt. Mart var hiá manna. Þá tóko þeir skeid fram, oc fylgdi Haralldr íafnan frambæginom. Enn er þeir komo til skeids-enda, mælti Magnús: þú hellz í gagntakit, oc dró hestrinn þic. Magnús hafdi gautzkan best allskiótan. Þeir tóko annat skeid aptr, rann þá Haralldr allt skeid fyrir hestinom. Enn er þeir komo til skeids-enda, þá spurdi Haralldr: hellt ec nú í gagntakit? Magnús svarar: nú tókt þú fyrri til. Let Magnús þá blása hestinn um hrið; can er hann var búinn, þá keyrði hann sporom hestinn, oc kom hann skiótt á

hlaup. Haralldr stóð þá kyrr; þá leit Magnús aþtr oc kalladi: renn nú, segir hann; þá lióp Haralldr oc skiótt fram um hestinn, oc langt fyrir fram, oc sva til skeids-enda; kom hann sva myklo fyrr, at hann lagdiz nidr, oc spratt upp, oc heilsadi þá Magnúsi frænda sínom, þvíat hann kom þá. Oc eptir þat fóro þeir heim til bæiar. Enn Sigurdr konongr hafdi verit medan at há-messo, oc víssi hann þetta eigi, fyrr enn eptir mat um daginn. Þá mællti hann reidoliga til Magnúsar: þer kallit Haralld heimscan, enn mer þickir þú vera meira fól, eigi kantu utanlandz sido manna; vissir þú þat eigi fyrr, at menn í öðrom löndom temia sic meir við adrar ídróttir, enn at kyla öl, eda göra sic æran ok ófæran, oc vita þá eigi til manns; oc fá Haralldi hrúg sinn, oc gabba hann alldri sídan, medan mitt höfud er fyrir ofan molla, oc ec á at ráða.

CAP. XXXV.

FRÁ SUNDFÆRI.

Þat bar til eitt sinn, þá er Sigurdr konongr var úti á skipom, oc lágo þeir í höfn, oc kaupskip nockot hía þeim Islandzfar. Haralldr Gilli var í fyrir-rúmi á konongs skipi, enn næst hönom fram frá lá Sveinn Rimhilldason, hann var son Knútz Sveinssonar af Jadri. Sigurdr Sigurdarson var oc

þar, lendr madr ágætr, hann styrði þar skipi. Þat var einn fagran vedr-dag, var heitt skin, oc fóro menn margir á sund, bæði af lánq-skipunom oc af kaupskipino. Islendzkr madr einn, sá er á sundi var, henti gaman at því, at færa nidr þá menn er verr voro syndir, oc hlógo menn at því. Sigurdr konongr sá þetta oc heyrði; síðan kastadi hann klædom af ser, oc leypr á sund, oc lagdiz at Islendingi, grípr hann oc færði í kaf, oc hellt nidri, oc þegar annat sinn er Islendingr kom upp, færði konongr hann nidr, oc hvert sinn eptir annat. Þá mællti Sigurdr Sigurdarson: skolu ver konong láta deyða manninn? madr svarar, segir at eingi var allfúss til at fara. Sigurdr svarar at verda mundi madr til, ef Dagr Eilífsson væri her; síðan lióp Sigurdr fyrir bord, oc svam til konongs, tók til hanns, oc mællti: tyn eigi mannin-om herra, siá nú allir, at þú ert myklo betr syndr. Konongr mællti: lát mic lausan, Sigurdr, ec skal bana hönom, þvíat hann vill kesa menn vára. Sigurdr svarar: vit skulom nú leika fyrst, enn þú Islendingr leita til landz, oc hann gördi sva. Enn konongr let Sigurd lausan, oc svam hann til skips síns, sva fór oc Sigurdr; enn konongr bad Sigurd verda eigi sva diarfan at koma í augsyn ser; þat var sagt Sigurdi, oc geck hann á land upp.

CAP. XXXVI.

FRÁ HARALLDI OC SVEINI HRÍMHILLDAR-
SYNI.

Þá um kvældit er menn fóro at sófa, leko sumir menn uppi á landi. Haralldr var í leikinom á landi, oc bad skó-svein sinn fara út á skipit, oc búa hvílo sína, oc bíða sín þar. Sveinninn gördi sem hönom var bodit. Konongr var sofa fariinn; enn er sveininom þótti Haralldr seinn, þá lagðiz hann uppi rúmit Haralldz. Sveinn Hrímhíldarson mælti: skömm mikil er at fara til þess heiman frá búom sínom dugandis mönnom, at draga knapa her upp iarnhátt ser. Sveinninn svarar, oc kvad Haralldr vísadi hönom þáugat. Sveinn Hrímhíldarson svarar: oss þickir eingi ofgæda kostur í, at Haralldr liggi her, þó at hann dragi eigi hingat þræla upp, cda staf-karla, oc greip upp ridvöl oc laust sveinninn í höfudit, sva at blóð fell um hann. Sveinninn lióp þegar upp á land, oc segir Haralldi hvat í var ordit. Haralldr geck þegar á skipit út, oc aptr í fyrir-rúmit, hann hió med hand-öxi til Sveins, oc veitti hönom sár mikit á höndina, geck Haralldr síðan á land upp. Sveinn lióp þegar á land eptir hönom, drífo þá til frændor Sveins, oc tóko Haralld höndom, oc ætludo at
her-

hengia hann. Enn er þeir bioggo þar um, þá geck Sigurdr Sigurdarson út á skip konongs, oc vakdi hann. Enn er konongr brá augom í sundr, oc kendi Sigurd, þá mællti konongr: fyrir þetta sama skaltu deyia, er þú komt í augsyn mer, þvíat þú vissir ec bannada þer þat; oc lióp konongr upp. Sigurdr mællti: kostr mun þess konongr, þegar þer vilit, enn adrar syslor ero ydr nú fyrst skylldari; far sem skiótast máttu upp á land, oc hiálpa Haralldi bróðr þínom, þvíat Rygir vilia nú hengia hann. Þá mællti konongr: Gud gæti nú til, Sigurdr; kalla nú lúdr-svein minn, oc lát blása lidino upp til mótz vit mic. Konongr lióp upp á land, enn allir er hann kendo, fylgdo med hönom, oc þar til er gálginn var búinn. Tók konongr Haralld þegar til sín, enn allt fólk þusti þegar til konongs med alvæpni, er lúdrinn hafdi vidkvedit. Þá sagdi konongr, at Sveinn oc allir hanns felagar skylldo útlagir fara; enn vid bæn manna feckz þat af konongi, at þeir skylldo hafa landzvist oc eignir sínar, enn sárit bóta-laust. Þá spurdi Sigurdr Sigurdarson, ef konongr villdi, at hann færi þá í brott. Þat vil ec eigi, sagdi konongr, alldregi má ec þín án vera.

CAP. XXXVII.

JARTEGNIR OLAFS KONONGS VID TÚNGO-
SKORINN MANN.

Kolbeinn het madr úngr oc fátaekr, enn þóra mó-
dir Sigurðar konongs Jórsalafara, hon let skera
túngo or höfði hönom, oc var til þess eigi sök,
enn sá inn úngi madr Kolbeinn hafði eitt stycki
haft af diski konongs-módur, oc sagði at steikari
hefði gefit hönom, enn hann þordi eigi vid at
ganga fyrir henni. Síðan fór sá madr mállaus lán-
ga ríð. Þess getr Einar Skúlason í Olafs-drápo:

Göfug let hrund or höfði
hvítings of sauk litla
audar aumom beidi
úngs manns skera túngo.
þann sáð ver er várom
válaust numinn máli
hodda briót þar er heitir
Hlíd fám vikom síðarr.

Hann sótti síðan til Níðaróss, oc vakði at Kristz-
kirkio, enn um ótto-saung Olafs-vöko dag hinn sí-
dara, þá sofnadi hann, oc þóttiz síá Olaf hinn
helga konong koma til sín, oc tala vit sic, oc taka
hendi sinní í stúfinn túngunnar oc heimta; enn er
hann vaknadi, þá var hann heill, oc þackadi vor-
om drottni fegin-samlíga, oc enom helga Olafi kon-
ongi, er hann hafði heilso oc miskun af þegit;

hafði farit þángað áðr mállaus, oc sótti hanns heilagð skrin, enn þaðan fór hann heill oc skorin-ordr.

CAP. XXXVIII.

JARTEGNIR ÓLAFS KONONGS VID HER-
TEKINN MANN.

Úngan mann nockorn danskan at edli tóko heidnir menn, oc flutto til Vindlandz, oc höfðo þar í böndom med öðrom herteknom mönnom. Nú var hann um daga í iarni einnsaman vardveizlolaus, enn um nætor þá var sonr bónda í fiötrom med hönom, at hann hliópist eigi frá hönom. Enn sá aumi madr beid alldreigi svefn ne ró fyrir harns sakir oc sorga; hugleiddi marga vega hvat til hiálpar væri, qviddi miöc ánaud, oc mæddist bæði í sullt oc písl, oc vænti öngrar aptr-lausnar af frændom sínom, fyrir því at þeir höfðo tvisvar áðr leyðstann hann af heidnom löndom med fiárlut, oc þóttist hann því vita at þeim mundi þá þikia bæði mikit fyrir því oc kostnadarsamt, at gánga undir it þridia sinn. Vel hefir sá madr, er eigi bídr slíkt illt þessa heims, er hann þóttist þá bedit hafa. Nú gerdiz hönom einginn annar til, enn laupast í brott, oc komast undan, ef þess verðr audit. Því næst ræðr hann til á náttar-þeli, oc drepr son bónda, höggr af hönom fótinn, oc stefuir

sva til skógar með fiöturinn undan. Enn um morguninn eptir er lysti, þá verða þeir varir vit, oc fara eptir hönom með hundom tveim, er því voro vanir vit, at spyria þá upp er undan liópost, finna hann í skógi þar sem hann lá oc leyndist fyrir þeim. Nú taka þeir hann höndom, beria oc beysta, oc leika allskonar illa. Síðan draga þeir hann heim, lá hönom lífs at hvaro naðoliga, oc engrar annarar miskunar; draga hann til písla, oc setto hann í myrkva-stofu, þar er fyrir voro ádr xvj adrir christnir menn; bundu hann þar bæði iárnóm oc ödrom böndom, sem fastast mátto þeir. Sva þótti hönom vesölld oc píslir þær, er fyrr hafdi hann haft, sem þat væri skuggi noekor þessa alls ens illa er nú hafdi hann. Engi madr sá hann angom í þeirri þrisund, sá er hönom bæði miskunar; engom manni þótti aumligt um þann vesælligan, nema christnom mönnom er þar lágo bundnir með hönom, þeir hörmodo oc greto hanns mein, oc sína neyd oc úgæfo. Oc um dag nockurn lögðu þeir ráð fyrir, bádo at hann heitist hinum heilaga Olafi konongi, oc giæfist til embættis-manns í hanns dyrdar-húsi, ef hann kæmiz með Guds miskun oc hanns bænom burt or þeirri þrisund. Nú iátadi hann því feginn, oc gafz þegar til þess stadar sem þeir bádo hann. Nóttina eptir, þá þóttiz hann síá í svesni mann einn eigi láann standa þar et næsta

ser, oc mæla við sik á þá leid: heyrðo hinn aumi
madr, segir hann, hví rísto eigi upp? hann svarar:
lávarðr minn, hvat manna erto? hann sagði: ec er
Olafur konungur, er þú kallaðir á. Oho! lávarðr minn
góðr, segir hann, ec villða fegjum upp-rísa, ef ec
mætta, enn ec ligg iárnöm bundinn, oc þó í fiö-
trom, með þeim mönnum, er her sitia bundnir.
Síðan heitir hann á hann, oc qvæð sva at orðom:
statto upp skiótt, oc æðraz eigi um, víst erto nú
lauss. Því næst vaknadi hann, oc sagði þá sínöm
felögom, hvat fyrir hann hafði borit. Síðan báðo
þeir hann uppstanda, oc freista ef satt væri. Hann
stendr upp, oc kendi at hann var lauss. Nú sögðo
felagar hanss aðrir, oc kváðo þat hönom fyrir ecki
koma mundi, þvíat hurd var læst utan oc innau.
Þá lagði orð til gamall madr, sem þar sat meinli-
ga halldinn, oc bað hann eigi tortryggia þessa
manns miskun, er hann hefði lausn af fengit, oc
sva, at þat mun hanss iarteikn vit þik gört hafa,
at þú skulir hanss miskunar nióta, oc hedan lauss
verða, enn eigi þer verða til meiri vesælldar oc
písla, nú lát vit fiunt, segir hann, oc leita dyra,
oc ef þú mátt útkomaz, þá erto hólpinn. Sva-ger-
ði hann, finnr dyrnar þegar opnar, stöckr út íam-
nskiótt, oc burt í skóginn. Þegar þeir urðo varir
þessa, þá slógo þeir handom sínöm, oc fóro eptir
sem skyndiligast, enn hann liggir oc leyniz, oc ser

gerla vesall karl, hvar þeir fara eptir hönom. Nú villaz hundar þegar farsins, er þeir lido at hönom, enn þeim öllum villtiz synin, sva at einginn madr mátti finna hann, oc lá hann þar fyrir fótom þeim. Vendo þeir þá heim aptr þadan, oc veinudo miöc oc hörmudo, er þeir máttu ey fá stadið hann. Olafir konongr let hönom eigi tortína er hann var til skógar kominn, gaf hönom heyrn oc heilso alla, er þeir höfðu ádr barit höfud allt á hönom, oc knosit til þess er hann deyfði. Því næst komz hann á skip med Christnom mönnum tveim, þeim er lengi höfðu verit þar þindir, oc neytto þá allir saman þess farkostar sem ákafast, oc sluttuz þá áleiddiss af þeim laupstígi. Síðan sótti hann til þess helga manns húss, var þá heill ordinn oc herfærr. Þá idradiz hann sinna heita, geck á ord sín við þann helga konong, oc liópz á brott om dag, oc kom at kvölldi til bónda einns, þess er hönom veitti herbergi fyrir Guds sakir. Síðan um nóttina er hann var í svefni, sá hann meylar þriár gánga til sín, fríðar oc fagr-búnar, oc orto ordi á hann þegar, oc vördo hann miklom ávítom, er hann skyldi sva diarfr giöröz, at laupa frá þeirra góða konongi, er hönom hafði sva mikla miskun veitt, fyrst er hann leysti hann or iárnöm, oc allri þrisund, oc firraz þann liúfa lávard, er hann hafði á hönd gengit; því næst vaknadi hann felmsfullr, oc stóð upp

Þegar árdegis, oc sagdi hús-búanda; enn sá góði búandi let hann eigi ödro vit koma, eun venda heim aptr til þess helga stadar. Sá madr ritadi at upphafi þessa iarteikn, er siálfr sá mánninn, oc á hönom iárna-stadinn.

CAP. XXXIX.

SIGURDR KONONGR FÆR CECELIU.

Þá er áleid æfi Sigurdar konongs, gördiz sú nylyn-da um ráð hans, at hann vill láta eina drottningo-na, oc fá þeirrar kono er Cecelia het, hon var ríks manns dóttir. Lætr hann búa til veizlo mikillar, oc ætlar at fá at brúðlaupi í Biörgun. Enn er þat spyr Magni biskop, gördiz hann úkátr, oc einn dag gengr biskop til hallarinnar, oc med hönom prestr hanns einn, er Sigurdr het, er síðan var biskop í Biörgun. Enn er þeir komo at höllinni, sendir bi-skop konungi ord, at hann vill hitta hann, oc bad konong útganga til hans, oc hann giördi sva, geck út oc hafdi brugdit sverd í hendi, oc tók hann vel vit biskopi, oc bydr hönom inn til dryckio med ser. Biskop svarar: annat erindi hefi ec nú: er þat satt herra, sem mer er sagt, at þú ætlir at kvan-gaz, oc láta eina drottningona, enn taka adra kono? konongr qvad þat satt vera. Biskop tók þá at þrút-na miöc, oc svarar mædiliga: því syniz ydr, herra,

at göra slíkt í varri biskops-syslo, at svívirda sva mióc guds bod oc rett, oc helga kirkio; undrar mic, at þer foraktit sva mióc vort biskopligt embætti oc konongdóm þinn; nú vil ec þat göra, sem ec em skylldr til, banna þer af Guds hálfo, oc hinns helga Olafs konongs, oc Petrs postola, oc allra heilagra manna, þetta óráð. Oo medan hann mællti þetta, stód hann retrr, oc sem hann retti hálsinn undir höggit, oc væri búinn, ef konongr reiddi ofan sverdit. Enn sva hefir Sigurdr prestr síðan sagt, er síðarr var biskop, at eigi þótti hönom himininn meiri enn kálf-skin, sva þótti hönom konongrinn ógrligr. Síðan geck konongr aptr inn í höllina, oc svaradi öngo; enn biskop fór aptr til sinna heimkynna, var þá sva blídr oc kátr, at hann kvaddi hvert barn hlæiandi, oc lek vit finger ser; þá spurdi Sigurdr prestr: hví þat sætti, oc mællti sva: þó ero þer nú kátir herra, kemur ydr eigi þat nú í hug, at konongr muni leggja reidi á ydr, oc man þat vænna ráð at leita undan? Þá mællti biskop: líkligra þicki mer þat, at hann muni eigi sva göra, enn hverr væri daud-daginn betri eða æskiligri, enn láta líf sitt fyrir Guds dyrd, eða deyia fyrir heilaga Christni oc eigit embætti, at banna þat er eigi er vit sæmandi, oc því em ec nú kátr, er ec hefi þat gört er ec átta. Því næst gerdiz þyss mikill í bænom, bióz konongr þá þadan strax eptir

Þetta, oc flutti med ser mikit korn oc mallt oc lunáng; hellt síðan súðr í Stafáng, oc efnar þar til veizlo, at láta sik þar samavígia við Cecelio. Oc er biskop spýrr þat, sá er þar red fyrir, hinn hann konong, oc spýrr ef þat er satt, at konongr ætli at qvangaz, at lifandi drottningonni? Konongr qvad sva vera. Biskop svarar: ef sva er, herra, þá mego þer síá, hversu miöc þat er hannat enom smærröm mönnöm; nú er þat eigi úlíklígt, at þer ætli yðr heimilla, er meira hafit valldit, at láta yðr slíka hluti sóma, enn þat er þa miöc í móti retto; oc veit eo eigi, hví þer vilit þat göra í voröm biskops-dómi, at vanvirda sva Guds böðord oe heilaga kirkio, oc varn biskops-dóm. Nú muno þer nockora stóra luti vilia tilleggia þessa stadar í fiárlutom, oc bæta sva vit Gud oc vit oss. Þá mælli konongr: tak þar fe vart, sem þú villt; furdo úlíkir urdo þer Magna biskopi, Geck konongr í brott, oc líkadi eigi. betr vit þenna, enn vit hinu er forbodit lagdi á. Eptir þat feck konongr þessar kono, oc hafði hana í miklöm kærleikom, oc unni mikit,

CAP. XL.

EFLDR KAUP-STADR Í KONONGA-HELLO.

Sigurðr konongr lét sva miöc efla kaupstadinn í Konongahello, at þá var cingi ríkarí í Noregí; sat

hann þar laungom til land-gætzlo. Hann let húsa konongs-gard í kastalanom, hann lagdi þat á öll heröd, þau er í nánd voro kaup-stadinom, oc sva bæiar-mennina, at á hveriom xij mánudom skyllði hverr madr ix vetra gamall eda ellri bera til kastalans v vapn-steina eda adra v staura, oc skyllði þá göra hvassa í annann enda, oc fimm álna háfa. Þar í kastalanom let Sigurdr konongr göra Kross-kirkio, hon var tre-kirkia, oc þó miök vöndot at efnom oc smíd. Þá er Sigurdr hafði konongr verit xxiv, var vígd Kross-kirkia. Þá let konongr þar vera Krossinn helga, oc marga adra helga dóma. Sú var köllot Kastala-kirkia. Þar setti hann fyrir há-alltara tabulam, er hann hafði göra látit í Gricklandi, oc var gör af eiri oc silfri, oc gyllt öll, oc fagrliga sett smelltom gimsteinom. Þar var oc skrin, er Eiríkr Eymuni Dana-konongr hafði sendt Sigurdi konongi, oc plenarium ritat gull-stöfom, er Patriarkinn hafði gefit Sigurdi konongi.

CAP. XLI.

ANDLÁT SIGURDAR KONONGS.

Þrim vetrom sídar er Kross-kirkia var vígd, þá er Sigurdr konongr var staddr í Vík austr, tók hann sótt; bádo þá vinir hans, at hann leti konona af hendi, oc hon síálf villði þá vitskiliaz, oc bad kon-

onginn þá í sóttinni at hon færi brott, oc þat mætti hönöm þá best gegna. Konongr segir: eigi kom mer þat í hug, at þú mundir fyrirláta mik sem adrir, oc sneriz frá henni, oc gerdi dreyr-raudan, enn hon geck í brott. Sækir hann nú sóttin, oc í þeirri sótt fær hann bana, oc var lík hans flutt til grafar í Oslo. Hann andadiz einni nótt eptir Mario-messo í fösto; hann var iardadr at Hallvardz kirkio, oc var lagdr í steinvegginn, utar frá körn-om enom sydra megin. Magnús son hanss var þar þá í bænöm, tók hann þegar allar fe-hirdzlor konongs, er Sigurdr konongr andadiz. Sigurdr var konongr yfir Noregi eptir dauda Magnusar konongs Berfætta, födur síns, vij vetr oc xx; hann var þá at alldri XL, oc var hanss ölld góð landz-folkino, var þá bædi ár oc fridr.

XIII.

SAGAN AF MAGNUSI KONONGI
BLINDA OC HARALLDI
KONONGI GILLA,

CAP. I.

MAGNÚS OC HARALLDR TIL KONONGA
TEKNIR.

Magnús son Sigurðar konongs var tekinn til konongs í Oslo yfir land allt, þegar eptir andlát hans, sva sem alþýða hafði svarið Sigurði konongi; giörduz þá þegar margir menn handgengnir hönom, oc sva lendir menn. Magnús var hveriom manni frídari, er þá var í Noregi; hann var madr skapstórr oc grimmr, atgerfi-madr mikill, enn vinsælld födur hanss heimti hann mest til alþýdo vinátto. Hann var dryckio-madr mikill, fegiarn, óþýdr oc ódæll. Haralldr Gilli var madr lettlátr, kátr oc leikinn, örr, sva at hann spardi eigi vit vini sína, oc manna ráðþægastr, sva at hann let adra ráða med ser öllo því er villdo. Slikt allt dró hann til vinsællda oc ordlofs, þydduz hann þá margir ríkismenn, öngom mun midr enn Magnús konong. Haralldr var þá í Túnsbergi, er hann spurði andlát Sigurðar konongs bróður síns. Atti hann þá stefnor

við vini sína, oc redo þeir þat af, at eiga hauga-
þing þar í bænom. Á því þingi var Haralldr til
konongs tekinn yfir hálfst land, voro þat þá kalla-
dir naudungar-eidar, er hann hafði svarit födur-
leifð sína af hendi ser. Tók Haralldr ser þá hird,
oc gördi lenda menn, oc dregz hönom brátt lid
öngom mun minna enn Magnúsi konongi. Fóro þá
menn milli þeirra, oc stód sva vii nætor. Enn
fyrir því at Magnús konongr feck lid mycklo min-
na, þá sá hann öngan sinn kost annan enn skipta
ríkino í helminga vit Haralld. Var þá skipt, at
hálfst ríki skyldi hafa hvarr vit annan, þat er Sig-
urdr konongr hafði haft. Enn skipa-stólinn oc
bordbúnat, oc görsimar, oc allt lausafe, þat er Sig-
urdr konongr hafði haft, hafði Magnús einn, oc
undi hann þó verr sínom luta. Oc redo þeir þó
landi nockora ríd í frídi, oc hugdo miók ser hva-
rir. Haralldr konongr gat son er Sigurdr het, vit
þóro dóttur Guttorms Grábarda. Haralldr kon-
ongr feck Ingirídar dóttur Rögnvalldz, hann var
son Inga konongs Steinkells-sonar Svía-konongs.
Magnús konongr átti Christino dóttur Knútz Lá-
vardar, systor Valldamars Dana-konongs. Mag-
nús konongr vard henni eigi unnandi, oc sendi
hana sudr aptr til Danmerkr, oc geck hönom allt
síðan þyngra, feck hann úþocka mikinn af frænd-
om hennar.

CAP. II.

FRÁ HER HARALLDZ OC MAGNUSAR
KONONGA.

Þá er þeir frændor höfðo tveir konongar verit iij vetor yfir Noregi, Haralldr oc Magnús, sátu þeir inn síórda vetr bádir norðr í kaupáangi, oc veitti hvarr ödrom heimboð; oc var þó æ vit bardaga búit með lidino. Enn at vári sækir Magnús konongr með skipa-lidino suðr fyrir land, oc dró lid at ser or hverio fylki, allt þat er hann feck, oc leitadi þá þess vit vini sína, ef þeir vilia fá hönom styrk til þess, at taka Haralldr af konong-dómi, oc midla hönom slíkt af ríki, sem hönom syndiz, tíárr þat fyrir þeim, at Haralldr hafði fyrr svarit ríki af hendi ser. Feck Magnús konongr til þessa samþycki margra ríkis-manna. Fór Haralldr konongr þá um várit til Upplanda, oc et efra austr til Víkur; dró hann oc lid at ser, þá er hann spurdi til Magnúss konongs; oc hvar sem þeir fóro, hioggo hvarir bú fyrir ödrom, oc sva drápoz þeir menn fyrir. Magnús konongr var myklo fiöl-mennari, þvíat hann hafði haft allan þorra landz til lids-safnadar. Haralldr var í Víkinni austan-fjarðar, oc dró lid at ser, oc tóko þá hvarir fyrir ödrom bædi menn oc fe. Þar var þá með Haralldi konongi Kríströðr bróðir hanns sam-mæðri,

oc margir adrir lendir menn; enn þó voro myklo fleiri með Magnúsi konungi. Haralldr konongr var með lid sitt, þar sem heitir Fors á Ranríki, oc fór þadan út til sævar. Lafrantz-vöko aptan mötuduz þeir oc voro at náttverdi þar sem heitir Fyrileif; enn vard-menn helldo hestvörd alla vega frá bænom, oc þá verda vard-menn varir vit lid Magnúss konongs, at þeir fóro at bænom; oc hafði Magnús konongr nærr lx hundrút manna, enn Haralldr konongr hafði xv hundrút manna. Þá komo vard-menn er báro niósnina Haralldi konungi, oc segia at lid Magnúss konongs var þá komit miöc at bænom. Konongr svarar: hvat mun Magnús konongr Sigurdar-son frændi vilia? eigi mun þat, at hann muni vilia beriaz vit mik. Þá svarar Þióstolfr Alason: sva muno þer herra verda at göra ráð fyrir ydor oc lidi ydro, sem Magnús konongr muni hafa her til þess samandregit í allt sumar, at hann mun ætla at beriaz, þegar er hann finnr ydor. Þá stóð Haralldr konongr upp, oc bad menn sína þá taka vapn sín, scolom vit beriaz, ef Magnús konongr frændi minn vill beriaz. Þar næst var blásit, oc geek allt lid Haralldz konongs út frá bænom í akr-gerdi nockort, oc setto þar upp merki sín. Haralldr konongr hafði ij hrínga-brynior, enn Christrödr bródir hanns hafði öngva brynio; er kalladr var hinn braustasti madr. Þá

er Magnús konongr oc hanns menn sá lid Haralldz konongs, þá fylkdo þeir lidi síno, oc gördó sva lánga fylking, at þeir skylldo kringia allt um lid Haralldz konongs. Sva segir Halldorr Skvalldri:

Magnús feek þar er myklo
margr gengis naut hann lengri
valr nam völl at hylia
varmr fylkingar arma.

CAP. III.

ORROSTA Á FYRILEIF.

Magnús konongr let hera fyrir ser krossinn helga í orrosto þessi, vard þar orrosta mikil oc hörd. Kríströdr konongs-bródir hafdi gengit með sína sveit í midia fylking Magnúss konongs, oc hió til beggia handa, oc stucko fyrir hönom menn tveggja vegna. Enn einhverr bóndi ríkr, sá er verit hafdi í lidi Haralldz konongs, var staddr á bak Kríströdi; hann reiddi upp kesiona tveim höndom, oc lagdi í gegnom herdarnar oc kom fram um brjóstit, oc fell þar Kríströdr. Þá mællto margir er hiá stódo: hví hann færir sva, oc gördi þetta it illa verk. Bóndi svarar: nú veit hann þat, er þeir hiöggo bú mitt í sumar, oc tóko allt þat er heima var, enn hófdo mik naudugan í her með ser, hugda ek
hön-

hönom þá slíkan, ef ek fenga færi á. Eptir þat kom flótti í lid Haralldz konongs, oc flydi hann siálfr oc allt lid hanss. Mart fell af lidi Haralldz konongs; þar feck bana-sár Ingimarr af Aski Sveinson, höfðingi mikill oc lendr madr. Þá kvad hann þetta:

Flögd hvötto mik
til Fyrileifar
æ var ek ófúss
til orrosto.
Mik bito örvar
af álmboga
man ek alldregi
á Ask komá.

Þar fello oc nær lx hirdmanna Haralldz konongs; hann flydi þá austr í Vík til skipa sinna, oc fór or landi þegar á fund Eiríks konongs til Danmar-
kar. Sva segir Halldor Skvalldri:

Hard-ela lezto herdir
haddings á ió tradda
gladr tok gramr vit haudri
grund til Eiríks fundar.
Feck sá er fremstr var myklo
fliót-mælltr konongr Jóta
red Hollseto hrædir
hraust gengi þer drengia.

Sva segir Einarr Skúla-son:

Sótti á slett
seids hryn leidar
iörd elld skerdir
úngr Skánunga.
Fann fiöl-nennin
freks landreka
gífr skæ: göfugr
gran-rióðr Dana.

Haralldr konongr sótti Eirík Eimuna Dana-konong at trausti, þeir fundoz sudr á Smálandi. Eiríkr konongr tók vel vit hönom, oc mest fyrir því, at þeir höfðo svariz í brædra-lag. Hann veitti Haralldi konongi at veizlo oc yfir-ferd Halland, oc gaf hönom viij lángskip reidalaus. Eptir þat fór Haralldr konongr norðr um Halland, oc kom þá mart Nordmanna þar til mótz vit hann. Magnús konongr lagdi undir sik land allt eptir orrosto þessa; grid gaf haun öllum mönnom þeim er sárir voro, oc let græða sem sína menn, oc kalladi ser þá landit allt; hann hafði þá allt it bezta mann-val er í var landino. Enn er þeir redo rádom sínom, þá villdi Sigurðr Sigurdarson oc Þorir Ingiríðarson oc allir hinir vitrosto menn at þeir helldi flockinom í Víkinni, oc bidi þar, ef Haralldr leitadi sunnan. Enn Magnús konongr tók hitt med einræði síno, at hann fór norðr til Biörgyniar, oc settiz þar um

vetrinn, oc let lidit allt fara frá ser, enn lenda menn til búa sinna.

CAP. IV.

DAUDI ÁSBIARNAR OC NEREIDS.

Haralldr konongr kom til Konongahello med lid þat er hönom hafdi fylgt or Danmörko. Þá höfdo safnat fyrir lendir-menn oc bæiar-menn oe setto digra fylking upp frá bænom. Enn Haralldr konongr geck af skipom sínom, oc gördi menn til bónda-lids, oc beiddi af þeim, at þeir verdi hönom eigi vígi land hanns, oc letz eigi myndo meira beidaz, enn hann átti at retto at hafa, oc fóro menn í milli; oe of sídir gáfo bændor upp safnadinn, oc gengo til handa Haralldi konongi; veitti hann þá til lids ser len oc veizlor lendum mönnom, enn bændom rettar-bætor, þeim er í lid sneroz med hönom. Eptir þat safnadiz mikit folk til Haralldz konongs, fór hann þá austan of vikina, oc gaf góðan frid öllum mönnom, nema menn Magnúss konongs, þá let hann ræna eda drepa, hvar sem hann stóð þá. Oc er hann kom austan til Sarpsborgar tók hann þar höndum ij lenda menn Magnuss konongs, Asbiörn oc Nereid bróðr hanns, oc baud þeim kost at annarr skyllði hánga, en ödrom steypa í forsinn Sarp, oc bad þá kiósazc at. Asbiörn kaus at fara í Sarp, því at hann var ellri,

enn sá þótti daudinn enn grimmligri, oc var sva gört. Þess getr Halldórr Skvalldri:

Asbiörn vard sá er ordom
illa hellt vit stilli
gramr sædir val víða
vígs í Sarp at stíga.
Nereid let gramr á grimman
grand-meid Sigars fianda
húss-þínga gallt hengia
brann-báls glötudr mála.

Eptir þat fór Haralldr konongr norðr til Tunsbergs, oc var þar vel vit hönom tekit, safnadiz oc þar til hanns her mikill.

C A P. V.

RÁÐA-GERD.

Magnús konongr sat í Biörgun oc spyr þessi tíðindi; let hann þá kalla á tal vit sic alla höfðingia þá er voro í hönom, oc spyr ráðs, hvernug með skal fara. Þá svarar Sigurdr Sigurdarson: her kann ec gott ráð til at leggja, láti þer skipa skúto með gódom drengiom, oc fá til at styra mik eða annan lendann mann, at fara á fund Haralldz konongs frænda þíns, oc bióða hönom sættir, eptir því sem rettlátir menn göra yckar í milli, þeir sem ero í landino, oc bióðit at hann hafi ríki hálf vid yðor, oc þickir mer líkligt vit orða-fulltingi góðra manna,

at Haralldr konongr þeckiz þetta bod, oc verdi þá sættir milli ydar. Þá svaradi Magnús konongr: eigi vil ec þenna kost, eda hvat stodar þá þat, er ver unnom allt ríkit undir oss í sumar, ef ver skulom nú midla helming af; oc gefit þár til annat ráð. Þá svarar Sigurdr Sigurdarson: sva syniz mér, her-ra, sem lendir-menn þínir setiz nú heima, oc vili eigi koma til þín, þeir er í haust báðo þík heim-leyfis; giördir þú þá miök í móti mínom ráðom, er þú dreifdir þá sva miök því fiölmenni er ver höfdom; því ek þóttumz vita, at þeir Haralldr konongr mundo leita aptr í Víkina, þegar er þeir spyrdi at þar væri höfðingia-laust. Nú er þat annat ráð, oc er þat illt, oc kann þó vera at hlydi: gör til gesti þína oc annat lid með þeim, lát fara heim at þeim lendum-mönnum oc drepa þá, er nú vilia eigi undirvíkiaz naudsyn þína, enn gefid eiginir þeirra þeim nockurom er nú vilia ydur lid veita, þó at ádr se eigi mikils virdir; látid þá keira upp fólkit, haf eigi síður illa menn enn góða, farit síðan austr í móti Haralldi konongi með þat lid er þer fát, oc berizc. Konongr svarar: óvin-sællt mun þat verða at láta drepa mart stór-menni, enn hafia upp lítill-menni, hafa þeir opt eigi síður brugðize, enn verr skipat landit; vil ec enn heyra fleiri ráð þín. Sigurdr svarar: vandaz mér nú ráða-görðin, er þer vilit eigi sættaz oc eigi beriaz;

förom ver þá norðr til Þrándheims, þannug er landz-megin er mest fyrir oss, oc tókum lid þat allt upp um leid, er ver fám; kann vera þá at þeim Elfargrímom leidiz at rekaz eptir oss. Konongr svarar; eigi man ec nú flyia fyrir þeim, er ver elltom í sumar; oc rád þú mér betra rád. Þá stóð Sigurðr upp, oc bióze til brottgöngo oc mællti: ec skal þá nú ráða þer þat rád, er ec se at þer vilit hafa, oc framgengt mun verða: sit her í Biörgun, þar til er Haralldr konongr kemr med múga hers, oc munut þá annathvart verða at þola bana eda skömm. Oc var Sigurðr eigi lengr at þessari stefno.

CAP. VI.

FRÁ LIDI HARALLDZ KONONGS.

Haralldr konongr fór austan med landí, oc hafði all-mikinn her, var þessi vetr kalladr múga-vefr. Haralldr konongr kom til Biörguniar ióla-aþtan, oc lagði lidino í Flórovaga, oc villdi eigi beriaz um iólin fyrir helgi sakir. Enn Magnús konongr let búaz vidr í bænom. Hann let reisa valslöngo út í hólmi, oc hann let göra iáru-rekendur, enu sumt af vidom, oc leggja um þverann vaginn yfir frá konongs-bryggio til Nordness, oc til Múnka-bryggio. Hann let slá her-spora, oc kasta nidr yfir á Jonsvöllum, oc eigi meir enn iij daga var

heilagt halldit um jólin, at eigi veri smídat. Enn affara-dag jólanna þá let Haralldr konongr blása til bæiarins öllo lidino: nær 1x hundrot manna höfdo safnaz til Haralldz konongs um Jólin.

CAP. VII.

TEKINN MAGNÚS KONONGR.

Haralldr konongr het á hinn helga Olaf konong til sigurs, ser, at láta göra Olafs-kirkio þar í bæn-om, med sínom eins kostnadi. Magnús konongr setti fylking sína út í kristz-kirkio gardi, enn Haralldr konongr lagdi fyrst at Nordnesi. Enn er þeir Magnús konongr sá þat, snero þeir þá inn eptir í bæinn, oc inn í vags-hotu. Enn er þeir fóro inn um strætít, þá hliópo margir bæiar-menn inn í garda sína oc til heimilis síns, enn þeir er yfir gengo á völlona, liópo á her-sporana. Þá sá þeir Magnús konongr, at Haralldr konongr hafdi róit öllo lidino yfir í Hegravík, oc gengo þeir þar upp, oc sva it efra upp á backann fyrí ofan bæinn; þá sneri Magnús konongr út eptir stræti, flydi þá lidit frá hönom víds-vegar, sumt í fiall upp, sumt upp um Nunno-setr, sumt í kirkior, eda falz í ödrom stödom. Magnús konongr flydi þá út á skip sitt, enn þeim var engi kostur at komaz brott, þvíat iárn-rekendurnir gætto fyrir utan. Fylgdi hönom

oc fátt manna, voro þeir fyrir því einkis færir.
Sva segir Einarr Skúlason í Haralldz-drápo:

Luko vag viko
vara kostr fara
bryns Biörgynar
braut há-skrautom.

Litlo sídar þá komo menn Haralldz konongs út á skipin, var þá hand-tekinn Magnús konongr; hann sat aptr í fyrir-rúmi á hásetis-kistinni, oc med hönom Hákon Faukr, módur-bródir hanss, hinn mannvænsti madr, enn kalladr eigi vitr, oc Ivarr Özurarson, oc margir adrir vinir hanss voro þá handteknir, enn sumir voro þegar drepnir.

CAP. VIII.

MEIDDR MAGNUS KONUNGR.

Haralldr konongr átti þá stefnor vit ráða-neyti sitt, oc beiddi þá ráða-gördar med ser, oc at lykdom þeirrar stefno fengoz þeir orskurdir, at taka Magnús sva frá ríki, at hann mætti eigi kallaz konongr þadan í frá. Var hann þá seldr í hendor konongs-þrælom, enn þeir veitto hönom meizlor, stúngo út augun bædi, oc hiöggo af hönom annan fót, enn sídarst var hann gelldr. Ivarr Auzurarson var blindadr, enn Hákon Faukr drepinn. Eptir þetta lagdiz land allt undir ríki Haralldz kon-

ongs. Giördiz þá miök eptir-leit, hverir mestir hefði verit vinir Magnúsar konongs, eda hverir mest mundi víta fe-hirdzlor hanns eda görsimar. Krossinn helga hafði Magnús konongr haft með ser, síðan er Fyrizleifar orrosta hafði verit, oc villdi hann þá eigi til segia, hvar hann var þá nidr-kominn. Reinhalldr Biskop í Stafángri var Enskr, oc kalladr miök segiárn; hann var kærri vinr Magnúss konongs, oc þótti mönnum þat líkligt, at hönom mundi vera fengin fein til vardveizlo, stórfe oc dyrgripir; voro menn sendir eptir hönom oc kom hann til Biörgynar, váro þá kensl þessi borin á hann, enn hann synniadi þverliga, oc villdi ei vitganga, oc baud fram skírslor fyrir sik. Haralldr konongr villdi eigi þat, oc lagdi á Biskop fe-gialld, at gjallda ser xv merkor gullz. Biskop qvadz eigi sva vilia vesla Stad sinn, oc vill helldr hætta lífi síno. Síðan hengdo þeir Reinhalld biskop út í Hólmi vit valslöngona. Enn er hann geck til gál-gans, hristi hann bótann at fæti ser, oc mællti, oc svardi um: eigi veit ec meira fe Magnúss konongs, enn þat sem þar er í bótanom; þar var í einn gull-hríngr. Reinhalldr biskop var iardadr í Nordnesi at Mikíals-kirkio, oc váro þessi verk miök löstot. Síðan var Haralldr Gilli einn konongr yfir Noregi medan hann lifdi.

CAP. IX.

UNDUR Í KONONGA-HELLO.

Fímm vetrom eptir andlát Sigurðar konongs urdo tíðindi mikil í Kononga-hello. Þeir voro þar þá syslomenn Guthormr, sonr Haralldz Flettis, oc Sæmundr Hús-freyia. Hann átti Ingibiörgo dóttur Andreas prestz Brunssonar. Þeirra synir váro þeir Páll Flípr oc Gunni Fis. Asmundr het son Sæmundar laungetinn. Andreas Brunsson var allmikill merkis-madr, hann saung at Cross-kirkio; Solveig het kona hanns. Med þeim var þá at fóstri oc uppfæzlo Jon Loptzson, oc var þá xi vetra gámall. Loptr prestr Sæmundarson, fadir Jons, var þá oc þar. Dóttir Andreas prestz oc Solveigar het Helga önnor er Einar átti. Þat barsk at í Kononga-hello drottins nótt hina næsto eptir Páskaviko, at gnyrr vard mikill á strætum úti of allan bæinn, sem þá er konongr fór med alla hird sína, oc hundar leto sva illa, at eigi mátti vardveita þá, oc brutoz út. Eunn allir er út komo, urdo galnir, oc bito þat er fyrir vard, menn eda fenad; eunn allt þat er bitit vard, oc blód kom út á, þá ærdiz, oc allt þat er hafanda var, þá let burd sinn oc ærdiz. Þessi minning var nálíga hveria nótt frá Páskom oc til Uppstigningardags. Mennirnir óttuduz miök undur þessi, oc redo margir í brott,

oc selldo garda oc fóro í heröd, eda í adra kaupstadi; oc þótti þeim öllom þetta mest verdt, er vitrastir voro, oc hræddoz þat, oc sögdo sem var, at þetta mundi vera fyrir stór-tíðindom miklom, þeim er þá voro enn eigi fram-komin. Enn Andreas prestr taladi þá langt oc sniallt Hvítasunnodag, oc veik hann sva til lykda rædo'sinni, at hann ræddi um vanda byarmanna, oc bad menn herda hugi sína, oc eyda eigi þann enn dyrliga stad, hafa helldr gæzlo yfir ser, oc ætla ráð sitt, oc gæta sín við öllu því er við mætti komas, vit elldi eða ófrídi, oc bidia ser miskunar til Guds.

CAP. X.

UPPHAF ORROSTO Í KONONGA-HELLO.

Or bænom biuggoz xiii byrðingar, oc ætludo til Biörguniar, oc tyndoz xi, með mönnom oc fe, oc öllu því er á var, enn hinn xii braut, oc helldoz mennirnir, enn fe tyndiz. Þá fór Loptr prestr norðr til Biörgunar með allt sitt, oc hellt hann heilo öllu. Lafrantz-vöko dag tynduz byrðingar. Eiríkr Eymuni Dana-konongr oc Auzurr erkibiskop sendo ord bádir til Kononga-hello, oc bádo þá varaz um stad sinn, sögdo at Vindor höfdo her mikinn úti, oc heriodo víða á kristna menn, oc höfdo íafnan sigr. Bæiar-menn lögdo óslítinn hug á sitt

mál, afrækdur og ómintur þess at meir, er lengra leid frá þeirri ógn er yfir þá hafði komit. Lafrantz-vöko dag þá er talat var fyrir há-messo, kom Rettiburr Vinda-konongr til Kononga-hello, og hafði hálfst þridia hundrat vinda-sneckior, enn á hverri sneekionni voro menn XLIII, og hestar ij. Dunimiz het systor-son konongs, enn Unniburr het höfðingi einn, er red fyrir miklo lidi. Þeir ij höfðingar röro upp með öllum her í seinu eptir eystri kvísl, upp um Hísing, og komo sva ofan at bænom, enn sumo lidino lögdo þeir upp í vestri kvísl til bæarins. Þeir lögdo at landi út vit stikin, og leto þar upp hesta sína, og reid þat lid et efra of Bratzás, og ridu sva upp um bæinn. Einar mágr Andreas prestz bar þessi tíðindi upp til Kastala-kirkio, þvíat þar var þá bæiar-lydrinn, og hafði þannig sótt til há-messo. Og kom Einarr þá er Andreas prestr taladi, og sagdi mönnum at her fór at bænom með fiöllda her-skipa, enn sumt lid reid ofan um Bratzás. Þá mællto margir at þat mundi vera Eiríkr Dana-konongr, og vænto menn ser grida af hönom. Lióp þá fólkit allt ofan í bæinn til fiár síns, og vapnadiz og geck ofan á bryggior, og sá þeir þegar, at þetta var ófridr, og óflyandi her. Austr-fara skip ix flutu í ánni fyrir bryggjom, er kaupmenn átto. Vindur lögdo þar fyrst at, og bördoz vit kaupmennina. Kaupmenn tóko vel vit,

vapnuduz, oc vörduz lengi vel oc drengiliga. Vard þar orrosta hörd oc vidrtaka ádr kaupskipin yrðu hroðin. Í þeirri hríd leto Vindor hálfst annat hundrat skipa at öllu lidino. Þá er bardaginn var sem mestr, stóðu bæiarmenn á bryggíonom, oc skuto á heidingia. Enn er orrosta renadi, þá flyðu bæiarmenn upp í bæinn, oc síðan í kastala, oc höfðu allir menn með sér dyr-gripi sína, oc allt fe þat er með mátti komazc. Solveig oc dætor hennar, oc ij konor adrar gengo upp á lánd. Þá er Vindor háfðu unnit kaupskipin, þá gengo þeir á land, oc könnuðu lid sitt, oc birtiz þá skadi þeirra. Þá liópo þeir sumir í bæinn, enn sumir á kaupskipin, oc tóko fe þat allt, er þeir villdu með sér hafa. Því næst lögðu þeir elld í bæinn, oc brendu hann allan, oc sva skipin. Eptir þat sóttu þeir öllu lidino at kastalanom, oc skipuðoz til atsóknar.

CAP. XI.

ÖNNOR ORROSTA.

Rettibur konongr let bióða þeim er í kastalanom voro, at ganga út, oc hafa lífs grid með vapnom oc klædom, oc gulli oc silfri; enn allir æpðu á móti, oc gengo út á borgina, sumir skuto, sumir grytto, sumir köstundu staurom. Oc var þat mikil orrosta, fell mart af hvarom-tveggjom, enn myklo

fleira af Vindom. Sólveig kom upp á bæ þann er heita Sólbiargir, oc sagdi þar tíðindin. Þá var skorin upp herör oc send til Skúrhaga, þar var samburðar-öl nockvat, oc mart manna. Þar var sá bondi er het Aulver Mikli-mudr, hann lióp upp þegar, oc tók skiölld sinn oc hiálm, oc öxi mikla í adra hönd ser, oc mælti: standit upp, gódir dren-gir, oc takit vapn ydar, oc förom til lidveizlo vit hæiarmenn, þvíat þat mun skömm þickia hveriom manni er þat spyr, at ver sitiom her oc kylum öl, enn gódir drengir látiz í bænom fyrir varar sakir. Margir svörudo oc mællto móti, sögdo þeir mundo tyna ser, enn koma bæiar-mönnom at öngo lidi. Þá lióp Aulver upp oc mælti: þó at allir þer dveliz eptir adrir, þá skal ec þó einnsaman fara, oc láta skulo heidingiar 1 eda ij fyrir mik, ádr enn ec falla; hleypr síðan ofan til bæiarins, enn meun nockorir fóro eptir hönom, oc villdo síá ferd hauns, oc sva víta, ef hönom mætti nockot vithiálpa. Enn er hann kom sva nærr kastalanom, at heidnir menn máttu síá hann, þá liópo móti hönom viij meun alvavnadir. Enn er þeir mættuz, liópo heidnir menn umhverfis hann. Aulver reiddi upp öxina, oc laust fremri hyrno undir kverk þeim er á bak hönom stód, sva at í sundr sneid kiálka-na oc barkann, oc fell sá opinn á bak aptr. Þá reiddi hann fram öxina fyrir sik, oc höggv annan

í höfudit, oc klauf þann í herdar nidr. Síðan sötuz þeir á, oc drap hann þá enn ij, oc vard siálfr sárr miök. Enn þeir iiij, er eptir voro, flydo þá, enn Aulver rann eptir þeim; diki nockot var fyrir þeim, oc liópo þar í ij hinir heidno, oc drap Aulver þá báða, stód hann þá oc fastr í dikino; enn ij heidnir komoz undan af þeim átta. Enn þeir menn er fylgt höfdo Aulvi, tóko hann, oc flutto aptr med ser til Skúrhaga, oc vard hann græddr at heilo; oc er þat mál manna, at eigi hafi einn madr drengiligri ferd farit. Lendir menn ij, Sigurdr Gyrdarson, bródir Philippus, oc Sigardr komo vid vı hundrot manna til Skúrhaga, oc hvarf Sigurdr aptr med iiij hundrot manna, oc þótti síðan lítills-verdr, oc lifdi skamma stund; enn Sigardr fór med cc. manna til bæiarins, oc bardiz þar vid heidna menn, oc fell þar med öllo lidi síno. Vindor sótto kastalann, enn konongr þeirra oc höfdingiar voro fyrir utan bardagann. I einhveriom stad hiá Vindom var einn sá madr, er skaut af boga, oc drap mann til bana af hverri aur, enn ij menn stódo fyrir hönom med skiölldom, oc hlífdo hönom. Þá mællti Sæmundr Húsfreyja vit Asmundson sinn, at þeir skylldo skióta at skytanom bádir senn, enn ec mun skióta at þeim er skiölldinn ber fyrir hönom; hann görði sva, enn sá skaut skilld-inom nidr fyrir sik; þá skaut Asmundr milli skiall-

danna, oc kom örin í enni skytanom, sva at út kom um hnackann, oc fell sá daudr á bak aptr. Enn er Vindor sá þat, yldo þeir allir sem hundar eda vargar. Þá let Rettibur konongr kalla til þeirra, oc baud þeim enn grid; enn þeir neitto því. Síðan veitto þeir heidingiar þa enn harda atsókn. Þá var sá enn einn af heidnom mönnom, er sva diarfliga bardiz, oc sva nær geek, at hann komz allt at kastala-hurdinni, oc lagdi sverdi þann mann er fyrir innan stóð hurdina, enn menn báro at hönom skot oc spiót, oc hann var hlífðar-lauss, þá beit eigi; var hann sva fiölkunnigr, at ecki vapn festi á hönom. Þá tók Andreas prestr vígðan elld, oc blezadi, oc skar í tundr, oc lagdi í elldinn, oc setti á örvar-odd tundrit, oc feck Asmundi; þessi öro skaut hann at hinom fiöl-kunnuga manni, oc beit þetta skot sva, at hönom vanz at fullo, oc fell hann nidr. Þá leto heidingiar illiliga enn sem fyrr, yldo oc gnysto, oc fóro allir til konongs þeirra, þótti kristnom mönnom sem þá væri von til ráds, at þeir mundi fráhverfa. Þá skilldi túlkr sá er kunni vindversko, hvat höfðingi sá mælli, er Unniburr het; hann sagði sva: þetta fólkr er atallt oc illt vidskiptis, oc tótt ver takim allt se þat er í stadnom er, þá mætto ver tilgefa annat se iamn-mikit, at ver hefðim eigi her komit, sva

höfom

höfom ver her mikit lid látit, oc marga höfðingia. Fyrst í dag er ver tókom at beriaz vit kastalann, þá höfðo þeir fyrst til varnar skot oc spiót, því næst börðo þeir oss med grióti, enn nú beria þeir oss med kefli-völom sem hunda; enn se ec fyrir því, at þeirra faung þverra til varnar, oc skulom ver enn göra þeim harda hríd, oc freistom þeirra enn. Enn sva var sem hann sagdi, at þá skuto þeir staurom, enn í fyrsto hríd höfðo þeir borit óvarliga skot-vapn sín oc griót; enn er kristnir menn sá at minkadiz fiöldi af staurinnom, hiöggo þeir í tvau hvern staurinn. Enn heidingiar sótto þá med hinom mesta ákafa, oc hvílduz í milli; görðoz nú hvarir-tveggio miök módir oc sárir. Oc í einni-hverri hvíld, þá let Rettibur Vinda-konougr enn bióða þeim grid, oc at þeir skyllðo hafa vapn sín oc klædi, oc þat er þeir gæti siálfir bórít út or kastalanom. Þá var fallinn Sæmundr Húsfreyia, oc var þat þá ráð manna, þeirra er eptir voro, at gefa upp kastalann oc siálfa sik í valld heidinna manna, oc var þat it ósniallasta ráð, fyrir því at heidingiar efndo eingi ord sín, oc tóko alla menn, kalla oc konor oc börn, oc drápo allt þat er sárt var oc úngt, oc þeim þótti íllt med ser at flytia; þeir tóko allt fe þat er var í kastalanom, þeir gengo inn í Kross-kirkio, oc rænto hana at öllo skrúdi

hennar. Andreas prestur gaf Rettibur konungi refdi silfr-búit og gyllt, enn Dunimiz systor-syni hanns fingurgull; fyrir því þóttuz þeir vita, at hann mundi vera ráða-madr nockr í stadinom, og virðo hann meira enn adra menn; þeir þóko krossinn helga og höfdo brott; þeir tóko og tabulam er stóð fyrir alttarino, þá er Sigurdr konngr hafði góra látit í Gricklandi og haft í land, þeir lögdo hana nidr flata á graduna fyrir alttarit. Eptir þat gengu heidingiar út af kirkionni. Þá mællti Rettibur konngr: þetta hús hefir fyrr buit verit með ást mikilli vit þann gud er húsit á; enn sva lítz mer nú sem lítt muni gætt hafa varit til stadarins eda hússins, því at ec se at gudinn er reidr ordinn þeim er vardveita. Rettibur konngr gaf Andreas presti kirkiona og skrínit og krossinn helga, bókina, plenarium, og klerka iiij. Enn heidnir menn brendo þó kastala-kirkiona, og húsin öll þau er þar voro í kastalanom. Enn sá elldrinn, er þeir höfdo tendrat í kyrkionni, slöknadi tysvar, þá hiuggo þeir ofan kirkiona, og tók þá at lögá innan öll, og brann sem önnor hús. Þá fóro heidnir menn til skipa sinna með herfángit, og könnudo þá lid sitt, enn er þeir sá skada sinn, þá tóko þeir at herfángi allt folkit, og skipto milli skipanna. Þá fóro þeir Andreas prestur á konongs-skipit með krossinn helga; þá kom ótti mikill yfir heidingia, af þeirri bending.

er yfir konungs-skipit kom; þat var hiti sva mikill, at allir þeir þóttuz nær brenna. Konongr bad túlkinn spyria prestinn, hví sva vard; hann sagdi: at almáttkr Gud, sá er kristnir menn trúdo á, sendi þeim mark reidi sinnar, er þeir dirfdoz þess, at hafa med höndom hanss þíslar-mark, er eigi vilia trúa á skapara sinn; oc sva mikill kraptr fylgir krossinom, at opt hafa ordit fyrr þvílíkar iartegnir yfir heidnom mönnom, þá er þeir höfdo hann med höndom, ok sumar enn berari. Konongr let skióta kennimönnom á skip-bátinn, oc bar Andreas prestr krossinn helga í fángi ser. Þeir leiddo bátinn fram med endilöngo skipino, oc fram fyrir bardit, oc aptr med ödro bordi til lyptingar, skuto sídan vit forkom oc hrundo bátinom inn at bryggiom. Sídan fór Andreas prestr um nóttina med krossinn til Sólbiarga, oc var bædi regn oc rotavegr, oc flutti hann þadan til góðrar gæzlo. Rettibur konongr oc hanss lid, þat er eptir var, fór brott oc aptr til Vindlandz, oc mart þat fólk er tekit hafði verit í Kononga-hello var lengi sídan í Vindlandi í þián, eun þeir er út voro leystir, oc aptr komo í Noreg til ódala sinna, urdo allir at minna þrifnadi enn ádr. Kaupstadrinn í kononga-hello hefir allðri fengit uppreist sídan, slíka sem ádr hafði hann.

CAP. XII.

FRÁ MAGNÚSI BLINDA.

Magnús konongr, er blindadr hafdi verit, fór síðan norðr í Nidarós, oc gaf sik til klaustrs í Hólmi, ok tók vit múnka-klædom. Þá var þannug skeytt Hernes mikla á frosto í provendo hanns. Enn Haralldr konongr reð þá einn landi eptir um vetrinn, oc gaf öllum mönnom sættir, er hafa villdo; tók hann þá marga menn til hird-vistar er verit höfdo med Magnúsi konungi. Einnarr prestur Skúlason segir sva, at Haralldr konongr átti ij orrostor í Danmörko, adra vit Hvedn, enn adra vit Hlesey:

Otryggom let eggjar
eliun-þrárr und hárrí
Hvedn á hölldom roðnar
hrafns munn-litadr þunnar.

Oc enn þetta:

Átti sókn vid sletta
serk-rióðr hárs merki
harda þar er hregg of virdom
Hles-eyar þröm bleso.

Haralldr konongr Gilli var allra manna milldastr. Þat er sagt, at á hanns dögom kom af Islandi til biscops-vígslo Magnús Einarsson, oc var konongr ágætliga vel til hanns, oc veitti hanom mikinn sóma. Enn er biskop var útbúinn hingat, oc skipit

alþúit, geck hann í höllina er konongr drack, oc kvaddi hann dyrliga, oc fagnadi hönom; konongr tók vit hönom blidliga. Drottning sat hiá kononginom. Þá mællti konongr: herra biskop, ero þer nú búnir til brottferdar? hann qvad sva vera. Konongr mællti: eigi hittir þú nú í tíma til, er þer komut sva, at bordin voro uppi; nu er eigi til at gefa ydor sva virduðligt sem skyldi; eða hvat er til at gefa biskopi? Fe-birdirinn svarar: herra, upp ætlom ver nú gefnar geyrsimar. Konongr mællti: til er bord-kerit herna, þigg þat biskop, fe er her í. Enn biskop þackadi hönom sinn sóma. Þá mællti drottning: far heill oc sæll herra biskop! Konongr mællti til hennar: far heill oc sæll herra biskop, hveria heyrdir þú göfga kono slíkt mæla vit biskop sinn, oc gefa hönom eigi? Hon svarar: hvat er nú til, herra? Konongr mællti: til er hægindit undir þer. Síðan var þat tekit, oc var skorit um pell, oc var þat inn dyrligsti lutr. Oc er biskop veik í brott, þá let konongr taka undan ser hægindit, oc mællti: lengi hafa þau saman verit. Síðan for biskop á brott, oc kom út til Islandz til stóls síns, oc var þá rætt um hvat af bórd-kerino skyldi göra, þess er konongi gegndi bezt. Spurdi biskop ráðs eptir, oc mællto margir at selia skyldi, oc gefa síðan verdit fátækom mönnom. Þá mællti biskop: annat ráð vil ec taka; göra skal af kalek

her á stadinom, oc vil ec sva mæla fyrir, at þer hinir helgo menn allir, er her er af helgr dómr í þessi enni helgo kirkio, leti hann hvert sinn nióta, er yfir hönom er messa súngin. Oc sá kalekr er þar sídan at stadnom í Skálholhti. Enn af pellunom, er yfir voro dregin hægindin, er konongr gaf hönom, ero nú görvar fyrirsöngs-kápor, er þar í Skálholhti ero. I þessom lut má marka stórlyndi Haralldz konongs, oc mörgo ödro, þó at her se fátt af ritat. Haralldr konongr tók þóro dóltur Guthorms Grábarda, oc lagdi hana hiá ser, oc átto þau son er Sigurdr het. Son átti hann oc vit Ingirídi drottningo, er Ingi het. Dóttir Haralldz konongs het Brigitt, önnor Maria. Brigittu dóttur hanns átti fyrst Ingi Hallsteinsson Svía-konongr, sídan Magnús Heinreksson, sídarst Birgir Brosa.

CAP. XIII.

UPPHAF SIGURDAR SLEMBI-DIAKN.

Sigurdr er madr nefndr, er upp fæddiz í Noregi, hann var kalladr son Adalbrictz prestz. Módir Sigurdar var þóro, dóttir Saxa or Vík, systir Sigrídar, modur þeirra Olafs konongs Magnússonar oc Kára konongs-bróður, er átti Borghilldi, dóttur Dags Eilífssonar. Synir þeirra voro þeir Sigurdr á Austrátt oc Dagr. Synir Sigurdar varo þeir Jon á Austrátt,

oc Þórsteinn oc Andreas dauði. Jön átti Sigríði, systur Inga konongs, oc Skúla hertuga. Sigurdr var í barn-æsko settir til bókar, oc varð hann klerkr oc vígdr til diakns. Enn er hann giordiz fullkominn at alldri oc afli, þá var hann manna vaskli-gastr, mikill madr oc sterkr, oc um alla atgiörvi var hann umfram adra iafn-alldra sína, oc nálíga hvern mann annan í Noregi. Sigurdr var snemma ofsa-madr oc óeirdar-madr mikill; hann var kalladr Sigurdr Slembi-diákn. Manna var hann frí-dastr synom, helldr þúnn-hárr, oc þó vel hædr. Þá kom þat upp fyrir Sigurdi, at módir hanns sagdi, at fadir hanns væri Magnus konongr Ber-fættir; oc þegar hann red siálfr háttom sínom, þá afrækdiz hann klerka-síðo, oc fór af landi brott. Í þeim ferdom dvaldiz hann lángr hríðir. Þá fór hann út til Jórsala, oc kom til Jórdanar, oc sótti heim marga helga stadi, sva sem pálmarm er títt. Oc er hann kom aptr, dvaldiz hann í kaupferdom. Einn vetr dvaldiz hann í Örkenyiom með Haralldi Jarli, oc var með hönom at drápi Þórkels Fóstra Sumarlíða-sonar. Sigurdr var oc uppi á Skotlandi með David Skota-konongi, oc var hann þar mikils virðr. Eptir þat fór Sigurdr til Danmerkr, oc var þat hanns sögn oc hanns manna, at hann hefði flutt skírslor til fadernis ser, oc bar sva, at hann væri son Magnúss konongs Berbeins, oc þar væri

vit v. biskopar. Sva segir Ivarr Ingimundarson í Sigurðar-bælki:

Giördo skírslo
of Skiölldongs kyn
fím biskopar
þeir er framarst þóttu.
Sva bar raunir
at ríks konongs
þess var hinn milldi
Magnús fadir.

Vinir Haralldz konongs Gilla sögdo, at þat hefði verit svik oc lygi Dana vit Nordmenn. Þat er sagt frá Sigurði Slembi, at hann hafðiz vit í kaupferdom nockora vetor; einn vetr var hann á Islandi, oc var þá á vist med Þórgilsi Oddasyni á Stadarhóli í Saurbæ, oc visso fáir hverr hann var. Þat var um haustit er saudir voro reknir í rett oc ætladir til skurðar, oc er þeir hendo saudina, lióp einn saudrinn at Sigurði; Sigurðr let sem hann leitadi þángat hiálpar, rettir at hönom hönd, oc kippir út or rettinni, oc lætr hann laupa í fiallit upp, oc mællti: eigi leita nú fleiri traustzins til vár, enn at hiálp skal hönom verda. Þat giördiz enn um vetrinn at kona ein hafði stolit, oc vard Þórgils henni reidr, oc vill refsa henni, enn hon lióp þar til hiálpar, er Sigurðr var, hann setti hana nidr í pallinn hiá ser. Þórgils bad hann selia hana fram, oc segir hvat hon hefir giört; enn

Sigurdr bad henni fridar, er hon hefir þangat traust sótt, oc Þórgils gefi henni upp sökina; enn Þórgils kvad hana scyldo víti fyrí taka. Enn er Sigurdr sá at Þórgils vill eigi heyra bæn hanns, leypr hann upp oc brá sverdi, oc bad hann tilsækia. Oc er Þórgils sá at hann villdi vígi veria konona, leitz hönom madrinn med miklo yfirbragdi, oc grunar hverr véra muni, oc lætr vidberaz at giöra á hlut konóannar, oc gaf henni grid. Þar voro fleiri útlendir menn, oc hafdi Sigurdr minst yfirlát. Einn dag er Sigurdr kom í stofo, tefldi aust-madr vid einn heima-mann Þórgils, sá var skartz-madr mikill, oc barsk á mikit. Aust-madrinn kalladi á Sigurdr, oc bad hann ráða nockot um taffit med ser; Sigurdr sá á, oc leitz hönom farit. Sá mádr er tefldi vit aust-manninn hafdi sáran fót, þrútnadi tá hanns oc vægdi. Sigurdr setz í pallinn, oc tekr eitt strá oc dregr eptir gólfino, enn ketlingar liópo um gólfít; hann dregr æ fyrir þeim stráit, þar til er kemr yfir fót hönom, enn hann spratt upp, oc kvad vit, enn taffit svarfaz, göra þeir nú at þrætomál hvarr þeirra hefði; oc því er þessa getit, at Sigurdr þótti nær ser tekit hafa bragdit. Eigi visso menn fyrr at hann væri lærdr, enn þvatt-daginn fyrir páska, þá saung hann yfir vatni; oc æ þótti hann því meira verdr, er hann var lengr. Oc um sumarit eptir ádr enn þeir skildo, mællti Sigurdr,

at Þórgils skyldi kunnliga senda menn til Sigurðar Slembis. Þá svarar Þórgils: hvat er þer at hanom lángt? hann svarar: ec em Sigurðr Slembiðiákn, son Magnúss konongs Berfættz. Fór hann síðan utan.

CAP. XIV.

FRÁ SIGURDI SLEMBI-DIAKN.

Í þennann tíma var Haralldr einn konongr í Noregi, oc var þat mál manna, at hann væri eigi vitr madr, oc eigi jamn-grimmr, sem Magnús konongr frændi hanss, sonr Sigurðar konongs. Þá Haralldr Gilli hafði verit konongr ví vetur, kom Sigurðr til Noregs; gáfo þá menn hönom þat ráð, at hann færi á fund Haralldz konongs, oc birta fyrir hanom frændsemi þeirra, oc freista hversu þá skipadiz mál hanss. Sigurðr sótti á fund Haralldz konongs bróður síns, oc hitti hann í Biörgun, geck þegar á konongs valld, oc birti fyrir hönom faderni sitt, oc beiddi konong taka við frændsemi sinni. Konongr veitti öngva skióta orskurdi um þat mál, oc bar þetta síðan fyrir vini sína, oc átti vit þá tal oc stefnor. Enn er ráð-giafar konongs urdo þessa varir, mællta þeir þat, ef Sigurðr væri til ríkis leiddr, at hann mundi þeim verda ofstór, sva sem Magnús konongr hefði verit; enn þeir sátu nú miök í kyrrsæti, oc redo lendir-menn land-rádom miök.

Feckz þat ráð at með konongi, at láta drepa Sigurd, oc finna hönom dauda-sök. Kom þat þá upp af tali þeirra, at konongr bar sakir á hendur Sigurdi um þat, er hann hafði verit at aftöko Þórkels fóstura fyrir vestan haf. Þórkell hafði fylgt Haralldi konongi til Noregs, þá fyrst er hann komit hafði til landz; hafði Þórkell verit hinn mesti vinr Haralldz konongs. Var þesso máli sva fast fylgt, at fyrir þetta var Sigurdi gefin dauda-sök, oc með ráði lendra manna varð þat sva framgengt, at eitt kveld sídla gengo til gestir nockorir þar er Sigurdr var, oc kölludo hann med ser; tóko scúto nockora, oc röro med Sigurd brott or bænom norður um HolldhELLO. Sigurdr sat aptr á kistö einni, oc hugsadi sitt mál, oc grunadi hann, at þetta mundi vera svik. Hann var sva búinn, at hann hafði brækur blár, oc skyrto oc möttul á tyglom at yfirhöfn. Hann sá nidr fyrir sik, oc hafði hendur at möttuls-böndunom, lét stundom á höfut ser npp, enn stundom let hann af. Enn er þeir voro komnir fyrir nesit, nálíga út til Miólcra-ár, voro þeir kátir oc drucknir, oc sumir röro ákaflika, oc ugdo fátt at ser. Þá stóð Sigurdr upp, oc geck á bord, enn ij menn, þeir er til gæzlo voro fengnir vit hann, stódo upp, oc gengo med hönom at bordino út, tóko þeir möttulinn bádir tveir oc helldo frá hönom, sem sidr er til at göra vit ríka

menn. Enn er hann grunadi at þeir helldi fleirom klædom hanss, þá greip hann sinni hendi hvarn þeirra, oc steypdiz utanbordz med báða þá, enn skútan rendi langt fram, oc varð þeim seint at víka, oc laung dvöl ádr enn þeir fengi sína menn tekna. Enn Sigurdr tók sva langt kaf á brott, at hann var fyrri á landi uppi, enn þeir fengi snúit skútonni eptir hönom. Sigurdr var allra manna fót-hvatastr, oc stefnir hann í fiall upp, enn konongs-menn fóro alla nótt oc leitudo hanss, oc fundo hann eigi. Hann lagdiz nidr í biarg-skoro nokora, oc svaladi hönom miök, fór hann þá af brókonom, oc skar rauf á setgeiranom, oc smeygdi á sík, oc tók út höndunom, oc halp med því lífi síno at sinni. Enn konongs-menn fóro aptr, oc máttu eigi leynd óförom sínom.

CAP. XV.

SVIKRÆDI VID HARALLD KONONG.

Sigurdr þóttiz nú finna, at eigi myndi hönom til hiálpar vera, at leita optar á fund Haralldz konongs, oc var hann þá í fylsknom allt haustit oc aundverdan vetr. Hann var í bænom í Biörgyn á laun med presti nockorom. Haralldr konongr var þar í bænom, oc mart ríkis-manna med hönom. Nú leitadi Sigurdr um med tilstilli vina sinna, ef

hann mætti viðkomaz at ráða konungi svikræði oc líflát. Voro miök margir menn at þessom rádom, oc þeir sumir er þá voro hirdmenn oc herbergis-sveinar Haralldz konongs, enn þeir höfdo fyrr verit hirdmenn Magnúss konongs, voro þeir þá í kærleikom miklom vit Haralld konong, sva at æ var nockorr af þessom yfir bordi konongs. Lucio-messo at qvelldi, er þeir ætlodo at fremia þetta velræði, rædduz vit ij menn er þar sátu; þá mællti annar til konongs, herra, sagdi hann, nú höfom vid felagar skotit ockarri þræto undir ydar orslit, oc höfom vit vediat her um aski hunánga, hvarr ockarr satt segir. Ec segi, at þer munot í nótt liggia hiá Ingirídi drottningo þinni, enn hann segir, at þer munot liggia hiá Þóro Guthorms-dóttur. Þá sva-radi konongr læiandi, oc var miök úvitandi, at þessi spurning væri med sva mikilli vel, oc sagdi hann mundi eigi lióta ved-feit, oc þóttuz þeir af því vita, hvar hanns var at vitia á þeirri nótt, enn höfut-vördr var þá halldinn fyrir því herbergi, er flestir hugdo at konongr mundi ísófa, oc drottning var í.

CAP. XVI.

DRÁP HARALLDZ KONONGS.

Sigurdr Slembir oc nockorir menn, sem í rádom voro med hönom, komo um nóttina til herbergis

Þess, er Haralldr konongr svaf í, oc drápo fyrst vard-menn, síðan bruto þeir upp hurdina, oc genggo inn med brugdnom sverdom. Ivarr Kolbeinson vann fyrstr á Haralldi konongi; enn konongr hafði druckinn nidrlagz, oc svaf fast, oc vaknadi vid þat er menn vágo at hönom, oc mællti í óvitino: sárt byr þú nú vid mik, Þóra? Enn hon lióp upp vid oc mællti: þeir búa sárt vit þík, er verr vilia þer enn ec. Let Haralldr konongr þar líf sitt. Þessir menn genggo inn at hönom med Sigurdi: Ögmundr son Þrándar Scaga, Kolbeinn Þorliótzson af Batalldri, Erlendr Islendingr. Enn Sigurdr vit sína menn geck í brott, let hann þá kalla þá menn til sín, er hönom höfdo heitiz til föroneytis, ef hann fengi Haralld konong tekit af lífi. Þá genggo þeir Sigurdr oc hanns menn brott, tóko til skúto neckorarr, skipuduz vit árar oc röro út á vaginn fyrir konongs-gard, tók þá at lysa af degi. Þá stóð Sigurdr upp, oc taladi vit þá er stódo á konongs-bryggionom, oc lysti vígi Haralldz konongs ser á hendur, oc beiddiz þá af þeim vidrtöko, oc þess at þeir tæki hann til höfðingia, sva sem burdir hanns voro til. Þá dreif þangat á bryggjornar fiöldi manns or konongs-gardi, oc svörodo allir senn einom munni, oc mællto, at þat skyldi alldreigi verda at þeir veitti lydni oc þiönkan þeim manni, er myrdann hefði bróðor sinn; enn ef þú

ert eigi hanns bródir, þá átt þú öngva ætt til at vera konngr. Þeir bördo þá saman vapnom sín-om, oc dæmdu þá alla útlaga oc fridlausa. Var þá blásit konongs-lúdri, oc stefnt saman öllom lend-om-mönnom oc hird-mönnom. Enn Sigurdr oc hanns menn sá þann sinn kost hinn fegursta, at verda brotto; hann hellt þá á Nordr-hördaland, oc átti þar þíng vid bændor, gengó þeir undir hann, oc gáfo hönom konongs-nafn. Þadan fór hann inn í Sogn, oc átti þar þíng vit bændor, oc var hann þar oc til konongs tekinn. Þá fór hann nordr um fiáll, oc sva inn í fiördo, oc tóko flestir vel hanns máli. Sva segir Ivar Ingimundarson:

Tóko vit milldom
Magnúss syni
Haurdar oc Sygnir
at Haralld fallion.
Súroz margir
menn á þíngi
budldngs seyni
í bróðor-slád.

Haralldr konngr var iardadr í Kristz-kirkio inni forno.

XIV.

SAGAN AF SIGURDI, INGA OC
EYSTEINI, HARALLDZ-SONOM.

CAP. I.

UPPHAF SIGURDAR OC INGA KONONGA.

Ingirídr drottning oc med henni lendir-menn oc hirdin sú er Haralldr konongr hafdi haft, redo þat af, at hleypi-skúta var gör norðr til Þrándheims, at segia fall Haralldz konongs, oc þat med at Þrændor skyldo taka til konongs son Haralldz konongs Sigurd, er þá var norðr þar, oc Gyrdir Bárðarson fóstredi. Enn Ingirídr drottning fór þegar austr í Vík. Ingi het son þeirra Haralldz konongs, er var at fóstri þar í Víkinni með Amunda Gyrdarsyni, Lögbersa-sonar. Enn er þau komo í Víkina, var þegar stefnt Borgar-þing, var þar þá Ingi til konongs tekinn, var hann þá á annan vetr. At því ráði hurfo þeir Amundi oc Þióstólfr Alason, oc margir adrir stórir höfðingar. Enn er þau tíðindi komo norðr til Þrándheims, at Haralldr konongr var af lífi tekinn, tóko Þrændor til konongs Sigurd, son Haralldz konongs, á Eyra-þingi; var hann þá á fjórda vetr, oc hurfo at því ráði Ottar

Bir-

Birtingr, Petr Sauda-Ulfsson, oc þeir brædor, Gut-tormr af Reini or Ottar Balli Asólfssynir, oc margir adrir stórir höfðingiar, oc fiölldi annara manna. Oc sneriz þá undir þá brædor nálíga allr landz-lydr, oc allra hellzt fyrir þá sök, at fadir þeirra var kalladr heilagr; oc var þeim sva land svarit, at undir öngan mann annan skyllði gánga konong-dómr, medan nöckr þeirra lifdi sona Haralldz konongs.

CAP. II.

FRÁ SIGURDI SLEMBI-DIÁKN.

Sigurdr Slembir sótti norðr um Stad, oc þá er hann kom á Nord-mæri, voro allt komin fyrir hön-om bref oc iartegnir ráða-manna þeirra, er snúitz höfdo til lydni vit sono Haralldz konongs, oc seck hann þar önga vidtöko eda uppreist. Enn með því at Sigurdr var siálfr liffár, þá redo þeir þat af, at stefna inn í Þrándheim, oc leita á fund Magnúss blinda, þvíat hann hafði ádr gört ord fyrir ser inn þannog til vina sinna, oc til viná Magnúss. Þá var Sigurdr konongr Harallds-son í bænum, oc með hanom margir ríkis-menn, oc var Sigurdi Slembi eigi þángat færiligt at leita. Hann hafði þá með ser marga sína vini, oc sva Magnúss vini. Enn er hann kom til kaupánga, röro þeir upp í

ána Nid, oc leita á fund Magnúss konongs, oc komo festom á land í konongs-gardi, oc urdo þeir þá undan at leita, þvíat lydr allr stóð á móti. Þeir lögdo síðan at vit Hólm, oc tóko þar út or klaustri Magnús blinda Sigurdarson at naudgom múnkom, hann hafði tekit ádr múnks-vígslo. Sú er fleiri manna frásögn, at Magnús færi at siálfs síns vilia bravt, þótt hitt veri gört til umbótar máls hams. Fluttuz þeir Sigurdr þá brott eptir Jólin þegar, oc vænto ser lidsinnis af frændom sinom oc vinom Magnúsar, oc sva gafz; fóro þeir Sigurdr út eptir firdinom, sóttu síðan eptir þeim Biörn Egilsson, Gunnar af Gimsum, Halldorr Sigurdarson, Aslákr Hákonarson, oc þeir bræðor Benedict oc Eiríkr, oc hird sú er fyrr hafði verit med Magnúsi konongi, oc fiölldi annara manna. Þeir fóro med flockinn sudr fyrir Mæri, oc allt fyrir Raumsdals-mynni. Þeir Sigurdr oc Magnús skipto þar lidi síno, oc fór Sigurdr Slembir vestr um haf þegar um vetrinn; enn Magnús fór til Upplanda, oc vænti hann ser þar mikills lids-afla, sem hann feck; var hann þar um vetrinn oc um sumarit allt, oc hafði mikít lid. Enn Ingi konongr fórr þá at hönom med lidi síno, oc hittoz þeir þar sem heitir í Mynni. Vard þar mikil orrosta, oc hafði Magnús konongr meira lid. Sva er sagt, at Þióstólfr Alason hefði Inga konong í killting ser, meðan

bardaginn var, oc geck undir merki, oc kom Þjó-
stólfir í mikla naud af erfíði oc atsókn; oc er þat
mál manna, at þá hafi Ingi konongr fengit van-
heilindi þat, er hann hafði allan alldr síðan, me-
ðan hann lifði, oc knytti hrygginn, enn annar
fótrinn skemri enn annar, oc sva afl-lítill, at hann
var illa gengr meðan hann lifði. Þá sncri mann-
fallino á hendur Magnúsi oc hanss mönnum, oc
fello þessir í öndverdri fylkingo, Þórkell, Halldor
Sigurdarson, Biörn Egilsson, Gunnar af Gimsun,
oc mikill luti lids hanss, áðr hann villði undan
ríða. Sva segir Kolli hinn Prúði:

Unnot austr fyrir Mynni
odd-hríð enn brast síðan
hilmir feck und hiálmi
hrafns verðar lid sverdom.
Lögdot þer enn eirar
örr syniadir brynio
úngr varðir þú þengill
þitt land saman randir.

Oc enn þetta:

Fyrr lá hanss enn harri
hríng-milldr þadan villði
verðung öll á velli
víg-simr konongr himni.
Sundr klaust siklíngr þrænda
sókn-sús enn Magnúsi
þer fecks hálfo hærri
her-scriptir iðfurr gipta.

Magnús flydi þadan austr á Gautland til Karls Jarls Sóna-sonar, hann var ríkr madr oe ágiarn. Magnús blindi oc hanns menn sögdo sva, hvar sem þeir komo fyrir höfðingia, at Noregr mundi liggia lauss fyrir, ef nockorir stórir höfðingiar villdo tilsækia, er kalla mátti at cingi var konongr yfir landi, oc lendra-manna forráð váro yfir ríkinu, enn þeir lendir-menn, er hellz ero til ráða teknir, þá var nú hverr þeirra ósátttr vit annan fyrir öfundar sakir. Enn med því at Karl var ágiarn til ríkis oc áhlydinn of fyrir-tölor, þá safnar hann lidi, oc rídr austan í Víkina, oc geck mart fólk undir hann fyrir ræzlo sakir. Enn er þetta spyria þeir Þióst-ólfr Alason oc Amundi, þá fóro þeir í móti med þat lid er til feckz, oc höfdo med sér Inga konong. Þeir hitto Karl Jarl oc her Gauta, oc funduz austr á Króka-skógi, oc átto þeir orrosto; vard þar mikit mannsfall, oc feck Ingi konongr sigr. Þar fell Munan Augmundarson módur-bródir Karls Jarls. Augmundr fadir Munaus var son Orms Jarls Eilifssonar, oc Sigrídar dóttur Einnz Jarls Arnasonar. Astrídr Augmundar-dóttir var módir Karls Jarls. Mart annara manna af Gautum fell á Króka-skógi; enn Jarl flydi austr af Skóginom. Ingi konongr rak þá allt austr or ríki síno, oc vard þeirra för hin hæðiligsta. Sva segir Kolli:

Lysa mun ec hve liósa
 laut rafn í þen Gauta
 aurn fylldit sik sialldan
 sár-ísa raud vísi.
 Gollðit vard þeim er görðo
 glaum herdondom sverda
 raun er at ríki þíno
 róg á Króka-skógi.

CAP. III.

FERD EIRÍKS KONONGS Í NOREG.

Magnús blindi fór þá til Danmerkr á fund Eiríks konongs Eymuna, oc feck hann þar góðar vidtökor. Baud hann konungi, ef hann villdi fara med Dana-her í Noreg, oc leggja undir sik landit, at hann mundi fylgia hönom, segir ef hann kæmi med styrk hers síns, at eingi madr í Noregi mundi þora at skióta skapti eino í móti hönom. Konongr skipaðiz vit fortölor Magnúsar, oc baud út leidángri, oc fór hann med cc skipa norðr í Noreg, oc var Magnús blindi oc hanns menn í þessi ferd med Dana-konongi. Enn er þeir komo í Víkina, þá fóro þeir til hófs nockors med spekd oc fridi austan-fiardar. Enn er þeir komo lidinu austan til Túnsbergs, var þar mikill safnadr fyrir lendra-manna Inga konongs. Vatn-Ormr Dagsson, bródir Gregoriuss, red mest fyrir þeim; þar mátto Danir eigi á land

komaz, oc eigi vatn taka ser, var þar mart drepit af þeim. Þá lögdo þeir inn eptir firði til Osloar, oc var þar fyrir Þióstólfr Alason. Sva er sagt, at þeir villdo láta bera út skrín Hallvardz hins helga or bænom um aptaninn, er þeir urdo varir við lidit, oc gengo sva margir undir, sem vit máttu komaz. Enn sva þúngt var skrínit, at þeir máttu eigi lengra bera, enn utar á kirkio-gólfít. Enn um morgoninn, er þeir sá at herinn fór utan at Höfutey, þá báro iiij menn skrínit upp or bænom; Þióstólfr oc allt bæiar-fólkit fylgdi með skrínino, fór þat upp á Rauma-ríki til Fors, oc var þar iiij má-nadi.

CAP. IV.

BÆR BRENDR Í OSLO.

Eiríkr konongr ok hanns lid sótti upp í bæinn. Þióstólfr nam stadar fyrir ofan bæinn, oc ruuno menn Eiríks konongs eptir þeim Þióstólfi, enn stafubúi hanns vard skiótastr, sá het Askill. Þióstólfr skaut broddi til hanns, oc laust undir kverkina sva at yddi út um hnakkann, oc þóttiz Þióstólfr eigi skotit hafa betra skot, þvíat ecki var bert á hönom nema þat eitt. Þióstólfr fór uppa Raumaríki oc samnadi þar lidi um nóttina, oc kom ofan til bæiarins um morguninn. Eiríkr konongr let

leggja elld í Hallvardz-kirkio, oc víða um bæinn, oc brendo upp allan. Því næst kom Þióstólfr ofan med lid mikit til bæiarins, enn Eiríkr konongr lagdi á brott skipa-lidi síno, oc máttu þeir hvergi á land komaz þeim-megin fiardar fyrir safuadi lenda-manna, enn hvar sem þeir leitudo til land-göngo, þá lágo eptir v eda vi eda fleiri. Ingi konongr lá í Hornboro-sundom med lidi miklo, oc Amundi fóstri hanns Gyrdarson, oc börduz vid Eirík konong þar, oc drápo mart af hannun, slydi hann undan, ok sneriz aptr sudr til Danmarkar. Ingi konongr fór eptir hönom, oc hendi áf þeim allt þat er hann mátti, oc er mál manna, at eigi hafi verri ferd farin verit í annars konongs veldi med iann-miclo lidi. Enn Eiríki konongi líkadi illa, oc þótti þeir Magnús oc hanns menn miöc hafa spottat sik, er hann hafdi komit í þessa ferd, oc qvadz cigi síðan skyllði vera þeirra viur slíkr sem ádr. Nú er at segia frá sonom Haralldz oc Sigurdi Slembi, sem sagt hefir vitr madr oc skynsamr Eiríkr Oddzson, oc er þessi frásögn Hákonar Maga lends-mans, hann sat yfir oc sagði frá þessom tíðindom, er ritot voro fyrsta sinni; enn hann siálfr oc synir hanns voro í öllom þessom ferdom oc orrostom, oc voro allar adrar ferdir kunnar.

CAP. V.

FRÁ SIGURDI SLEMBI-DIÁKN.

Sigurdr Slembir kom þat sumar vestan um haf til Noregs, spurdi hann þá um ófarir Magnúss frænda síns; þá þóttiz hann vita at hann mundi eiga lítit traust í Noregi, sigldi hann þá allt útleid sudr med landi, oc kom fram í Danmörko, hann hellt til Eyrarsundz. Enn sudr fyrir Eyri hitti hann Vinda-sneckior neckorar, oc lagdi til bardaga vit þá, oc feck sigr, hraud þar vin sneckior oc dráp mart manna, enn hann hengdi suma. Flackadi Sigurdr í sudr-löndom um hrið, enn hann vissi eingan sinn afla í Noregi, oc var þar (vörn) mest, sem voro Þrændir oc Mærir. Sva segir Ivarr:

Riso við vísa
vestan komnom
þrændir oc Mærir
þeir er þrifom núttlo.
Brugdoz hölldar
í huga sínom
mensco milldom
Magnúss seyni

Oc þat segir hann, þá er Sigurdr fór af Noregi, at hann kom í Svía-konongs ríki:

Drífo til reipa
í raudo vedri

reyndir at risno
 ræsis þegnar.
 Urdo seggir
 segls at gæta
 þá var svalt á síá
 enn sumir ióso.

Hratt hvast scipi
 í hvöto vedri
 raust ríðandi
 oc ramir straumar.
 Festo seggir
 Sueckio lúnga
 kynstórs iöfurs
 vid Kalmars-nes.

Þá var hann kominn í Dana-konongs ríki, oc gör-
 di ser þar marga at vinom höfðingia; konunginn
 siálfann fyrst, sem her segir:

Ser framliga
 fridar leitadi
 il-rióðr ara
 vit Jota gram.

Hann átti oc orrostu vid Maun vid Vindor, oc haf-
 di sigr, þá hellt hann sunnan, oc lagdi upp í Elfi-
 na í eystri-qvísl, oc vann þar iij skip af lidi þeirra
 Þóríss Huínantorda, oc Olafs sonar Haralldz Kesio,
 systursonar síns: Módir Olafs var Ragnhilldr, dót-
 tir Magnús konongs Berfætz; enn ellti Olaf á land
 upp. Sva segir Ivarr:

Vann í elfi
 þar er iðfurr bardiz
 fall fólkstara
 til fódr-leifdar.
 Sculfo sceyti
 scot mögnudoz
 hnigo hríng-vidir
 huarra tveggio.

Enn Þióstólfr var í Konongahello, oc hafði safnat fyrir, oc skyldi þar veria landit, enn Sigurdr Slembir hellt þannug lidi síno, oc skutoz þeir á, oc mátto cigi á land gánga; fello menn af hvarom tvegiom, oc mart vard sárt. Þar fell Ulfhedinn Söxólfsson, nordlendskr madr, stafn-búi Sigurdar; Sigurdr lagdi brott oc hellt norðr í Víkina, oc rænti víða. Enn er Sigurdr lá í höfn þeirri er Portyria het, á Lungardz sído, oc sætti þar skipom er fóro í Víkina eda brott þadan, oc rænti, enn Túnsbergs-menn gördo lid at hönom, oc komo á óvart, sva at þeir Sigurdr voro á landi, oc skip-to fángi síno; kom sumt lid ofan at þeim, enn sumt lagdi skipom um þvera höfnina fyrir utan þá. Þar fell mart manna af lidi Sigurdar; þar fell Fidr Geit oc Askell Smidsson; enn Sigurdr hlióp á skip-silt, oc reri út at þeim, enn skip Vatn-Orms var þar næst, oc let hann síga skip silt á hömlom, enn Sigurdr róri út hiá þeim, oc komz undan einu skipi, enn mart fell af lidi hanns. Þá var þetta ort:

Vard eigi vel við styrio
Vatn-Ormr í Portyrio.

CAP. VI.

DRÁP BEINTEINS.

Sigurdr Slembi-diákn sigldi síðan suðr til Danmerkur, oc tyndiz madr af skipi hanns, sá er het Kolbeinn Þórliótzson or Batalldri af Hadalandi, hann var á eptir-báti er bundinn var vit skipit, er þeir sigldo miök; braut Sigurdr skipit er þeir komo suðr til Danmerkr, oc var hann um vetrinn í Alaborg. Enn um sumarit eptir þá fóro þeir Magnús sunnan bádir saman með vij skipom, oc komo á Lista á óvart um nótt, oc lögdo þeir skipom sínom at landi. Þar var fyrir Beinteinn Kolbeinsson, hirdmadr Inga konongs, enn hraustasti madr. Þeir Sigurdr runno þar upp í ellding nætur, oc komo á óvart, oc tóko hús á þeim, oc villdo leggja elld í bæinn, enn Beinteinn komz út í búr nockvat með herklædom sínom, oc vel búinn at vapnom, oc stóð hann fyrir innan dyrin með brugdit sverd, oc hafði skiölld fyrir ser, enn hiálm á höfði, var þá búinn til varnar; dyrnar voro helldr lúgar. Sigurdr spurdi, hverr sveina fúsast væri at ganga inn at Beinteini, oc þat er nú kurteisi; enn eingi vard skióu tilbúinn. Beintein beyrði hvat þeir töludo, oc segir sva: hver ydar er iungengr, þá skal vapn

fyrir-finna; enn myrkt var í búrino, oc stóð hann vit dyrin med brugdit sverd. Sigurdr stóð braut frá nockut, oc sá at eingi vard tilbúinn; hann tók grá-felld einn oc vafdi um hönd ser, hann brá sverdi, oc sneri upp at húsino, hann var í skyrto cinni, oc hafdi ecki á höfði; hann hleypr inn í húsit, sva snart sem kólfi scyti, oc um hann, sva at hann var þegar í innanverdo húsino. Beinteinn hió eptir hanum oc misti; Sigurdr sneri þegar utar at Beinteini, skiptuz þeir fám höggom vid, ádr Sigurdr hió hann bana-högg oc kom sva út, at hann hafdi höfudit í hendi ser, oc var madrinn einkar hvatligr, þviat allra manna var hann snæfr-mannligastr. Sva segir Ivar:

Hellst á Lista
lofdúngr scipom
örr fyrir Agdir
austan af nesiom.
Hne hersa kyn
herr var í landi
brunno bygdir
fyrir budlúngi.

Dreif til skógar
fyrir sciölddongi
land-manna lid
þar er logar brunno.
Vöedo drengir
med dör roðin

blód Beinteini

ádr bana fengi.

Þeir tóco fe allt er var í bænum, oc fóro síðan til skipa sinna oc helldo brot. Enn er Ingi konongr oc hanns vinir spyria dráp Beinteins, oc þeir Kolbeins-synir Sigurdr oc Gyrdir, brædor Beinteins, þá giördi konongr lid mikit at þeim Sigurdi Slembi, oc fór siálfr, oc tók scip undan Hákoní Púngelltu Pálssyni, oc dóttor-syni Asláks Erlingssonar af Sóla, systrúngi Hákonar Maga. Enn Ingi konongr eltti Hákon á land upp, oc lid hamns allt, oc tók hvert fat þeirra. Þeir flydo í Fiördo inn undan Sigurdr Stockr, son Eindrida í Gaut-dali, oc Eiríkr Hæll bródir hanns, oc Andreas Kellduscítr son Gríms or Ord. Enn Sigurdr Slembir oc Magnús Blindi oc Þórleifr Sciappa sigldu norðr it ytra iij scipom á Hálogaland, oc var Magnús um vetrinn í Biarkey norðr med Vidkunni Jónssyni bróðrsyni Knútz. Enn Sigurdr hió stafna af scipi síno, oc hió á raufar oc sökdi nidr í Ægisfirði innanverdom; sat Sigurdr um vetrinn í Tiállda-sundom í Kinn, þar sem heitir Gliúfrafiörðr. I innanverdom Firdinom er hellir í biargino, þar sátu þeir Sigurdr um vetrinn á Finnmörk á laun, meir enn xx menn, oc tiöldudo fyrir hellis-dyrnar, sva at eingi mátti siá dyrnar or fiöro. Þeir fengo Sigurdi vistir um vetrinn Þórleifr Sciappa oc Einar Ögmundarson af

Sandi, oc Guðrúnar Einarisdóttur Arasonar af Reykiahólom. Þann vetr er sagt, at Sigurdr leti Finna göra ser skútor ij inn í fiördom, oc voro sini bundnar, oc engi var saumur í, enn vidiar fyrir kne, oc voro xij menn á bord hvarri. Sigurdr var med Finnom þá er þeir gördo skútornar, oc höfdo Finnar þar munngát, oc gördo Sigurdi veitzlo. Þá kvad Sigurdr þetta:

Gott var í gamma
 þar ver gladir druckom
 oc gladr gramsson
 geck medal beckia.
 Vara þar gamans vant
 at gaman-dryckio
 þegn gladdi þegn
 þar landz sem ec var.

Skútor þær voro sva sciótar, at ccki skip tók þær á vatni, sva sem qvedit var:

Fátt eitt fylgir
 furo Háleyskri
 svipar und segli
 sin-bundit skip.

Enn um varit fóro þeir Sigurdr oc Magnús nordan med þær sömo skútor, er Finnar höfdo gört. Enn er þeir komo nordan í Vaga, drápo þeir þar Svein prest, oc sono hanns tva.

CAP. VII.

HERNADR SIGURDAR SLEMBI-DIÁKNS.

Sigurdr hellt þá sudr í Vikar, oc tóko þar Vilhiálm Skinnara, lendan-mann Sigurdar konongs, annan Þórallda Kiept, oc drápo þá báda. Þá fór Sigurdr sudr med landi, oc hitti þar Styrkár Glæsi-rófo sudr vit Byrdo, er hann fór sunnan or kaupáangi, oc drap hann. Enn er Sigurdr kom sudr til Valsness, þá hitti hann þar Svína-Grím fyrir Valsnesi, oc let höggva af hönom ena hægri hönd. Þá fór hann sudr a Mæri, fyrir utan Þrándheims-mynni, oc tók þar Hedin Hird-maga oc Kálf Krínglo-auga, oc let hann Hedin undangánga, enn þeir drápo Kálf. Sigurdr konongr oc Sáda-Gyrdir fóstri hanss spurdo til fara Sigurdar Slembi-diákns, oc hvat hann haf-diz at; þá sendo þeir menn at leita hanss, fengo þá til forráða Jon Kaudo, son Kálfs ins ránga, bróðor Ivars biskops, oc annan Jon prest Smyril. Þeir skipudo Hreininn, er var ij rúm oc xx, oc allra skipa skiótast. Þeir fóro at leita Sigurdar, oc fundu hann eigi, oc fóro aptr norðr med lítinn ordz-tír, þvíat menn sögdo sva, at þeir sæi þá Sigurdr, oc þordo eigi at leggja at þeim. Sigurdr fór þá sudr med landi, oc giörði allstadar stórann skada. Hann fór sudr á Haurdaland, oc kom í Herdlo; þar átti bú Einarr son Laxa-Páls, oc var

hann farinn inn í Hamars-fiörd til Gámgdaga-Þings. Þeir tóko feit allt er heima var, oc láugskip hálf-þrítugt, er Einarr átti, oc son hanss iij vetra gamlan, er lá hiá verkmanni hanss; villdo sumir drepa sveininn, enn sumir hafa brot med ser. Verk-madrinn sagdi þeim: eigi er ydor happ í at drepa sveininn, oc eingi tilslægr er ydor at hafa hann í brott, þvíat þetta er minn son, enn eigi Einars; oc af hanss ordom leto þeir eptir sveininn, enn þeir fóro í brott. Enn er Einarr kom heim, þá gaf hann verkmanninom fe til ij aura gullz, oc þackadi hanom sitt orrædi, oc lezc skyldo vera vin hanss iafnan síðan. Sva segir Eiríkr Oddz-son, er fyrsta sinn ritadi þessa frásógn, at hann heyrði í Biörgun Einar Pálsson segia frá þessom atburdom. Sigurdr fór þá sudr med landi, oc allt í Vík austr, oc hitti Finn Sauda-Ulfsson austr á Kuilldum, er hann fór at heimta skyldir Inga kon-ongs, oc let hengia hann. Þeir fóro síðan sudr til Danmerkr.

CAP. VIII.

BREF-SENDING INGA KONONGS.

Vikveriar oc Biörgyniar-menn mællto at þat var ósómi, er Sigurdr konongr oc vinir hanss sátu kyr-rir norðr í kaupangi, þótt födurbani hanss særi
þíód-

þíód-leid fyrir utan Þrándheims-mynni, enn Ingi konongr oc hanns lid sat í Vík austr við háskann siálfan, oc vardi landit, oc hafði átt margar orrostor. Þá sendi Ingi konongr bref norðr til kaupáangs, stóðo þessi ord þar á: Ingi konongr, son Haralldz konongs, sendir qvedio Sigurdi konongi bróðor sínom, oc Sáda-Gyrði, Augmundi Suípti, Otari Birtingi, oc öllum lendum-mönnom, hird-mönnom oc hús-körlom, oc allri alþýðo, sælom oc vesölom, úngom oc gömlom, Guds oc sína. Aullom mönnom ero kunnug vandræði þau er ver höfom, oc sva æska, at þú ert v vetra gamall, enn ec iij; mego vit eigi atfæraz, nema vit niótím vina ockarra oc góðra manna. Nú þikkiumz ec oc mínir menn vera nærr staddir vandqvædom oc naudsyn beggia ockarra, enn þú eda þínir vinir; nú giördu sva vel, at þú far til fundar vít mic sem fyrst, oc sem fiöl-mennztr, oc verom báðir saman, hvat sem igeriz; nú er sá ockar mestr vinr, er til þess helldr, at vit æ seom sem sáttaztir, oc sem iafnast halldnir í öllum lutom. Enn med því at þú afrækiz, oc villt eigi fara at naudsynligri ordsending minni enn, sem fyrr hefir þú gört, skaltu vit því búaz, at ec mun fara á hendur þer med lidi, oc skipti þá Gud med ockor; þviat eigi megu ver hafa lengr sva búit, at sitia med sva miklom kostnadi oc fiöl-

menni, sem her þarf fyrir ófridar sakir, enn her þarf margs vit; tekr þú hálfar allar landskyllir oc adrar tekíor í Noregi. Lifit í Gudz fridi.

CAP. IX.

TALA ÓTTARS BIRTINGS.

Þá stóð upp á þíngino Ottar Birtingr, oc svarar fyrstr manna: þat er mál Sigurdar konongs til Inga konongs bróðor síns, at gud þacki hönom góða qvedio sína, oc sva, starf oc torvellid, er þú hefir oc þinir vinir í ríki þíno, at beggia ockar naudsyn. Enn þótt sumt þicki helldr ördigt í ordom Inga konongs til Sigurdar konongs bróðor síns, þá hefir hann mikit til síns máls í marga stadi. Nú vil ec lysa yfir míno scapi, oc heyra hvart því fylgir vili Sigurdar konongs, oc annara ríkismanna, at þú Sigurdr konongr búiz, oc þat lid er þer vill fylgia, at veria land þitt, oc farir sem fiölmennastr á fund Inga konongs bróðor þíns, sem fyrst máto, oc styrki hvarr yckar annan í öllum farsælligom lutom, emm almáttugr gud báða yckr. Nú vilom ver heyra ord þín, konongr. Petr son Sauda-Ulfs bar Sigurd konong á þíngit, er síðan var kalladr Petr Byrdarsveinn. Þá mællti konongr: viti þat allir menn ef ec skal ráða, þá vil ec fara á fund Inga konongs bróðor míns, sem fyrst má ec.

Enn þá taladi annar þetta, oc hverr at öðrom, oc hóf sinneg hverr, enn lauk í sama stad, sem Ottar Birtingr hafði fyrst uppkvedit, oc var þat þá ráðit, at stefna lidi saman, oc fara austr í land. Sidan fór Sigurdr konongr austr í Vík með miklo lidi, oc hitti þar Inga konong bróðr sinn.

CAP. X.

ORROSTA VIT HÓLMINN GRÁ.

Sama haust komo þeir Sigurdr Slembir oc Magnús Blindi sunnan or Danmörk með xxx scipa, bæði Dana-her oc Nordmanna, þat var nær vetr-nóttom. Enn er þetta spyrja konongar, oc þeirra lid, fara þeir austr í móti þeim; þeir hittoz í Hvolom vit Holminn Grá; þat var inn næsta dag eptir Marteíns-messo, þá var Sunnodagr. Ingi konongr oc Sigurdr konongr höfðu þá xx skip, oc öll stór; varð þar orrosta mikil, enn eptir hina fyrsto ríd, þá flyðu Danir með xviii skip, oc heim til Danmerkur. Þá hruduz skip þeirra Sigurdar oc Magnúsar. Enn er miök var hrodit skip Magnúss, lá hann í reckio sinni. Hreidarr Griótgardz-son, er lengi hafði fylgt hönom, oc verit hird-madr hans, hann tók Magnús konong í fang ser, oc villdi hlauða með hann á annat skip. Þá var Hreidarr skotinn spíóti á milli herdanna, oc þar í gegnom; oc

þat.sögðo menn, at þar fengi Magnús bana af því eno sama spióti, oc fell Hreidarr á bak aptr á þiliornar, enn Magnús á hann ofan: oc mællti þat hverr madr um, at hann þótti vel oc prúðliga hafa fylgt sínom lávardi oc lánar-drottni; gott er hveriom, er slíkan ordróm getr. Þar fell Lodinn Sauprudr af Línostödom, á skipi Magnúss konongs, oc Brúsi Þórmóðarson, stafubúi Sigurðar Slembi-diákna, oc Ivarr Kolbeinsson, oc Hallvarðr Fægir, fyrirrúms-madr Sigurðar Slembis; sá Ivarr geck fyrst inn at Haralldi konongi, oc vann á hönom. Þá fell mikill luti lids þeirra Magnúsar oc Sigurðar, þvíat Inga menn leto eingan undan gánga, þann er þeir máttu ná, þótt her seo nefndir fáir menn. Þeir drápo í einom hólmí meir enn xl manna; þar voro ij Islendskir menn drepnir, Sigurðr prestur son Bergþórs Márssonar, oc annar Clemet son Ara Einarssonar. Enn iij Islendskir menn lifdo eptir; Ivarr Skráut-hánki, son Kálfs inns ránga, er síðan var biskop í Þrándheimi, hann var fadir Eiríks erkibiskups; Ivarr hafði iafnan fylgt Magnúsi konongi, hann komz á skip Jons Kaudo bróðor síns; enn Jon átti Cecilíu dóttur Gyrdar Bárðarssonar, oc var þar í lidi Inga konongs oc Sigurðar. Þeir iij komuz á skip Jons; annar Arnbiörn Ambí, er síðan átti dóttur Þorsteins í Audsholli; Þriddi Ivarr Dynta Starrason, hann var bróðir Helga Starrasonar, enn

Þrænskr at móðor-kyni; var hann hinn vænsti madr. Oc er lids-menn urdo vidvarir þetta, at þeir voro þar, þá gripo þeir til vapna sinna, oc gengo at þeim Joni, enn þeir biöggoz vid, oc var þá vit siálfst, at þar myndi alþyða beriaz; enn þat vard at sætt med þeim, at Jon leysti undan Ivar broðor sinn oc Arnbiörn, oc festi fe fyrir þá, enn þat fe var hönom gefit síðan. Enn Ivarr Dynta var leiddr á land upp, oc höggvinn, þvíat þeir Sigurdr oc Gyrdir, Kolbeins synir, villdo eigi taka fe fyrir hann, þvíat þeir kendo hönom, at hann hefði verit at vígi Beinteins bróðor þeirra. Þat sagði Ivarr biskop, at þat hefði sva yfir hann lidit, at hönom hafi vest þótt, er Ivarr var leiddr á land upp undir öxi, oc hvarf ádr til þeirra, oc bad þá heila hittaz. Sva sagði Guðríðr Birgisdóttir, systir Jons erkibiskops, Eiríki Odds-syni, at hon heyrdi Ivarr biskop þetta mæla.

CAP. XI,

SIGURDR SLEMBI-DIÁKN HAND-TEKINN.

Þrándr Gialldkeri het madr, er styrði skipi í lidi Inga konungs. Enn þá var sva komit, at Inga menn röro á smá-bátom milli skipanna, at þeim mönnom er á sundi voro, oc drápo hvern er þeir nádo. Sigurdr Slembir lióp á kaf af skipi síno, þá

er hrodit var, oc steypiti brynio af ser í kafi, oc svam sídan, oc hafdi skiöllld yfir ser. Enn menn nockorir af skipi Þrándar tóko á sundi mann einn, oc villdo drepa, enn sá bad sic undan, oc letz mundo segia þeim hvar Sigurdr Slembir var, enn þeir villdo þat. Enn skilldir oc spiót oc menn daudir, oc vapn oc klædi fluto víða á síanom hía skiponom. Síá munot þer, sagdi hann, hvar flytr einn raudr skiölldr, þar er hann undir. Sídan röro þeir þángat, oc tóko hann, oc flutto upp í skip Þrándar. Enn Þrándr giördi ord Þióstólfi oc Ot-tari, oc Amunda oc Gyrði. Sigurdr Slembir hafdi haft á ser elldzvirki, oc var fnióskrinn í valhnotar-skurn innan, oc steypt um utan vaxi. Því er þessa getit, at þat þótti hugkvæmiligt at búa sva um, at alldregi mætti vætaz. Því hafdi hann sciöllld yfir ser, er hann svam, at þá vissi eingi, hvart sá skiölldr var eda annar, er margir flutto á sænom. Sva sögdo þeir, at alldregi mundo þeir hitta hann, ef eigi væri þeim sagt til hanns. Enn er Þrándr kom til landz med Sigurd, þá var sagt lidsmönn-om, at hann var tekinn; þá sló ópi á herinn af fagnadinom. Enn er Sigurdr heyrði þetta, þá mællti hann: margr vandr madr mun her verda feginn af höfði míno í dag. Þá geck at Þióstólfr Alason, þar er hann sat, oc strauk af höfði hön-om silki-húfo blaudom búna, oc mællti: hví var

Þú sva diarfr, þræls-sonrinn, at þú þordir at kallaz son Magnúsar konongs Berfætta? Sigurdr svarar: eigi þarftu at iafna födr mínom vit þræl, þvíat lítills var þinn fadir verdr hiá mínom födr. Hallr son Þórgeirs læknis Steinssonar, hirdmadr Inga konongs, var vitstaddr þessi tíðindi; hann sagdi Eiríki Oddssyni, enn hann reit eptir þessa frásögn. Eiríkr reit bók þá, er köllot er Hryggjar-stycki. Í þeirri bók er frásagt Haralldi Gilla oc sonom hanss, oc frá Magnúsi Blinda, oc frá Sigurdi Slembi, oc allt um dauda þeirra. Eiríkr var vitr madr, oc var í þenna tíma laungom í Noregi. Suma frásögn ritadi hann eptir fyrirsögn Hákonar Maga, lends-manus þeirra Haralldzsona. Hákon oc synir hanss voro í öllum þessom deilom oc ráða-gjördom. Enn nefnir Eiríkr fleiri menn, er hönom sögdo frá þessom tíðindom, vitrir oc sannordir, oc voro sva nær, at þeir sá edr heyrido atburdina; enn sumt ritadi hann eptir siálfs síns heyrn eda syn.

CAP. XII.

PÍNING SIGURDAR SLEMBI-DIÁKNA.

Hallr segir sva, at höfðingar villdo þegar drepa láta Sigurd; enn þeir menn er grimmastir voro, oc þóttos eiga at reka harma sínna á hönom, redo píslom hanss, oc voro til þess nefndir brædor Bein-

teins, Sigurdr oc Gyrdir Kolbeinssynir, oc Petr Byrdar-sveinn villdi hefna Finns bródur síns. Enn höfðingar oc flest-allt fólk geck frá. Þeir bruto fótleggi hanns í sundr med öxar-hömrom, oc handleggi. Þá fletto þeir hann af klædom, oc ætludo at flá hann kykvann, oc klufo svörd í höfði hönom, enn þat máttu þeir eigi göra fyrir blód-rás. Þá tóko þeir sward-svipor, oc bördo hann lengi, sva at vandliga var öll húdin af, sem fleginn væri. Enn síðan scuto þeir stock á hrygginn, sva at sundr geck. Þá drógo þeir hann til tress, oc hengdo, oc hiuggo síðan af hönom höfudit, ok drógo brott síðan höfudit oc líkama hanns, oc reyrdó í hreysi nockuro. Þat er allra manna mál, vina hanns oc úvina, at eingi madr í Noregi hafi betr verit at ser görr um alla luti enn Sigurdr, í þeirra manna minnom, er þá voro uppi, enn ógæfo-madr var hann um suma luti. Sva sagdi Hallr, at hann mællti fátt í pínslonom, oc svaradí fám ordom, oc fám mönnom, þó at ordi orti á hann. Enn þat segir Hallr, at hann bráz alldregi vid, er þeir pín-do hann, helldr enn þeir lysti á stock edr stein; enn þat let hann fylgía, at þat mátti vel vera of góðan dreng, þann er vel væri at þreki búinn, at sva mátti standaz píningar, at því at madr helldi munni sínom, eda brigdliz lítt vid. Enn þat sagdi hann, at alldregi brá hann máli síno, oc íafn lett-

mællt væri hönom, sem þá at hann sæti á ölbeck inni; hvarki mællti hann hærra ne lægra, eda skiál-fendra, enn sem vandi hanns var til; mællti hann allt til þess er hann andadiz, oc saung hridom or psalterio, oc letz hönom þat þyektia umfram eliun edr annara manna styrk. Enn prestur sá er þar hafdi kirkio skamt frá, let lík Sigurðar færa þannug til kirkio, sá prestur var vinur þeirra Haralldz-sona. Enn er þetta spurdiz, þá köstudo þeir reidi á hann, enn leto aptr flytia líkit þángat sem ádr hafdi verit, oc varð þá prestrinn fe fyrir at giallda. Vinir Sigurðar fóro síðan eptir líkama hanns or Danmörko sunnan med skip, oc færdó til Alaborgar, oc grófo at Mario-kirkio þar í bænóm. Sva sagdi Eiríki Ketill profastr, er varðveitti Mario-kirkio, at Sigurður væri þar grafinn. Þióstolfr Alason let færa lík Magnúsar Blinda til Oslóar, oc grafa at Hallvardz-kirkio hiá Sigurði konungi föðor sínum. Lodinn Sauprud oc Þórleif Bryniolfsson oc Kolbein leto þeir færa til Tunsbergs; enn allt lid annat grofo þeir þar.

CAP. XIII.

EYSTEINN HARALLDZ-SON KOM Í NOREG, OC
UPPHAF MAGNÚSAR HARALLDZ-SONAR.

Sigurður oc Ingi konongar höfðo þá ráðit vı vetor Noregi; þat vár kom Eysteinn vestan af Scotlandi,

hann var sun Haralldz konongs Gilla. Arni Sturlason oc Þórleifr Bryniolfsson, oc Kolbeinn Hróga höfdo farit vestr um haf eptir Eysteini, oc fylgdo hönom í land, oc helldo þegar med hann norðr til Þrándheims; tóko Þrændor vit hönom, oc var hann þegar til konongs tekinn á Eyra-þingi um Gagndaga, sva at hann skyldi hafa þridiung Noregs vit brædor sína Sigurd oc Inga. Þeir Sigurdr oc Ingi voro þá austr í landi, fóro þá menn milli þeirra kononganna, oc sætto þá at því, at Eysteinn skyldi hafva þridiung ríka. Var því trúat of faderni hauns, er Haralldr konongr hafdi til-sagt. Biadauk het módir Eysteins konongs, oc kom hon í Noreg med hönom. Magnus het hinn fiórði sun Haralldz konongs Gilla, hann fóstradi Kyrpinga Ormr; hann var oc til konongs tekinn, oc hafdi sinn fiórða lúta af landi. Magnus var veill at fótom, oc lifdi skamma ríd, oc vard sótt-daur; hanns getr Einarr Skúlason:

Aud gefr Eysteinn lydom
 eykr hialldr Sigurdr skialldar
 lætr Ingi slaug syngva
 semr Magnús frid bragna.
 Fiöl-dyrs hafa fiórir
 fólk-tialld komit alldri
 rydr bragnings kyn blódi
 brædr und sól eun ædri.

CAP. XIV.

DRÁP ÓTTARS BIRTINGS.

Eptir fall Haralldz konongs Gilla var Ingirídr Drottning gipt Ottari Birtingi, hann var lendrmadr oc höfdingi mikill, þrændskr at ætt; hann var mikill styrkdar-madr Inga konongi, medan hann var mest í barnæsko. Sigurdr konongr var eigi mikill vin Ottars, oc þótti hann vera allt hallr undir Inga konong. Ottar Birtingr var drepinn norðr í kaupánga, í einvígi um kvell, er hann geck til aptansaungs. Enn er hann heyrdi hvininn af höggino, þá brá hann upp hendi sinni oc styckio í móti höggino, oc hugdi at kastat væri snækecki at hönom, sem títt var úngom sveinom. Ottar fell vit höggít, enn Alfr Raudí son hanss kom þá gángandi í kirkiogardiinn; hann sá fall födor síns, oc sva at madr sá, er vegit hafdi födur hanss, lióp austr um kirkiona. Alfr lióp eptir hönom, oc drap hann vit saung-húss hornit, oc mællto menn at hönom hefði vel tekiz til um hefndina, oc þótti hann myklo meiri madr síðan enn ádr.

CAP. XV.

UPPHAF EYSTEINS KONONGS, HARALLDZ-SONAR.

Eysteinn konongr Haralldsson var þá inn í Pránd-

heimi, er hann spurdi fall Ottars, oc stefndi til sín bónda-lidi, hann fór út til bæiar oc vard allfiölmennr. Enn frændor Ottars oc adrir vinir kendo ráðin mest Sigurdi konongi, enn hann var þá í kaupáangi, oc voro bændor miök geystir á hendor hönom. Enn konongr baud fyrir sik skírslor, oc festi iárnburd, at sva skyldi sanna mál hanss, oc vard þat at sætt. Fór Sigurdr konongr eptir þat sudr í land, oc urdo þessar skírslor alldregi framfluttar.

CAP. XVI.

UPPHAF ORMS KONONGS-BRÓÐUR.

Ingirídr drottning gat sun vid Ivari Sneis, er kalladr var Ormr, oc síðan var kalladr konongs-bróðir; hann var madr frídr synom, oc giördiz höfdingi mikill, sem enn mun síðar getít verda. Ingirídr drottning var síðan gipt Arna á Stodreimi, hann var síðan kalladr konongs-mágr, oc voro þeirra börn, Ingi, Nicolás, Philippus í Herdslo, oc Margret, er átti Biörn búkr, enn síðan Simun Kárasun.

CAP. XVII.

ÚTFERD ERLINGS SKACKA OC RÖGN-
VALLDZ JARLS.

Erlingr het son Kyrpinga-Orms, oc Ragnhilldar dóttur Sveinka Steinarssonar. Kyrpinga-Ormr var

sun Sveins Sveinssonar, Erlendzsonar or Gerdi. Módir Orms var Ragna, dóttir Orms jarls Eilífs-sonar oc Sigrídar, dóttur Finnz jarls Arnasunar. Módir Orms Jarls var Ragnhildr, dóttir Hákonar jarls hinns ríka. Erlingr var vitr madr, oc var vinr mikill Inga konongs, oc med hanns rádi feck Erlingr Christinar, dóttur þeirra Sigurdar konongs Jórsalafara oc Málmfrídar drottningar. Erlingr átti bú á Staudlu á Sunnhörda-landi. Erlingr fór or landi oc med hönom Eindridi Ungi, oc enn fleiri lendir-menn ríkir, oc höfdo frítt lid; þeir biöggoz til Jórsalafardar, oc fóro vestr um haf til Orkneyia. Þadan fór Raugnvalldr jarl, er Kali var kalladr, oc Vilhiálmr biskop, þeir höfdo allz af Orkneyiom xv lángskip, oc sigldo fyrst til Sudreyia, oc þadan vestr til Vallandz, oc þá leid sídan, er farit hafdi Sigurdr konongr Jorsalafari út til Nörvasunda, oc heriudo vida út um Span heidna. Litlo sídar er þeir höfdo siglt út um sundin, skildiz á brott Eindridi Ungi, oc þeir er hönom fylgdo med vi skipom, oc fóro sídan ser hvarir. Enn Raugnvalldr jarl oc Erlingr Skacki hitto drómund einn í hafi, oc lögdo til ix skipom, oc bördoz vit þá; enn at lyktom lögdo þeir sneckionom undir drómundinn, báro. Þá heidnir menn ofan á þá bædi vapn oc griót, oc grytor fullar af vellanda biki oc vid-smiörvi. Erlingr lá síno skípo næst inn undir

drómundinom, oc bar fyrir utan þat skipit vapna-
burdinn heidinna manna. Þá hiuggo þeir Erlingr
raufar á drómundinom, sumar í kafi nidri, enn
sumar uppi á bordonom, sva at þeir gengo þar
inn. Sva segir Þórbiörn Skacka-skálld í Erlings-
drápo:

Hiöggo öxar eggjom
ugglaust hvatir glugga
því var nennt á nyio
Nordmenn í kaf bordi.
Eydendor sá ydrar
arnar húngrs á iárnom
vag fylvingi velar
vígskörd ofan bördot.

Audun Raudi het sá madr, stafnbúi Erlings, er
fyrstr geck upp á drómundinn; þeir unno þá dró-
mundinn oc drápo þar ógryn timer manna, oc tóko þar
ofa-fe mikit, oc unno þeir frægan sigr. Raugnvalldr
jarl oc Erlingr Skacki komo í þeirri ferd til Jór-
sala-landz, oc allt út til árinna Jórdana. Snero
þá aptr, oc fyrst til Mikla-gardz, oc leto þar eptir
skip sín, oc fóro sunnan landveg, oc helldo þá
heilo öllo, þar til er þeir komo í Noreg, oc var
þeirra ferd allmiök lofut. Erlingr þótti nú myclo
meiri madr enn ádr, hvarvetna af ferd sinni oc kvan-
fánga síno, sva var hann oc spekingr at viti, audigr
oc ættstórr, málsniallr, oc var mest hallr at allri
vinátto til Inga konongs, allra þeirra brædra.

CAP. XVIII.

FÆDDR HÁKON HERDA-BREIDR.

Sigurdr konongr fór at veizlom í Vik austr med hird sína, oc reid um bæ þann er ríkr madr átti, er Simun het. Enn er konongr reid gangnom bæ-inn, þá heyrdi hann inn í hús nockvot kvedandi sva fagra, at hönom fannz nm mikit, oc reid til hússins, oc sá iun, at þar stóð kona ein vít kvern, oc kvad vit forkunnar fagurt, er hon mól. Konongr steig af hestinom, oc geek inn til kononnar, oc lagdiz med henni. Enn er konongr fór í brott, þá vard Simun bóndi viss, hvert örindi konongs hafdi þángat verit; enn konan het Þóra, oc var verkakona Simunar bónda. Síðan let Simun vardveita kost hennar; enn eptir þat ól sú kona barn, oc var sá sveinn nefndr Hákon, oc kalladr son Sigurdar konongs; fæddiz Hákon upp med Simuni Þórbergssyni oc Gunnhildi kono hanns. Þar fædduz oc upp synir þeirra Simunar, Aunundr oc Andreas, oc unnoz þeir Hákon mikit, sva at þá skildi ecki nema hel.

CAP. XIX.

FRÁ EYSTEINI OC HÍSINGS-BÚOM.

Eysteinn konongr Haralldzson var staddr austr í Vik nærr landz-enda; hann vard ósáttur vid bændor á Reini oc Hísingsbúa, giördo þeir safnat at hönom,

enn hann hellt vit þá orrosto, oc hafði sigr; þar heitir Leikberg, er þeir börðoz; hann brendi oc miök víða um Hísing. Síðan gengo bændor til handa, oc gulldo konongi stór giöllð, enn konongr tók af þeim gisla. Sva segir Einar Skúlason:

Víkveriom gallt
 vard þannog hallt
 giörræði gramr
 gíafmíllðr oc framr
 Flest fólk vard hrætt
 áðr fengi sætt
 enn gíslar tók
 sá er giöllðin iök.

Oc enn:

Vann síklingr sótt
 við snarpa drótt
 leyfðr er lydom kær
 Leikbergi nærr.
 Reinir flyðo ríkt
 oc reiddo slíkt
 aullð festi and
 sem audlingr baud

C A P. XX.

HER-FERD EYSTEINS KONONGS HARALLDZ- SONAR.

Litlo síðarr byriadi Eysteinn konongr ferd sína or landi vestr um haf, oc sigldi þá fyrst til Kataness,
 hann

hann spurdi þá til Haralldz jarls Maddadar-sonar í Þórs-á, hann lagdi þannug til með þriár smáscútor, oc kom á þá óvara. Enn jarl hafði haft þrítögt skip, oc á nærr LXXX manna. Enn er þeir voro óbúnir við, þá fengo þeir Eysteinn konongr þegar uppgöngo á skipit, oc tóko jarl höndom, oc höfdo med ser á skip; hann leysti sik út med iij mörkom gullz, oc skillduz þeir at sva búno. Sva segir Einarr Skúlason:

Voro sogns med sára
syni Maddadar staddir
má-grennir fremz manna
máttigr tigr álta.
Þrimur skútom tók þreytir
þann jarl drasils hranna
hraustr gaf hræ-skúfs nistir
haufut sitt fraumom iöfri.

Þadan sigldi Eysteinn konongr sudr fyrir austan Skotland, oc lagdi til kaupstadar þess á Skotlandi, er Apardion heitir, oc drap þar mart manna, enn rænti stadinn. Sva segir Einarr Skúlason:

Frett hefir ec at fell
fólk brusto sveil
iöfurr eyddi frid
Apardionar lid.

Adra orrosto átti hann sudr við Hiartapoll við rid-dara-lid, oc kom þeim á flótta, oc hraud þar skip nockor. Sva segir Einarr:

Beit budlungs hiörr
 blód fell á dörr
 hird fylgdiz holl
 vid Hiartapoll.
 Huginn gladdi heit
 hruduz Engla beit
 óx vitnis vín
 um val kasta rín.

Þá hellt hann enn sudr á England, oc átti þar
 hina iij orrosto vid Hvítabæ, oc feck sigr, enn
 brendi bæinn. Sva segir Einarr:

Jók hilmir hialldr
 þar var hiörva galldr
 hiósk hilldar sky
 vid Hvítaby.
 Ríkt lek vid rann
 raudz ylgjar tann
 fekz fyrdom harmr
 fyri skóga garmr.

Eptir þat heriadi hann víða um England, enn þá
 var Stefnir konongr á Englandi; þar næst átti Ey-
 steinn konongr orrosto vit Skarpa-sker vit riddara
 nockora. Sva segir Einarr:

Drap döglingr gegn
 dreif strengiar regn
 vid Skörpo-sker
 skialld-kænan her.

Þar næst hardiz hann vid Pilavík, oc feck sigr.
 Sva segir Einarr:

Raud siklíngr sverd
 sleit gylldis ferd
 þrútt Parta lík
 í Pilavík.
 Vann vísir allt
 fyri vestan salt
 bróndr gall vit brún
 brent Lángatún.

Þar brendo þeir Lángatún, mikit þorp, oc segia menn at sá byr hafi fengit litla uppreist síðan. Eptir þat fór Eysteinn konongr brott af Englandi um haustit, oc aptr til Noregs, oc ræddo menn of þessa ferd allmisiafnt.

CAP. XXI.

FRÁ HARALLDZ-SONOM.

Fridr gódr var í Noregi aundverda daga suna Haralldz konongs, oc var þeirra samþyeki til noekorrar hlítar, medan hit forna rádoneyti þeirra lifdi. Enn þeir Ingi oc Sigurdr voro bernskir, oc höfdo þeir þá eina hird bádir, enn Eisteinn einn ser, var hann madr fullroskinn at alldri. Enn er andat var rádoneyti þeirra Inga oc Sigurdar, Sáda-Gyrdir Bárðarson, Amundi Gyrdarson, Þióstólfr Alason, Ottar Birtíng, Augmundr Svíptir, oc Augmundr Dreng, bródir Erlíngs Skacka, (lítills þótti vert um Erlíng medan Augmundr lifdi), skilldo þeir hird sína Ingi

konongr, oc Sigurdr konongr. Redz þá til fulltings vid Inga konong Gregorius, son Dags Eilífssonar oc Ragnhíldar, dóttur Scopta Augmundarsonar. Gregorius hafdi aud fiár, oc var siálfr skörúngr hinn mesti. Giördiz hann forstióri fyrir landrádom med Inga konongi, enn Ingi konongr veitti hönöm at taka af sinni eigo, slíkt er Gregorius villdi.

CAP. XXII.

FRÁ HÁTTALAGI HARALDZSONA.

Sigurdr konongr giördiz ofstopa-madr mikill, oc óeirinn um alla luti, þegar er hann óx upp, sva voro þeir Eysteinn konongr bádir, oc var þat þó nockoro nær sanni, þar sem Eysteinn var. Sigurdr konongr giördiz mikill madr oc sterkr, vaskligr madr synom, iarpr á hár, munn-liótr, enn vel at ödrom andlits-sköpom, allra manna var hann sniall-
astr í máli, oc giörvastr at ser. Þess getr Einarr Skúlason:

Snílld herra snarpa ellda
sár-flóds þars rydr blóði
gefit hefir Gud siálfr iöfri
gagn Sigurdr magni.
Sva es þá Rauma ræsir
rejd-ordr tanlor greidir
rausn vidr gramr sem gumnar
glad-mælltr þegi adrir.

Eysteinn konongr var madr svartr oc döcklitadr, helldr hárr medal-madr, vitr madr oc skynsanur. Enn þat dró mest ríki undan hönom, er hann var sínkr oc fegiarn. Hann átti Rögnö, dóttor Nicoláss Masa. Ingi konongr var þeirra mun fríðastr í andliti, hann hafði gult hár, oc helldr þunt, oc hröck miök; lítill var uppvöxtr hanns, oc traudliga mátti hann gánga einn saman, sva var visinn annar fótrinn, enn knytt var hann á herdom oc á bríngo. Hann var blídmælltr oc dæll vinom sínom, aurr af se, oc let miök höfðingia ráða med ser landráðom. Hann var vinsæll vid alþýdo, oc dró þat allt saman miök ríki undir hann oc siölmenni. Brigida het dóttir Haralldz konongs Gilla, hon var fyrst gípt Inga Hallsteinssyni Svía konongi, enn síðan Karli jarli Sónasyni í Gautlandi, enn þá Magnúsi Svía konongi; þau Ingi konongr Haralldzson voro sam-mædra. Síðast átti Brigida Birgir jarl Brosa; þau átto iiij sono, einn var Philippus jarl, annar Knútr jarl, þridi Folki, siórði Magnúss. Dætor þeirra: Ingigerdr, er átti Sörkvir Svía konongr, þeirra son var Jón konongr; Christín het önnor, þridia Margret. María het önnur dóttir Haralldz konongs Gilla, hana átti Simun Skálpr, son Hallkells Húks, Nicolás het son þeirra. Margret het hin þridia dóttir Haralldz konongs Gilla, hana átti Jon Hallkellsson, bródir Simunar. Nú giörðiz mart

í með þeim bræðrom, þess er til sundr-þyckis var, enn ec mun þó hins eins geta, er mer þickir mest-om tíðindom sætt hafa.

CAP. XXIII.

NICOLÁS CARDINALI KOM TIL LANDZ.

Nicolás Cardinali af Rómaborg kom í Noreg á dög-om þeirra Haralldzsona, oc hafdi pávinn hann sendan í Noreg. Cardinalinn hafdi reidi mikla á þeim bræðrom, Sigurdi konongi oc Eysteini, oc urdo þeir at gánga til sættir vid hann; enn hann var afarvel sáttir vid Inga konong, oc kalladi hann son sinn. Enn er þeir voro allir sáttir vid hann, veitti hann þeim at vígia Jón Birgisson til Erkibiskups í Þrándheimi, oc feck hönom klædi þat, er pallium heitir, oc mælti sva, at Erkibiskops stóll skyldi vera í Nidarósi at Kristz-kirkio, þar er Olafr konongr hinn helgi hvílir. Enn ádr höfdo lyd-biskopar einir verit í Noregi. Cardinalinn skipadi oc, at eingi madr skyldi bera vapn i kaupstödom at úsekio, nema xii menn, er fylgdir helldo med konongi. Hann bætti oc mörgo sido Noregs-manna, medan hann var í landi. Eingi hefir sá madr komit í Noreg útlendr, at allir menn metti iam-mikills, eda iam-miklo mætti ráda vid alþydo sem hann. Hann fór sudr síðan med miklar vingiafir, oc letz iafnan

mundo vera síðan enn mesti vinr Nordmanna. Enn er hann kom sudr til Rómaborgar, þá andadiz bráðliga þar pávi sá, er ádr hafði verit, enn allr Rómaborgar lydr villdi taka Nicolaum Cardinala til páva. Þá var hann vígdr til Páva, með nafni Adrianus; oc sva sögdo þeir menn, er of hanss daga komo til Rómaborgar, at alldrigi átti hann sva skýllt erindi at tala vid adra menn, at eigi mællti hann vid Nordmenn fyrst, ávallt er þeir villdo ná máli hauns. Var hann eigi lengi pávi, oc er hann nú kalladr madr heilagr.

CAP. XXIV,

JARTEGNIR OLAFS KONONGS *).

Á dögom þeirra sona Haralldz Gilla, vard sá atburdr, at madr sá, er Halldór er nefndr, vard

*) Duo, quæ sequuntur, capita, & pleraque alia similis argumenti, omnibus *Heimskringlæ* Codd. & chartaceis & membraneis ignota, soli debentur Editioni Peringskiöldianæ. A *Snorrio* non esse profecta, & res & verba loquuntur. Palam est, Peringskiöldium, cum suam Editionem moliretur, ad manns habuisse *Codicis Flateyensis* exemplar, exque ingenti illo, quem hujus libri auctor, a *Sturlæsonio* certe diversissimus, habet, miraculorum *Olafi* Regis catalogo, in festis hujus Sancti recitari forte solito, hæc mutuatum, miraculorum istas narrationes, in sua

fyrir Vindum, oc tóko þeir hann oc veitto hönom meidzlör, skáro kverkarnar oc drógo þar út túngona, oc skáro af í túngo-rótunom. Síðan sókti hann til hinns helga Olafs konongs, rendi huganom fastliga til hinns helga manns, oc bad miök grátandi Olaf konong liá ser máls oc heilso. Því næst feck hann mál oc miskun af þeim góða konongi, giördiz þegar hanns þiönusto-madr um alla sína lífdaga, oc vard dyrdligr madr oc trúfastr. Þessi iartekn vard hálfom mánaði fyrir Olafs-messo ena sídari, á þeim degi, er Nicolás Cardinal vard landfastr í Noregi.

CAP. XXV.

JARTEGNIR ÓLAFS KONONGS VID RÍKARD
PREST.

Bræðor tveir voro á Upplöndom, kynstórir menn oc fiádir vel, synir Guttorms Grábardz, Einar oc Andres, möður-bræðor Sigurdar konongs Haralldzsonar, átto þar eignir oc ódul stór. Systur átto þeir, frída helldr at yfirsyn, enn cigi þó til forsiála vit vandra manna ordi, sem síðan reyndiz; hafði

tempora digestas, historiæ opportunis locis inseruisse. Cujus consilium secutus est *Schöningius*, nequid in hac Editione, qvod Snorriano operi uspiam attextum, lector desideraret. Id qvod semel hic monuisse suffecerit.

hon blíðlæti mikit við prest einn Enskan, er Rík-
andr het, er þar var heimilis-vistom með bræðrom
hennar, og giördi hon hönom mart í villd, og opt
mikit gagn, fyrir sakir góðvilja. Þat bar eigi betr
at, enn um kono þá fór og flaug ferligt ord; síðan
er þat var á málrcíð komit, þá hugdo þat allir
menn á hendur prestinom, og sva bræðor hennar,
þegar er þeir urdo þess varir, þá leto þeir hann
líklíkastan til fyrir alþydo. Í þeirri miklo blíðo,
er þeirra var á meðal, var þeim síðan mikill ófar-
nadr, sem eigi var örvænt, er þeir bræðor þögdo
um leyndri væl, og leto eigi á sér finna. Enn um
dag nockorn kölludo þeir prestinn til sín, enn hann
vardi einskis af þeim nema góds eins, teygdo hann
heiman með sér, og sögduz fara ætla í annat herat,
og sysla þar nockot þat er þeir þurftu, og báðu
hann fylgia sér. Þeir höfðu með sér heima-mann
sinn, er vissi þessi ráð með þeim. Fóro þeir á
skipi eftir vatni því er Rönd heitir, og framm með
vatns-ströndinni, og lendo vit nes þat, er Skipti-
sandr het; þeir gengo þar á land upp, og leko
stund nockra. Þá fóro þeir í nockorn leyndan
stad, og báðu verkmanninn líósta hann öxarhamars-
höggi; hann sló prest, sva at hann lá í svíma; enn
er hann vitkadiz, mællti hann: hví skal nú sva
hart vit mik leika. Þeir svörodo; þótt eingi segdi
þer, þá skaltu nú finna, hvat þú hefir giört; báro

síðan sakir á hendur hönom; hann syniadi oc mællti, þáð Guð skipta á milli þeirra, oc hinn heilaga Ólaf konong. Síðan bruto þeir sundr fót-leggi hanns; þá drógo þeir hann milli sín til skógar, oc bundo hendur hanns á bak aptr. Síðan laugdo þeir streng at höfði hönom, oc þilio undir herdar oc höfudit, oc setto í sneril, oc snero at strenginn. Þá tók Einar ellri hæl, oc setti á auga prestz, oc þíón hanns stóð yfir, oc laust á með öxi, oc hleypti út augano, sva þegar stöck nidr á kampinn. Enn þá setti hann hælinn á annat augat, oc mællti vit þíóninn: líósto mun kyrrara; hann giörði sva, þá skautz hælinn af auga-steininom, oc sleit frá hönom hvarminn. Síðan tók Einar hvarminn með hendi sinni, oc hellt af upp, oc sá at auga-steinninn var þar. Þá setti hann hælinn vit kinnina út, enn þíóninn laust þá, oc sprack auga-steinninn á kinnarbeinit nidr, þar er þat var hæðst. Síðan opnudo þeir munn hanns, oc tóko túnguna, drógo út oc skáro af, enn síðan leysto þeir hendur hanns oc haufut. Þegar er hann vitkadiz, þá vard hönom þat fyrir, at hann lagdí augasteinana upp vit brárnar í stad sinn, oc hellt hann þar vit bádom höndom sem hann mátti. Enn þá báro þeir hann til skips, oc fóro til bæiar þess, er heitir á Sæheimrod, oc lendo þar. Þeir sendo mann til bæiarins at segia, at prestur lá þar á skipi við ströndo,

Medan sá madr var uppfarinn, er sendr var, þá spurdo þeir, ef prestur mætti mæla, enn hann bladradi túngonni, oc villdi vitleita at mæla. Þá mællti Einar vit bróðor sinn: ef hann rettiz vit, oc grær fyrir túngo-stúfinn, þá kemr mer þat í hug, at hann muni mæla. Síðan klipto þeir túngo-stúfinn med taung, oc togudo, oc skáro tvisvar þadan frá, oc í túngo-rótunom hit þridia sinn, oc leto hann þar liggia hálf-daudan. Húsfreyia þar á bænom var fátæk, enn þó fór hon þegar, oc dóttir hennar med henni, oc báro hann heim til húss í mötlom sínom. Síðan fóro þær eptir presti, enn er hann kom þángat, þá batt hann sár hanss öll, oc leito-do þau hönom hæginda, slíkra hvörra þau máttu. Hann lá hinn sári prestur aumliga búinn, vilnadiz iafnan Guds náðar, oc tortrygdi þat ecki, bad Gud mállaus med hugrenningo oc sútfullo hiarta, því öllu traustara, er hann var siúkari, oc rendi huganom til þess millda konongs, Olafs hinns helga, Guds dyrdlings, oc hafdi hann ádr heyrt mart sagt af hanss dyrdar-verkom, oc trúði því öllu hvatara á hann af öllu hiarta til allrar hiálpar í sínom naudom. Enn er hann lá þar lami, oc öllu megni numinn, þá gret hann sárliga oc stundi, oc bad med sáro briósti þann dyrliga Olaf konong duga ser. Enn epter midia nótt þá sofnadi prestur hinn sári, þá þóttiz hann siá mann göfugligan koma til

sín, og mæla vit sik: illa ertu nú leikinn, Ríkarðr felagi; se ee nú at eigi er mátttrinn mikill. Hann þóttiz sanna þat. Þá mællti sá og vit hann: miskunar ertu þurfi. Prestur svarar: ee þyrfti miskunar almáttugs Guds, og hinns heilaga Olafs konungs. Hann svarar: þú skalt hafa; og því næst tók hann túngo-stúfinn, og heimti sva hart, at prestinnom varð sárt vit. Því næst strauk hann hendi sinni um augo hönom, og um bein, sva um adra limi er sárir voro. Þá spurði prestinn, hver þar væri? hann leit vit hönom og mællti: Olafur er her norðan or Þrándheimi; enn síðan hvarf hann í brott; enn prestriinn vaknadi alheill, og þegar tók hann at mæla: sæll em ee nú, sagði hann; almáttkom Gudi se þöck, og hinom heilaga Olafi konungi, hann hefir græddan mie. Enn sva hörmuliga sem hann var áðr leikinn, sva bráðar bætor feek hann allrar þeirrar óhamíngio, og sva þótti hönom, sem hann hefði orðit hvarki sár ne siúkr; túngan heil, augun bæði í lag komin, með biörtom skygnleik, beinbrotin og öll önnor sár gróin edr verklaus, fengit ena besto heilso. Enn til iartegna var, at augo hans höfðu verit útstúngin, þá greiðu ör hvítt á hvarmi hvöro-tveggja, til þess at síá mætti dyrdir þess hins gaufga konungs, á þeim manni, er sva var aumliga búinn.

CAP. XXVI.

INGI KONONGR OC SIGURDR KONONGR

ÁTTÓ ÞÍNG Í HÓLMÍ.

Eysteinn oc Sigurdr konongr höfdo ordit ósáttir fyrir þá sök, at Sigurdr konongr hafði vegit hirdmenn Eysteins konongs, Haralld inn Víkverska, er hús átti í Biörgvin, oc annan Jóan prest Tabardzson, oc Biarna Sigurdarson; oc fyrir þá sök lögdo þeir med ser sættar-stefno um vetrinn á Upplöndom. Þeir sátu lengi ij á tali. Enn þat kom upp af hiali þeirra, at þeir skyldo hittaz í Biörgun allir brædor eptir um sumarit. Þat fylgdi því máli, at þeir villdo at Ingi konongr hefði bú ij eda iij, oc sva mikil önnor audæfi, at hann mætti hallda þri-átigi manna med ser; oc letz hann eigi þickia hafa heilso til, at vera konongr. Ingi konongr oc Gregorius spurdo þessi tíðindi, oc fóro til Blörgyniar, oc fiölmento miök. Sigurdr konongr kom þar litlo sídar, oc hafði hann lid syno minna. Þá höfdo þeir Sigurdr oc Ingi verit xix vetr konongar yfir Noregi. Eysteinn konongr var seinni austan or Víkinni, enn þeir nordan. Þá let Ingi konongr blása til þings út í hólmi, oc koma þeir þar Sigurdr oc Ingi, oc fiölmenna mikit. Gregorius hafði ij lángskip, oc vel nió-tigo manna, er hann feek allar vistir; hann hellt betr húskarla sína, enn adrir

lendir-menn, þvíat hann drack alldri sva í seytningom, at eigi drycki húskarlar hanss allir með hönom. Hann geck með hiálm gulldrodinn á þíngit, oc allt lid hanss var hiálmát. Ingi konongr stóð upp, oc sagdi mönnom frá, hvat hann hafði spurt, hvernog bræðor hanss villdo vit hann scripta oc setia hann af ríki, oc bad ser lids. Enn alþyda manna gördo góðan róm at máli hanss, oc qváðoz hönom vilia fylgia.

CAP. XXVII.

FRÁ GREGORIUS DAGS-SYNI.

Þá stóð upp Sigurdr konongr, oc taladi: taldi þat ósatt, er Ingi konongr kendi hönom oc þeim, kvad Gregorius slikt uppsetia, oc kvad eigi skylldo lángt til, at sá skyllði fundr þeirra verda, ef hann mætti ráða, at hann mundi steipa hiálminom þeim hinom gull-rodna, oc lauk sva síno máli, at hann kvad þá eigi lengi skylldo báða lifa. Gregorius svarar: kvedz þat ætla, at hann þyrfti lítt at fysaz þess, oc letz vit því búinn vera. Fám dögom síðarr var veginn húss-karl Gregoriuss úti á stræti, oc vá húss-karl Sigurdar konongs. Þá villdi Gregorius gánga at þeim Sigurdi konongi, enn Ingi konongr latti, oc mart annara. Enn eitt kvölld, er Ingirídr drottning, móðir Inga konongs, geck frá aptan-saung,

kom hon at, þar er þá var höggvinn Sigurdr Skrúðhyrna, hann var hirdmadr Inga konongs, oc var þá gamall, oc hafdi mörgom konongom á hendi verit; enn þeir höfdo vegit hann hirdmenn Sigurdar konongs, Hallvardr Gunnarsson oc Sigurdr, son Eysteins Trapala, oc kendo menn ráðin Sigurdi konongi. Þá geck hon þegar á fund Inga konongs, oc sagdi hönom, oc kvad hann lengi mundi lítinn konong, af hann villdi eigi atferaz, þótt hirdmenn hauns væri drepnir, annar at öðrom, sva sem svín. Konongrinn reiddiz vid átölur hennar; oc er þau hnipdoz vid, þá kom Gregorius inn gángandi hiálmadr oc bryniadr, oc bad konong eigi reidaz, kvad hana satt mæla; enn ec em her kominn til lids vid þic, sagdi hann, ef þú villt veita Sigurdi konongi atgöngo, oc er her meir enn c manna hiálmadir oc bryniadir, oc munom ver þadan at þeim sækia, er öðrom þickir verst. Enn flestir lötto, oc kvádo Sigurd konong mundo bæta vilia óhapp sitt. Enn er Gregorius sá, at leitaz mundi atförin, þá mællti hann vid Inga konong þannin: Sva bleidia þeir af þer mennina, drápo fyrst minn húss-karl fyrir skömмо, enn nú hirdmann þinn, enn síðan muno þeir vilia veida mik, eda annan lendan-mann þann, er þeim þickir þer mest afnám í vera, er þeir siá at þú færiz eigi at, enn taka þic síðan af konongdóminom, eptir þat

er vinir þínir ero drepnir. Nú hverngan veg sem adrir lendir-menn þínir vilja, þá vil ec eigi bíða lengr, sem naut höggsins, oc skulom vit Sigurdr konongr kaupa saman þessa nótt, at því kaupi sem þá má verða; er þat bæði at þú ert lítt at tekinn, fyrir sakir vanheilso þinnar, enda ætla ec lítinn viliann til at hallda vini þína. Enn ec em nú al-búinn at gánga til fundar við Sigurd konong hedan, þvíat her er merki mitt úti í gardinom. Ingi konongr stóð þá upp, oc kalladi til vapna sinna, oc bad þá hvern mann búaz, er hönom villdi fylgia, oc kvad þá eigi tíóa at letia sik; letz lengi hafa undan eirt, let þá mundo verða at sverfa til stáls med þeim.

CAP. XXVIII.

FALL SIGURDAR KONONGS.

Sigurdr konongr drack í gardi Sigrídar Sætu, oc bióz við, oc ætludo menn at eigi mundi verða af atgaungonni. Þá geck Ingi konongr at gardinom med lid sitt ofan frá Smidabúdom, Arni konongsmágr utan frá Sandbrú, Aslákr Erlendzson or gardi sínom, enn Gregorius af strætino, oc þótti öllom þadan verst. Þeir Sigurdr konongr scuto miöc or lopta-gluggom, oc bruto ofna, oc báro griótit á þá. Þeir Grigorius híuggo upp gardzhlidit, oc fell þar

Einarr,

Einarr, son Laxa-Páls, í hlidino af lidi Sigurðar konungs, oc Hallvarðr Gunnars-son, hann var scotinn í lopt inn, oc harmadi hann eingi madr. Þeir hiöggo húsin, oc geck lidit miök af hendi Sigurði konungi oc til grida. Þá geck Sigurðr konongr á lopt eitt, oc villdi beida ser hlióds, enn hann hafði gullroðinn skiölld, oc kendo menn hann, oc villdo þeir eigi hlyda hönom, enn sento at hönom sva þyekt, sem í drífo sæi, oc mátti hann eigi þar vera. Enn þá er lidit var gengit af hendi hönom, oc menn hiöggo húsin miök, þá geck hann út þadan, oc Þórðr Húsfreyia med hönom, hirdmadr hanns, Víkverskr madr, oc villdo þannug sem Ingi konongr var fyrir, oc kalladi Sigurðr á Inga konong bróðor sinn, at hann selldi hönom grid; enn þeir váro þegar höggvur bádir, oc fell Þórðr Húsfreyia þar med ordlofi miklo. Sigurðr konongr var iárdardr at Kristz-kirkio hinni forno í hólmi úti. Ingi konongr gaf Gregorius skip þat, er Sigurðr konongr hafði átt. Þar fell mart manna, þótt ec nefni fá, af lidi Sigurðar konungs, oc sva af Inga konungs lidi; enn iiij menn af Gregoriuss lidi, oc sva af þeim er med hvarigom váro, oc urdo þeir fyrir scotom á bryggiom nidri, eda á scipom úti. Þeir bördoz xiv nóttom fyrir Jóansmesso-dag baptistæ, enn þat var friádagr. Enn ij nóttom eda

iiij sídarr, kom Eysteinn konongr austan með xxx skipa, oc hafði þar Hákon, son Sigurðar konongs, bróðor-son sinn í för með ser. Eysteinn fór eigi til bæiarins, oc lá í Flórovagom, enn menn fóro medal, oc villdo sætta þá; enn Gregorius villdi at þeir færi út at þeim, oc kvad eigi sídarr betra mundi, kvadz hann mundi vera höfðingi fyrir; enn þú konongr far eigi; scortir oss nú eigi lid til. Enn margir lötto, oc tókz af því eigi förin. Enn Eysteinn konongr fór austr aptr í Víkina, enn Ingi konongr norðr í Þrándheim; oc voro þeir þá sáttr at kalla, oc hittuz þó eigi siálfir.

CAP. XXIX.

FRÁ GREGORIUS DAGS-SYNI.

Gregorius Dagsson fór austr litlo sídarr enn Eysteinn konongr, oc var uppi á Höfundi at Brattzbergi, at búi síno, enn Eysteinn konongr var inni í Oslo, oc let draga scip sín meir enn ij vikur sævar at ísi, þvíat ís-lög voro mikil í Víkinni. Eysteinn konongr fór upp á Höfund, oc villdi taka Gregorius, enn hann varð varr vit, oc fór undan upp á Þelamörk með níotygi manna, oc þadan norðr um fiall, oc kom ofan í Hardángri, oc fór síðan í Edni til Stodlo til búss Erlíngs Skacka, enn hann var farinn norðr til Biörgyniar, enn Kristín kona

hanns, dóttir Sigurðar konungs, var heima, oc baud Gregorius slikt allt, er hann villdi hafa þadan, oc feek Gregorius þar góðar vidtökor. Hann hafði þadan á braut lángeip er Erlingr átti, oc allt þat er hann þurfti. Gregorius þackadi henni vel, oc let henni hafa ordit stórmanuliga, sem von var at. Gregorius fór þá til Biörgyniar, oc funduz þeir Erlingr, oc þótti hönom Kristín vel hafa giört.

CAP. XXX.

SÆTT INGA KONONGS OC EYSTEINS
KONONGS.

Síðan fór Gregorius Dagsson norðr til Þrándheims, oc kom þar fyrir Jól. Ingi konongr varð hönom inn fegnasti, oc bað hann hafa slikt allt af sinni eign, er hann villdi. Eysteinn konongr brendi bæ Gregoriuss, oc hió bú hanns; enn naust þau er Eysteinn konongr hinn ellri hafði göra látit norðr í Kaupáangi, er mestar gersimar voro, þá voro brend um vetrinn oc skip góð med, er Ingi konongr átti, oc var þat verk it óvinsæla, enn ráðin voro kend Eysteini konongi, oc Philippus Gyrdarsyni, fóstbróðor Sigurðar konungs. Um sumarit eptir fór Ingi konongr nordan, oc gördiz sem fiölmænnastr, enn Eysteinn konongr sunnan, oc safnaði hann ser lidi. Þeir hittoz austr í Seleyiom, fyrir norda

Líðandi, oc var Ingi konongr miklo fiölmennari; var þá vit siálfst, at þeir mundi beriaz. Enn þeir sættuz þó, oc vard þat at sætt, at Eysteinn konongr festi at giallda hálfan fimta tug marka gullz; enn Ingi skyllði hafa xxx marka, fyrir þat er Eysteinn konongr hafði ráðit skipa brennonni, oc sva naustanna; enda skyllði Philippus vera útlægr, oc sva þeir allir er at brennonni höfðu verit; þeir memm skyllðu oc vera útlægir, er sannir urdo at áverkom vit Sigurd konong, þvíat Eysteinn konongr kendi þat Inga konongi, at hann helldi þá menn; enn Gregorius skyllði hafa xv merkor gullz fyrir þat er Eysteinn konongr brendi fyrir hönom. Eysteini konongi líkadi illa, oc þótti nauda-sætt vera. Ingi konongr fór austr í Vík fra stefnonni, enn Eysteinn konongr norðr í Þrándheim. Síðan var Ingi konongr í Víkinni, enn Eysteinn konong norðr, oc hittuz þeir eigi; enn þau ein fóro ord milli þeirra, er eigi voro miök sáttgiarnlig; oc sva let hvartveggi drepa vini annars, enn Eysteinn konongr gallt eigi feit; kendi oc þat hvarr öðrom at eigi efndi þat er mællt var. Þeir Ingi konongr oc Gregorius spaundo miök líð undan Eysteini konongi; voru í því líði Bárði Standali Bryniólfsson, oc Simun Scálpr, son Hallkels Húks, Halldor Bryniólfsson, oc Jóan Hallkelsson, oc mart annara lendramanna, þótt eigi nefnom ver.

CAP. XXXI.

FRÁ INGA KONONGI OC EYSTEINI.

Þá er lidnir voro ij vetr frá falli Sigurdar konongs, drógo bádir konongar her saman; Ingi konongr austan or landi, oc feck hann átta-tigi scipa, enn Eysteinn konongr nordan, oc feck hann hálfan fimta tög skipa. Þá hafði hann dreka hinn mikla, er Eysteinn konongr Magnússon hafði giöra látit eptir orminom lánga, oc höfdo þeir allfrídt lid oc mikit. Ingi konongr lá skipom sínom sudr vid Mostr, enn Eysteinn konongr litlo nordarr í Græninga-sundi. Eysteinn konongr sendi sudr til móts vid Inga konong Aslák únga Jónsson, oc Arna Sturluson Snæbiarnarsonar; þeir höfdo eitt skip. Enn er Ingamenn kendo þá, lögdo þeir at þeim, oc drápo mart manna af þeim, tóko skipit oc allt þat er á var, oc hvert fat þeirra. Enn þeir Aslákr oc Arni, oc nockorir menn med þeim, komoz undan á land upp, oc fóro til fundar vit Eysteinn konong, oc sögdo hönom hvernog Ingi konongr hafði fagnat þeim. Eysteinn konongr hafði þá hús-þing, oc sagði mönnom hvern ófrid þeir Ingi konongr gördo mönnom hanns, oc bad lids-menn ser fylgia, oc höfom ver lid sva mikit oc frítt, at ec vil hvergi undan flyia, ef þer vilit fylgia mer. Enn eingi vard rómr at máli hanns. Hallkell Húkr var þar,

enn synir hanns bádir með Inga konungi Simun og Jon. Hallkell svarar, svo at miök margir menn máttu heyra: fylgi gullkistor þínar þer nú, og veri land þitt.

CAP. XXXII.

DRÁP EYSTEINS KONONGS.

Um nóttina eptir röro þeir á brot mörgom skipom á laun, sumir til lags við Inga konong, enn sumir til Biörgyniar, enn sumir í fiördo inn. Enn at morni er lióst var, þá var konongr x skipom einom eptir; þá let hann þar eptir drekann mikla, þvíat hann var þúngr undir árom, og fleiri skipin leto þeir eptir, hiuggo drekann miök, og svo hiuggo þeir nidr munngát sitt, og allt þat er þeir máttu eigi með sér hafa, þá spillto þeir. Eysteinn konongr gekk á skip Eindrida Jóássonar Mörnefs, og fóro þeir norðr, og inn í Sogn, og þaðan it efra austr í Vík. Ingi konongr tók skipin, og fór með austr it ytra í Víkina. Eysteinn konongr var þá fyrir austan Follð, og hafði nær xij hundrut manna. Þá sá þeir skipa-lid Inga konongs, og þóttos þeir eigi lid hafa til vidtöko, og hleypdo á scóg undan; þá flydi á sinn veg hverr, svo at konongr varð vit annan mann. Þeir Ingi konongr urdo þá varir við farar Eysteins konongs, og svo þat at hann var fámennr; þeir fóro þá at leita. Simun Scálpr hitti

konong, er hann geck undan hrísrunni einom at þeim. Simun heilsadi hönom: heill lávarðr, sagdi hann. Konongr sagdi: vetka oc nema þú þickiz nú minn lávarðr. Simun mællti: þat er nú sem göriz. Konongr bad at hann skyldi hönom undanscióta, kvad hönom þat byria, þvíat lengi hefir med ockr vel verit, þó at nú se annan veg. Simun kvad þá eigi myndo or því verda. Konongr bad þá, at hann skyldi hlyda messo ádr, oc sva var gört. Síðan lagdiz Eysteinn konongr nidr á grúfo, oc breiddi hendornar frá ser út, oc bad sik höggva í kross medal herdanna, kvad þá skyldo reyna, hvert hann mundi þola iárn edr eigi, sem þeir höfdo sagt lags-menn Inga konongs. Simun mællti vid þann er höggva skyldi kononginn, bad hann tilráða, kvad konong hellzt ílengi þar hafa kropit um lyng; var hann þá höggvinn, oc þótti verda vid prydiliga. Lík hans var flutt til Fors, enn fyrir sunnan kirkio undir breckunni var lík hans náttsett. Eysteinn konongr var iardadr at Forskirkio, oc er leg hans á midio kirkiogólfi, oc breidt yfir kaugr, oc kalla menn hann helgan. Þar sem hann var höggvinn, oc blód hans kom á iörd, spratt upp brunnr, enn annar þar undir breckonni, er lík hans var náttsett. Af hvarotveggia því vatni þickiaz margir menn bót fá oc hafa feugit meina sinna. Þat er sögu Víkveria, at margar iartegnir

yrði at leidi Eysteins konongs, ádr óvinir hanns steypiti á leiddit hunds sodi. Simun Scálpr var it mesta óþockadr af verki þesso, oc var þat alþydomál; enn sumir sögdo, at þá er Eysteinn konongr var handtekinn, at Simun sendi mann til fundar vit Inga konong, enn konongr bad Eystein eigi koma í augsyn ser. Sva hefir Sverrir konongr rita látit, enn þannig segir Einarr Skúlason:

Mun sá er mordi vandiz
margillr oc sveik stilli
síd af slíkom rádom
Simun Scálpr of hiálpaz.

XV.

SAGAN AF
HÁKONI HERDA-BREID.

CAP. I.

UPPHAF HÁKONAR HERDA-BREIDS.

Hákon, sun Sigurðar konongs, var tekin til höfðingia yfir flokk þann, er ádr hafði fylgt Eysteini konongi, oc gáfo flocks-menn hönom konongs-nafn; þá var hann x vetra. Þar voro þá með hönom Sigurðr, sun Hávardz Hauddz af Reyri, oc þeir

Andres oc Aunundr, fóstbræðor Hákonar konongs, Simunar synir, oc mart annarra höfðingia oc vina Eysteins konongs oc Sigurðar konongs. Þeir fóro fyrst upp á Gautland. Ingi konongr kastadi sinni eign á þat allt er þeir átto eptir í Noregi, oc görði þá útlaga. Ingi konongr fór þá norðr í Víkina, oc var þar, enn stundom norðr í landi. Gregorius Dagsson var í Konongahello vid háskann, oc hafði allmikit lid oc frítt, oc varði þar landit.

CAP. II.

FRÁ GREGORIUS DAGS-SYNI.

Eptir um sumarit komo þeir Hákon konongr af Gautlandi, oc fóro til Konongahello, oc höfðu allmikit lid oc frítt. Gregorius var þar í bænom, oc stefndi þing fiölment vid bændor oc bæiarmenn, oc krafði ser lids; hönom þóttu menn þat lítt ræma, oc letz hann illa trúa þeim. Þá fór Gregorius brott vid ij skipom inní Víkina, oc var all-ógladr, oc ætladi til móts vid Inga konong, þvíat haun hafði þat spurt, at Ingi konongr fór med her mikinn nordan um Víkina. Enn er Gregorius var skamt norðr kominn, þá mætti hann þeim Simuni Scálp oc Halldori Bryniólfssyni, oc Gyrði Amundasyni, fóstbróðor Inga konongs. Gregorius var þeim seginn miök oc hvarf þá aptr, oc þeir allir saman,

oc höfdo xj skip. Enn er þeir röro upp til Konongahello, þá höfdo þeir Hákon þing fyrir utan bæinn, oc sá för þeirra. Þá mællti Sigurdr af Reyre: Nú er Gregorius feigr, er hann scr í hendor oss med fá lidi. Gregorius lagdi at landi gagnvart bænom, oc villdi bída Inga konongs, þvíat hanns var von, enn hann kom eigi. Hákon konongr bióz vid í bænom, oc let Þórliót Scaufoscalla vera höfðingia í lidi því, er var á kaupskipom þeim er fluto fyrir bænom, hann var víkingr oc ráusmadr. Enn Hákon konongr, oc Sigurdr oc alþydan var í bænom, oc fylkdo á bryggionom, þvíat allir menn höfdo þar gengit undir Hákon konong í bænom.

CAP. III.

FLÓTTI HÁKONAR KONONGS.

Þá röro þeir Gregorius upp eptir ánni, oc leto hefia skipin ofan fyrir straumi at þeim Þórlióti, oc þeir scutuz um bríd, þar til er Þórliótr lióp fyrir bord oc hanns felagar, voro sumir drepnir, enn sumir komuz á land. Þá röro þeir Gregorius at bryggionom, oc þegar let Gregorius scióta upp bryggiom á síno skipi, undir fætor þeim Hákonar-mönnom. Þá fell sá madr er merki hanns bar, er hann ætladi til uppgöngo. Þá kyaddi Gregorius til at taka upp merkit Hall, sun Audunar Hallzsunar; hanu giörði

sva, oc bar síðan merkit upp á bryggior, enn Gregorius geek þegar upp eptir hönom, oc seaut skilddi fram yfir höfud hönom, oc hlífdi sva báðom þeim. Enn þegar er Gregorius kom upp á bryggionar, oc Hákonar-menn kendo hann, þá opudo þeir, oc gafz rúmit þegar tva vega. Enn er fleira kom lidit upp af skipunom, þá sótti Gregorius með síno lido hart fram. Enn Hákonar-menn opudo í fyrsto, oc runno því næst upp í bæinn. Enn þeir Gregorius fylgdo þeim fullvel, sva at þeir ráko þá tysvar upp or bænom, oc drápo mart af þeim. Eingi var för scörugligri enn sú at máli alþydo, er Gregorius fór, fyrir því at Hákon hafdi meirr enn xl hundrut manna, enn Gregorius eigi öll cccc. Þá mællti Gregorius við Hall Audunarson eptir orrostona: margir menn þickia mer miúkari í sóknom enn þer Islendingar, þvíat þer erut óvanari enn ver Noregs-menn, enn eingir þickia mer vapndiarfari enn þer. Þá kom Ingi konongr litlo síðarr, oc let drepa margga menn, þá er vit Hákon höfdo tekit, enn suma let hann se giallda, enn hann brendi bæi fyrir sumom, enn suma rak hann or landi, oc giörði þeim mart illt. Hákon flydi þá fyrst uppá Gautland undan við öllo lidino, enn fór um vetrinn eptir it efra norðr í Þrándheim, oc kom þar fyrir Þáskir, oc tóko Þrændir vel vit hönom, þvíat þeir höfdo íafnan þíónat undir þann seiöll. Sva er sagt, at

Þrændir tóko Hákon til konongs, at hafa födrleifð sína, þridiúng Noregs vit Inga konong. Ingi konongr var í Víkinni oc Gregorius, oc villdi Gregorius fara at þeim norðr, enn margir lötto, oc vard þat eigi á þeim vetri.

CAP. IV.

DRÁP GYRDAR OC HÁVARDZ.

Hákon konongr fór nordan um várit frá Þrándheimi, oc hafði nær xxx skipa, enn menn hansns fóro fyrr vit viij skipom, oc heriudo á Mæri hvarritveggio. Engi madr mundi fyrr heriat hafa verit milli kaupánga. Jón, son Hallkels Húks, safnadi bóndalidi, oc fór at þeim, oc tók Kolbein Oda, oc drap hvert mannsbarn af skipi hansns. Síðan leitaði hann hinna, oc hitti þá á vij skipom, oc börðoz þeir, enn Hallkell fadir hansns gördi eigi fara til móts vid hann, sem þeir höfdo vidmæltz. Þar fell mart góðra bónda, enn Jón vard siálfr sár. Hákon fór sudr til Biörgynar vit lidi síno, enn er þeir komo í Stiórvellto, þá spurdo þeir at Ingi konongr oc Gregorius váro austan kómnir fám nóttom áðr til Biörgynar, oc þordo þeir þá ecki þannug at hallda. Þeir sigldo þá sudr of Biörgyn et ytra, oc hitto þá á iij skipom lagsmenn Inga konongs, er seinui höfdo ordit austan. Þar var Gyrdir Amunda-

son, fóstbródir Inga konongs, hann átti Gyridi, systor Gregoriuss, oc enn Gydr laugmadr Gunnhill-darson, þridi Hávarðr Klíningr; enn Hákon konongr let þá drepa Gyrdi Amundason, oc Hávarð Klíning, enn hann hafði með sér Gyrd lögmann sudr, oc fór síðan austr í Víkina.

CAP. V.

FRÁ RÁDAGIÖRD.

Enn er Ingi konongr spurdi þat, þá fór hann austr eptir þeim, oc hittuz þeir austr í Elfi. Ingi konongr lagði upp í ána eptir enni nyrðri kvísl, oc giörði niósn fyrir sér upp til þeirra Hákonar, enn hann lagði at landi út við Hising, oc beid þar niósnarinnar. Enn er niósnar-menn komo aptr, þá gengo þeir til konongs, oc sögdo at þeir höfdo set lid Hákonar konongs, oc alla scipan þeirra, sögdo at þeir lágo upp vit stikin öllo lidino, oc tengdo skutstafna sína vit stikin; þeir hafa ij austrfarar-knörro, oc hafa þeir þá lagt yzta skipanna; á knörr-unom voro hún-kastalar fram í stafni á bádom. Enn er þetta spyrr Ingi konongr hvern vidrbrúnad þeir höfdo, þá let hann blása lidino öllo til hússþíngs, oc er þíng var sett, þá leitar konongr ráds vit menn, oc kvedr at því Gregorius Dagsson, oc Erlin Skacka mág sinn, oc adra lenda-menn oc

skip-stiðrnarmenn, oc segir allan vidrbúnað þeirra Hákonar-manna. Þá svarar Gregorius Dagsson fyrstr, oc birti sinn vilia, oc segir sva: fundir ockar Hákonar hafa atboriz noekorom sinnom, oc hafa þeir optaz haft meirra lid, oc fengit þó inn minna lut í oekrom vidskiptom. Enn nú höfom ver miklo meira lid, oc mun þat nú þickia likligt þeim mönnum er fyrir scömmo hafa mist fyrir þeim göfugra frænda sinna, at her muni nú vel bera til um hefudir, þvíat þeir hafa nú lengi ádr rekiz undan oss í sumar; höfom ver þat opt mællt ef þeir bidi var, sva sem nú er sagt at vera muni, at ver munðim hætta til fundar vit þá. Nú er þat at segia frá míno scaplyndi, at ec vil leggja til orrosto vit þá, ef þat er eigi í móti konongs vilia, þvíat ec ætla enn, sem fyrr hefir verit, at þeir muni verða fyrir at láta, ef ver leggiom scellega at þeim; mun ec þar tilleggia, er öðrom þickir torsóttligast. At rædo Gregoriuss varð mikill rómr, oc letuz allir búnir at leggja til orrosto vit þá Hákon. Var þá róit öllom skipom upp eptir ánni, til þess er hvarir sá adra, þá víkia þeir Ingi konongr af árstrauminom út undir eya. Atti konongr þá enn tal vit stýrimenn alla, oc bad þá skipa til atlögo, oc kvaddi þá at Erling Skacka, sagði sem satt var, at eingi madr var í því lidi vitrari, ne kænni í orrosto, þó at sumir væri enn meiri ákæfa-menn; veik konongr

þá enn rædonni til fleiri lendra-manna, oc nefndi suma á nafn, enn lauk sva rædo sinni, at hann bad þat hvern tilleggia, er hann hellz sæi at rádi gegndi, enn síðan alla saman verda á eitt sátta.

CAP. VI.

TALA ERLINGS SKACKA.

Erlingr Skacki svarar rædo konongs: skylldr em ec, herra, at þegia eigi vit rædo ydarri, enn ef þer vilit forvitnaz hvat mín rádagjörd mun vera, þá scal ec yður þat láta heyra: þessi ætlan er nú er stefnd, er þvert frá míno scapi, þvíat þetta kalla ec vera ósæro, at beriaz vid þá at sva búno, þótt ver hafim lid mikit oc frítt; ef ver skulom veita þeim atlögo, oc róa árstraum þenna í mót, þá er iij menn róa í hálfrymi, þá verdr einn at róa, enn annar at hlífa þeim; hvat er þá, nema einn þridi-úngr lids vors verdr til at beriaz? lítz mer sva sem óvígliga muni þeir komaz vit orrosto, er vit árarar sitia, oc bökom horfa vit úvinom sínom. Nú gefit mer tómstund til rádagjörðar, enn ec heit því þar í mót, at ec scal þat ráð þar tilfinna, fyrr enn iij dagar se lidnir, at hógligar sculom ver vitkomaz at leggja á fund þeirra. Oc fannz þat miök í ordom Erlings, at hann latti atlögunnar; oc eigi at síður eggjudo margir adrir, oc kvádo þá Hákon mundo

hlaupa á land upp, enn nú sem fyrr, oc höfom ver þeirra þá eigi, sögdo þeir, enn þeir hefa nú lítit lid, oc höfom ver nú ráð þeirra allt í hendi. Gregorius lagdi fátt til, oc sneiddi þó sva til, sem Erlingi gengi miök þar til, er hann latti atlögunnar, at bann villdi þau ráð ónyta, er Gregorius hafði tillagt, helldr enn hitt, at hann kynni þetta giörr at síá enn allir adrir.

CAP. VII.

FRÁ LIDI HÁKONAR KONONGS.

Íngi konongr mællti þá til Erlings: mágr, sagði hann, nú viliom ver þínom ráðom framfara, hvern-og háttu skal atlögunni. Enn fyrir því at þess ero ráðamenninir fúsari, þá sculo ver nú í dag at þeim leggja. Þá mællti Erlingr: skútor þær allar sem ver höfom oc lettiskip sculo róa út um eyna, oc upp í ena eystri kvísl, oc sva ofan at þeim, oc freista ef þeir megi leysa þá frá stikunom; enn þá sculum ver róa nedan at þeim stórskipunom, oc veit eigi ádr enn reynt er, hvert þeir leggja því betr at, enn ec, sem þeir ero ódari. Þetta ráð líkadi öllom vel. Nes nockort geck fram milli þeirra Hákonar konongs, oc sá hvargi skipin frá ödrom. Enn er scútna-herinn röri ofan eptir ánni, þá sá þeir

þeir Hákon þat, enn ádr höfdo þeir verit á tali, oc ráðit ráðom sínom. Gáto sumir at þeir Ingi konongr mundi atleggja, oc margir ætludo at þeir mundo eigi treystaz, þvíat miök þótti seinkaz atlagan, enn þeir treystuz vel vidrbúnadi sínom oc lidi. Medr Hákonu var þá mart stórmenni, þar var Sigurdr af Reyri, oc þeir Simunar-synir, Ömundr oc Andres, oc Nicolás Skialldvararson, Eindridi, son Jons Maurnefs, er þá var ágætastr madr oc vinselastr í Þrændalögom, oc margir adrir voro þar lendirmenn oc sveitar-höfðingar. Enn er þeir sá at Inga konongs menn röro mörgom skipom út eptir ánni, þá hugdo þeir Hákon, at Inga-menn mundo flyia vilia, ok hiöggo þeir þá tengslin frá stikunom, gripo þá til ára, oc röro eptir þeim, oc villdo reka þá, rendo skipin sciótt fyrir straumi. Oc er þau bar ofan eptir ánni fyrir nesit, er ádr var í milli, þá sá þeir at megin-lidit Inga konongs lá út vit cyna Hísing. Lagsmenn Inga konongs sá þá oc, hvar skip Hákonar fóro, oc hugdo at þeir mundo vilia atleggja, var þar þá þyss mikill oc vapna-brak, oc eggjun, oc lusto þeir upp herópi. Enn þeir Hákon snero skipom sínom norðr at landino, oc er þar vik-hvarf nockot, oc komít af ár-strauminom. Þeir bioggoz þar um, báro upp á land skutfestar, oc snero út framstöfnom á öllum

skipom sínom, oc tengdo saman öll skipin, leto austrfarar-knörruna liggja út frá ödrom skipunom, annan fyrir ofan, enn annan fyrir nedan, oc tengdo þá vit lángskipin. Enn í midiom flotanom lá konongs-skipit, oc þar næst Sigurdar skip, enn á annat bord konongs-skipi lá Nicolás, enn þar næst Eindridi Jonsson. Öll hin smærri skip þeirra lágo utar meirr; þeir höfdo nálíga öll skip sín ladin af vapnom oc grióti.

CAP. VIII.

TALA SIGURDAR AF REYRI.

Þá taladi Sigurdr af Reyri fyrir fólkinu, oc mællti svo: þat er nú vænt at fram muni koma, er oss hefir lengi í sumar heitit verit, at fundr varr Inga mundi verda; höfom ver nú oc miök lengi vidbúiz, hafa oc margir varir felagar stórt bergt um, at eingi mundi flya edr fálma fyrir Inga konongi oc Gregorius, oc er nú gott at minnaz þeirra orða; enn ver megom med minna trausti um þat ræda, er fyrr höfom ordit nockot tannsárir í varom vidrskiptom, oc er þat sem hverr hefir heyrt, at ver höfom miök opt svadils-förom farit, fyrir þeim. Enn eigi at sídr er oss naudsyn á at verda vid sem mannlíkast, oc standa sem fastast, þvíat þann eigom ver útveginu til þess at ver fám sigrinn. Enn þótt ver hafim lid nockoro farra enn þeir, þá

má þó audna ráða, hvarir gagn skulo hafa, oc er sú van best í varo máli, at Gud veit at ver mælom rettara. Ingi hefir ádr höggvit nidr brædor sína ij; enn pat er eingom manni blindt, hveriar födrbætor hann hefir hugat Hákon konongi, þær at höggva hann nidr sem adra frændor sína, oc mun þat synaz þenna dag. Hákon konongr heidiz eigi meira frá upphafi af Noregi, enn þess þridíungs sem fadir hanns hafði átt, oc var hönom þess varnat, enn at minni virding, er Hákon konongr betr tilkominn at taka arf eptir Eystein konong födur-bróðor sinn, helldr enn Ingi eda Símun Scálpr, eda adrir þeir menn er Eystein konong tóko af lífdögom. Mörgom mundi sva lítaz, þeim er sálo sinni villdi þyrma, oc hefði þvilíkir stórglæpir á hendor horiz sem Inga, at eckí mundo þora fyrir Gudi at kallaz med konongs-nafni, oc þat undrumz ec, at Gud þolir hönom þá ofdirfd, oc þat mun Gud vilia, at ver steypim hönom; beriumz ver því diarfligarr, at Gud man oss sigr fá; enn ef ver föllom, þá mun hann þat umbuna oss med margföldom fagnadi, er nú ler hann vandom mönnom valldz at gánga yfir oss; fari menn stilliliga, oc felmti eigi, ef orrosta tekz; gæti hverr sín, oc sinna svcitbúa, enn Gud allra var. Góðr rómr var görr at máli Sigurdar, oc heto allir góðo um, at verda vel vit. Hákon konongr geck upp

á austrfarar-knörrinn, oc var þar sett skialldborg um hann, enn merki hans var á lángskipino, því er hann hafði ádr áverit.

CAP. IX.

FRÁ LIDSMÖNNOM INGA KONONGS.

Nú er at segja frá Inga konongi oc mönnom hans; þá er þeir sá at Hákonar konongs menn biugguz til orrosto, var þá áin ein millom þeirra, þá giördo þeir hleypiscuto út eptir lidi síno, því er á brott hafði róit, at þeir skyldo aptrsnúa, enn þeir konongr oc hans menn bido þeirra, oc skipudo lidi síno til atlögo. Þá töludo höfðingiar fyrir lidino, oc sögdo ætlan sína, þat fyrst hver skipin skyldo næst liggia, oc þá hvar hvarir skyldo atleggja. Gregorius mællti sva: ver höfom mikit lid oc frítt; nú er þat mitt ráð, at þer Ingi konongr set eigi í atlögunni, þvíat þá er allz gætt, er ydar er; oc eigi veit hvar óscytio ör geigar, þvíat þeir hafa þann vidrbúnat, at or húnkastölom á kaupskipunom mun borit scot oc griót, er þeim þá litlo óhætara, er fiarri ero. Þeir hafa lid eigi meira, enn þat er vid vart hæfi lendra-manna, at hallda orrosto vit þá. Ec mun leggja mitt skip at því skipi þeirra, er mest er, oc vænti ec enn, at skaumm raun se oss at beriaz vit þá; sva hefir enn verit

optast á varom fundom, þótt annan-veg hafi lidsmunr verit, enn nú er. Þetta líkadi öllum vel, er Gregorius mællti, at konongr siálfr legdi eigi til orrosto. Þá mællti Erlingr Skaeki: Því ráði vil ec oc fylgia, at þer konongr farit eigi til orrosto; lítz mer sva á vidrbúnat þeirra, sem ver munim þurfa vidsiá at giallda, ef ver sculom eigi fá mikit manntión af þeim, þicki mer best um heillt at binda. Enn sù ráda-gjörd er ver höfdom fyrr í dag, þá mællto þar margir í mót því, er ec red, oc sögdot þer at ec villda eigi beriaz; enn mer þiekir oss hafa snuiz til mikilla hæginda, er þeir ero í brotto frá stikunom; oc nú er sva komit, at eo man eigi letia at leggja til orrosto, þvíat ee se þat, er allir mego víta, hverso mikil naudsyn á er, at stöckva óalldar floeki þessom, er farit hefir of land allt med rán oc rifs, oc mætti menn eptir þat byggja land þetta í fridi, oc þíóna einom konongi. Þeim er sva er góðr oc rettlátr, sem Ingi konongr er, oc hefir hann þó lengi haft valk oc vandræði af ofsa oc úiafnadi frænda sinna, oc verit brióst fyrir allri alþydo, oc lagt sik í margfalldan háska, til at frida landit. Mart taladi Erlingr oc sniallt, oc enn fleiri höfðingiar, oc kom í sama stad nidr, at allir höfðingiar eggjudo, at lögunnar; þeir bido þess er allt kom saman lid þeirra. Ingi konongr hafði þá Beikisúdina, oc let haun at bæn vana

sinna, at hann lagdi eigi til orrosto, oc lá hann eptir vid eyna.

CAP. X.

UPPHAF ORROSTO.

Enn er lidit var búit, þá greida þeir atróðriinn, oc liósta hvarirtveggio upp herópi, tengdo þeir Ingamenn eigi skip sín, oc fóro eigi samfast, þvíat þeir röro þveran strauminn, oc sveif miök stórskipunom. Erlingr Skacki lagdi at skipi Hákonar konongs, oc stack stafni at milli oc Sigurdar skips, tók þá orrosta; enn skip Gregoriuss sveif uppá grunn, oc halladi miök, oc komoz þeir eigi í fyrsto vid atlöguna. Enn er Hákonar-menn sá þat, þá lögdo þeir til, oc sóttu at þeim öllo-megin, er skip Gregorius lá fyrir. Þá lagdi at Ivarr, son Hákonar Maga, oc sveif saman lyptingunom. Ivarr krækdi stafn-liánom um Gregorius, þar sem hann var mióstr, oc hnyckdi hönom at ser, oc hörvadi Gregorius at bordino út, enn liann svarfadi upp eptir sídunni, oc var vid siálfu at hann mundi krækia Gregorius fyrir bord. Vard Gregorius þó lítt sárr, þvíat hann hafði spánga-brynio. Ivarr kalladi á hann, oc kvad hann þyckt byrðt hafa. Gregorius sagdi, kvad hann sva ambúa, at þess þyrfti vid, oc geek þó eigi af. Þá var vit siálfu, at þeir Gregorius mundi verda fyrir bord at gánga, ádr Aslákr

úngi kom ackeri í skip þeirra, oc dró þá af grunnino. Þá lagdi Gregorius at skipi Ivars, oc áttuz þeir vid lánga ríd, oc var skip Gregoriuss bordmeira oc fiölmennara. Fell þá miök lid af Ivars skipi, enn sumir liópo fyrir bord. Ivarr varð sárr miök, sva at hann varð óvígr. Enn er skip hans var hrodit, þá let Gregorius flytiá Ivar til landz, oc kom hönom undan, oc voro þeir ávallt vinir sídan.

CAP. XI.

FLÓTTI HÁKONAR KONONGS.

Enn er Ingi konongr oc hans menn sá, at Gregorius var á grunnino, þá het konongr á lidit, at þeir skyldo til þeirra róa; hann mælti þá: þetta var hit ósniallasta ráð, at ver skylldom her eptir liggja, enn vinir varir fóro til bardaga, höfom ver þat skip, er mest er oc best skipat í öllom herin-om; enn nú ec se, at Gregorius er nú lids þörf, þeim manni er ec á bezt at launa, oc leggiom til bardaga vid þá sem hardest; er þat oc rettast at ec se í orrosto, þviát ec vil sigrinn eignaz ef fæz. Enn þótt at ec vissu fyrir, at varir menn mundi ósigr hafa, þá veri oss þó sá einn til, at vera þar sem vinir varir ero, þviát ec má eigi atferaz, ef ec missi þeirra manna, er rettliga mego kallaz brióst, oc röskvastir ero, oc lengi hafa verit forstio-

rar fyrir mer oc míno ríki; bad hann þá setia upp merkit, oc var sva gört, oc röro þeir yfir ána. Þá var bardagi sem ódastr, oc feck konongr eigi rúm til atlögunnar, sva lágo skipin þraungt fyrir. Þá lögdo þeir undir austrfarar-knörrinn; þar var borit á þá ofan kesior, pálstafir oc griót sva stórt, at ecki hellz vid, oc máttu þeir eigi þar vera. Enn er lidsmenn sá þat at konongr var kominn, þá rymdo þeir fyrir hönom, oc lagdi hann þá at skipi þeirra Eindrida Jóanssonar; þá eyddo Hákonar-menn smáskipin, oc gengo uppá knörruna, enn sumir lupu á land. Erlingr Skacki oc hanns menn átto harda sókn, hann var í fyrirrúmino, hann kalladi á stafnbúa sína, oc bad þá ganga uppá konongs-skipit; þeir svörudo, at þat var eigi dællt, oc þar varo iárn á triám fyrir. Erlingr geck þá fram í stafninn fyrir, oc dvaldiz þar litla ríd ádr þeir greiddo uppgöngo á konongs-skipit, oc ruddiz þat skip stafna á millum, tók þá at flyia allir herinn; eptir þat lióp mart á kaf, oc mart fell, enn allr fiölldinn komz á land. Sva segir Einar Skúlason:

Margr fell madr af dreyrgo
 mar-blacks á kaf saxi
 gnógt elldi feckz gygiar
 glaum rak ná fyrir stráumi.
 Elfr vard unda giálfri
 eittr-kölld roðin heito

vitnis fell með vatni
varmt auldr í men Karmtar.

Maurg fluto aud á urga
álm sveigdi lid hiálma
raud flugo stál í stríðri
stafu-blódeg skip módo.
Adr á grund af græðiss
gædinga lid flædi
sveit vard í rym rítar
ryr Hákonar dyrom.

Einar orti um Gregorius Dagsson flokk þann, er kalladr er Elvar-vísor. Ingi konngr gaf grid Nicolási Skialldvarar-syni, þá er skip hans var hrodit, oc geck hann þá til Inga konongs, oc var með hönöm síðan meðan hann lifdi. Eindridi Jonsson lióp á skip Inga konongs, þá er skip hans var brodit, oc bad ser grida. Konngr villdi gefa hönöm grid, enn son Hávardz Klínings lióp til, oc hió hann bana-högg, oc var þat verk miök lastat; enn hann sagdi at Eindridi hafdi ráðit drápi Hávardz födur síns. Eindridi var miök harmadr, oc þó mest í þrændalögom. Þar fell mart af lidi Hákonar, enn eigi fleiri höfðingiar. Fátt fell af Inga konongs lidi, enn mart vard sárt. Hákon konngr flydi á land upp, enn Ingi konngr fór norðr í Víkina með síno lidi; hann var í Víkinni um vetrinn, oc sva Gregorius. Enn er þeir komo til Biörgyniar frá orrosto menn Inga konongs, synir

Ivars af Elldu, Bergliótr oc þeir bræðor, þá drápo þeir Nicolás Scegg, er gialldkeri hafði verit, oc fóro síðan heim norðr í Þrándheim. Hákon konongr kom norðr fyrir Jólin, enn Sigurðr var stundum heima uppi á Reiri. Gregorius hafði tekit hönom grid af Inga konongi, sva at hann skyldi hafa eignir sínar allar, þvíat þeir Gregorius oc Sigurðr voro náfrændor. Hákon konongr var í kaupangi um Jólin, oc börðoz menn hans einn aptan í hirdstofu um Jólin, á öndverdom Jólunom, oc höfðo viii menn bana, oc margir urðo sárir. Enn eptir enn viii dag Jóla, þá fóro þeir lagsmenn Hákonar konongs inn í Elldu, Alfr Raudi, son Ottars Birtings, oc nær lxxx manna, oc kómo þeir á óvart öndverða nótt, þá er hinir voro drucknir, oc lögðo elld í stofuna, enn þeir gengo út oc vörðuz vel; þar fell Bergliótr, son Ivars, oc Augmundr bróðir hans, oc miök mart manna. Þeir höfðo verit fyrir nær xxx manna. Um vetrinn í kaupangi norðr andadiz Andres Simunar-son, fóstbróðir Hákonar konongs, oc var hann harmadr it mesta. Erlingr Skacki oc menn Inga konongs, þeir er í Biörgyn voro, leto sem þeir mundo fara norðr þá oc þá um vetrinn at þeim Háconi konongi, oc þó vard eigi af því. Gregorius sendi þau ord austan or Konongahello, ef hann sæti iarnærr, sem þeir Erlingr, at hann mundi eigi sitia kyrr

í Biörgyn, ef Hákon leti drepa vini Inga konongs
nordr í Prándheimi, oc legonauta þeirra.

CAP. XII.

BARDAGI Á BRYGGIOM.

Ingi konongr oc Gregorius fóro austan um varit til
Biörgyniar; enn þegar er Hákon spurdi þat oc Sig-
urdr, at Ingi var farinn or Vikinni, þá fóro þeir
austr it efra í Vikina. Enn er þeir Ingi konongr
komo til Biörgyniar, þá gördiz úsátt milli þeirra
Halldórs Bryniólfssonar oc Biarnar Nicolássonar.
Húskarl Biarnar spurdi, hví hinn væri sva bleikr,
þá er þeir mættuz á bryggiom nidri; enn hann
kvad ser látit blód. Eigi villda ec sva vid verda
blódlátit, bastbleikr sem þú ert; enn ec ætla kvad
hinn, at þú mundir verr vid verda oc ódrengiligar;
oc urdo eigi meiri upphöf at enn sva. Þá óx ord
af ordi, þar til er þeir deildo, oc bördoz því næst.
Þá var sagt Halldóri Bryniólfssyni, at húskarl
hanns var særdr á bryggiom nidri; enn Halldór
drack þar hiá í gardinom, oc geck hann þá þangat
til; enn ádr voro þar komnir húskarlar Biarnar,
oc þóttó Halldóri þeir óiafnt hafa skilit, oc stökudo
þeir Halldór þá húskörlum Biarnar, oc knúskudo
þá; var þat sagt Birni Búk, at Vikveriar bördo
húskarla hanns á bryggiom nidri. Þá tóko þeir

Biörn vapn sín, oc fóro til oc villdo hefna sinna manna; urdo þá áverkar med þeim. Þá var sagt Gregorius, at Halldór mágr hanns þurfti lids við, oc húskarlar hanns voro höggðir niðr, á stræti niðri. Þá liópo þeir Gregorius í brynior sínar oc fóro til. Þá var sagt Erlingi Skacka, at Biörn systurson hanns bardiz við þá Gregorius oc Halldór á bryggjom inni, oc hönom var lids þörf. Þá fór hann til þannug, oc var allfiölmennr, oc bad menn veita sér lid; kvad mönnom klæki í vera, ef einn Víkverskr madr scal yfir oss gánga her í frændhaga varom, oc man oss þat æ oc æ uppi. Þar fello xiiij menn, oc höfdo ix þá þegar bana, enn síðarr önduduz iiij menn or sárom, enn mart vard sárt. Þá komo Inga konongi orð, at þeir börðoz inná bryggjom Gregorius oc Erlingr, oo fór hann til oc villdi skilia þá, oc mátti eingo áorka, þvíat þeir váro sva ódir hvarirtveggio. Þá kalladi Gregorius á Inga konong; oc bad hann fráfara, kvad hann eingo mundi til vegar koma at sva búno; kvad þat mesta geig, at hönom yrði nockot, þvíat eigi kann vita hvar sá er, er eigi sparir þat óhapp vit sik, ef hann þikiz í færi komaz; sneri þá konongr í brott. Enn er þurru laup in mesto, þá gengo þeir Gregorius upp til Nicolás-kirkio, enn þeir Erlingr eptir, oc kölluduz þá á. Þá kom enn Ingi konongr í annat sinn, oc sætti þá, oc villdo þat hvarir-

tveggio, at hann skipadi einn milli þeirra. Þá spurdo þeir, at Hákon konongr var í Víkinni, fóro þeir Ingi konongr oc Gregorius austr, oc höfdo miök mart skipa. Enn er þeir komo austr, þá stucko þeir Hákon konongr undan, oc vard eigi orrosta. Þá fór Ingi konongr inn til Oslóar, enn Gregorius var í Konungahello.

CAP. XIII.

DRÁP MUNANS.

Gregorius spurdi til þeirra Hákonar konongs litlo sídarr, þar sem heita Saurbæir, þat er uppi við mörkina. Gregorius fór þannig, oc kom um nótt, oc hugdi at þeir Hákon konongr oc Sigurdr mundo vera á enom meira bænom, oc lögdo þar elld í húsin. Þeir Hákon konongr voro á hinom minna bænom; þeir fóro til, þar er þeir sá elldinn, oc villdo duga sínom mönnom. Þar fell Munan, sun Ala Oskeins, bródir Sigurdar konongs, födur Hákonar; þeir Gregorius drápo hann, þá er hann villdi duga þeim er inni voro brendir; sumir gengo út, oc var þar mart manna drepit. Asbiörn Jalda komz af bænom, hann hafði verit víkingr hinn mesti, oc var sár ordinn miök; enn bóndi einn hitti hann, oc had Asbiörn at bóndinn skyldi hann láta undanganga, oc baud hönom fe til; enn

bóndinn letz þat mundo giöra, er hann var fúsari til, kvez opt hafa gengit hræddr fyrir hönom, oc hió hann banahögg. Þeir Hákon konongr oc Sigurdr komoz undan, enn mart var drepit lid þeirra. Eptir þat fór Gregorius heim til Konongahello. Litlo sídar fóro þeir Hákon konongr oc Sigurdr til búss Halldórs Bryniólfssonar á Vettaland, oc lögdo elld í húsín, oc brendo. Halldór Bryniólfsson geck út, oc var höggvinn þegar, oc húskarlar hans med hönom; voro þar drepnir nær xx menn allz. Sigrídr kona hans var systir Gregoriuss, hana letu þeir gánga til skógar í brott, í náttserk einom. Þar tóko þeir Amunda, son Gyrdar Amunda-sonar, oc Gyridar Dags-dóttur, systor-son Gregoriuss, oc höfdo vid ser; hann var þá v vetra.

CAP. XIV.

FALL GREGORIUSS DAGS-SONAR.

Gregorius spurdi þessi tíðindi, oc þótti hönom mikil, fretti hann þá vandliga at, hvar þeir væri. Gregorius fór or Konongahello ofarla Jólanna med miklo lidi, oc komo þeir til Fors inn xiiij dag Jóla, oc var hann þar um nótt eina, hafdi þar óttosaung affara-dag Jólanna, oc var hönom lesit gudspiall eptir; þá var laugardagr. Er þeir Gregorius sá lid þeirra Hákonar konongs, þá syndiz þeim miklo

minna enn sitt lid. A ein var í milli þeirra er þeir hittuz, er heitir Befa; ís illr var á ánni, þvíat flóð geck undir ísinn utan. Þeir Hákon konongr höfdo höggvit á ánni vakir, oc mokat yfir snió, sva at eigi mátti tilsiá. Þá er Gregorius kom at ísnom á ánni, kvadz hönom illr synaz ísinn, oc kvad þeim þat ráð, at fara til brúar, er skamt var ofar á ánni. Bónða-lidit svaradi, oc kvadz eigi vita hví gegndi, er hann skyllði eigi þóra at sækia at þeim um ísinn, eigi meira lid enn þeir höfdo fyrir, leto ís fullgóðan. Gregorius svarar, kvad sialldan hafa þess þurft, at fryia ser allmiök árædis, kvad oc eigi enn vera skylldo, bad þá fylgia ser vel, oc standa eigi á landi, ef hann gengi á ísin, oc kvad þat þeirra ráð vera, at gánga á ís vandan, letz þess ófús; enn eygi vil ek sitia ydr fryio, sagði hann, oc bad þá bera merki sitt fram, geck hann þá þegar fram á ísinn med lidino; enn þegar er bænda-lidit fann at ísinn var vandr, þá hvarflidit aptr. Enn Gregorius lá í ísinom, oc eigi miök; hann bad menn vidvaraz, enn eigi geck fleira med hönom, enn nær xx menn, enn annat lidit hvarf aptr allt. Madr skaut at Gregorius ör or flokki Hákonar konongs, oc laust undir kverk hönom, oc er nú þar lokit ævi hans. Gregorius fell þar til iardar, oc x menn med hönom. Enn þat er almæli, at hann hafi verit höfud lendra-manna í Noregi,

í þeirra manna minnom er þá voro uppi, oc verit bezt vit oss Islendinga, síðan er Eysteinn konongr andadiz hin ellri. Lík Gregoriuss var fært á Höfund upp, oc grafit í Gimsey, at nunno-setri því er þar er. Þar var þá Baugeidr Abbadís, systir Gregoriuss.

CAP. XV.

INGI KONONGR SPYR FALL GREGORIUSS.

Ár-menn ij fóro med tíðindin, at segia Inga konongi inn í Oslo, enn er þeir komo þar, þá heimto þeir konong á mál, enn hann spurdi hvat þeir segdi tíðenda? Fall Gregoriuss Dags-sonar, sögdo þeir. Hví bar sva illa at? sagdi konongr. Þeir sögdo hönom. Konongr svarar: þeir redo þá er verr kunno. Þá er sva sagt, at hann kunni því sva illa, at hann gret sem barn. Enn er þat geck af hönom, mællti hann þetta: ec villda fara til fundar vit Gregorius, þegar er ec spurda dráp Halldórs, þvíat ec þóttumz þat vita, at Gregorius mundi eigi lengi sva sitia, at hann mundi eigi til hefnda ráða; enn þetta fólk let ecki væri iamskyllt sem Jóla-dryckia, oc eigi mátti henni bregða; þvíat ec veit víst, ef ec hefda þar verit, at annattveggia mundi at meira ráði framfarit, eda þá mundo vid Gregorius hafa farit til einnar gistingar bádir ella.

Enn

Enn þar er sá madr fariunn, er mer hefir bestr verit, oc mest hefir landino halldit í hönd mer; enn þat hugda ec til þessa, at skamt mundi ockar í milli verda. Nù skal eid enn vitleggia, at fara til fundar vit þá Hákon, oc skal vera annathvart, at ec skal hafa bana, edr stíga yfir þá Hákon ella; enn era slíks manns at hefndra, sem Gregorius var, þótt þeir komi allir fyrir. Madr svarar, oc let hann lítt mundo þurfa at leita þeirra, segir þá þannug ætla til fundar vit hann. Christín var þar í Oslo, dóttir Sigurðar konongs, bræðrunga Inga konongs. Konongr spurdi at hon ætladi á brott, oc sendi henni ord, oc spurdi hví hon villdi á brott or bænom; enn henni letz agasamt þickia, oc kvad eigi kvenna vist þar vera. Konongr bad at hon skyldi eigi á brott fara, oc með því at ver hafin gagn, sem ec ætla, þá mantu her vel halldin, enn ef ec fell, þá muno vinir mínir eigi ná at búa um lík mitt, enn þú skalt bidia, at þer se lofat at búa um; máttu mer sva hellzt launa, þat er ec hefi verit vel vit þik, at búa um lík mitt, þvíat þer man þat lofat.

CAP. XVI.

FRÁ INGA KONONGI.

Blasius-messo at kvölldi, kom niósn Inga konongi,

at Hákonar konongs væri þá ván til bæiarins. Let Ingi konongr þá blása öllu lidi síno upp or bæn-om, oc let fylkia, oc var þá skorat nær xl hundrut manna. Konongr let vera fylkingina lánga, oc eigi meir enn v menn á þioktina. Þá mællto menn vit konong, at hann skyldi eigi vera í orrosto, letz þiekia mikil ábyrgd á hönom, oc veri Ormr bródir hanss höfdingi fyrir lidino. Konongr svarar: þat ætla ee, ef Gregorius lifdi oc væri hann her nú, enn ec vera fráfallinn, oc skyldi mín hefna, at hann mundi eigi liggia í fylsuom, oc mundi vera í orrosto siálfr. Enn þótt ec se verr tilfærr fyrir vanheilso sökum, enn hann var, þá skal ec eigi verr viliadr vit hann; oc er eingi ván, at ec muni eigi í orrosto vera. Sva segia menn at Gunnhilldr, er Simun hafdi átta, fóstura Hákonar konongs, leti sitia úti til sigurs Hákon; enn sva geck frettin, at þeir skyldo beriaz vit Inga konong um nótt, enn all-dregi um dag, qvad oc þá hlyda mundo; þórdís seggia er sú kona nefnd, er sagt er at úti sat; enn eigi veit ec sann á því. Simun Scálpr hafdi gengit í bæinn, oc lagdiz nidr at sofa, oc vaknadi vid herópit. Enn er áleid nóttina, kom niósn til Inga konongs, var hönom sagt, at þeir Hákon konongr fóro þá utan á ásinn, enn ís lá allt frá bæn-om út til Höfuteyar.

CAP. XVII.

TALA INGA KONONGS.

Ingi konongr med her sinn geck þá út á ísinn, oc setti hann þá fylking sína fyrir bæinn; var Símun Scálpr í þann arminn fylkingar, er út vissi til Þræla-bergs, enn í þann arminn er vissi til Nunnusetsrs, var fyrir Gudrödr Sudreyia konongr, son Olafs Bitlings, oc Jón, son Sveins Bergþórs-sonar Búks. Enn er þeir Hákon konongr komo at fylking Inga konongs, þá æpto hvarir-tveggio heróp. Þeir Gudrödr oc Jón báknudo til þeirra Hákonar konongs, oc leto þá vita hvar þeir voro fyrir. Síðan snero Hákonar-menn þar at, enn þeir Gudrödr flydo þegar, vit nær xv hundrut manna, Enn Jón, oc mikil sveit med hönom, liópo í lid med Hákon konongi, oc bördoz med þeim; var þetta sagt Inga konongi. Hann svaradi: sva mikit hefir skilit vini mína, alldregi mundi Gregorius sva fara medan hann lifdi. Þá bádo menn konong, at hesti skyldi skióta undir hann, oc ridi hann or orrosto uppá Raumaríki, mant þú þar fá nógt lids, segia þeir, þegar í dag. Konongr svarar: eingi hugr er mer á því; opt hefi ec ydr heyrð þat mæla, oc þycki mer satt, at lítit lagdiz fyrir Eystein konong bróðor minn, síðan er hann lagdiz á flóttu, oc var hann vel at ser gerr um marga lati, þá er konong pryda. Nú

kann ec þat síá vit vanheilindi mitt, hversó lítit man fyrir mik leggiaz, ef ec tek þat til, er hönom skyllði sva miök vefiaz, iafnmikit sem atferd öckra skildi, oc heilso oc alla eliun. Ec var þá á annan vetr, er ec var til konongs tekinn her í Nor-egi, enn nú em ec vel hálf-þritogr. Ec þikiumz vandræði oc ábyrgdir hafa meir haft í konongdóm-inom, helldr ein skemtan oc hóglifi. Ec hefi margar orrostor áttar, stundom vid meira lidi, oc stundom vid minna, hefir sú mín gæfa mest verit, at ec hefi alldri á flótta komit; ráði Gud lífi míno, hversó langt vera skal, enn alldregi man ec á flótta leggiaz.

CAP. XVIII.

FALL INGA KONONGS.

Enn er þeir Jón oc hanns felagar höfdo rofit þann fylkingar-arm Inga konongs, þá flydo þeir oc margir, er þar höfdo næstir stadit; skildiz þá oc ridladiz fylkingin, enn þeir Hákon konongr sóttó þá fast at, var þá oc komit at dagan. Þá var sólt at merki Inga konongs, oc í þessi rid fell siálfr Ingi konongr, enn Ormr bródir hanns hellt þá upp orrosto, flyði þá fiölldi fólks uppi bæinn. Ormr fór tysvar í bæinn, sídan er konongr var fallin, oc eggíadi lidit, oc hvartveggia sinn geck hann út á ísinu, oc hellt upp orrostunni. Þá sóttó þeir Hákon

onar-menn þann fylkingar-armiun, er Simun Scálpr var fyrir; oc í þeirri atgaungo fell af lidi Inga konongs Gudbrandr Skafhaugs-son, mágr konongs; enn Simun Scálpr oc Hallvarðr Hikri gengoz á, oc bördoz med sveitir sínar, oc óknz út fyrir Þræla-berg, oc í þeirri ríð fello þeir bádir um síðir Símun oc Hallvarðr. Ormr Konongs-bródir feck þar allgott ord, enn þó flyði hann at lykdom. Adr um vetrinn hafði Ormr fastnat ser Rögno, dóttur Nicoláss Masa, er átt hafði Eysteinn konongr Haralldz-son, oc skyllði þá gánga at brúðkaupino sunnodaginn eptir. Blasius-messa var á friádegí. Ormr flyði austr á Svíþíód til Magnúss bróðor síns, er þá var þar konongr, enn Rögnvalldr bródir þeirra var þá Jarl. Þeir voro synir Ingirídar oc Henreks Hallta, hann var son Sveins Sveins-sonar Dana-konongs. Christín Konongs-dóttir bió um lík Inga konongs, oc var hann lagdr í steinvegginn í Hallvardz-kirkio, utar frá kórinom sydra megin; þá hafði hann verit konongr hálfan þridia tog vetra. Í þeirri orr-osto fell mart manna af hvarom-tveggjom, enn þó miklo fleira af Inga konongs lidi. Arni Fridreks-son fell þar af Hákonar konongs lidi. Enn þeir Hákonar-menn tóko upp brúðkaups veizlona alla, oc stórmikit lutskipti annat.

CAP. XIX.

FRÁ HÁKONI KONONGI OC CHRISTINO
KONONGS-DÓTTUR.

Hákon konongr lagdi þá land allt undir sik, oc skipadi syslor allar sínom mönnom, oc sva kaupstadi. Þeir Hákon konongr oc hanns menn höfðu stefnur sínar í Hallvardz-kirkio, er þeir redo landráðom. Christín Konongs-dóttir gaf til fe presti þeim er kirkio lukla vardveitti, at hann leyndi inanni hennar í kirkionni, sva at sá mætti heyra tal þeirra Hákonar konongs. Enn er hon vard vör hvat þeir redo, þá sendi hon mann til Biörgyniar Erlingi Skacka bónda sínom, at hann skyldi alldr-eigi trúa þeim Hákon.

CAP. XX.

JARTEGNIR OLAFS KONONGS MEDAL
VÆRINGIA.

Sá atburdr vard á Gricklandi, þá er þar var Kyríalax konongr, at konongr fór herferd á Blöckomanna-land. Enn er hann kom á Pezinavöllo, þá kom þar á móti hönom heidinn konongr með úvígum her. Þeir höfðu þángat haft hesta-lid, oc vagua stóra miök, oc ofan á vígskörd. Enn er þeir bioggo nátt-ból sitt, þá skipado þeir vögnom hveriom vit

annan fyrir utan herbúdir sínar, enn þar fyrir utan grófo þeir mikit diki. Var þat þá alltsaman vígi sva mikit, sem borg væri. Konongr heidni var blindr. Enn er Griekia konongr kom, þá setto heidnir fylking sína á völlum fyrir vagna-borg. Þá setto Grickir sína fylking þar í móti, oc rido hvorotveggio oc bördoz; fór þá illa oc óheppiliga, flydo Grickir, oc höfdo fengit mikit maun-tíon, enn heidíngiar fengo sigr. Þá skipadi konongr fylking af Fröekom oc Flæmingiom, enn síðan rido þeir fram mót heidíngiom, oc bördoz vit þá, oc fór þeim sem hinom fyrrom, at margir voro drepnir, enn allir flydo þeir er undan komoz. Vard þá Griekia konongr reidr miök hermönnom sínom, enn þeir svörudo hönom, bádo hann þá taka til Væringia vinbélgia sinna. Konongr segir sva, at hann vill eigi spilla gersömom sínom sva, at leida fá menn, þótt þeir væro hravstir, á móti sva miklom her. Þá svarar ordom konongs Þórir Helsíng, er þá red fyrir Væringiom: Þótt þar væri fyrir elldr brennandi, þá munda ec oc mínir lidar þegar ihlaupa, er ec vissa, at þat keyptiz í, at þer konongr hefdot þá frid eftir. Enn konongr svarar: heiti þer á hinn helga Olaf konong ydvarn, til fulltíngis oc styrktar ydur. Væringiar höfdo hálfu fimta hundrat manna, þá tóko þeir heit sitt med hand-festi, oc heto því, at reisa kirkio í Miklagardi med sínom kostnadi,

oc góðra manna stodom, oc láta þá kirkio vígia til vegs oc dyrðar hinom helga Olafi konongi. Síðan runno Væringiar fram á völlinn. Enn er þat sáo heidíngiar, þá sögðo þeir konongi sínom, at þá fór enn lid af Grickia konongs her, oc rann of völlona, oc er þetta sögðo þeir hönd full manna. Þá svarar konongr: hver er sá hinn tígugligi madr, er þar ríðr á þeim hvíta hesti fyrir lidi þeirra? eigi síðom ver hann, saugðo þeir. Þar var eigi minni lidsmunr enn sva, at heidíngiar sextío væri í mótí einom Christnom manni, enn eigi síðr helldo Væringiar til bardaga alldiarfliga. Enn þegar er þeir komo saman, þá sló ótta í lid heidíngia oc rædslo, sva at þeir tóko þegar at flyia, enn Væringiar ráko þá, oc drápo brátt mikinn fiöllda. Enn er þat sá Grickir oc Fraekar, þeir er áðr höfðo flúit fyrir heidíngiom, sóttu þá til oc ráko flóltann med þeim, vofo þá Væringiar komnir uppi vagna-borgina, vard þar oc mesta manni-fall. Enn er heidíngiar flydo, þá vard handtekinn hinn heidni konongr, oc höfðo Væringiar hann med ser, tóko þá Christnir menn her-búðir heidíngia oc sva vagna-borgina.

CAP. XXI.

JARTEGN ÓLAFS KONONGS.

Sá atburðr vard á Stiklastödom í orrosto, sem fyrr var ritat, at Olafir konongr kastadi frá ser sverdino

Hneiti, þá er hann feck sár; enn einhver maðr sænskr at ætt hafði brotit sverð sitt, oc tók þá upp sverðit Hneiti, oc vá með því; enn sá maðr komz brott or bardaganom, oc fór með öðrom flótta-mönnum, kom hann fram í Svíþjóð, oc fór heim til búss síns. Hafði hann síðan þat um alla sína æfi, enn síðan hans son, oc tók hverr eptir annan þeirra frænda, oc fylgdi þat iafnan eign sverðzins, at hver sagði öðrom nafn sverðsins, oc sva hvadan þat var komit. Enn þat var miklo síðarr, á dögum Kirialax Miklagardz keysara, at þar váro í gardi stórar sveitir Væringia, þá var sva, at á eino sumri, þá er keysarinn var í herför nockorri, lágo þeir í her-búdom. Væringiar helldo vörd oc vöktu yfir konongi, lágo þeir á völlum fyrir utan her-búdir; þeir skipto nóttinni með sér til vöko, enn þeir er ádr höfðu vakat, lögduz þá niðr oc sváfo, þeir voro allir með alvegni. Þat var síðr þeirra, þá er þeir lögduz til svefns, at hver hafði hiálm á höfði, enn skiöld yfir ser, oc sverð undir höfði, oc skyldi leggja hægri hönd á medal-kastla. Einhver þeirra felaga, sá er hlotit hafði vörd enn efsta luta nætur, þá vaknadi hann í dagan, þá var sverð hans iborto; enn er hann leitadi, þá sá hann sverðit, hvar lá á vellinum, langt frá honum; hann stóð upp, oc tók sverðit, ætladi hann at felagar hans þeir er vakat

höfdo, mundo hafa giört til spotts, at vela frá hön-
om sverdit; þess syniodo þeir fyrir sik. Slíkir at-
burdir urdo iij nætur. Þá undradiz hann miök
siálfr, oc sva adrir þeir er þetta sá edr heyrdó,
oc spurdo menn hann eptir, hverio þat mundi
gegna? Þá sagdi hann at sverd þat var kallat
Hneitir, oc Olafur hinn helgi hafdi átt, oc borit
siálfr í orrosto á Stiklastödom, hann sagdi oc hvor-
nug sídan hafdi farit sverdit. Sídan var þetta sagt
Stól-konongi; þá let konongr kalla til sín þann
mann, er með sverd þat fór, feek hönóm gull,
þrenn íafnmikil virði sverdsins, enn konongr let
sverdit bera í Olafs-kirkio, þá er Væringiar hallda;
var þat þar sídan yfir alltari. Eindridi Ungi het
lendr-madr í Noregi, á dögóm þeirra sona Haralldz
Gilla, Eysteins, Inga oc Sigurdar. Eindridi var þá
í Miklagardi, er þessir atburdir gerduz, sagdi hann
þessa sögo í Noreg, sva sem Einar Skúla-son segir
í Vattar-drápo, þeirri er hann orti um Olaf hinn
helga; oc er þar kvædit um þenna atburd.

XVI.

SAGA MAGNÚSAR KONONGS
ERLINGS-SONAR.

CAP. I.

UPPIAF MAGNÚSAR KONONGS ERLINGS-
SONAR.

Síðan er Erlíngur varð þessa vís, hver ráðagiörð þeirra Hákonar var, þá sendi hann boð öllum Höfðingiom þeim, er hann vissi at trúnaðar-vinir höfðu verit Inga konongs, oc sva hird-sveitinni, oc handgengnom mönnum konongs, þeim er undan höfðu komiz, oc öllum hús-körlom Gregoriuss, oc giörði þeim stefno-lag. Enn er þeir fundoz oc átto tal sitt, þá redz þat þegar, at þeir skyldo hallda saman flokkinom, oc bundo þeir þat fastmælom milli sín. Síðan töludo þeir þat, hvern þeir skyldo til konongs taka. Þá taladi Erlíngur Skacki, oc leitadi ef þat væri ráð höfðingia eda annara ríkis-manna, at tekinn væri til konongs, sun Simunar Scálps, dóttur-sun Haralldz konongs Gilla, enn Jón Hallkelsson bindiz fyrir flokkinom; enn Jón mæltiz undan. Var þá leitad vid Nicolás Skialldvararsun, systor-son Magnúss konongs Berfættz, ef hann villdi görðaz höfðingi fyrir flokkinom. Enn hann svarar

á þá leid, at þat var sitt ráð, at taka þann til konongs, er af kononga ætt var kominn, enn þann til ráða fyrir floekinn, er vænn væri til lids oc vits; let þeim þá betra mundo verda til lids. Nú var leitat vit Arna Konongs-mág, ef hann villdi láta taka til konongs noekorn sona sinna, brædra Inga konongs. Arni svarar því, at son Kristínar, dóttur Sigurðar konongs Jórsalafara, væri bezt ættborinn til konongdóms í Noregi, er þar þó oc, sagði hann, sá madr til forráða med hönom, er skyllða ber til at vera forsiá-madr fyrir hönom oc ríkino, er Erlingr er faðir hanns, madr vitr oc hardráðr, oc reyndr miök í orrosto, oc landráðamadr góðr, mun hann eigi scorta til þessa ráðs framkvæmd, ef hamíngia fylgir. Margir tóko vel undir þetta ráð. Erlingr svarar: sva litz mer oc heyriz til, sem þeir se flestir, er þessa máls er leitat vid, er helldr færiz undan, at taka upp vandann. Nú syniz mer iasuvíst, þótt ver hefim þetta mál, hvart helldr er, at tignin fæz þeim er fyrir bindz floekinom, eda verdr hinn veg, sem ádr hefir nú miök mörgom farit, þeim er slíkt stórræði hafa upptekit, at fyrir þat hafa tynt allri eigninni, oc sumir þar med lífino. Enn ef framgángrinn verdr at þesso ráði, þá má vera at þeir se noekorir, er villdi þenna kost hafa upptekit; mun sá því þurfa, er nú gengr undir þenna vanda, at setia ramligær

skordur við, at eigi sæti hann þá-mótgáangi eda fiandseap, af þeim er nú ero í þessu ráði. Allir iákvæddo þat, at giöra þetta samband með fullom trúnadi. Erlíngur mællti þá: þat er frá mer at segia, at þat þicki mer næst bana mínom, at þíóna Hákonu konungi; oc þótt at mer þicki þetta it háscasamligasta, þá vil ec helldr til þess hætta, at láta ydr fyrirsjá; oc mun ec taka við forráðom flocksins, ef þat er allra ydar vili, ráð oc fysi, oc vili þer þetta allir binda swardögom. Allir iá-tudo því, oc var á þeirri stefno þat ráðit, at þeir skyldo Magnús til konongs taka, son Erlíngs. Sídan átto þeir þing í bænom, ok á því þingi var Magnús Erlíngsson tekinn til konongs, yfir land allt. Þá var hann v vetra gamall. Sídan gengo til handa hönom allir þeir menn er þar voro, oc handgengnir höfdo verit Inga konungi, oc hafdi hverr þeirra slíka nafn-bót, sem ádr hafdi haft með Inga konungi.

CAP. II.

FERD MAGNÚSAR KONONGS TIL
DANMERKUR.

Erlíngur Skacki byriadi ferd sína, oc red ser til skipa, oc hafdi með ser Magnús konong, oc alla handgengna menn, þá er þar voro. Þar var í ferd Árni Konongs-mágr, oc Ingirídr módir Inga kon-

ongs, oc synir hennar ij, oc Jón Kurteisa, son Sigurðar Storks, oc húskarlar Erlíngs, oc sva þeir er verit höfðo húskarlar Gregoriuss, oc höfðo þeir allz x skip. Þeir fóro sudr til Danmarkar á fund Valldimars konongs oc þeirra Buris Henriks-sonar, bróðor Inga konongs. Valldimar konongr var frændi scylldr Magnúss konongs. Þær voro systur, dætur Haralldz konongs or Gördom austan, Ingibiörg módir Valldimars konongs, oc Málfridr módir Kristínar, móður Magnúss konongs. Haralldr var son Valldimars Jarisleifs-sonar. Dana-konongr tók vel við þeim, oc voro þeir Erlíngr laungom á málstefnom oc ráða-gjörðom, oc kom þat upp af tali þeirra, at Valldimar konongr skyldi veita styrk Magnúsi konongi af síno ríki allan, þann er hann þyrfti til þess at eignaz Noreg, oc hallda síðan; enn Valldimar konongr skyldi þá þat ríki hafa í Noregi, sem haft höfðo hinir forno frændor hanss, Haralldr Gormsson oc Sveinn Tiúguskegg, Víkina alla norðr til Rygiarbitz. Var þessi ráða-gjörd bundin eidom oc einka-málom. Síðan búa þeir Erlíngr oc Magnús konongr ferd sína af Danmörko, oc sigldo út af Vendilskaga:

CAP. III.

ORROSTA Í TÚNSBERGI.

Hákon konongr fór þegar núm varit eptir Páska-

viko norðr til Þrándheims, hann hafði þá Skipa-
stól allan þann er átt hafði Ingi konngr. Hákon
konngr átti þing í bænom í kaupáangi, oc var hann
þar til konongs tekinn yfir land allt. Þá gaf hann
Sigurdi af Reyri Jarlsdóm, oc var hann þar til
Jarls tekinn. Síðan fóro þeir Hákon konngr sudr
aptr, oc allt í Vik austr, fór konngr til Túnsbergs,
enn sendi Sigurd Jarl austr í Konongahello, at
veria þar land med sumo lidino, ef Erlíngur kæmi
sunnan. Þeir Erlíngur komo at Ögdom, oc helldo
þegar norðr til Biörgyniar; þar drápo þeir Arna
Brígidar-skalla, syslomann Hákonar konongs, oc
fóro austr aptr þegar til móts við Hákon konong.
Enn Sigurdr Jarl hafði eigi ordit varr við sunnan-
ferdina þeirrá Erlíngs, oc var hann þá enn austr
vit elfi, enn Hákon konngr var í Túnsbergi. Er-
língur lagdi at við Hróssanes, oc lá þar nockorar
nætur. Hákon konngr bióz við í bænom. Þeir
Erlíngur lögdo þá at bænom, þeir tóko byrdíng
einn, oc hlódo med vildi oc hálmi, oc lögdo í elld,
enn vedrit stóð upp á bæinn, oc rak byrdínginn
at bryggiom. Erlíngur let bera á byrdínginn kadla
ij, oc tengia vit skútur ij, oc let sva róa eptir, sem
byrdínginn rak fyrir. Enn er elldriinn var miök
kominn at bænom, þá helldo þeir ködlunom er á
skútunom voro, sva at eigi mætti bærinn brenna,
enn reykr lagdi sva þyekt í bæinn, at eigi sá af

bryggionom, þar sem konongs fylking stóð. Síðan lagði Erlíngur at öllu lidino utan eptir, á vedr elldinom, oc skuto upp á þá. Enn er bæar-menninnir sá, at elldrinn nálgadiz hús þeirra oc margir urdo sárir af scotom, þá giördo þeir ráð sitt, oc sendo Hróalld prest Lángtölo út á fund Erlíngs, at taka ser grid oc bænóm af Erlíngi, oc rufo fylking konongs, þegar er Hróalldr sagði þeim at gridin voro tekin. Enn er bæiar-manna lid var í brottfarit, þá þyntiz lidit á bryggionom, eggjundo þá sumir Hákonar-menn, at við skyldi taka, enn Aunundr Simunarsun sagði sva, er þá hafði í mesta lagi ráð yfir lidino: eigi mun ec beriaz til ríkis Sigurdi Jarli, eny hann se hvergi nærr. Síðan flyði Aunundr, oc þar næst allt lidit med konongi, oc snerí á land upp; fell þar miök mart af Hákoní konongi. Sva var þá kvedit:

Aunundr qvadz eigi mundo
 vid orrosto kosta
 fyrr enn sunnan sigldi
 Sigurdr Jarl mod hús-karla.
 Miök fara Magnúss reckar
 mætir upp á stræti,
 enn Hákonar haukar
 hart scundudo undan.

Þorbiörn Skacka-skálld sagði sva:

Greitt

Greitt frá ec gumna drottinn
 gríðar fáks í vido
 traundr erat tenn at rióða
 Túnsbergi þer snúna.
 Hræddoz biartra brodda
 bæar-menn vit renno
 ugdo elld oc sveigdan
 álm dyn-vidir málma.

Hákon konongr fór et efra norðr til Þrándheims. Enn er Sigurðr Jarl spyr þetta, fór hann með skipom öllum, þeim er hann feck, it ytra norðr til móts við Hákon konong.

CAP. IV.

FRÁ ERLÍNGI OC HÁKONI.

Erlíngr Skacki tók skip þau öll í Túnsbergi, er Hákon konongr átti. Þar feck hann Bækisúdina, er Ingi konongr hafði átt. Erlíngr fór síðan oc lagði undir Magnús konong alla Víkina, oc sva norðr allt sem hann fór, oc sat um vetrinn í Biörgyn. Þá let Erlíngr drepa Ingibiörn Sipil, lendanmann Hákonar konongs, norðr í Fiördom. Sat Hákon konongr í Þrándheimi um vetrinn, enn eptir um varit haud hann út leiðángri, oc bióz at fara sudr til móts við Erlíng. Þar var þá með hönom Sigurðr Jarl, Jón Sveinsson, Eindridi Ungi, Aun-

undr Simunarsun, Philippus Petrsson, Philippus Gyrdarson, Raungvalldr Kunta, Sigurdr Kápa, Sigurdr Hiúpa, Fridrekr Kæna, Asbiörn af Örlandi, Þorbiörn son Gunnars Giallkera, Strad-Biarni.

CAP. V.

FRÁ LIDI ERLÍNGS.

Erlíngur var í Biörgyn og hafði lid mikit, og tók þat til ráðs, at hann lagði far-bann fyrir kaupskip öll, þau er fara villdo norðr til kaupánga, fyrir því at hann hugdi, at ofskiótt mundi koma Hákonu konungi niósn, ef skipin færi milli; enn fann þat þó til, at Biörgynar-menn væri makligri at hafa gæzku þá er á var skipunom, þótt ódyrra væri keypt at byrðings-mönnom, enn þeim þætti fallit, helldr enn flutt væri í hendur fiandmönnom þeirra og óvinom, þeim til styrks. Nú söfnuduz skip til Biörgynar, þvíat mörg komu hvern dag, enn eingi fóru í brott. Þá let Erlíngur setja upp skip sín þau er lettust voro, og þann róm á vera, at hann mundi þar bída Hákonar, og veita þar vidtöku óvinom sínom, með fulltíngi vana sinna og frænda. Enn einnhvern dag let Erlíngur blása til styrimannastefno, og gaf þá lof kaupskipom öllum, og styrimönnom, at fara hvert er þeir vildo. Enn er menn höfðu þegit leyfi af Erlíngi Skacka til brotlögo,

Þeir er fyrir byrðingom redo, oc ádr lágo föllði þeirra albúnir at fara med varnadi sínom, sumir med kaupom, enn sumir átto önnor eyrindi, var þá oc vedr lett oc segltækt norðr med landi. Enn fyrr enn nón kæmi þess dags, höfdo allir siglt þeir er búnir voro, sótti sá sinna ferd ákafligast, er skip hafði skiótast, kepðiz hverr vit annan. Enn er þetta samflot kom norðr á Mæri, var þar fyrir lid Hákonar konongs, oc siálfr hann í lidsafnadi, oc stefndi til sín lendum-mönnum oc leidángurs-fólki, oc hafði hann þá ádr lánga ríð eigi til tíðenda spurt sunnan af Biörgyn. Enn nú fengo þeir þá eina nyia niósn af öllum skipom þeim er sunnan fóro, at Erlíngr Skacki hafði uppsett skip sín í Biörgyn, oc mundo þeir þannug eiga hanns at vicia, oc sögdo at hann hafði mikit lid. Þadan sigldi Hákon konongr út til Ve-eyar, oc gördi frá ser menn í Raumsdal, Sigurd Jarl oc Aunund Símunar-sun, at fá ser lid oc skip; hann sendi oc frá ser menn á Mæri hvaratveggio. Enn er Hákon konongr hafði dvaliz fár nætur í kaupbænom, þá lagði hann brott, oc hellt siálfr þá enn sudr nockoro lengra, oc þótti sem þá mundi enn skiótara byriod ferd þeirra, oc lidit mundi fliótara til hauns koma. Erlíngr Skacki hafði leyft brottferd öllum kaup-mönnum or Biörgyn sunno-daginn, enn tys-daginn er lokit var formessom, var blásit konongs lúdri,

oc stefnir hann þá til sín lids-mönnom oc bæiar-mönnom, oc let setia fram skip sín þau er ádr voro uppsett. Erlíngur átti þá húsþing vid lid sitt oc leidángurs-menn, sagdi þá mönnom ætlan sína, oc nefndi menn til skipa-stiórnar, let lesa upp hve-
rir skrádir voro á konongs skipino. Lauk sva þesso þingi, at Erlíngur had hvern mann búaz um í síno rúmi, hvar sem skipat var; let þann missa skyldo lífs eda lima, er þá dvalldiz eptir í bænom, er hann legdi brott Bækisúðinni. Ormr Konongs-bródir lagdi á brott síno skipi þegar um kvellðit, oc margir adrir, oc flest skip höfdo ádr verit á floti.

CAP. VI.

FRÁ ERLÍNGI SKACKA.

Ódinsdaginn ádr messor voro súngrar í bænom, lagdi Erlíngur á brott öllu lidino or Biörgyn: þeir höfdo XXI skip; þá var blásandi byrr sunnan med landi. Erlíngur hafdi med ser Magnús konong son sinn; margir voro þar lendir-menn, oc höfdo þeir med ser it frídasta lid. Þá er Erlíngur sigldi norðr fyrir Fiördo, sendi hann skúto inn af leid til búss Jóns Hallkelssonar, oc let taka Nicolás, son Símunar Scálps oc Mario dóttur Haralldz Gilla, oc höfdo þeir hann med ser út til lids síns, fór hann á konongs skipit. Friðdaginn þegar í ótto sigldo þeir á

Steinavog. Hákon konongr lá þar í höfninni scaut brott, oc hafði xiiij skip; var hann siálfr oc menn hanns uppi á eyiunni á leiki, enn lendir-menn hanns sátu á haugi nockorom. Þeir sá at bátr nockr reyri sunnan at eyiunni; ij menn voru þar á, oc leto þeir fallaz stundom í kiölinn ofan, oc eigi tóko þeir fram árunom úákastigarr. Enn er þeir komo at landi, þá festo þeir eigi bátinn, oc runno bádir. Enn er þetta sá ríkis-menn, ræddo þeir um sín í milli, at þessir menn munda segia tíðindi nockor; stódo upp, oc gengo í mót þeim, oc þegar er þeir funduz, spurdi Aunundr Simunason: kunno þit nockot at segia til Erlíngs Skacka, er þit farit sva ákastliga? Sá svaradi er fyrr mátti ordom uppkoma fyrri mædisakir: her siglir Erlíngr sunnan at ydr vid xxi skip, eda því nærr, oc mörg ærit stór, oc megit þer nú skiótt siá segl þeirra. Þá svaradi Eindridi Ungi: ofnærr nefi, kvad karl, var skotinn í auga. Gengo þeir þegar skyndiliga þar til sem leikrinn var, oc því næst gall konongs lúdr vid, oc var þá blásit herblástr öllo lidino til skipa sem ákastligast, oc var þat í þann tíma dags, er miök var matbuit. Stefndi allt fólk til skipanna, hlióp hvern þar uppá þat skip sem hönom var næst, oc urdo skipin óíafnt skiput; taka þá sumir til ára, sumir reisa viduna, oc snúa norðr skipunom, oc stefna til Vecyiar, fyrir því at þeir væntu ser þar mikils lids af bæiar-mönnum.

CAP. VII.

FALL HÁKONAR KONONGS.

Því næst síá þeir segl þeirra Erlíngs, oc sva hvarir adra. Eindridi Ungi hafdi þat skip er kallat var Draglaun, lángskips-búza mikil, oc hafdi þar ordit lidfátt á, þvíat þeir höfdo laupit á önnor skipinn, er þar höfdo ádr verit; þat var seinst skipa Hákonar konongs. Enn þá er Eindridi kom gegnt eyionni Sek, kom Beikisúdin eptir þeim, er Erlíngr Skacki styrdi, oc festo þeir saman þau skip. Enn Hákon konongr var kominn nálíga inn til Veeyiar, er þeir heyrdo lúdra-gánginn; viko þeir þá aptr, oc villdo veita lid Eindrida, oc leggja þá hvarirtveggio til orrosto, sva sem vid komaz; fóro mörg seglin ofan þverskipa, enn eingi voro skipin tengd, oc lögdo bord vid bord. Þessi orrosta vard eigi laung, ádr skipun raufz á skipi Hákonar konongs; fello sumir, enn sumir gengo fyrir bord. Hákon steypti á sik grárri kápo, oc lióp á annat skip; enn er hann hafdi þar dvaliz litla hríd, þá þóttiz hann vita, at hann var þar med óvinom sínom kominn. Oc er hann hugsadi fyrir ser, þá sá hann einga sína menn eda sín skip allnær ser; geck hann þá á Beikisúdina, oc fram í stafnsveit, oc bad ser grida, enn stafnbúar tóko hann á sitt valld, oc gáfo hönom grid. I þessi hríd hafdi ordit mikit mann-

fall, oc þó miklo meira af Hákonar mönnum. Fallinn var þá á Beikisúðinni Nicolás son Simunar Scálps, oc var hanns dráp kent þeim siálfom Erlíngs mönnum. Eptir þetta var hvíld á orrosto, oc greindoz ser hvar skipin. Þá var sagt Erlíngi, at Hákon konongr var þar á skipi hanns, oc stafnbúar höfdo tekit hann til sín, oc heitudz at veria hann. Erlíngr sendi mann fram á skipit, oc bad þat segia stafnbúom, at þeir vardveitti sva Hákon konong, at hann kæmiz eigi ábrott; enn letz eigi mundo á móti mæla, at konongr hefdi grid, ef þat væri ráð annara ríkis-manna, oc væri þadan leitat um sættir. Stafnbúar mællto allir, at hann skyldi mæla allra höfðingia heilastr. Þá let Erlíngr blása ákassliga, oc bad menn þess, at þeir skyldo leggja at skipom þeim er óhrodin voro, sagdi at þeir mundo eigi komaz í betra færi at hefna Inga konongs. Þá æpdo allir heróp, oc eggjadi hverr annan, oc greiddo til atlögunnar. I þessom þys var konongr særdr bana-sári. Enn eptir fall hanns, oc þá er hanns menn urdo þess varir, þá röro þeir at fast, oc köstudo hlifunom, oc hiuggo i jhöndom, oc hirto þá eigi um líf sitt. Þessi ofrausn geyrdiz þeim brátt at skada miklom, þvíat menn Erlíngs sá þá bera högg-stadi á þeim; fell þá þorrinn Hákonar konongs manna, bar þat mest til, at lidsmunr var mikill, oc menn Hákonar hlífdo ser lítt,

enn eingi þurfti gridin at nefna Hákonar-manna, uema þeir einir, er ríkis-menn tóko á sitt valld, oc festo fe fyrir. Þessir menn fello af Hákonar lidi: Sigurdr Kápa, Sigurdr Hiúpa, Rögnvalldr Kunta; enn nockor skip komoz undan, oc röro inn í Fiördo, oc hulpo sva lífi síno. Lík Hákonar konongs var flutt inní Raumsdal, oc var þar iardat. Enn sídar let Sverrir konongr bródir hanss flytia lík Hákonar konongs norðr til kaupánga, oc leggja í steinvegginn í Kristz-kirkio fyrir sunnan í kórnom.

CAP. VIII.

FLÓTTI LIDS-HÖFDÍNGIA HÁKONAR
KONONGS.

Sigurdr Jarl, Eindridi Ungi, Aunundr Simunars-son, Fridrekr Kæna, oc enn fleiri höfðingar helldo enn saman flockinom, leifdo skipin í Raumsdal, oc fóro sídan til Upplanda. Magnús konongr oc Erlíngr fadir hanss fóro við lidi síno norðr í Þrándheim til Nidaróss, oc lögdo land allt undir sik, hvar sem þeir fóro. Sídan let Erlíngr stefna Eyraþíng, var þar Magnús til konongs tekinn yfir allan Noreg; dvaldiz Erlíngr þar litla ríd, þviat hönom þóttu þrændor vera helldr ótrúligir þeim fedgom, var Magnús þá kalladr konongr yfir landi öllo. Hákon konongr hafði verit maðr fríðr synom, vax-

inn vel, hár og miór, og helldr herda-breidr, og því kölludo lids-menn bann Hákon Herda-breidan. Enn fyrir því at hann var úngr alldri, höfdu lendir-menn ráða-gjördir fyrir hönom; hann var kátr og lítilátr í máli, leikinn og hafði úngmennis æði á ser, vinsæll var hann vit alþýdo.

CAP. IX.

UPPHAF SIGURDAR KONONGS.

Markús á Skógi het madr Upplendzkr, frændi Sigurdar Jarls; Markús fóstradi son Sigurdar konongs Haralldzsonar, sá het og Sigurdr. Síðan tóko Upplendingar Sigurd til konongs, með ráði Sigurdar Jarls, og annara höfðingja, þeirra er fylgt höfdu Hákonu konongi, og höfdu þeir þá enn styrk mikinn lids, og fór flokkurinn íafnan í tvenningo, var konongr og Markús minnr á viðborða, enn Sigurdr Jarl með sína svit og lendir-menn váro meir við háskann; fóro þeir með flokkinn mest um Upplönd, enn stundom ofan í Víkina. Erlíngr Skacki hafði íafnan með ser Magnús konong son sinn, hafði hann og skipa-stól allan og land-varnir. Hann var í Biörgyn um haustit ríð nockora, og fór þaðan austr í Vík, og settiz í Túnsbergi, og efnadi þar til vetrseto, og safnadi at ser um Víkina sköttom og skyldom þeim er konongr átti, hann hafði og frítt lid

oc mikit. Enn med því at þeir Sigurdr Jarl höfdo lítit af landi, enn mikit fiölmenni var med þeim, þá vard þeim brátt fefátt, oc þar er eigi voro höfðingiar nærr, þá vard eptir feno leitast miök aflaga, sumt med frekligom saka-giptom, enn sumt berliga med ránom.

CAP. X.

FYRIRDÆMDR SIGURDR JARL.

I þann tíma stóð Noregs velldi med miklom blóma, var bónda-fólkit audigt oc ríkt, oc úvant ófrídi edr ófrelsi, oc ofríki floekanna; geyrdiz brátt á þesso mikit ordlag oc stórar frásagnir, þá er rænt var. Vikveriar voro fullkomnir vinir Magnúss konongs oc Erlíngs, oc ollí því mest vinsælld Inga konongs Haralldzsonar, þvíat Vikveriar höfdo med sínom styrk iafnan þíónat undir þann skiöld. Erlíngur let hafa vardhölld í bænom, oc vökdo xij menn hveria nótt. Erlíngur átti iafnan þíng vit bændor, oc var þar talast opt of óspekdir Sigurðarmanna; oc med fortöloom Erlíngs oc annara lidsmanna, þá fekz til þess mikill rómr af bændom, at þat væri happa-míkit verk, at menn leti þann floek aldregi þrífaz. Arni konongs-mágr taladi langt oc sníallt um þetta mál, oc hart at lykdom; beiddi hann þess alla menn er á voro þíngino, bædi lidsmenn oc bændor oc bæiar-menn oc kaupmenn, at

menn skyldo göra at því vapna-tak, at dæma med lögom Sigurd Jarl oc allan þann flok þeirra til fiandans bædi lífs oc dauda. Enn med ákafa oc óstilling⁹ lydsins, þá iátudo allir því; var þetta ódæma-verk giört oc fest, sva sem lög voro til at dæma á þingom. Hróalldr prestur Lángtala taladi um þetta mál, hann var manna sniallastr, oc kom sú tala miök í einn stad, sem ádr hafdi talat verit. Erlíngur veitti um Jólin í Túnsbergi, enn hann gaf mála þar um Kyndel-messo.

CAP. XI.

FRÁ ERLINGI.

Sigurdr Jarl fór med it frídasta lid sitt ofan í Víkina, oc geck þar undir hann mart fólk fyrir ófrikis sakir, enn margir gulldo fe; fór hann sva víða uppi á land, oc kom fram í ymsom stödom; voro þeir sumir í flokinom, er ser leitudo grida á laun til Erlíngs, enn þar komo þau andsvör móti, at allir menn þeir er þess leitudu, skyldo fá lífs-grid, enn þeir einir landz-vist, er eigi væri í stórsökom við Erlíng. Oc er þat fretto flokks-menn, at þeir skyldo eigi landz-vistina hafa, þá hellt þat miök saman flokinom; þvíat þeir voro margir, er at því visso sik sanna, at Erlíngi mundi þickia miök vera sak-bitnir. Philippus Gyrdarson

geck til sættar vid Erlíng, oc feck aptr eignir sínar, oc fór aptr til búa sinna. Litlo síðarr komo þeir þar menn Sigurðar, oc drápo hann. Mörg slög veitto oc hvarir öðrom í elltom, eða í manna af-tökom; oc er þat eigi her ritat, er eigi áttuz höf-díngiar vid.

CAP. XII.

ERLÍNGR FÆR NIÓSN UM SIGURD JARL.

Þat var á öndverdri fösto er niósn kom Erlíngi, at Sigurðr Jarl mundi ætla á fund hanss, oc var til hanss spurt her oc hvar, stundom nærr, enn stundom firr meirr. Erlíngr giörði þá niósnir alla vega frá ser, at hann skyldi varr vid verða, hvar sem þeir kæmi fram. Hann let oc hvert kvæld blása öllo lidino upp or bænom, oc lágo þeir um vetrinn um nætor lengi í safnadi, oc var ádr allt skipat lidino til fylkingar. Þá kom Erlíngi niósn, at þeir Sigurðr Jarl voro skamt þadan á brott, uppi á Re. Erlíngr byriadi þá ferd sína or bænom, oc hafði þá vid ser allt bæiar-fólk, þat er vígt var oc vapnat, oc sva kaupmenn, nema xii menn, er eptir voro at gæta bæiar. Erlíngr fór or bænom tys-daginn í annari viko lánga-fösto eptir nónn, oc hafði hverr madr med ser ij daga vist; fóro þeir um nóttina, oc varð þeim seint at koma lidino or bænom. Um einn hest oc einn skiölld voro

menn ij. Þá er skorat var lidit, þá var nær xii hundrut manna. Enn er niósn kom móti þeim, var þeim sagt, at Sigurdr Jarl var á Re, á þeim bæ er Ramnes heitir, með v hundrut manna; let þá Erlíngur kalla saman lidit, oe sagði þau tíðindi er hann hafði spurt; enn allir eggiudo, at þeir skylldo skunda, oe taka hús á þeim, eda beriaz þegar um nóttina. Erlíngur mællti sva: þat mun líkligast þikia, at fundr varr Sigurdar Jarls muni brátt atberaz; eru í þeirra floeki þeir menn margir, at oss mætti minnisamt vera þeirra handaverk, er þeir hiöggo niðr Inga konong, oc sva margi adra vini vara, sem seint er tölo á at koma; geyrdo þeir þau verk með fianda-krafti oc fiölkyngi oc níðingsskap: þvíat þat stendr her í lögom vorom oc landzretti, at eingi madr hefir sva fyrirgört ser, at eigi heiti þat níðings-víg eda mordvíg, er menn drepaz of nætor. Hefir þessi flockr sva leitad ser heilla, at tilvísan fiólkunnigra manna, at þeir skylldo of nætor beriaz, enn eigi undir sólo; hafa þeir oc með þvílíkri framkvæmd þann sigr unnit, at stíga yfir höfod þvílíkom höfðingiom, sem þeir hafa at iördo lagt. Nú höfom ver þat optliga sagt oc synt, hvernog afleitt oss virdiz um þetrra hátto, er þeir hafa of nætor til bardaga rádit; skolo ver fyrir því helldr hafa hinna höfðingia dæmi, er oss ero kunnari, oc betra er eptir at

líkia, at beriaz of líósa daga, oc med fylkdo lidi, enn stelaz eigi á sofandi menn of nætor; höfo ver nógt lid i móti þeim, eigi meiri her enn þeir hafa; skulo ver bíða dags oc lysingar, oc helldaz saman í fylkingom, ef þeir vilia nockor álaup oss veita. Eptir þat settiz nidr lidit allt; tóko sumir sundr hey-híálma nockora, oc geyrdo ser af ból, sumir sátu á skiölldom sínom, oc bido sva lysingar. Svallt var vedr oc vata-drífa.

CAP. XIII.

FRÁ FYLKING SIGURDAR JARLS.

Sigurdr Jarl hafði sva fremi fengit niósnina, er lidit nærr var komit at bænom. Stódo menn hanns upp oc vapnudoz, oc visso ógiörla hverso mikit tíð. Erlingr hafði, villdo sumir flyia, enn flestir villdo bíða. Sigurdr Jarl var vitr madr oc sniallr í máli, enn kalladr eigi mikill árædis-madr, var Jarl þá oc fúsari at flyia, oc feck hann af því hallmæli mikit af lids-mönnom. Enn er lysti, tóko hvarirtveggio at fylkia lidi síno, fylkdi Sigurdr Jarl á brecko nockorri fyrir ofan brúna, milli árinna oc bæiarins; þar fell litil á. Enn þeir Erlingr fylkdo öðro megin árinna; á bak fylking þeirra voro menn á hestom vel vapnadir, þeir höfdo kononginn med ser. Menn Sigurdar Jarls sá þá, at lids-munr

mundi vera mikill, oc töldo þat ráð at leita á skóginn. Þá svarar Sigurdr Jarl: þat segi þer at, mer fylgi eingi hugr, enn nú skal þat reyna: gæti hverr sín, at cigi flyi eða fálmi fyrr enn ec. Ver höfom vigi gott, látom þá gánga yfir brúna, enn er merkit kemr yfir brúna, þá steypumz ver á þá ofan fyrir breckuna, oc flyi nú eingi frá ödrom. Sigurdr Jarl hafði raudbrúnadan kyrtil, oc rauda skickio, oc drepit upp fyrir skautunom, fitskúa á fótom, hann hafði skiöld, oc sverd er Bastardr het. Jarl mælti: þat veit Gud med mer, at helldr enn þiggia mikit gull, þá villða ec ná med Bastardi, at koma eino höggvi vid Erlíng Skacka.

CAP. XIV.

FALL SIGURDAR JARLS.

Lid Erlíngs Skacka villdi gánga fram at brúnni; Erlíngr bad þá venda upp med ánni: er á þessi lítil, oc eingi torfæra, þvíat slett er at; oc var sva giört. Fylkíng Sigurdar Jarls fór upp eptir breckunni gegnt þeim; enn þá er þraut breckuna, oc slett var yfir ána oc gott, þá mælti Erlíngr, at hanns menn skylldo syngia Pater Noster, oc bidia Gud, at þeir hefði gagn er betr gegndi. Þá súngo þeir allir hátt Kyrieelison, oc bördo vapnom á skiöldo sína. Enn vid þann gny skutuz ábrott oc

flydo ecc manna af Erlíngs lidi. Geck þá Erlíngur oc hanns lid yfir ána, einn Jarls-menn æpðo heróp; enn þeim brásk framhlaupit fyrir breckuna á fylking Erlíngs, oc tókz orrosta upp á framanverðri breckunni; voro fyrst spióta-lög, oc þvínæst högg-orrosta, oc fór þegar á hæl merki Jarls, sva at Erlíngur oc hanns menn komuz uppá breckuna. Vard þá skömm orrosta, ádr enn Jarls-menn flydo á skógin, er at baki þeim var ádr. Þá var þat sagt Sigurði Jarli, oc báðo menn hann flyia; hann svarar: fram ver nú, meðan megom. Gengo þeir þá fram allhraustliga, oc hiuggo til beggia handa. I þeirri hríd fell Sigurður Jarl, oc Jóan Sveinsson, oc nær lx manna. Þeir Erlíngur leto fátt manna, oc ráko flóttann at skóginom. Þá stöðvadi Erlíngur lidity, oc hvarf þá aptr. Hann kom þar at, er þrælur konungs villdo fletta klædom af Sigurði Jarli, oc var hann eigi með öllo eyrendr, enn vissi þó ecki. Hann hafði fólgt sværd sitt Bastard í umgiörð, oc lá þat þar hiá hönom. Erlíngur tók þat upp, oc laust með þrælana, oc bad þá brott skrida. Eptir þat hvarf Erlíngur aptr með lidi síno, oc settiz í Túnsbergi. Siö nóttom síðar enn Sigurður Jarl fell, tóko þeir Erlíngs-menn Eindrida Unga, oc var hann drepinn, oc öll skipsaugn hanns með hönom.

CAP. XV.

FRÁ MARKÚSI Á SKÓGI, OC SIGURDI
KONONGI SIGURDAR SYNI.

Markús af Skógi oc þeir Sigurdr konngr fóstrar redo ofan í Vikina er varadi, oc fengo ser þar skip. Enn er þat spurdi Erlíngr, þá fór hann austr at þeim, oc hittuz þeir í Konongahello. Flydo þeir Markús uppí eya Hísing; dreif þar ofan landz-fólk Hísings-búar, oc gengo í fylking med Markúsi oc Sigurdi. Þeir Erlíngr röro at landi, enn Markúss-menn skuto á þá. Þá mællti Erlíngr vid sina menn: tókum skip þeirra, oc göngum eigi upp at beriaz vid landz-her: Hísings-búar ero illir heim-sóknar, hardir menn oc óvitrir; muno þeir litla stund hafa flokk þenna med ser, þvíat Hísing er lítit land. Var sva giört, at þeir tóko skipin, oc flutto yfir til Konongahello. Markús oc hauns lid fóro upp á markir, oc ætludo þaðan til álaupa; höfdo þá hvarir niósnir af ödrom. Erlíngr hafði fölmenni mikit, oc nefndi þat lid or herodom; veitto þá hvarir ödrom árásir.

CAP. XVI.

UPPHAF EYSTEINS ERKIBISKUPS.

Eysteinn son Erlendz Hímallda var kosiinn til Er-kibiskups, eptir andlát Jóans Erkibiskups. Eysteinn

var vígdr á sama ári er Ingi konongr fell. Enn er Eysteinn Erkebiskop kom til Stóls, var hann vel þökkadr öllu landz-fólki, hann var skörúngr mikill, oc madr ættstór; tóko Þrændir seginsamliga við hönom, þvíat flest stórmenni í Þrændalögom var bundit í frændsemi eda í nockorom tengdom við Erkebiskop, enn allir fullkonnir vinir hanss. Erkebiskup hóf þá mála-leitan við bændor: taladi fyrst um siár-þurft Stadarins, oc þat med, hversu mikla uppreist Stadrinn þurfti at hafa, ef hann skyldi þá vera þeim mun sæmiligar halldinn enn ádr, sem hann var þá tignari enn ádr, er þar var Erkebiskops-stóll settr. Hann beiddi þess bændor, at þeir skyldo veita hönom silfr-metinn eyri í sinn sakeyri, enn ádr hafdi hann sakmetinn eyri, sem geck í konongs sakeyri; enn þessa aura-lags er helmíngs munr, at meiri er sá, er hann villdi hafa, silfr-metinn eyrir. Enn við styrk frænda Eysteins Erkebiskops oc vina, enn framkvæmd siálfs hanss, þá geckz þetta við, oc var þat dæmt at lögom um öll Þrændalög, oc öll fylki þau er í hanss Erkebiskops-riki voro.

CAP. XVII.

FRÁ MARKUSI OC SIGURDI KONONGI.

Sigurdr oc Markús þá er þeir höfdo látit skip sín í Elfunni, oc sá þeir þat, at þeir fengo eigi fang

á Erlíngi, þá sneroz þeir til Upplanda, oc fóro sva it efra norðr til Þrándheims; var þeim Sigurði þar vel fagnat, oc var Sigurdr þar til konongs tekinn á Eyra-þíngi. Redoz þar til flocksins margir göfugir menn oc synir þeirra; redo þeir ser þá til skipa, oc biðgguz skyndiliga, oc fóro er sumradi sudr á Mæri, oc tóko þar allar konongs-tekior hvar sem þeir fóro. Þeir voro þá lendir-menn í Biörgyn til landvarnar: Nicolás Sigurdarson, Nöckvi Pálsson, oc enn fleiri sveitar-höfðingiar, Þórólfr Dryllr oc Þórbiörn Gialldkere, oc margir adrir. Þeir Markús sigldo nordan, oo spurdo at Erlíngs-menn höfdo fiölment í Biörgyn, sigldo þar útleid sudr um. Þat höfdo menn at máli, at sumar þat höfdo Markúss-menn byr, hvert er þeir villdo sigla.

CAP. XVIII.

DRÁP SIGURDAR KONONGS OC MARKÚSAR.

Erlíngr Skacki, þegar er hann spurdi at þeir Markús höfdo nordan farit, hellt hann þá norðr í Víkina, oc dró hann at ser lid oc vard brátt fiölmennr, oc hafdi mörg skip oc stór. Enn er hann sótti útí Víkina, tók hann andvidrí stór, oc lá lengi í höfnom hær oc hvar allt þat sumar. Enn er þeir Markús komo austr á Lista, þá spurdo þeir at Erlíngr hafdi hær óvígán í Víkinni, vendo þeir aptr norðr.

Enn er þeir komo á Hördaland, þá ætla þeir til Biörgyniar, oc er þeir komo fyrir bæinn, róa þeir Nicolás innan í móti þeim, oc höfdo lid miklo meira oc skip stærri; siá þeir Markús þá eingan annan sinn kost, enn róa sudr undan, stefna sumir til hafs út, enn sumir sudr í sund, enn sumir í Fiördo inn. Markús oc sumt lid med hönom lióp upp í ey þeirri, er Skarpa heitir. Þeir Nicolás tóko skip þeirra, oc gáfo grid Jóni Hallkelssyni, oc nockorom mönnom ödrom, enn drápo flesta þá er þeir nádo. Nockorom dögum sídarr fann Eindridi Heidafyla þá Sigurd oc Markús, oc voro þeir fluttir til Biörgynar. Var Sigurdr höggvinn út fyrir Grafðali, enn Markús var hengdr vit annan mann á Hvarfsnesi; enn þat var Michaels-messo. Þá dreifdiz flockr sá, er þeim hafði fylgt.

CAP. XIX.

FRÁ ERLÍNGI OC HÍSÍNGS-BÚOM.

Frírekr Kæna oc Biarni hinn illi, Annundr Simunarson, Aurnolfr Skorpa, þeir höfdo róit á haf út med nockorom skipom, oc helldo it ytra med hafi austr fyrir land. Enn hvar sem þeir komo vit land, rænto þeir oc drápo vini Erlings. Enn er Erlíngr spurdi dráp þeirra Sigurdar oc Markúsar, þá gaf hann heimleyfi lendum-mönnom oc

leidángs-mönnum, enn hann siálfr hellt þá síno lidi austr yfir Follina, þvíat hann spurdi þar til Markús-manua. Erlíngur hellt til Konongahello, oc dvaldiz þar um haustit. A fyrsto viko vetrar fór Erlíngur út í eya Hising med lid mikit, oc krafði þar þíngs. Hísings-búar komo ofan, oc helldo upp þíngi. Erlíngur bar sakir á hendur þeim um þat, er þeir höfdo hlaupit í flok med Markúsi oc Sigurdi, oc fylkt lidi í móti hönom. Auzurr het bön-di sá er ríkastr var í eyinni fyrir, oc taladi í móti hönom af þeirra hendi; var þíngit langt, enn þat vard at lykdom, at bændor festo dóm Erlíngi á síno máli, enn hann giörði þeim stefno-lag á viko fresti í bænom, oc nefndi til xv bændor at koma þá þar. Enn er þeir komo, dæmði Erlíngur á hendur þeim at giallda ekk nauta. Fóro bændor heim, oc undo illa sínom hluta. Litlo sídar lagdi is á ána, oc fraus inni skip Erlíngs; helldo bændor þá gialldino, oc lágo í safnadi um hríd. Erlíngur bió þar til Jóna-veizlo, enn Hísings-búar höfdo samburðar-öl, oc helldo sveit um Jónin. Um nóttina eptir hinn fimta dag Jóna, fór Erlíngur uppí eya Hising, oc tók hús á Auzari, oc brendi hann inni, oc allz drap hann tíu-tígi manna, oc brendi iij bæi, oc fór síðan aptr til Konongahello. Síðan komo bændor sem ákvedit var, oc gulldo gialldit Erlíngi.

CAP. XX.

DRÁP FRÍREKS KÆNO OC BIARNAR ILLA.

Erlíngur Skacki bióz þegar um varit, er hann mátti fleyta skipom sínom fyrir ísom, oc fór or Konongahello; hann spurdi at þeir herido norðr í Víkinni, er fyrr höfdo verit Markúss menn. Erlíngur hellt þá til niósnom um farir þeirra, oc fór at leita þeirra, oc hitti þá er þeir lágo í höfn nockorri. Aunundr Simunarson oc Aurnolfr Skorpa komuz undan, enn Frírekr Kæna oc Biarni inn Illi urdo handteknir, oc drepit mart af sveitúngom þeirra. Erlíngur let binda Frírek vid ackeri, oc kasta fyrir bord; oc var Erlíngur af því verki it mesta óþockadr í Þrændalögom, þvíat Frírekr átti þar hina stærsto ætt. Biarna hinn Illa let Erlíngur hengia, oc mællti Biarni enn illa, sem hann var vanr, med eno mesta orðskræpi, ádr hann var hengdr. Sva segir Þórbiörn Scacka-skálld:

Urd dró austan fiardar
 Erlíngur at víkingom.
 mein feck margr af Kæno
 madr er hann sör þadra.
 Færdr var sleinn medal herða
 Fríreks ofarr nockvi
 skolldi óþarfr ölldom
 illgiarn vid tre Biarni.

Aunundr oc Aurnolfr, oc þær sveitir er undan höfdo komiz, flydo til Danmerkor, enn váro stundom á Gautlandi eda í Víkinni.

CAP. XXI.

SAMTAL ERLÍNGS SKACKA OC EYSTEINS ERKIBISKOPS.

Erlíngr Skacki hellt síðan til Túnsbergs, oc dvaldiz þar miög lengi um varit; enn er sumradi, hellt hann norðr til Biörgyniar, var þar þá allmikil fiölmenni. Þá var þar Stephanus Legati af Rómaborg oc Eysteinn erkibiskop, oc adrir biskopar innlendzkir. Þar var oc Brandr biskop, er þá var vígðr til Islandz, oc Jón Loptzson, dótturson Magnúss konongs Berfættz; hafði þá Magnús konongr oc adrir frændor Jóans tekit við frændsemi hanss. Eysteinn erkibiskop oc Erlíngr Skacki voro opt á tali oc á einmælom; oc eitt sinn varð þat í rædom þeirra, at Erlíngr spurdi: er þat með sannindom, herra, er menn segia, at þer hafit aukit aura-lag um sakeyri ydvarn við bændor norðr í landit? Erkibiskop svarar: þat er víst satt, at bændor hafa mer þat veitt, at auka aura-lag um sakeyri minn; hafa þeir af siálfræði síno, enn með cingom pindingom, aukit í því Guds dyrd oc audæfi stadar vars. Erlíngr svarar: hvert ero þat lög, herra, hinns helga

Olafrs konungs, eða hafi þer tekit nockoro frekara þetta mál, enn sva sem ritat er á lögbókinni? Erkibiskop svarar: sva mun hinn helgi Olafr konongr lögin hafa sett, sem hann feck þá til iáord oc samþycki alþyðunnar; enn eigi finnz þat í hanns lögom, at bannat se at auka Guds rett. Erlíngr svarar: vili þer auka ydarn rett, þá muno þer oc vilia styrkia oss til þess, at ver aukim iamnmiklo konungs rettinn. Erkibiskop svarar: aukit hefr þú nú ádr med uógo nafn oc ríki sonar þíns; enn ef ec hefi aflaga tekit aura-lögin af þrændom, þá ætla ec stærri afbera hin laga-brotin, er sá er konongr yfir landi, er eigi er konungs sonr, ero hvarki til þess lög ne dæmi her í landi. Erlíngr svarar: þá er Magnús var til konungs tekinn yfir Noregs ríki, var þat giört med ydarri vitund oc rádi, oc allra annara biskopa her í landi. Erkibiskop svarar: því hetz þú þá, Erlíngr, ef ver samþycktom þat med þer, at Magnús væri til konungs tekinn, at þú skyll-dir styrkia Guds rett í öllum stödom med öllum krapti. Erlíngr svarar: iáta ec því, at ec hefi heitit at hallda oc styrkia Guds bodord oc landz-lög med öllum krapti mínom oc styrk konungs. Nú se ec her betri ráð til, helldr enn hvarr ockarr kenni ödrom brigdmæli, hölldom helldr einkamál var öll; styrki þer Magnús til ríkis, sva sem þer hafit heitit, enn ec skal styrkia ydart ríki til allra farsælligra luta.

Fór þá öll ræðan miðkliga með þeim. Þá mælti Erlíngur: ef Magnús er eeki svo til konungs tekinn sem forn síðvandi hefir verit her í landi, þá megit þeir af ydro valldi gefa hönom konungs vígslo, svo sem Guds lög ero til, at smyria konong till velldis. Enn þótt ec se eigi konongr eda af kononga ætt kominn, þá hafa þeir konongar verit nú flestir í varo minni, er eigi vissu iafnvel sem ec til laga eda landz-rettar; enn módir Magnúsar konungs er konungs dóttir og drottningar skilfengin. Magnús er og drottningar son og eiginkona son. Enn ef þeir vilit gefa hönom konungs vígslo, þá má eingin hann síðan at retto taka af konungdóminom. Eigi var Vilhiálmr Bastardr konungs son, og var hann vígdr og kórónadr til konungs yfir Englandi, og hefir síðan halldiz konungdómr í hanss ætt á Eng-landi, og allir verit kórónadir. Eigi var Sveinn Ulfsson í Danmörk konungs son, og var hann þó þar kórónadr konongr, og síðan synir hanss, og hver eptir annan þeirra frænda kórónadir konongar. Nú er her í landi Erkistóll, er þat mikill vegr og tign landi voro; auk m ver nú enn þá með gódom lutom: höfom konong kórónadan, eigi síðr enn Dan-ir og Enskir menn. Síðan töludo þeir Erlíngur og erkibiskop um þetta mál optliga, og fór allt sáttgjarnliga. Síðan bar erkibiskop þetta mál fyrir Legatan, og fekk hann auðveldliga snúið hanum til

samþykis við sik. Atti erkibiskop þá stefno við lyðbiskopa, og adra kennimenn, og bar þetta mál fyrir þá; enn allir svörudo á eina lund, sögdo þat sitt ráð sem erkibiskop villdi vera láta, og fysto allir at vígsla særi fram, þegar er þeir fundu, at erkibiskop villdi sva.

CAP. XXII.

VÍGSLA MAGNÚSAR KONONGS.

Erlíngur Skaeki let búa í konongs-gardi til veizlo mikillar, og var in mikla höll tiölldod þellom og bakklædom, og búin við hinom mesta kostnadi. Var þar veitt hirdmönnom og öllum handgengnom mönnom; þar var fiölldi bods-manna og margir höfðlingiar. Magnús tók þá konongs-vígslu af Eysteini erkibiskupi, og þar voro at vígslonni adrir v biskupar og Legátinn, og fiölldi annara kennimanna. Erlíngur Skaeki og með hönom xij lendirmenn svördo laga-eydinn með konongi. Og þann dag er vígslan var, hafdi konongur og Erlíngur í bodi síno Legátann og erkibiskup, og alla adra biskupa, og var sú veizla hin vegsamligasta; gáfo þeir fedgar þar margar stórgiafir. Þá var Magnús konongur viij vetra, og þriá vetur hafdi hann þá konongur verit.

CAP. XXIII.

FRÁ SENDIMÖNNOM VALLDIMARS
KONONGS.

Valldamar Dana-konongr hafði þá spurt þau tíðindi af Noregi, at þar var þá Magnús einn ordinn konongr yfir landi öllu, oc þá var eytt flokkom öllum öðrom þar í landi. Þá sendi Valldamar Dana-konongr menn síná við brefom til Magnúss konongs oc þeirra Erlíngs, oc minti þá á einkamál þau, er Erlíngr hafði bundit vit Valldamar konong, sva sem fyrr var her ritat: at Valldamarr konongr skyldi eignaz Víkina austan til Rygiarbitz, ef Magnús yrði einvalldz-konongr yfir Noregi. Enn er sendimenn komo fram, oc syndo bref Dana-konongs Erlíngi, oc hann skilr tilkall Dana-konongs, þat er hann hefir í Noregi, þá ber Erlíngr þetta fyrir adra þá menn, er hann skaut ráðom undir. Enn þeir sögdo allir eitt, at alldri skyldi Dönom midla neitt af Noregi, þvíat menn sögdo, at sú ölld hafði verst verit þar í landi, er Danir höfdo valld í Noregi. Sendimenn Dana-konongs slutto sitt mál fyrir Erlíngi, oc beiddo hann orskurðar; enn Erlíngr bad þá fara með sér í Vík austr um haustit, sagði at hann mundi þá veita orskurð of þetta mál, er hann hafði hitta þá menn í Víkinni, er þar voro vitrastir.

CAP. XXIV.

FRÁ ERLÍNGI OC VÍKVERIOM.

Erlíngur Skacki fór um haustit austr í Víkina, oc dvaldiz í Túnsbergi: hann giördi menn yfir til Borgar, oc let stefna iiij fylkna þing í Borg; síðan fór Erlíngur þannug við lidi síno. Enn er þing var sett, þá taladi Erlíngur, oc sagði frá því, hver ráðagiörd hafði verit stadfest með þeim Dana-konungi, þá er þeir Erlíngur höfðu hafit flokk þann it fyrsta sinn; vil ec, sagði Erlíngur, hallda öll einka-mál við konung, þau er ver giördom þá, ef þat er vili oc samþykki ydart bøndanna, at þióna helldr Dana-konungi, enn þessom konungi, er nú er vígdr oc kórónadr til landz þessa. Bændor svörudo máli Erlíngs, oc sögdo sva: fyrir eingan mun vilíom ver göraz menn Dana-konongs, meðan einhverr varr er á lífi Víkverianna. Geystiz þá at múgrinn allr með ópi oc kalli, oc bádo Erlíng hallda eida sína, er hann hafði þá svarit öllu landz-fólki, at veria land sonar síns; enn ver skulom allir fylgia þer. Sleit sva því þingi. Síðan fóro sendimenn Dana-konongs heim sudr til Danmerkr, oc sögdo sín erindis-lok. Veitto Danir Erlíngi mikit ámæli, oc öllom Nordmönnom, at þeir væri alldregi reyndir nema at illo; fóro þau ord um, at Dana-konongr mundi eptir um varit hafa úti her sinn, oc heria

í Noreg. Erlíngur fór um haustit norðr til Björgyniar, og sat þar um vetrinn, og gaf þar mála.

CAP. XXV.

FRÁ BREFOM ÞRÆNDA.

Vetr þann fóru menn nockrir Danskir it efra um Upplönd, og sögðu þat, sem marg-títt er, at þeir skyldu fara til hinns helga Olafs konungs til vöku. Enn er þeir komo í Þrándheim, þá hitto þeir þar marga ríkis-menn, og sögðu þeir þá erindi sín: at Dana-konungur hefði sent þá at leita ser vinátto þeirra, og viddöko ef hann kæmi í land; enn hann het bæði at gefa þeim ríki og fe. Þessi ordsending fylgdi bæði bref og innsigli Dana-konungs, og þat með, at þeir Þrændur skyldu senda ámót bref sín og innsigli. Þeir gjörðu sva, og urpuz flestir vel vid ordsending Dana-konungs. Fóru sendimenn austr aptr, er áleid lánga-föstu. Erlíngur sat í Björgyn, enn er varadi sögðu vinir Erlíngs hönom þat þann, er þeir höfðu heyrt af byrdings-mönnum, er komnir voru norðan or Þrándheimi: at Þrændir væri berir í siandskap til hans, og þeir lysti því á þingom sínum, ef Erlíngur kæmi í Þrándheim, at hann skyldi alldri komaz með förví út um Agðanes. Erlíngur qvadd slíkt vera upplost og hegóma. Erlíngur lysti því, at hann mundi fara suðr á Unarheim til Gagudaga-þings, og let búa sneckio

tvítug-sesso, oc med skúto fimtán-sesso, oc einn vista-byrding. Enn er skipin voro búin, þá lögdoz á sunnan-vedur hvöss. Tyss-daginn í gagndögum let Erlíngr blása til brottlögo lidi síno til skipa, enn menn voro traudir or bænom, oc þótti illt at róa andródrinn. Erlíngr lagdi í Biskups-höfn. Þá mællti Erlíngr: illa kunni þer at róa andródran; takit nú þá oc reisit vidona, dragit sídan seglin, oc látit gánga norðr skipin. Þeir giördo sva, oc sigldo norðr um daginn oc um nóttina. Ofinsdaginn at qvelli sigldo þeir inn um Agdanes; var þá fyrir þeim samflot mikit af byrdingom, oc ródrar-ferior oc skútur, var þat vöko-lid, oc fóro inn til bæiar, sumt fyrir þeim enn sumt eptir; gáfo bæiar-menn fyrir þessa sök eingan gaum at um lángskipa siglúguna.

CAP. XXVI.

FRÁ ERLÍNGI OC ÞRÆNDOM.

Erlíngr kom til bæiarins þann tíma er súnginn var ótto-saungr uppi á Kristz-kirkio; líópo þeir Erlíngr í bæinn, oc var þeim sagt at Alfr Raudi, son Otars Birtings, lendr madr, sat þá enn oc drack med sveit sína. Erlíngr veitti þeim atgöngo, oc var Alfr drepinn oc nær öll sveit hanns. Fátt fell annara manna í bænom, þvíat flest hafdi gengit í kirkio, því þetta var um nóttina fyrir uppstigningar

dag. Þegar um morguninn let Erlíngur blása öllu lidino til þings út á eyrar. Enn á þingino bar Erlíngur sakir á Þrændi, og kendi þeim landráð við konunginn, og nefndi til Bárd Stendala og Pál Andresson, og Raza-Bárd, hann hafði þá bæiar starf, og enn miök marga aðra. Þeir svörudo, og færdo sik undan sökum. Þá stóð upp kapalín Erlíngs, og hellt upp bresom mörgom og innsiglom, og spurdi ef þeir kendi þar innsigli sín, þau er þeir höfdo send Dana-konungi; váro þá og lesin upp bresin. Þar voro og þá inir Dönsko menn með Erlíngi, er með bresin höfdo farit um vetriinn, hafði Erlíngur þá fengit til þess; sögdo þeir þá fyrir allri alþydo hvers þeirra ord, þau er mællt höfdo verit. Sva mælltir þú Raza-Bárdr, sögdo þeir, og bardir á brióstit: or þesso briósti komo at upphafi öll þessi ráð. Bárdr svaradi: ærr var ec þá, herra minn, er ec mællta slíkt. Urdo þá eingi faung önnur, enn festa allt óskorat á dóm Erlíngs á öllu þesso máli. Tók hann þar ógryn timer af mörgom mönnum, enn lagdi alla ógillda þá er drepnir voro. Fór Erlíngur síðan aptr sudr til Biörgyniar.

CAP. XXVII.

FERD VALLDIMARS KONONGS Í NOREG.

Valldimar Dana-konongur hafði þat var úti her mikinn í Danmörko, og hellt lidi því norðr í Víkina.

Þegar er hann kom í velli Noregs konungs, þá höfðu bændor fyrir safnad oc múg manns. Konongr fór fridsamliga oc spakliga; enn hvar sem þeir komo vid meginland, þá skuto menn á þá, oc þótt einn eða tveir væri; oe þótti Dönom þat fullr illvili vid sik landz-manna. Enn er þeir komo til Túnsbergs, þá stefndi Valldimar konongr þar þing á Haugom, enn eingi sótti til or herödom. Þá taldi Valldimar konongr fyrir lidino, oe mællti sva: audsætt er of landz-fólk þetta, at allir standa oss at móti; eign ver nú ij kosti fyrir höndom, þann annan, at fara herskilldi yfir landit, oc eyra eingo, hverki fe ne mönnöm; hinn er annar kostur, at fara sudr aptr vid sva búit, oe er þat nærr mino skapi, oc fara helldr med herinn í austrveg til heidinna landa, er gnóg liggia fyrir, enn drepa her nidr kristit fólk, þótt þeir hefði ærna makligleika til þess. Allir adrir voro fúsari til at heria, enn þó red konongr, at þeir fóro aptr til Danmerkr vid sva búit; var þó allvíða rænt of úteyar, oc hvarvetna þar er konongr var eigi allnærr. Fóro þeir sudr til Danmarkar oe vard eigi til tíðinda.

CAP. XXVIII.

FERD ERLÍNGS TIL JÓTLANDZ.

Erlíngur Skacki spyr þetta brátt, at kominn var
Dana-

Dana-her í Víkina, baud hann þá her út, almenn-
 íng um allt land at lidi oc skipom, oc vard þat
 it mesta herlaup, oc hellt hann her þeim austr med
 landi. Enn er hann kom til Lídandisness, spurdi
 hann at Dana-her var farinn sudr aptr til Dan-
 markar, oc þeir höfdo víða rænt í Víkinni. Þá
 gaf Erlíngur heimleyfi öllo leidángurs lidi, enn hann
 siálfr oc nockorir lendir-menn med hönom sigldo
 med mörg skip sudr eptir Dönom til Jótlandz. Enn
 er þeir komo þar sem heitir Dyrs-á, þá lágo þar
 fyrir Danir komnir or leidángri med skip mörg.
 Erlíngur lagdi at þeim, oc bardiz vid þá; Danir
 flydo brátt, oc leto mart manna, enn þeir Erlíngur
 rænto skipin oc sva kaupstadinn, oc fengo þar all-
 mikit fe, oc fóro síðan aptr til Noregs. Var þá
 um hríd ófridr á milli Noregs oc Danmarkar.

CAP. XXIX.

FERD ERLÍNGS TIL DANMERKUR.

Kristín Konongs-dóttir fór um haustit sudr til Dan-
 markar á fund Valldimars konongs frænda síns,
 þau voro systra-börn; sagnadi konongur henni for-
 kunnar vel, oc feck henni veizlor þar med ser, sva
 at hon feck vel halldit þar sína menn. Var hon
 opt á tali vid konong, oc var hann allblídr vid

hana. Enn eptir um varit sendi Kristín menn til Erlings, oc bad hann fara á fund Dana-konongs, oc sættaz vid hann. Um sumarit eptir var Erlíngur í Vikinni; hann bió þá eitt lángskip, oc skipadi enom besto drengiom, oc sigldi síðan eino skipi yfir til Jótlandz. Hann spurdi at Valldimar Dana-konongur var í Randarósi; sigldi Erlíngur þannug, oc kom til bæjarins, þann tíma er konongur sat yfir matbordom, oc flest fólk matadiz. Enn er þeir höfðu umbúiz eptir því sem Erlíngur villdi, tialldat oc fest skip sitt, geck Erlíngur upp vid xij menn, oc allir bryniadir, höfðu hötto yfir hiálmom, oc sverd undir mötlom. Þeir gengo til konongs herbergis, opin var hurd, oc fóro þar sendingar inn; gengo þeir Erlíngur þegar innar fyrir hásaetit, mællti þá Erlíngur: grid vilioni ver hafa, konongur, bædi her oc til hemferdar. Konongur leit vid hönom oc mællti: ertu þar, Erlíngur? Hann svarar: Erlíngur er her, oc seg oss skiótt, hvart ver skulom grid hafa. Þar váro inni LXXX konongs-manna, oc allir vapnlausir. Konongur mællti: grid skolo þer hafa, Erlíngur, sem þu beidir; á eingom manni nídumz ec, ef á minn fund kemr. Þá kysti Erlíngur á hönd konongi, oc geck út síðan oc til skips síns. Dvaldiz Erlíngur þar um hríd med konongi, töludo þeir um sáttar-gjörð milli sín oc landanna; oc kom þat ásamt, at Erlíngur settiz þar í gislíng med Dana-

konongi, enn Asbiörn Snara, bródir Absalons Er-
kibiskops, fór til Noregs í gífling í móti.

CAP. XXX.

TAL VALDIMARS KONONGS OC ERLÍNGS.

Þat var eitt sinn, er þeir töludo Valldimar kon-
ongr oc Erlíngr, þá mællti Erlíngr: Herra, þat
þicki mer líkligast til sættar milli landanna, at þer
fáit allt þat af Noregi, er ydr var heitit í einka-
málom varom; enn ef sva er, hvern höfðingia vili
þer þá yfirsetia þar, hvart nockorn Danskan? Neí,
segir konongr, eingi Dana-höfðingia mun fara vilia
í Noreg, oc fásk þar vid hart fólk oc óhlydit, enn
hafa her ádr ærit gott. Erlíngr mællti: ec fór fy-
rir þá sök hingat á ydarn fund, at ec villda fyrir
eingan mun missa ydarrar vinátto; sarit hafa oc
fyrrum hingat menn til Danmerkur af Noregi, Há-
kon Ivarsson oc Finn Arnason, oc geyrði Sveinn
konongr frændi ydar hvarntveggia þeirra Jarl sinn.
Eigi em ec nú minni valldz-madr í Noregi, enn
þeir voro þá, oc eigi ræd ec minna, oc gaf kon-
ongr þeim yfirsókn á Hallandi, því ríki er hann
hafdi oc átti ádr. Nú þicki mer þer herra vel me-
ga unna mer þess lens, ef ec giörumz ydar madr
handgenginn, at ec hallda af ydor þesso ríki, sva
oc Magnús konongr son minn má eigi synia mer

þessa; enn ec vil ydor vera skeytr oc skylldr til þeirrar þionosto allrar, er því nafni byriar. Slíkt taladi Erlíngr, oc mart annat þesso líkt, oc kom sva at lykdom, at Erlíngr giördiz handgenginn Valldimar konongi, enn Valldimar konongr leiddi Erlíng einn dag til sætis, oc gaf hönom Jarlsnafn, oc Víkina til lens oc yfirsókuar. Eptir þat fór Erlíngr Jarl til Noregs, oc var síðan Jarl meðan hann lifdi, oc hellz þá vel sætt við Dana-konong íafnan síðan. Erlíngr Jarl átti með fríllom sínom iv sono, einn het Hreidarr, annar Augmundr; þeir voro ser of móðr; iij Fimr, iiij Sigurdr, þeirra móðir var Asa en Liósa; þeir voro yngri. Þau Kristín Konongs-dóttir oc Erlíngr Jarl átto dóttur er Ragnhíldr het, hon var gípt Jóani Þórbergssyni af Randabergi. Kristín fór af landi brott með þeim manni er Grímr Rusli het, þau fóro úti Miklagard oc voro þar um hríd, oc átto þau saman börn neckor.

CAP. XXXI.

UPPHAF ÓLAFS.

Ólafr son Gudbrandz Skafhaugssonar, oc sonr Mariu, dóttur Eysteins konongs Magnússonar, var at fóstri með Sigurdi Agnhött á Upplöndom. Enn er Erlíngr Jarl var í Danmörko, þá hófo þeir fóstrar flokk Ólafr oc Sigurdr, oc reduz til með þeim margir

Upplendingar. Var þar Olafr til konongs tekinn. Þeir fóro með flokkinn of Upplönd oc stundum í Víkina, stundum á markir austr; eigi voro þeir á skipom. Enn er Erlíngr Jarl spurdi til flocks þessa, þá fór hann við lidi síno í Víkina, oc var á skipom um sumarit, oc um haustit í Oslo, oc veitti þar um Jólin. Hann let hallda niósnom uppi á landit til flocksins, oc fór siálfr upp á land at leita þeirra, oc með hönom Ormr Konongs-bródir. Enn er þeir komo til vatz þess er heitir Vænir í Svíaríki, þá tóko þeir skip öll þau er voro við vatnit.

CAP. XXXII.

FRÁ ERLÍNGI.

Prestr sá er saung þar sem heitir á Rydiökli, þat er við vatnit, hann baud þeim Jarli til vezlo, oc at koma þar at Kyndilmesso. Jarlinn het ferdinni, þótti þat gott at hafa þar tídir, röro þeir þángat yfir vatnit um kvelldit fyrir Kyndilmesso dag. Enn prestr sá hafði annat ráð með höndom; hann sendi menn at bera niósn þeim Olafi um farar Erlíngs Jarls. Prestr gaf þeim Erlíngi sterkann dryck um kvelldit, oc let þá allmiök drecka. Enn er Jarl fór at sofa, þá voro reckior þeirra búnar í dryckiostofunni. Enn er þeir höfdo litla ríd sofit, vaknadi Jarl, oc spurdi ef þá mundi vera óttosaungs-mál;

prestrinn sagði at lítit var af nótt, oc bad þá sofa í ró. Jarl svarar: mart dreymir mik í nótt, oc illa sef ec. Hann sofnadi síðan annat sinn, oc vaknadi litlo síðar, oc bad prest uppstanda, oc syngia tídir. Prestur bad Jarl sofa, sagði at þá var mid nótt; lagðiz Jarl þá niðr, oc svað litla ríð, lióp upp síðan, oc bad menn sína klæðaz. Þeir giörðo sva, oc tóko vapn sín, oc gengo til kirkio, oc lögðo úti vapnin, meðan prestur saung ótto-saungiinn.

CAP. XXXIII.

BARDAGI Á RYDIÖKLI.

Ólafur kom niósnin um kvellðit; þeir gengo um nóttina vírastir göto, oc þótti mönnum þat furðomikit farit. Þeir komu á Rydiökul þá er prestur saung ótto-saung; níða-myrkr var sem mest. Þeir Ólafur gengo at stofunni oc æpðu þar heróp, oc dráðu þar inni nokkora Jarls-menn, er eigi höfðu gengit til ótto-saungs. Enn er þeir Erlíngur Jarl heyrdur óp, hlióðu þeir til vapna sinna, oc stefndu síðan til skipanna ofan. Þeir Ólafur mættu þeim við garð nokkurn, varð þar bardagi; óko þeir Erlíngur undan ofan með gardinum, oc hlífði garðrinn þeim. Þeir Erlíngur höfðu líð miklu minna, fell mart af þeim, oc fiólldi varð sárt. Þat halpr þeim Erlíngi Jarli mest, at Ólafur menn kendo þá eigi.

sva var myrkt; enn Jarls-menn. leitudo einart til skipanna. Þar fell Ari Þórgeirsson, fadir Gudmundar biskups, oc mart annara hirdmanna Erlíngs. Erlíngur varð sár á vinstri síðunni, oc segia sumir menn, at hann siálfr drægi sverdit á sic, þá er hann brá. Ormr Konongs-bródir varð oc miök sár, oc naudliga komoz þeir á skipin, oc leto þegar frá landi. Þat var kallat, at þeir hefði ena mesto óhamíngio tilborit fundarins, sva sem þeir Erlíngur Jarl þóttu þó framselldir vera, ef þeir Olafur hefðu meirum ráðum framfarit. Síðan kölludo menn hann Olaf Ogæfo; enn sumir kölludo þá Hettosveina. Fóro þeir með flokk þann enn sem ádr uppi um Upplönd. Enn Erlíngur Jarl fór úti Víkina til skipa sinna, oc voro eptir um sumarit í Víkinni, enn þeir Olafur voro á Upplöndum, enn stundom austr á mörkom; höfðu þeir flokk þann sva annan vetr.

CAP. XXXIV.

BARDAGI Á STÖNGOM.

Enn annat vor eptir fóro Hettosveinar ofan í Víkina, oc tóko þar þá víða konongs-skylldir, dvölldoz þar lánga ríd um sumarit. Enn er Erlíngur Jarl spurdi þat, hellt hann lidi síno austr til mótz við þá í Víkina, oc varð fundr þeirra austan-liadar, þar sem heitir á Stöngom, oc varð þar orrosta

mikil, oc hafði Erlíngr Jarl sigr. Þar fell Sigurðr Agnhöftr, oc mart annat af Olafs mönnum, enn Olafr kom á flóttu, oc fór síðan suðr til Danmerkr, oc var um vetrinn á Jotlandi í Alaborg. Enn eftir um varit feck Olafr sótt þá, er hann leiddi til bana, oc er hann þar iardadr í Mario-kirkio, oc kalla Danir hann helgan.

CAP. XXXV.

DRÁP HARALLDZ.

Nicolás Kufúngur, son Páls Skoptasonar, het lendr madr Magnúss konongs; hann tók höndom Haralld, er sagdr var son Sigurðar konongs Haralldzsonar oc Kristínar konongs-dottur, bródir Magnúss konongs sammæddr. Nicolás flutti Haralld til Biörgynar, oc feck hann í hendur Erlíngi Jarli. Þat var háttr Erlíngs, ef óvinir hans komo fyrir hann, at hann mælti eigi eða fátt við þá, oc stilliliga þat er var, ef hann var ráðinn til at láta drepa þá, enn hina hrakdi hann sem mest í ordom, er hann villdi at lífit hefði. Erlíngur mælti fátt við Haralld, oc var mönnum grunr á, hvat Jarl mundi fyrirætla. Þá beiddo menn Magnús konong, at hann skyldi fríða fyrir Haralldi við Jarl; konongr giörði sva. Jarl svarar: slikt ráða þer vinir þínir; enn þú munt litla ríd ráða ríkino í frelsi, ef þú skalt

heilhuga ráðom einom framfara. Eptir þat let Erlíngur Jarl flytja Haralld yfir í Nordnes, oc var hann þar höggvinn.

CAP. XXXVI.

UPPHAF EYSTEINS, SONAR EYSTEINS
KONONGS, OC BIRKIBEINA.

Eysteinn er nefndr sá madr, er kalladr er son Eysteins konongs Haralldzsonar; hann var þá úngr madr, eigi med fullu alroscinn. Frá því er sagt, at hann kom fram á eino sumri austr í Svía-velldi, oc fór á fund Birgis Jarls Broso, hann átti þá Brigido, dóttur Haralldz konongs Gilla, födor-systur Eysteins; þar Eysteinn upp fyrir þau sitt erindi, oc bad þau ser fulltúngis. Birgir Jarl oc bædi þau tóko vel hanss máli, oc heto hönom síno trausti; dvaldiz hann þar um ríd. Birgir Jarl feck Eysteini nockorn lids-kost, oc góða penínga til skotsilfurs ser, oc leysti hann vel af hendi, oc heto þau bædi hönom sinni vinátto. Eysteinn fór þá norðr í Noreg, oc kom ofan í Víkina; dreif þá þegar lid til hanss, oc effdiz þar flockr sá, oc tóko þeir Eystein til konongs, oc voro þeir med flock þann í Víkinni um vetrinn. Enn fyrir því at þeim var sefátt, þá rænto þeir víða, enn lendir-menn oc bændor giördo lid at þeim, oc er þeir voro ofrlidi bornir, þá flydo þeir brott á skóga, oc lágo löngom

á eydimörkom; gengo þá klædi af þeim, sva at þeir spento næfrom um fótleggi ser, því kölludo bændor þá Birkibeina. Þeir liópo opt í bygdina, oc komo fram her oc hvar, oc redo þegar til álaupa, er eigi var fiölment fyrir. Þeir átto nockorar orrostor vid bændor, oc veitti ymsom betr. Þriár orrostor átto Birkibeinar, sva at fylkt var til, oc höfdo sigr í öllom. A Króka-skógi lagdi þeim nær óförom, kom at þeim bónda-safnadr mikill, oc fiölldi lids. Birkibeinar felldo brota fyrir þá, oc helldo sídan á mörkina. Birkibeinar voro ij vetur í Vikinni, sva at þeir komo eigi norðr í land.

CAP. XXXVII.

FRÁ BIRKIBEINOM, MAGNÚSI KONONGI,
OC ERLÍNGI SKACKA.

Magnús hafdi þá verit xii vetur konongr, er Birkibeinar hófuz. It þrídia sumar redo Birkibeinar ser til skipa, oc fóro þá fyrir land fram, oc fengo ser fiár oc lids. Þeir voro fyrst í Vikinni, enn er áleid sumarit, stefndo þeir norðr í land, oc fóro sva skyndiliga, at eingi fór niósna fyri þeim, ádr þeir komo til Þrándheims. Birkibeinar höfdo mest í floeki sínom marka-menn oc elfar-gríma, oc miök mart höfdo þeir af þelamörk, oc vel voro þeir þá vapuadir. Eysteinn konongr þeirra var madr frídr

oc fagrleitr oc lítileitr, eigi mikill madr vexti; hann var kalladr af mörgom Eysteinn Meyla. Magnús konongr oc Erlíngr Jarl sátu í Biörgyn, þá er Birkibeinar sigldu norðr um, oc urðu þeir eigi við þat varir. Erlíngr Jarl var madr ríkr oc spakr at viti, hermadr hinn mesti, ef ófridr var, landrádamadr góðr oc stjórnssamr, oc kalladr helldr grimmr oc hardráðr; enn hitt var þó mest, at hann lét óvini sína fá eina landz-vistina, þó at gríða beiðduz, oc urðu fyrir þá sök margir til álaupa í flokkana, þegar þeir hófuz í móti hönom. Erlíngr var hár madr oc hardvaxinn, nockvat barraxladr, langleitr oc skarpleitr, líóslitadr, oc giördiz hárr miök, bar hallt höfudit nockut, hugadlátr oc veglátr, hafði forneskio klæða-búnað, lánga uppluð oc langar ermar á kyrtlöm, oc á kyrtlöm valskickior, uppháa skúa. Slíkan búnað lét hann konongr hafa, meðan hann var úngr, enn þá er hann red sér siálfr, bió hann sik miök í skart. Magnús konongr var lettlátr oc leikinn, gleðimadr mikill, oc kvenna-madr mikill.

CAP. XXXVIII.

FRÁ NICOLÁSI.

Nicolás son Sigurðar Hranasonar, hann var son Skialldvarar, dóttur Bryniólfs Ulfallda, systur Halldórs Bryniólfssonar, enn sammædra við Magnús

konong Berfætta. Nicolás var hinn mesti höfðingi; hann átti bú á Háloga-landi í Aungli, þar sem heitir á Steig. Nicolás átti oc gard í Nidarósi ofan frá Jóans-kirkio, þar sem skömмо átti Þórgeir kapalín. Nicolás var opt í kaupáangi, oc hafði hann þá ráð öll fyrir bæiar-mönnom. Skialldvöro dóttur Nicoláss átti Eiríkr Arnason; hann var oc lendr-madr.

CAP. XXXIX.

FRÁ EIRÍKI OC NICOLÁSI.

Þat var Mario-messo ina sídari, er menn gengo frá ótto-saung í bynom, at Eiríkr geck til Nicolásar, oc mællti: mágr, þat segia fiskimenn nockorir, er utan ero komnir, at lángskip sigli utan eptir fird-inom, oc geta menn at vera muni Birkibeinar; oc er sá til, mágr, at blása bæiar-lidi öllo út á Eyrar med vapnom. Nicolás svarar: eigi fer ec, mágr, at fiskimanna kvittom, mun ec giöra niósn út á fiörd-inn, cun höfom þíng í dag. Geck Eiríkr heim; enn er hríngdi til hámessu, geck Nicolás til kirkio. Eiríkr kom þá til hanns oc mællti: þat hygg ec, mágr, at sönn se niósnin, ero þeir menn nú her, er kvedaz sed hafa siglíng þeirra: þicki mer þat ráð, at ver rídim or bænom, oc söfnom ockor lidi; þviat mer þickir mannfátt vera í bænom. Nicolás svarar: kvaksamr ertu nú, mágr; hlydom fyrst messo,

enn görom þá ráð vart síðan; geck þá Nicolás í kirkio. Enn er messa var súngin, geck Eiríkr til Nicolásar, oc mællti: mágr, nú ero hestar mínir búnir, vil ec brott ríða. Nicolás svarar: far þú vel þá, mágr; ver munom í dag hafa þíng á Eyr-om, oc kanna hvat lids er í bænom. Reid þá Eiríkr á brott, enn Nicolás geck í gard sinn, oc síðan til borda.

CAP. XL.

FALL NICOLÁSAR.

Enn í þann tíma er víst var sett, kom madr inn í gardinn, oc sagdi Nicolási, at þá röro Birkibeinar í ána. Þá kalladi Nicolás at hanns menn skyldo taka vapnin. Enn er þeir voro vapnadir, bad Nicolás þá gánga uppi loptit, oc var þat it ósníallasta ráð; fyrir því, ef þeir hefði varit gardinn, þá mundi bæiar-fólkit hafa komit til at hiálpa þeim: enn Birkibeinar fyllto allan gardinn med síno lidi, oc gengo síðan at loptino umhverfis. Þeir kölludo á Nicolás, oc budo hönom grid, enn hann neitadi. Síðan sóttu þeir at loptino. Þeir Nicolás höfdo til varnar boga-skot oc hand-skot, oc ofn-griót; enn Birkibeinar hiuggo húsin, oc bruto upp loptit, oc skuto sem tíðast. Nicolás hafdi raudan skiölld, oc gylltir naglar í, oc stirnd hiálms-gjörd á. Birkibeinar skuto sva at nppi stód á reyr-böndunom.

Þá mællti Nicolás: lygr skiölldrinn nú at mer. Þar fell Nicolás, oc mikill fiölldi sveitar hanns; oc var Nicolás it mesta harmadr. Birkibeinar gáfo grid öllum bæiar-mönnum.

CAP. XLI.

EYSTEINN TIL KONONGS TEKINN Í NIDARÓSI.

Sídan var Eysteinn þar til konongs tekinn, oc geck allt fólk undir hann. Hann dvaldiz um hríd í bænom, fór síðan inn í Þrándheim, kom þar mart lid til hanns. Þá kom til hanns Þórsinn Svartí af Snaus, oc hafdi sveit manna. Aundverdan vetr fóro þeir út til bæiar; þá komo til Birkibeina synir Guðrúnar af Salltnesi, Jón Kettlíng, Sigurdr oc Vilhiálmr. Þá fóro þeir upp or Nidarósi til Orkadals; þá váro skorot þar nær xx hundrut manna, Fóro þá til Upplanda, oc sva út um Þotn oc Haldaland, þá á Ríngaríki; lögdo þeir undir sík, hvar sem þeir komo.

CAP. XLII.

FALL EYSTEINS KONONGS.

Magnús konongr fór í Vík austr um haustit med sumo lidi síno, oc med hönom Ormr Konongsbrodir, enn Erlíng Jarl var eptir í Biörgyn, oc hafdi þar mikit lid, oc skyllði þar gegna Birki-

beinom, ef þeir færi it ytra. Magnús konongr fór til Túnshergs, oc settiz þar, oc þeir Ormr bádir, oc veitti konongr þar um Jólin. Magnús konongr spurdi til Birkibeina, at þeir væri uppi á Re. Síðan fór konongr upp or bænom oc Ormr med lidi síno, komo á Re. Sniorr var á mikill, oc vedr furdo kallt. Enn er þeir komo á bæinn, þá gengo þeir or túnino á veginn, oc fóro utan vid gardinn, fylkdo þar oc trádo ser gadd; þeir höfdo eigi öll xv hundrut manna. Birkibeinar voro á ödrom bænom, enn sumt lid þeirra var her oc hvar í húsom. Enn er þeir urdo varir vit her Magnúss konongs, heimtuz þeir saman, oc skuto á fylking. Enn er þeir sá lid Magnúss konongs, þá þótti þeim sem var, at þeirra lid var meira, oc redo til bardaga þegar. Enn er þeir sóttu fram veginn, þá máttu fáir senn framfara, enn þeir er úthliópo af veginom, fengo snió sva mikinn, at þeir máttu valla framkomaz, oc brast þá fylkíng þeirra, enn þeir fello er fyrstir gengo fram brautina; var þá nidrhöggvit merkit Birkibeina, enn þeir er þar voro næst opudo, enn sumir slógoz á flóttu. Magnús konongs menn fylgdo þeim, oc drápo hvern at ödrom, er þeir nádo; komo Birkibeinar þá eigi fylkingo á, oc urdo þeir þá herir fyrir vapnom, oc fell þá fiölldi af þeim, oc mart flydi. Var þá sem opt kann verda, þótt menn se fræknir oc vapndiarfir,

ef slög stór fá, oc koma á flóttu, at flestir verða illir aptrhvarfs. Tók þá at flyia megin-lidit Birki-beina, fiölldi fell, þviat menn Magnúss konongs drápo allt þat er þeir nádo oc máttu, oc var eingom manni grid gefin þeim er þeir nádo, enn flockrinn dreifdiz víds vëgar. Eysteinn konongr kom á flóttu oc lióp í húsnockot, oc bad ser grida, oc þess at bóndinn skyldi fela hann; enn bóndinn drap hann, oc fór síðan á fund Magnúsar konongs, oc fann hann á Ramnesi, var konongr inni stofo oc bakadiz vid elld, oc var þar mart manna. Síðan fóro menn til, oc flutto þannug líkit, báro inn í stofuna, oc bad konongr þá menn tilganga, oc kenna líkit. Madr einu sat í krók-pallinom, oc var þat Birkibeinn, oc hafdi eingi madr gaum gefit at hönom; enn er hann sá lík höfðingia síns oc kendi, þá lióp hann upp skiótt oc hart: hann hafdi öxi í hendi, hlióp hann innar á gólfit, oc hió til Magnúsar konongs, oc kom höggit á hálsinn vid herdarnar. Madr nockr sá at öxin reid, oc skaut hönom frá, oc vid þat snaradiz öxin ofan í herdarnar, oc vard þat mikit sár. Síðan reiddi hann upp öxina annat sinni, oc hió til Orms Konongs-bróður, hann lá í pallinom, höggit stefndi á báða fót-leggi hanss. Enn er Ormr sá at madr villdi drepa hann, bráz hann vid skiótt,

ka-

kastadi fótunom fram yfir höfud ser, oc kom höggit í pall-stockinn, oc stód öxin föst; enn vapn stódo á Birkibein sva þyekt, at valla mátti hann falla fyrir. Þeir sá þá at hann hafði dregit um gólfrit eptir ser idrin, oc er þess manns hreysti allmiök lofut. Magnúss konongs menn ráko flóttann lengi, oc drápo allt þat er þeir máttu. Þar fell Þórfinnr af Snaus, oc fiölldi annara þrænda.

CAP. XLIII.

FRÁ BIRKIBEINOM.

Flokkur þessi, er Birkibeinar voro kalladir, hafði samansafnaz med fiölmenni miklo, oc var þat fólk hart, oc menn hinir vapn-diörfusto, oc lid helldr óspakt, fóro geystir oc rasandi miök, þegar er þeir þóttuz hafa styrk fiölmennis. Þeir höfdo í flokki-
nom fátt þeirra manna, er rádagjörðar-menn væri, eda vanir landz stiörn eda laga, eda her at styra, enn þótt sumir kynni betr, þá villdi þó fiöldinn allr hafa þat eina er siálfom syndiz: þóttuz þeir oc öruggir af lids-fiöllda sínom oc hreysti. Enn þat lid er undan komz var mart sárt, oc hafði látit bædi vapp sín, oc klædi, enn allt felaust; sótti sumt austr á mörkir, enn mart á þelamörk, þat flest er þar átti kyn, enn sumt fór allt austr í Svía-velldi.

Allir fordudo ser, þvíat lítil ván þótti grida af Magnúsi konongi eða Erlíngi Jarli.

CAP. XLIV.

FRÁ MAGNÚSI KONONGI ERLÍNGSSYNI.

Magnús konongr fór síðan aptr út til Túnsbergs, oc varð hann allfrægr af sigri þessom; þvíat þat var allra manna mál áðr, at Erlíngr Jarl væri brióst oc forysta fyrir þeim fedgom. Einn eptir þat er Magnús konongr hafði fengið sigr af sva styrkom flokki oc fiölmennom, oc hafði haft minna lid, þá þótti sva öllom mönnum, sem hann mundi yfir alla gánga, oc hann mundi verða því meiri hermadr enn Erlíngr Jarl faðir hanss, sem hann var yngri.

51

